



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

### About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>







Mason  
H. 192.







...

EE



J U R I S  
P U B L I C I R O M A N I  
A R C A N A

SUB REGIBUS ATQUE IN EJUS CONVERSIONIBUS  
SUB AUGUSTO HADRIANO CONSTANTINO  
JUSTINIANO DETECTA

S I V E

DE CAUSSIS ROMANI JURIS

A U C T O R E

JOSEPHO TOSCANO

M A N D A T O R I T I O

JURISCONSULTO NEAPOLITANO.

---

T O M U S I.

---



NEAPOLI MDCCLXVII.

EX TYPOGRAPHIA SIMONIANA.

SUPERIORUM PERMISSU.







# I N D E X

## C A P I T U M .

De Caussis Romani Juris .

## L I B E R P R I M U S .

CAP.I. §.I. *De necessitate scientiæ juris naturalis ad jus civile.* pag.23.

§.II. *De necessitate scientiæ juris naturalis , in definiendis contractuum obligationibus.* pag.31.

§.III. *De lege Rhodia.* pag.36.

CAP.II. §.I. *De civili Romanorum Imperio.* pag.41.

§.II. *De forma Romanæ Reipublicæ a Romulo instituta, ejusque jure.* pag.46.

§.III. *De legibus publicis a Romulo institutis.* pag.51.

§.IV. *De jure privato a Romulo instituto.* pag.54.

§.V. *De Numa Pompilio.* pag.59.

§.VI. *De Servio Tullio, ejusque civili regimine.* pag.65.

§.VII. *De Republica Atheniensis sub Solone.* pag.71.

§.VIII. *De Republica Lacedæmoniorum sub Lycurgo.* pag.76.

CAP.III. *De aliis subsidiis ad acquirendam jurisprudentiam necessariis.* pag.80.

§.I. *De veteri Jurisconsultorum latinitate,* ibid.

§.II. *De Philosophia Stoica.* pag.89.

§.III. *De Geographia.* pag.102.

CAP.IV. *De antiquo usu Fori Romani in causis decidendis.* pag.109.

§.I. *De antiquis Romanis Magistratibus.* pag.110.

§.II. *De fictionibus, formulisque antiqui Fori Romani.* pag.118.

§.III. *De jure recepto in foro Romano ex Prudentum disputationibus.* pag.122.

CAP.ULT. *De iis, quibus opus est ad Principum Constitutiones intelligendas.* pag.126.

- §.I. *De Chronologia legum*. pag.129.  
 §.II. *De notitia Magistratuum Romanorum*. pag.134.  
 §.III. *De Religione Principis, ejusque indole*. pag.137.  
 §.IV. *De necessitate Historiæ Ecclesiasticæ*. pag.142.  
 §.ULT. *De cognitione veteris Romanorum Religionis ad juris civilis intelligentiam*. pag.147.

De Romana Jurisprudencia sub Cæsare Octaviano Augusto.

L I B E R II. pag.161.

- CAP.I. *De Romanæ Monarchiæ primordiis*. pag.171.  
 §.I. *De Rerumpublicarum conversionibus*. ibid.  
 §.II. *De Mario, & Sylla*. pag.177.  
 §.III. *De Cornelio Sylla*. pag.182.  
 §.IV. *De legibus Marii, & Syllæ*.  
 CAP.II. *De progressu Romanæ Monarchiæ*. pag.195.  
 §.I. *De Pompejo, Crasso, & Cæsare*. ivi.  
 §.II. *De legibus Pompeji*. pag.206.  
 CAP.III. ET ULT. *De Monarchia Romana*. pag.211.  
 §.UNICUS. *De Octaviano Augusto, Antonio, & Lepido*.  
 ibid.  
 CAP.I. *De Romana Republica sub Imperio Octaviani Augusti*.  
 pag.218.  
 §.I. *De rationibus, & de forma regiminis instituta ab Augusto*. ibid.  
 §.II. *De Romano Senatu*. pag.224.  
 §.III. *De Tribunatu plebis, Pontificatu Maximo, ac Proconsulari*. pag.226.  
 CAP.II. *De Constitutionibus Cæsaris Octaviani Aug.* pag.241.  
 §.UNICUS. *De Constitutionibus ad Urbis ornatum, & Conservationem*. pag.243.  
 CAP.III. *Ad legem Juliam, & Papiam, de maritandis Ordinibus*. pag.255.  
 §.I. *De legis hujus occasione, atque historia*. ibid.  
 §.II. *De maritandis Ordinibus*. pag.259.  
 §.ULT. *De senagenariis, quinquagenariis, ac de sponsalibus*. pag.265.  
 CAP.



CAP.VI. *De amotis per Augustum impementis contra nuptias.*  
pag.273.

§.I. *De legatis, & de libertate data sub conditione Cælibatus.* pag.274.

§.II. *De jure affinitatis.* pag.278.

§.III. *De absentia Reipub. causa, & indulgentia Senatus propter nuptias.* pag.281.

§.III. *De prohibito divortio Libertæ, de divortii modo, & pœna, deque parentibus cogendis, ut liberos elocent.* pag.283.

CAP.VII. *De privilegiis maritorum, & parentum in gerendis, petendisque honoribus, & in hæreditate acquirenda; deque Cælibatus pœnis.* pag.289.

§.I. *De ornamentis Consularibus.* ibid.

§.II. *De immunitate ob liberorum numerum, deque iure Quiritium ob eosdem consequendo.* pag.291.

§.III. *De libertorum operis, mulierumque tutela, quibus ob numerum liberorum solvebantur.* pag.296.

§.IV. *De decimis, & de solidi capacitate.* pag.300.

§.V. & ULT. *De pœnis Cælibatus, & orbitatis.* pag.307.

CAP.VIII. *De legibus, quibus Monarchia inolevit.* pag.309.

§.I. *De arario Principis.* ibid.

§.II. *De vigesima hæreditatum.* pag.318.

§.III. *De abrogata vicesima reliquiis in jure Justiniano.* pag.326.

CAP.IX. *Ad legem Papiam de caducis.* pag.331.

§.I. *De actione hæreditatis, & quando dies legatorum cedat.* ibid.

§.II. *De his, quæ pro non scriptis habentur, quæque sunt in causa caduci.* pag.340.

§.III. *De caducis, creptitiis, & vacantibus bonis.* pag.345.

§.IV. & ULT. *De jure accrescendi, transmittendi, & de tacitis fideicommissis.* pag.353.

CAP.X. *Ad legem Juliam Majestatis.* pag.359.

§.I. *Quibus, & adversus quos, & ob quas res iudicium Majestatis comperat.* pag.364.

§.II. *De pœna legis Juliae.* pag.376.

§.III.

- §.III. De pœna legis Julia Majestatis, en Arcadii Constitutione. pag.386.
- §.IV. Ad legem Juliam de vi publica. pag.390.
- §.V. Ad legem Juliam de adulteriis, quidque sit adulterium, & a quibus committatur. pag.397.
- §.V.ET ULT. De adulterii pœna, & quinam de eo accusare possint. pag.403.
- CAP.XI. De regiminis Provinciarum forma ab Augusto instituta, legibusque pro eisdem latis. pag.409.
- §.I. De antiquo jure Provinciarum. pag.410.
- §.II. De jurisdictione, & imperio Præsidentum, Quæstorumque in Provinciis. pag.413.
- §.III. De regimine Provinciarum imperante Octaviano Augusto instituto. pag.420.
- §.IV. Ad legem Juliam repetundarum. pag.428.
- §.IV.ET ULT. De mandatis Principum Præsidentibus Provinciarum datis. pag.339.
- CAPXII. De Magistratibus ab Augusto institutis. pag.443.
- §.I. De Magistratibus, qui Monarchiæ congruunt. lvi.
- §.II. De Præsente annonæ, Præsente vigilum, Comite riparum, & alvei Tiberis, Consulari aquarum, deque Curatore operum publicorum ab Augusto institutis. pag.449.
- §.III. De Præsente Urbis, & Præsente Prætorio. pag.457.
- §.IV. De Præsente arario, Subcensore, & Quæstore. pag.467.
- CAP.XII. De Magistratibus Provincialibus ab Augusto institutis. pag.474.
- §.I. De Præsente Augustali, deque Juridico Alexandrino. pag.475.
- §.II. De Procuratore Caesaris, deque ejusdem rationalibus. pag.479.
- §.III.ET ULT. Ad legem Juliam de ambitu, ac peculatu. pag.486.
- CAP.XII. De consilio, sive consistorio Augusti, deque novo Fori Romani usu sub eodem. pag.492.
- §.I. De origine consistorii Principis. pag.494.
- §.III. De auctoritate Prudentum, deque Principis Consiliariis. pag.496.
- §.IV.

§.IV. De Sacris Cognitionibus . pag.505.

§.V. De Constitutionibus , Rescriptis , deque beneficiis , atque dispensationibus Principum . pag.511.

§.IV.ET ULT. De Legibus Juliis Judiciorum . pag.515.

## E R R A T A .

Pag.1. lin.12. derivantur , Sic lege : deriventur . Ibid.1.16. non juvari , *leg.* juvari .  
 Pag.2. l. 31. eorum arma . . . ut , *leg.* sua arma . . . ut illa . Pag.3. lin.1. Barbarorum , *leg.* Barbari . Pag.4. l.2. speciem , *leg.* specimen . Pag.6. l.11. revivisci , *leg.* reviviscere . Ibid. lin. 30. vindicibus restauratoribus , *leg.* vindicibus ac restauratoribus . Ibid. l.18. hoc tempore tempus , *leg.* hac ætate tempus . Ibid. l.20. eos , qua maxime , *leg.* eos quam maxime . Pag.8. lin.8. me vocare , *leg.* me vocet . Ibid. lin.10. hortor , *leg.* e re censeo . Ibid. lin.27. haustam tam , *leg.* haustam . Ibid. lin.31. absolutas , *leg.* absolutiores . Pag.10. lin. 9. ei , *leg.* eis . Ibid. lin.10. statim ac , *leg.* statim . Pag.11. lin.34. Hæc autem publica potestas , *leg.* Ei autem hæc publica &c. Pag.12. lin.1. communem , *leg.* commune . Ibid. lin. 13. pugnant , *leg.* pugnant . Ibid. lin.15. depromet , *leg.* depromat . Pag.19. lin.35. sepiat , *leg.* sapiat . Ibid. compartum , *leg.* compertum . Pag.20. lin.11. fuerint , *leg.* fuerit . Pag.21. lin.3. eo , *leg.* adeo . Ibid. lin. 32. norma , *leg.* normam . Pag.26. lin.9. salubris , *leg.* salubri . Pag.28. lin. 33. præferant , *leg.* præferat . Ibid. lin. 34. id plectendum , *leg.* ea plectenda . Pag.36. lin. 25. quam fulgentissima , *leg.* quam fulgens . Ibid. lin.29. usurpatum , *leg.* usurpata . Ibid. lin. 33. cuicumque , *leg.* quemquam . Ibid. lin.35. ne cui , *leg.* ne quam . Pag.44. lin.27. Respublica adeo fuit perturbata , *leg.* Rempublicam adeo perturbavit . Ibid. lin.35. pretendebatur , *leg.* prætendebatur . Pag.45. lin.1. Graccorum , *leg.* Gracchorum . Ibid. lin.3. quæ ad sedanda , *leg.* quas ad sedandas . Ibid. lin.5. cupiditas , *leg.* cupiditas . Pag.48. lin.29. respondit , *leg.* respondet . Ibid. lin.34. eis , *leg.* sibi . Pag.49. lin.19. adeo , *leg.* ita . Pag.50. lin.10. ipse , *leg.* ipso . Pag.54. lin.8. compolitum , *leg.* compositus . Ibid. lin. officio , *leg.* officium . Pag.57. lin. 7. eum , *leg.* ipsum . Pag.60. lin.27. gerebant , *leg.* gererent . Pag.61. lin.25. jure eam , *leg.* jura . Pag.63. lin. 13. sit , *leg.* esset . Pag.64. lin. 8. consultissimum , *leg.* consultum . Ibid. lin.36. vereretur , *leg.* vererentur . Pag.68. lin.25. pernosset , *leg.* pernosceret . Pag.70. lin.22. unde , *leg.* undique . Pag.72. lin.11. finit , *leg.* finit . Pag.76. lin.28. ni , *leg.* si non . Pag.77. lin.27. permittere , *leg.* permittere . Pag.78. lin.8. profiscatur , *leg.* profisceretur . Pag.82. lin.17. quoad , *leg.* quod . Pag.88. l.32. legamus , *leg.* legimus . Pag.90. lin.31. hæc , *leg.* hac . Pag.91. lin.19. Stoicæ , *leg.* Stoica . Pag.92. lin.9. creba , *leg.* crebra . Pag.94. lin.13. respondit , *leg.* respondet . Pag.96. lin. 21. minus , *leg.* minores . Pag.97. lin.8. adhiberemus , *leg.* adhibeamus . Ibid. lin.22. non debentur , *leg.* non debetur . Pag.100. lin.27. Theodosi , *leg.* Theodosiano . Pag.101. lin.32. Papinianas , *leg.* Sabinianas . Ibid. lin. Proculianas , *leg.* Proculianas . Pag.102. lin.22. ad hoc , *leg.* ad hanc . Pag.104. lin.5. profiscantur , *leg.* profiscatur . Ibid. lin.26. uberius , *leg.* uberiores . Pag.106. lin.25. fregisse , *leg.* fractam esse . Ibid. lin.30. Urbem , *leg.* ad Urbem . Pag.107. lin. 30. Pancirol , *leg.* apud Pancirol . Pag.110. lin. 27. in res sacras , publicas & privatas , *leg.* in rebus sacris publicis , & privatis . Ibid. lin.40. coerebat , *leg.* cohærebat . Pag.111. lin.24. nec ne , *leg.* vel contra . Pag.122. lin.2. hæc consuetudo , *leg.* hanc consuetudinem . Pag.116. lin. 4. iusticia , *leg.* imperitia . Pag.118. lin.6. ignoraverat , *leg.* ignorabat . Pag.120. lin.



lin.10. non effct, *leg.* non sit. Pag.121.lin.2. prætergressus sit, *leg.* prætergressus esset. Pag.122.lin.27. quod anne ita se habeat res, *leg.* quod an ita se habeat. Pag.124.lin.21. rem ita absolvit, *leg.* rem absolvit. Pag.125.lin.5. convenisset, *leg.* esset conventa. Pag.126.lin.20. negligant & abhorreant, *leg.* negligunt & abhorrent. Pag.127.lin.20. atque hoc, *leg.* atque hæ. Ibid.lin.31. hujusmodi rescripta vim legis generalis habere, *leg.* ut hujusmodi rescripta vim legis universalis haberent. Pag.129.lin.2. agendum, *leg.* videndum. Ibid.lin.12. ipsius, *leg.* ipsis. Ibid.lin.25. Anciræ, *leg.* Ancyra. Pag.131.lin.11. dejecti, *leg.* dejectæ. Ibid.lin.20. quum Magistratibus, *leg.* cum Magistratibus. Ibid.lin.21. ut & iis, *leg.* ut & ii. Ibid.lin.25. idemque sit, *leg.* idemque esset. Ibid.lin.29. inaccessa, *leg.* inaccessa. Pag.132.lin.24. derogatam, *leg.* abrogatam. Pag.133.lin.19. posset, *leg.* possit. Pag.135.lin.21. per se, *leg.* per eum. Pag.136.lin.17. hæc, *leg.* hæ. Ibid.lin.21. possint, *leg.* possent. Pag.137.lin.30. confixit, *leg.* confinxit. Pag.139.lin.11. efferebant, *leg.* efferebant. Pag.140.lin.4. pro suo, *leg.* pro ejus. Ibid.lin.16. qui sibi, *leg.* qui ei. Pag.141.lin.8. hæc, *leg.* ex. Pag.144.lin.22. denique & illud, *leg.* denuo. Pag.145.l.20. in Codice, *leg.* in Codicem. Pag.151.lin.21. peragendo, *leg.* peragendis. Pag.252.lin.22. tantum, *leg.* tantam. Ibid.lin.35. Fastus, *leg.* Festus. Pag.170.lin.21. causas, *leg.* caussa. Pag.172.lin.35. forte, *leg.* forte. Pag.195.lin.4. imaginem, *leg.* imagine. Pag.196.lin.24. admissus, *leg.* admissus. Pag.230.lin.32. appellarent, *leg.* appellarent. Pag.273.lin.1. dele quæ. Pag.280.lin.14. vitricum, *leg.* vitricum. Pag.283.lin.17. Senatus, *leg.* Senatium. Pag.286.lin.13. eandem, *leg.* eadem. Pag.300.lin.12. ordines, *leg.* ordinum. Pag.336.lin.31. ad filium reponendum, *leg.* ad fiscum repellendum. Pag.395.lin.35. ne, *leg.* nec. Pag.72.6.4. lib.1. qua sane responsione ex Stoicorum doctrina, *leg.* ex doctrina, quæ postea fuit Stoicorum.

*Adm. Rev. U. J. D. D. Carolus Gagliardi in hac Regia  
Studiorum, Universitate Professor, revideat & in scriptis re-  
ferat. Datum Neapoli die 10. Septembris 1765.*

NICOLAUS DE ROSA EPISC. PUTEOL. CAP. MAJ.

S. R. M.

**O**pus inscriptum de causis Romani Juris, ut M. V. jussa  
facere, attente jam legi, in quo undique splendet  
elegantia sermonis, rerum ubertas & ordo, & multigena eru-  
ditio. Cumque in eo nil offenderim regiis juribus, nostrisque  
moribus, ac legibus adversum, typis illud mandari posse cen-  
seo. Neapoli die 26. Novembris 1766.

M. V.

*Humillimus Subditus  
Carolus Gagliardus.*

*Die 9. Mensis Januarii 1767. Neapoli.*

*Viso Rescripto suae Regalis Majestatis sub die 27. Men-  
sis Decembris proximi elapsi anni, ac relatione Rev. U. J. D. D.  
Caroli Gagliardi de Commissione Rev. Regii Cappellani Majo-  
ris ordine praefatae Realis Majestatis*

*Regalis Camera Sancta Clara providet, decernit, atque  
mandat, quod imprimatur cum inserta forma praesentis suppli-  
cis libelli, ac approbationis dicti Rev. Revisoris; verum in pu-  
blicatione servetur Regia Pragmatica, Hoc suum.*

GAETA.

PERRELLI.

*Ill. Marchio Citus Praeses S. R. C. tempore subscriptionis  
impeditus, & ceteri Ill. Aularum Praefecti non interfuerunt.*

*Reg. f. 127.  
Garulli.*

*Athanasius.*

*Adm.*

*Adm. Rev. Dominus D. Jacobus Martorellius Regius Linguae Graecae Professor revideat, & in scriptis referat. Datum die 9. Novembris 1763.*

PH. EPISC. ALLIPHANUS VIC. GEN.

JOSEPH SPARANUS CAN. DEP.

**PRINCEPS EMINENTISSIME.**

**I**N juris Romani sapientia inspicienda, quicunque aliquid videt, quod aliorum latuit sollertiam, nam is omnium bonorum merebitur suffragia. Josephus Tuscanus Mandatoritius Urbis Rossani Patritius, ac Neapolitanus Jureconsultus, cujus tum mores ad summam honestatem compositos, tum legum penitiorum scientiam semper suspexi, quo prægrande ingenii, ac studiorum præ se specimen ferret, primo hoc volumine, *de Causis Romani juris* inscripto (negotium sane ardui, ac dignissimi argumenti) spondet futurum, ut præstet legum γενικὴν θεωρίαν, atque historiam, tradatque sapientiæ veteris absolutam numeris omnibus disciplinam, causis, quæ etiam hodie inter gentes incidunt, decidendis aptissimam, atque ingressus totius antiquitatis iter, contemplatusque non unum Rei Romanæ statum, ipsa præterea principia rimatus, inde diligentissime derivet legum momenta, ac rationes, interdum etiam ignota antehac interpretamenta interferat. Quantum in his excelluerit præclarissimus auctor, cernet qui in rem præsentem venerit, parumque dubii est, quin certus abierit ipsum omne tulisse punctum. Cum autem opus legum studiosis maxime profuturum sit, rogandus es, Princeps Eminentissime, ut promptam facias illud typis edendi potestatem. Neapoli Idibus Sept. 1766.

Dignitatis suæ Eminentissimæ

*Cultor Observantissimus*  
Jacobus Martorellius.

*Attenta relatione Domini Revisoris, imprimatur. Datum Neapoli die 29. mensis Martii 1767.*

PH. EPISC. ALLIPHANUS VIC. GEN.

JOSEPH SPARANUS CAN. DEP.

IN-



VIRO AMPLISSIMO  
MARCHIONI  
STEPHANO PATRICIO

A SANCTIORIBUS REGALIS CAMERÆ S. CLARÆ

ET TRANSFRETANÆ SICILLÆ

FERDINANDO IV. CONSILIIS.



Consuetudo jam usque a vetustis ducta temporibus fuit Opera omnia, sive apta elaborata manu, sive docto ingenio profecta, Viris eximiiis devovendi, ut ii & auctoritate, qua pollent, ea probarent, & patrocinio adversus invida laudis alienæ ausa tuerentur. Egregie quidem & præclare factum! Verum genus hoc dedicationes, si finem quem intendunt assequi velint,

a

uti

uti temporibus respondere debent, sic eorum propriæ esse, quibus Opus sistitur. Philosophus olim quidam Antiocho, qui inter arma furebat, perelegantem de Justitia libellum obtulit: *At quid mea*, inquit is, *Themidis commentariolum, dum strident ex catapultis molares, & ariete mania subruo?* & Pompejus ei, qui meminerat Leges, dum sago indutus manum scuto inferuerat, respondit: *Armatus ut Leges cogitem?* Frustra igitur id illis erit, qui in Operibus nuncupandis importune se gerunt.

Sed si sæpe alias, in iis maxime, quæ ingenio perficiuntur, alia aliorum sunt studia. Quidam in hoc toti sunt, ut per doctas Lucubrationes suas in lucem ipsi prodeant, atque ad honores attollantur: alii locupletissimos quosque avide quæritant, a quibus per Opellas sibi dicatas opes divitiasque expectent. Jam vero, his ita se habentibus, ecquæ æqua Operis comparatio erit cum eo cui nuncupatur? bene consilio auctoris consultum erit, nequaquam vero Libelli dignitati.

Sunt vero alii, pauci quamvis numero, quibus Deus hanc mentem dedit, ut per improbum laborem, salutisque, si Superis placet, dispendium, illis insudent, quæ hominum vitæ vel morali, vel civili proficiant; neque aliam ob causam ingeniosos fetus in publicam lucem emittant, quam ut mortalium generi profint. Hi profecto Mæcenatem, cui se dedunt, cum delectu dignitatis inquirunt: eum enim sibi optant, qui gnarus rerum quæ aguntur, atque æque sapienterque de laboribus suis dijudicaturus, aut lucem ad meliora, quæ forte effugerint, impertiat, aut

ca

ea quæ chartis illeverint, si probaverit, a dente Theonino vindicet, novaque ad scribenda sollicitet. Horum hercle pobandæ sunt dedicationes, quippe quæ ex studiorum convenientia proficiuntur, & non fucata benevolentia; quodque de Patrono suo prædicatur, nihil sane est, quod assentatorum technas oleat, quum omnia ex sincero pectore prodeant, ejusque dignitati congruant.

Sed ad Operis mei occasionem, atque ejusdem dedicationis consilium devenio. Adolefcens ego ex Calabria finibus in hanc Urbem Regni principem, scientiisque florentissimam profectus, Præceptoribus lectissimis Juris & Civilis, & Canonici operam auditor dedi. Vix autem a legum theorefi discefferam, quum ad earum usum, rebus domesticis ad forum vocantibus, descendi, nequaquam tamen penitiori Jurisprudentiæ Justinianæ interpretationi nuncio remisso. Inter hæc forenses exercitationes vidi quidem, sæpenumero in definiendis controversiis ad leges provocari, quæ nimirum ad alias Reipublicæ formas, atque inter alios populorum mores latæ, vix aut ne vix quidem causarum nostræ gentis nostrorumque temporum decisionibus aptari apposite poterant. Quapropter diu mente rem perpendens, statui tandem, præclare actum iri, si præter propriam verborum notionem, quibus Icti Romani ad consulentibus respondendum usi sunt, historiæ luce, temporum varietate, diversarum Reipublicæ formarum, ad quas conditæ leges sunt, intelligentia, sectarum Ictorum sibi adversantium cognitione, interior legum mens introspeceretur, eas ad pura putanda principia,

verasque ad causas rationesque revocando. Sed hoc opus, hic labor. Perfectam vocabulorum significationem ex casca priscorum Jurisprudencia, philosophiam Istorum disparem, multiplicem Romani Imperii formam; religionem, moresque populi varios, cum quibus leges aliæ alio tempore congruebant, quæ sane omnia ex nitidis fontibus, hoc est, æqualibus scriptoribus haurienda sunt, quis vel sollertissimæ mentis homo non desperet?

Verumtamen, curta licet ingenio meo, quod non diffiteor, supellex sit, factus audax hanc arcem expugnare adnixus sum. Interdiu ac noctu duros exantlavi labores, ut hac via, quam monstravi, quamvis salebris aspera, in Civile Canonicumque Jus penetrarem. Affecta me valetudo non revocavit, nec pulveris forensis sollicitudines interceperunt. At vero quorsum pertinax hic labor? Quæ mei mens animi fuerit, testari ii poterunt, quibus mecum consuetudo fuit, vitamque meam civilem norunt. Hi quidem profitebuntur, id mihi consilii fuisse, ut justum in legibus pernoctarem, doctusque fierem in scientia tam præclara gloriosaque, utque publicæ utilitati, quæ semper cordi fuit, consulerem.

Sed manu ad tabulam accedente, fateor me primum deterritum vehementer: unde inciperem, qui cursus esset, quive exitus futurus, diu hæsi. Ut enim ante oculos legum corpus a Triboniano quaquæ collectum, atque in Pandectis compilatum statui, in illis adverti immensam simulque indigestam Responsorum molem, quæ veteres Jurisperiti, alii in alia Reipublicæ forma, ac diversas philosophorum



rum sectas sequentes, a se invicem diffidentia dederant. Adverti haud integra ea relata, sed frustra tantum eorum esse ac fragmenta, nec sedibus in suis collocata. Mecum ipse reputabam, desperandum prorsus omnem conatum. Qui fiat, ut leges has sic vage disiectas ad locos suos adducere, suaeque ad principia referrem, earum lacunas explerem, Reipublicae formas omnes, in quibus Icti quotquot sunt vixerint, varia Principum ingenia, sub quibus scripserint, dignoscerem, sua cuiusque philosophiae dogmata calleam?

Nec minor mihi perlegenti Codicem, ubi prostant sacratissimae Imperatorum, & Paganorum & Christianorum, Constitutiones, difficultas parata est. Hae maximam partem Rescripta sunt ad Magistratus Principum oracula in dubiis controversiis consulentes, Rescripta nimirum sine libellis, a quibus lumen accipiant. Saepe desiderantur Consules, unde facilis esset ad rerum Imperii, morumque populi historiam accessus. Plerumque mutilae sunt ac decurtatae, & non raro infida manu interpolatae aliamque in faciem versa. Num igitur interiores Divalium Constitutionum rationes causasque inter has tenebras perspectas habebimus, nulla face praelucente, quae in tanta rerum obscuritate eo quo properandum ducat? Num si dilaniata ac fucata Placita ad ingenium Imperantium ac regimen referri recte poterunt?

His de causis consternatus stilum e manu deieci, tabulasque quas paraveram, diffusus ingenio meo, diffregi, quum, immane quantum me nitente, saxum voluturum pro certo haberem. Sed haud diu  
post

post, intimo nescio quo sensu in pristinum consilium, a quo fastidiosus me abalienaveram, revocante, ad rem veluti tentabundus reverti; viamque illam, quam mente conceperam, tenens, nonnulla ante omnia in quædam Juris Publici Romanorum capita commentariola inchoare conatus sum. Quumque hæc in academico eruditorum coetu apud Illustrem Marchionem Josephum Antonium Castagnolam, Regalis Cameræ Quinquevirum, cujus nomen clarissimum semper posteris erit, recitare ausus fuerim, fata longe alia, quam quæ mihi ominabar, expertus sum; a cuncto enim confessu maximo plausu fuerunt comprobata. Quod quidem extulit me dejectum, fractosque ita restituit spiritus, ut Opus tandem perpetuum, quod mihi ante proposueram, a carcere ad calcem confidenter decurrerem.

Itaque, quale quale hoc sit, V. in Libros dispendendum censui, quorum I. præter subsidia generalia, quibus reconditior legum intelligentia comparatur, priscam sub Regibus Romanis Jurisprudentiam complectitur. Quoniam vero post hos ad Augustanam usque Monarchiam una prope fuit Reipublicæ forma, quamquam pro Patriciorum, aut Plebis potentia, modo Aristocratica, modo Democratica; missis proinde Reipublicæ legibus, ad illas Libro II. festinavi, quæ ab Augusto Imperatore, Reipublicæ per speciem constituendæ, seu populo priscam libertatem restituendi, latæ sunt. In III. agitur de Jurisprudentia Hadrianea, per quam, conditis ex sola Principis voluntate per æquitatis ostentationem legibus, & curante Juliano Icto Edictum  
per.

perpetuum, Monarchia firmata: IV. Jurisprudentiam Constantinianam in medium profert, quam ex philosophiæ Christianæ dogmatibus, oblangente in diem illa Paganorum, quæ legum Romanarum norma ante fuerat, interpretatus sum. In V. demum de Jurisprudentia Justinianeâ differitur herili Monarchiæ omnino conveniente, ad quam Tribonianus ingenioso artificio miroque studio antiquam illam accommodavit: atque ubi ad Justiniani Novellas perveni, non modo necessitatem novas pro tempore leges condendi, atque oblitteratas hominum vitio ad pristinum revocandi confirmavi; sed etiam id maxime conatus sum, ut, quum inibi Jurisprudentia Sacra potissimum agatur, eam Conciliorum canonibus, rebusque tunc temporis Ecclesiæ, tota quanta est, in nixam esse ostenderem. In quo sane mihi placeo, quum ante me hanc Jurisprudentiæ partem ad unguem exposuisse viderim neminem. Porro prætereundum non est, me in quinque hisce Libris sic gessisse, ut integra æqualium scriptorum loca afferrem, quum satis mihi numquam fuerit Auctorum fidem obtestari, nisi eorum testimonia fidelibus subjicerentur oculis; quod sicuti Lectoribus voluptati erit, ita mihi operoso fuit negotio.

Atque hæc totius Operis summa, quod post maximos labores, pluresque annos ex domesticis laboribus tandem vidit solem. Superest modo, ut videamus, Tibine, sapientissime Vir, præ ceteris Lucubrationes has, quanticumque æstimaveris, stiturus fuerim, & num æqua earum comparatio sit ad Mæcenatem, cui nuncupatur.

In

In trinam quidem Jurisprudentia Romanā faciem distinguere commode potest, antiquam sub Xuiris, mediam sub Prætoribus, postremam imperantibus Principibus. In vetusta illa omnia horrida erant, probabilique ratione carentia. Jus omne versabatur in superstitiosis quibusdam ritibus formulisque, in quibus adeo defixi veteres hærebant, ut, vel vocula neglecta, causa caderetur, contractusque omnis evanesceret. Quid? adeo presse & anguste definiebatur verborum notio, ut nisi secundum eam acciperentur, resque ex vi vocabuli expediretur, omnia frustra fierent. Quod quidem voluit Cicero, quum ait: *In omni Jure Civili, relicta æquitate, verba tantum retinuisse*; atque Attico respondens, qui ut in leges scriberet rogaverat: *Quo me, inquit, vocas? aut quid hortaris, ut libellos consciam de stillicidiorum, ac de parietum jure, aut stipulationum, & judiciorum formulis componam?*

In I. ego Libro hujus Opellæ de tristi hac severaque Juris Romani specie sermonem institui, non quod superstitiosæ hujus Jurisprudentiæ scientia judiciis exercendis usui censeatur, sed quia sine ingeniæ verborum carminumque illorum significationis cognitione abstrusa Ictorum Responsa, quæ illam respiciunt, penitus intelligi nequeunt. His accedit, per eam nobis artem arcanam ostendi, qua populus gubernabatur sub ea forma, quæ semel a Romulo fuerat instituta. Etenim tale primævum illud Romanæ Reipublicæ Jus statutum erat, quale plebem effrenem sub Patriciorum dominatione callide cauteque contineret. Quapropter Tullius pulchre satis

de Ictis ait, *eos magna professos in parvis esse versatos. Quid enim est tam exiguum, quam est munus hoc eorum, qui consuluntur, quamquam est populo necessarium?*

Jam vero, ut ad Te me vertam, Pater amplissime, Te ante omnes partem hanc tenebricosæ illius Jurisprudentiæ penitus intellexisse, satis superque ostendunt tot forenses orationes, quibus maximus ab omnibus plausus, quum inter primores a subselliis versabaris, excitabatur. Tu enim & quæ fuerit antiquæ Reipublicæ Romanæ forma, quæ ratio eam gerendi, quoque artificio Patricii ad insolentem cohibendam plebem usi fuerint, in dicendo pro re nata gravissime docebas; & casca atque ancipitia veterum Ictorum vocabula ad intelligentiam suam revocans, causasque non sine interiori eruditione orans, ex solidis non autem inficetis principiis normam juste recteque judicandi præmonstrabas.

Itaque diversa Rerump. genera, & pro earum varietate varia legum dictata ob mentis oculos ponens, ex probe intellectis antiquorum institutis ea ad fori negotia hauriebas, quæ usui gentis nostræ, ejusque regimini paria videbantur, jejunas vero subtilitates, ac superstiosas nugas ad plebem frena mordentem inventas, quamvis tunc temporis opportunas, sapienter susque deque habebas. Nimirum tale ingenium Tuum, ut ex religiosis illis ac futilibus formulis, ex intento vocabulorum veteris Jurisprudentiæ studio, tamquam aurum ex luto, solidiora quæque decerperes, omniaque ad publicæ utilitatis sensum referres: siquidem compertum Tibi, non propter le-

ges homines esse, sed propter homines conditas leges. Quapropter de Te dicam, quod de C. Aquilio Gallo Tullius: *Hominem prudentissimum, acutum, & exercitatum, ex eo quod ejus prudentiam populus Romanus in cavendo, non in decipiendo perspexisset, isque Juris Civilis rationem numquam ab æquitate sejunxisset.* Eccui igitur prima hæc meorum laborum pars aptius statuenda, quam Tibi, qui de antiquæ Romæ legibus tam præstantissime mereris?

Sed quum Patriciorum tyrannidem, quam in speciem juris dandi, justitiamque tuendi exercebant, jam plebes persentisceret, furore ad potentiam eorum minuendam exarsit. Quare videntes illi perstare amplius non posse artificiosam hanc carminibusque implexam Jurisprudentiam, quum palam factum esset ejus arcanum, agitare cœperunt consilium Jus novum ad aliam Reipublicæ formam, quæ in dies, furente plebe per ejus Tribunos recens creatos, exsurgere videbatur, aptum condendi. Porro id aperte facere, perinde erat ac profiteri se victos, ac vehementiores plebi, quæ numquam contenta novis semper rebus studet, donec ad dominationem assurgat, stimulos admovere. Itaque ad alias leges, sed fucatas quodammodo, versum est, novo creato Magistratu, qui occulta politia legum lationem tamquam in insidiis absconderet. Quumque efferatus Romanorum mos civili familiaritate, & elegantiorum gentium consuetudine mansuescere cœpisset, leniri & eæ aliquantulum videbantur. Quapropter per æquitatis ostentationem, qua antiquæ leges horridæ satis ac severæ expoliebantur, ortum est

est novum prorsus Jus ; quod cum populo ferocia exsuto consentiret .

Quum autem religiosum esset leges antiquas mutare , quas æternas atque immutabiles putabant ; id propterea Magistratus hic sibi statuit , ut cuncta latenter , ac veluti per cuniculos ageret . Quamquam igitur omnium primum in leges jurabat , sensim tamen actiones exceptionesque privatim dare aggressus est , quod unum satis erat ad leges eludendas , quæ quidem frustra sunt , quoties eas exsequi Magistratus haud curat . Ad hæc , actionibus aut exceptionibus priscae Jurisprudentiæ callida cunctatione superfedendo , novas ipse dabat sub variis coloribus , per nova nempe vocabula , verbaque antea inaudita , perque varias fictiones ; & quando nihil aliud , in integrum restituebat , ut Jure Prætorio non teneretur , qui nexu civili erat obligatus . Atque ex istiusmodi hujus Edictis , ortum est Jus Prætorium æquitate profecto innixum , novam pariens Jurisprudentiam , cui , Jure antiquo pedetentim deficiente , ac tandem in cinere prope jacente , Icti , veluti porrecta sibi invicem dextra , universi strenuam navarunt operam : quæ propemodum sunt Responsa Prudentum , quæ in Pandectarum volumen congesta legimus . Videamus modo , qui justior Judex in hac altera Jurisprudentia optandus mihi fuerit .

Quando Prætorium Jus ex naturali sapientia proficiscitur , quantum Tu in hac divina scientia polleas , non populares tantum Tui , qui propius Te intuentur , sed & exteri omnes , qui ubique gentium norunt , maxime mirantur . Etenim cordi semper

b 2

Tibi

Tibi fuit illud Ciceronis monitum ; ex intima hominis natura Juris disciplinam hauriendam, ejusque exordium ab illa summa lege, quæ sæculis omnibus ante nata est, quam civitas ulla constituta, repetendum. Ab adolescentia nosti, veram justitiam esse, quæ ex naturali jure, sive rectæ rationis lumine, res hominum administrat, illudque omnis justitiæ fontem esse & principium, idemque in civili societate locum habere, temperatum aliquantulum, atque ad Reip. commoda relatum; siquidem, ut ait Ulpianus *l. 6. pr. De just. & jur. quum aliquid addimus, vel detrahimus juri communi, Jus Civile efficitur*. Compertum Tibi erat, hujusmodi detractio- nes, atque additiones Juris Civilis, respondere opus esse Reipublicæ formæ, populi moribus, temporum- que vicibus; atque hinc novas leges ferri, veteres abrogari, aliis obrogari, ab aliis derogari, si quan- do regimen mutetur, aliique mores obrepant.

Solidis his institutionibus mente Tua conforma- ta, sic studiorum ratione inita, quid mirum, si & Judex in Magna Curia sedens, & mox potissimum inter Sacri Consilii Patres cooptatus, in gravium ac perplexarum causarum disceptationibus sanctitatem ju- dicialium non sine omnium ordinum commendatione sustinebas? Tu enim, aliis alia sentientibus, ad le- ges confugiebas, quæ naturali æquitati aptabantur, quæ humanitatis sensui accedebant, quæ publico bo- no suffragabantur. Unde autem hoc, nisi quod ju- stum & æquum ex fontibus suis hauseras, leges ex utilitate communi interpretaberis, penitiores earum latebras subiveras, ad gentis mores referebas, le- gum.



gumque latores salutem civitatis ac commoda ; præterea nihil , sibi proposuisse fat noveras ? Sic sane assuetus , in causis impeditissimis jus dicens , tanta sapientia ac gravitate sententias ferebas , ut ad posterorum exemplum , ac veluti ad certa præjudicia , plura Decisionum Tuarum volumina congesta in pluteis Tuis admiremur ; quæ si lucem viderint , quod in optato omnibus est , haud hercle minorem Fabrianis laudem assecuturas meo periculo spondeo .

Quum igitur omnia semper , quæ ex æquo & bono prodeunt , animo Tuo maxime grata fuerint , & Jus Prætorium ego fuscè pro ingenii viribus exposuerim , nonne id Tibi prætoriam mente sic prædico dicendum ? Num justior vigiliarum mearum Cenfor expectandus fuerat , qui Edictorum interpretationes , qualescumque chartis illevis , vel probaturus sit si forte fortuna dignæ videantur , vel si qua peccaverim , quod vehementer vereor , virgula sua notet , ac meliora humaniter doceat ?

Sed ad postremam tandem Principum Jurisprudentiam descendi ; quæ quum varia pro varia Imperii fortuna fuerit , sic eam dispescendam censui , ut de Augustana primum , deinde de Hadrianea , deinde de Constantiniana , deinde de Justiniana differerem . Et vero in illa Augustana in hoc totus fui , ut miram artem , ingenique follertiam , quæ Imperatori , assidente C. Clinio Mæcenate , non deerat , admirarer . Etenim per blandam Reipublicæ constituendæ simulationem ita se gessit , ut leges ejus oculis civium libertatem præferrent , intus vero per eas sibi caneret , ac Monarchiam foveret . In altera autem ,  
quan-

quando, detecta facie, ante omnium ora sine fucō volitavit Principatus, id arcanum fuit, ut e re sua ducerent cives in Monarchia manere, neque libertatem primævam amplius rerum novarum cupidi anhelarent. Quoniam vero Jurisprudentia Romana in philosophia Pagana tota nitebatur, Constantino placuit, ut Jus Civile, cognito Christo, veraque religione probata, a Christianorum moribus Evangelio inserviens non dissideret. Quumque sanctissima quæque, labentibus annis, elanguescant, suoque gradu decendant, furentibus post Constantinum hæresibus civilibusque discordiis, concidit disciplina quum Civilis, tum Ecclesiastica: quare coactus Justinianus, herili Monarchia constituta, novas quamplures edere Constitutiones fuit, quibus Christianam religionem a dissidentium hominum impetu vexatam tutaretur, judiciis integritas restitueretur, foro calumniæ averterentur, atque Ecclesiastica maxime disciplina ad pristinum rediret.

Itaque, ut ad Imperii orsa redeam, quod Syllæ, quod Pompejo, quod Cæsari, quod Antonio, aliisque, non bene, aut pessime potius celsit, Augusto satis ex sententia, ac felicissime processit, qui Imperium sub Principis nomine capeffens, cuncta insperata pace, & prospere gubernavit. Quo autem artificio, quove studio, quibusque præidiis fultus tantam dignitatem tuto, atque a periculis procul, tamdiu sustinuerit, ut expiscarer, herculeos, equidem fateor, exantlavi labores. Tum enim cuncta discordiis civilibus fessa advertere debui, tum maxime ex memoriæ illius scriptoribus Imperatoris ingenium

nium, consilia, religionem; artesque omnes rimari opus fuit. An autem fors mihi sereno riserit vultu, atque ex causis suis bene de Augusti legibus meritis sim, Tu unus, maximi nominis Vir, cognoscere potes. Si enim semper Tibi præ manibus M. Tullii, Suetonii Tranquilli, Cornelii Taciti, Dionis Cassii, omnium politicorum, & veterum & recentiorum, libri fuerunt, meritissimo Tuum tamquam in jus Librum II. Operis mei producendum duxi, quum Tu judicare æquo Jove possis, an, ut par erat, Augustana perfunctus sim Jurisprudentia.

Porro autem furti manifesti reus peragerer, si Tibi exhibitorio edicto utenti, aut jure vindicanti, Libri III. filioli tamquam Tui præsentiam non præstitissem, aut justa restitutione Parenti suo non exhiberem. Etenim Augustana Jurisprudentia exsolutus, saltatoria veluti excursione confestim, omisso Hadriano, ad illam Constantini, & Justiniani evolare mihi statueram: siquidem negotiosa nimis mihi provincia videbatur, si Hadrianei Juris interpretationem, & causas scrutari aggressus essem. Qui sane fieri posset, ut ex historiae penu, ut meus est mos, intimam Imperatoris hujus in imperando mentem, firmata jam Monarchia, atque reconditiores ejus Constitutionum recessus penetrarem, quando vix unus Spartianus res Hadriani gestas enarrat, suasque Constitutiones, misso die & Consule, per saturam veluti meminit? Ceterum in Justiniano Codice unam tantum Hadriani sanctionem legimus, eamque nullo die adscripto, unde illius occasionem decerpere liceat. Quamplures, fateor, in Digestis sparsas habemus, sed detruncatas, ex-

fas,

quando, detecta facie, ante omnium ora sine fucō volitavit Principatus, id arcanum fuit, ut e re sua ducerent cives in Monarchia manere, neque libertatem primævam amplius rerum novarum cupidi anhelarent. Quoniam vero Jurisprudentia Romana in philosophia Pagana tota nitebatur, Constantino placuit, ut Jus Civile, cognito Christo, veraque religione probata, a Christianorum moribus Evangelio inferviens non dissideret. Quumque sanctissima quæque, labentibus annis, elanguescant, suoque gradu decidant, furentibus post Constantinum hæresibus civilibusque discordiis, concidit disciplina quum Civilis, tum Ecclesiastica: quare coactus Justinianus, herili Monarchia constituta, novas quamplures edere Constitutiones fuit, quibus Christianam religionem a dissidentium hominum impetu vexatam tutaretur, judiciis integritas restitueretur, foro calumniæ averterentur, atque Ecclesiastica maxime disciplina ad pristinum rediret.

Itaque, ut ad Imperii orsa redeam, quod Syllæ, quod Pompejo, quod Cæsari, quod Antonio, aliisque, non bene, aut pessime potius cecidit, Augusto satis ex sententia, ac felicissime processit, qui Imperium sub Principis nomine capeffens, cuncta insperata pace, & prospere gubernavit. Quo autem artificio, quove studio, quibusque præsidis fultus tantam dignitatem tuto, atque a periculis procul, tamdiu sustinuerit, ut expiscarer, herculeos, equidem fateor, exantlavi labores. Tum enim cuncta discordiis civilibus fessa advertere debui, tum maxime ex memoriæ illius scriptoribus Imperatoris ingenium

nium, consilia, religionem; artesque omnes rimari opus fuit. An autem fors mihi sereno riserit vultu, atque ex causis suis bene de Augusti legibus meritus sim, Tu unus, maximi nominis Vir, cognoscere potes. Si enim semper Tibi præ manibus M. Tullii, Suetonii Tranquilli, Cornelii Taciti, Dionis Cassii, omnium politicorum, & veterum & recentiorum, libri fuerunt, meritissimo Tuum tamquam in jus Librum II. Operis mei producendum duxi, quum Tu judicare æquo Jove possis, an, ut par erat, Augustana perfunctus sim Jurisprudencia.

Porro autem furti manifesti reus peragerer, si Tibi exhibitorio edicto utenti, aut jure vindicanti, Libri III. filioli tamquam Tui præsentiam non præstitissem, aut justa restitutione Parenti suo non exhiberem. Etenim Augustana Jurisprudencia exsolutus, saltatoria veluti excursionem confestim, omissis Hadriano, ad illam Constantini, & Justiniani evolare mihi statueram: siquidem negotiosa nimis mihi provincia videbatur, si Hadrianei Juris interpretationem, & causas scrutari aggressus essem. Qui sane fieri posset, ut ex historiae penu, ut meus est mos, intimam Imperatoris hujus in imperando mentem, firmata jam Monarchia, atque reconditiores ejus Constitutionum recessus penetrarem, quando vix unus Spartianus res Hadriani gestas enarrat, suasque Constitutiones, misso die & Consule, per saturam veluti meminit? Ceterum in Justiniano Codice unam tantum Hadriani sanctionem legimus, eamque nullo die adscripto, unde illius occasionem decerpere liceat. Quamplures, fateor, in Digestis sparsas habemus, sed detruncatas, ex-

fas,

fas, Jurisconsultorum Responsis admistas, nulla ad-  
jēcta caussa, nisi plerumque, *ut Divus Hadrianus scri-*  
*pfit*. Ecquis tam lynceus erit, qui in tantis tene-  
bris, nullo sublucente crepusculo, Constitutionum  
ejus rationes introspexerit?

Hæc, inquam, deterruerunt me, ne in campum  
tam operosum descenderem, argumentumque incertæ  
plenum alex auderem. Sed Tu, Senator amplissime,  
veluti de cælo missus me consternatum sustulisti, a-  
nimumque dejectum erexisti. Tu hortationibus Tuis  
ad tantum Opellæ meæ hiatum explendum impulisti,  
stimulis pungentissimis renuentem excitasti, manum  
jacenti porrexisti. Evicisti tandem Tua eloquentia,  
Tuaque auctoritate, ut stilum reposcerem, & quod  
nolueram inceptarem, quodque desperabam perfice-  
rem. Ita se re habente, nonne Tuum dicendum,  
quod sine Te non esset susceptum? Si quod ipse pe-  
peri, opera Tua concepi, & justii filii patrem sequun-  
tur; nonne injurius fuerim, & subrepti partus reus,  
si spartam hanc, quam a Te nactus fui, utcumque a  
me ornatam, non Tibi acceptam retulissem, Tibi-  
que exhibuissem? Vereor tamen, ne quod felici astro  
a Te in me ingenitum, imbecillitate culpaque mea  
monstruosum enixus sim. Sed quale quale in lucem  
prodierit, Tibi, Pater amantissime, sistendum jure  
optimo oportuit. Comprimas, ut libet, illidas, per  
me licet, modo officio meo defuisse ne arguar.

Et aliis vero nominibus Tibi maxime bini po-  
stremi Libri debentur, in quorum altero interiores  
Constantiniani Juris causas exquisivimus; in altero  
autem Justiniani volumina ex ejus mente explanavi-  
mus.

mus. Num enim aliis magis ; quam Tibi iudicium in eos dederim ? Et quidem Constantinus M. Christi religionem amplexatus , postquam Imperium ejus universum quatuor in Præfecturas divisit , juraque ad bene gerendas dedit ; id sibi potissimum curandum censuit , ut Paganam superstitionem , quæ altissimas tot sæculorum diuturnitate radices egerat , undique ex Provinciis omnibus evelleret , civiumque mores ad Evangelicæ philosophiæ formam componeret . Itaque leges eas pertulit , quæ Deorum cultum prosternerent , Christi fidem foverent , ejus Apostolorumque doctrinam sustinerent , Episcoporum Clericorumque omnium dignitatem tuerentur , Conciliorum canonibus obsequium juberent , moresque sædis Ethnicæ religionis obscenitatibus perditos corrigerent , ut demum omnia ad Divini Verbi effata referrentur . In hoc totum fere , quantum est Constantinianum Jus , versatur .

Quid Justinianus ? Quum memoria sua Christianorum pietas male concidisset , Christi Ecclesia debacchantium studiis in alias atque alias hæreses discissa esset , turbis omnia miscerentur , totumque civilibus discordiis dilaceratum esset Imperium ; quumque ideo Civilis æque , atque Ecclesiastica disciplina corruisset ; opus profecto fuit , ut in Imperio suo herili novis ac saluberrimis legibus hæreticorum furor comprimeretur , mores corrupti reformarentur , disciplina Ecclesiastica in integrum restitueretur , justitia rediret ad forum , Magistratuum civilium , ac militarium potestas certis finibus coaceretur .

An autem ex fontibus suis legum harum expositio

sitionem apte derivarim, quis justissime judicet, nisi Tu, Vir sapientissime? Te in historiae Ecclesiasticae scientia, atque in Conciliorum constitutionibus, æque ut in legibus civilibus, adolescentiæ annos insumsisse, nemo est, cui lateat. Te annos decem & tres Regio Capellano Majori ad consilium assedis-  
sisse, apud quem ad trutinam severe expenduntur Curia Romanæ Rescripta, sanctorum ne canonum menti consona ea sint, temporique respondeant, meminimus omnes: atque utinam tredecim Consultationum Tuarum in hoc argumentum volumina cito lucem videant! quam sane avidissime ad posterorum documentum expectantur! Ad hæc, non Tu es, quem Carolus Hispaniarum Rex, cui in Christiana pietate, atque in justitiæ laude, posteri vix invenient parem, utramque Siciliam auspiciatissimo imperio regens, inter alios maxime ad Codicem suum concin-  
nandum elegit, ut veluti Tribonianus Exquæstor sacri Palatii alter, novum legum corpus pro utroque Regno congereres, quod pietati prospiceret, suum cuique ex æquo bono tribueret, judiciorum innocentiam foveret, litibus æternitatem præcideret, controversas Ictorum sententias dirimeret, subdolas calumniatorum cavillationes propelleret, omniaque demum religioni, moribus, ingenio civium, temporique aptaret? Et quando huc oratio processit, liceat aliquantulum excurrere, & misso tantisper Constantino & Justiniano, quorum maxime Jurisprudentiæ interpretes censoria virgula Tua se subducere nequeunt, meritos prosequamur honores, qui Tibi Magistratui spectatissimo magnifice delati sunt.

Tali



Tali enim Te mentis acie divinitus præditum, eaque legum prudentia diurnis nocturnisque laboribus instructum, prospiciens Rex noster providentissimus, cui Superi cuncta fortunent, Te, inquam, præ ceteris ad Feudalem Regiæ hujus publicorum studiorum Universitatis Cathedram, & quidem honorificentissimam, delegit. Ubi quidem cum dignitate sedens non aliorum quorumcumque sermone trita, veluti crambam, recoquis, sed, Deus immortalis! inaudita prorsus eleganter, clare, distincteque, Musis omnibus plaudentibus, doces. Hic Tu inficetas ex animis opiniones penitus infitas evellens, Feuda per temporum historiam ostendis primum tristi atque immani vultu obducta cum barbarorum moribus congruentia, a quibus prognata; mederata deinceps ac mitia, postquam humaniores gentes Principesque facti sunt; quique demum Feudalis Juris, memoria nostra, in ancipitibus quæstionibus usus faciendus. Ingenue fateor, & me ætate licet provecta cum aliis bene multis ad perdiscendum sæpe, quum per negotia forensia quibus distineor licuit, auditorem accessisse, nec me poenituisse, quod ab ore Tuo solidas horas pependerim, -quum una prælectione Tua plus profecerim, quam perpetua de re Feudali volumina evolvendo. Itaque hæc non fando reſero, sed oculis auribusque testibus comprobo. Atque eapropter, ut causis ex suis Feudorum Consuetudines interpretatum Te esse omnibus innotesceret, Feudales Antiquitates attexuisse novimus: quas tamen, quod adhuc typis non credideris, gravissimæ in quibus versaris occupationes in causa fuerunt.

Tua Te dignitas, non fumosarum imaginum commendatio, ad maximum honorem, vix tredecim post annis Consiliarium, inter summos Consilii S. Clarae Viros, gratulantibus omnibus, sustulit. Quantæ, bone Deus! amplitudinis isthoc Consilium est! Etenim hoc templum est sanctitatis, mentis publicæ salutisque specula sublimis, ara Provinciarum, portus omnium gentium, Curia vindex temeritatis, moderatrix officii, summus Ordo, quem in rebus gravissimis Princeps consulit: in hoc maximi momenti causæ agitantur, hic Magistratus creantur, sacræque Principis auctoritati proponuntur, de Sacerdotii juribus atque Imperii disceptatur. In hac altissima arce positus Tu es, interque splendidissimos Viros, quorum sapientiam & majestatem demisso vultu & cives, & advenæ venerantur: sive nobis occurrat Marchio Balthasar Citus, qui Caroli Collateralis Consilii Regentis filius, Locumtenens Regiæ Camerae, huc Præses advocatus est, Vir in abstrusioribus negotiis perspicacissimus, & maximi consilii, comitate, assiduitate, vigilantia, provecta quamvis ætate, admirabilis; sive Marchio Dominicus Salomonius, ingenio litteris, historiaque Ecclesiastica & Civili præstans, & in cujuscumque generis causis expeditissimus; sive Marchio Dominicus Antonius Avena, qui ut pietate eximius, ita præscarum fori consuetudinum, scientiæque judicialis doctissimus; sive Diodatus Targiannius græce latineque doctus, historiæ utriusque, rerumque Theologicarum scientia, & moribus probatissimus, & Regii Juris in contentionibus Sacerdotium inter, & Imperium Advocatus commenda-

datissimus : quibus sane adjiciendus Josephus Caravita Turitti Dux , qui ex Coronæ Advocato in Supremum hunc Senatum supra numerum allectus est , Regalis Jurisdictionis Delegatus , & monasticæ disciplinæ exactor integerrimus . De quibus profecto non possum , quin jure efferam , quæ Carisius de iis , quos Imperator ad suum Consistorium selegerat , magnifice dixit : *Credidit eos , qui ob singularem industriam , explorata eorum fide & gravitate , ad hujus officii magnitudinem adhibentur , non aliter judicaturos esse , pro sapientia & luce dignitatis suæ , quam ipse foret judicaturus .* At vero quum virtuti gloria tamquam spirans imago resonet , justissime sane & Te in hoc celsissimo Divorum cœtu gloriose effulgere , Vir meritisime , intuemur .

Quid ? hæc ipsa virtus Tua ad Supremum Abusum Consilium evexit , a quo profecto quidquid perversum pravumque temporum intemperie in Regno oboritur , Regia auctoritate corrigitur , & si qua inordinata videantur , in ordinem adducuntur . Tuæ virtutis ergo Regi nostro Augustissimo a sanctioribus Siciliæ transfretanæ consiliis es , quibus quæ ad ejus tranquillitatem , felicitatemque gentis spectant , provide suggeruntur , neu quid opulentissimum Regnum hoc detrimenti umquam patiatur , sapienter consulitur . Ecquæ negotia impeditiora sunt , quæ Tibi credita non fuerint , nec in diem credantur ? Ecquos honorum gradus , titulosque , sapientiæ veræque virtutis comites , munificentissime Tibi delatos non admiramur ? Latera mihi deficerent , si decora cuncta Tua atque ornamenta , percensere numerando tantum vellem .

Quare

Quare., ut redeamus unde discessimus, non poteram sane digniorem Operi huic meo Patronum querere, nec Judicem justiore legere, quam Te, Vir Juris omnis & Publici & Privati consultissime: Si enim ego priscae Jurisprudentiae Romanae causas introspexi, Tu interponere judicium poteris, an acutem tetigerim; si mediam Jurisprudentiam ex humanitate & naturali ratione haustam commentatus sum, abs Te & natura & disciplina humanissimo, an scite me gesserim, exspecto; si demum, quo intenderint Constitutionibus suis Octavianus Imp. Hadrianus, Constantinus, & Justinianus, rimari adnissus sum, quis Te melior an & hoc divinarum judicabit, qui de politica civilique arte tam praeclare mereris, qui historiae Augustanae scriptoribus evolvendis prope impallueris, qui de Principalis, & Sacerdotalis potestatis finibus esse magisterio omnibus potes? Mihi igitur gaudeo, quod Tibi Lucubrationes has meas, cujuscumque sint pretii, dedicarim; aptissimum enim Te novi ad harum rerum dignitatem, ex veritate non ex opinione, aestimandam; Te, inquam, qui in otio litterario, in arte oratoria, in legibus interpretandis, in jure dicundo, in Magistratum summorum honoribus, in tota demum vita, sic Te cunctis probasti, ut in omnium oculis habitare non sine maxima hilaritate intuear. Quidquid igitur his chartis illevi, disciplinae Tuae libens volens trado: inducas, deleas, aboleas: judicio Tuo sapientissimo atque auctoritati obsequi gloriae mihi erit sempiternae. At vero, si quid Romani Juris studiosis utile, aut quid probatu dignum, quod vix spero, for-

tasse

tasse occurrat, id obtestor, ut quale Patroni officium  
est in Clientem, qui ejus fidei se tradidit, more  
majorum adversus malignos obtrectatorum rhonchos  
tuearis, defendas.

*Observantissimus ac devotissimus*  
Josephus Mandacritius Toscanus.



# AD CUPIDAM LEGUM JUVENTUTEM

## P R Æ F A T I O .



Uum homines suapte natura impellan-  
tur ad scientiam , nil mirum si rerum  
causas sollerter investigare conentur ,  
quas quum sedulo exploraverint , cogno-  
verintque , miro gaudio afficiuntur . Hinc  
veteris memoriæ , priscarumque littera-  
rum cognitio summopere nos oblectat ,  
quia illarum scientia vetustarum rerum  
primæ origenes reperiuntur . Verum om-

*Jurisprudentiæ  
laus .*

nibus antiquitatum studiis Jurisprudencia Romana merito vi-  
detur anteferenda , quod infinita propemodum commoda ad  
hominum ingenia inde derivantur , & mirifica doctos homi-  
nes voluptate perfundat . Nam quis amabo inficias ire poterit  
jurisperitum rei Romanæ publicæ , privatæque scientia probe  
imbutum , hujusmodi antiquitatis subsidiis non oblectari , &  
simul non juvari ad aptandas priscas Romanorum leges novis sibi  
occurrentibus in foro disputationibus ? quum jura omnia , &  
civilis regiminis formæ hominum moribus , eorumque stu-  
diis potissimum congruant ; ut adeo si priscum civile regimen  
ad aliam imperii formam vertatur , alique mores invalescant :  
antiqua civilia jura mutantur & ipsa , aliaque pro re nata  
condantur . Quid porro elegantius veterum Jurisconsultorum  
latinitate , quid eorum eruditione jucundius ? Præterea quid  
optabilius , quam legum causas ex forma civilis regiminis ,  
ex historia illorum temporum , ex receptissimæ philosophiæ  
penu , ex legislatoris indole depromere , atque detegere ? De-  
nique nihil cognitione hac sapientius , prudentiusque esse po-  
test , qua nos legum non verba , sed mentem teneamus ; de-  
quum nihil veteris Romanæ prudentiæ munere gravius , quo  
singulorum status , & bona protegantur ab injuriis .

A

Pro-





# AD CUPIDAM LEGUM JUVENTUTEM

## P R Æ F A T I O .



Uum homines suapte natura impellan-  
tur ad scientiam , nil mirum si rerum  
causas sollerter investigare conentur ,  
quas quum sedulo exploraverint , cogno-  
verintque , miro gaudio afficiuntur . Hinc  
veteris memoriæ , priscarumque littera-  
rum cognitio summopere nos oblectat ,  
quia illarum scientia vetustarum rerum  
primæ origines reperiuntur . Verum om-

*Jurisprudentia  
laus .*

nibus antiquitatum studiis Jurisprudentia Romana merito vi-  
detur anteferenda , quod infinita propemodum commoda ad  
hominum ingenia inde derivantur , & mirifica doctos homi-  
nes voluptate perfundat . Nam quis amabo inficias ire poterit  
jurisperitum rei Romanæ publicæ , privatæque scientia probe  
imbutum , hujusmodi antiquitatis subsidiis non oblectari , &  
simul non juvari ad aptandas priscas Romanorum leges novis sibi  
occurrentibus in foro disputationibus ? quum jura omnia , &  
civilis regiminis formæ hominum moribus , eorumque stu-  
diis potissimum congruant ; ut adeo si priscum civile regimen  
ad aliam imperii formam vertatur , alique mores invalescant :  
antiqua civilia jura mutantur & ipsa , aliaque pro re nata  
condantur . Quid porro elegantius veterum Jurisconsultorum  
latinitate , quid eorum eruditione jucundius ? Præterea quid  
optabilius , quam legum causas ex forma civilis regiminis ,  
ex historia illorum temporum , ex receptissimæ philosophiæ  
penu , ex legislatoris indole depromere , atque detegere ? De-  
nique nihil cognitione hac sapientius , prudentiusque esse po-  
test , qua nos legum non verba , sed mentem teneamus ; de-  
num nihil veteris Romanæ prudentiæ munere gravius , quo  
singulorum status , & bona protegantur ab injuriis .

A

Pro-

*Ejus occasus.*

Propterea si prisca Romanorum prudentia eruditionis suæ divitiis tanta nos afficit voluptate : & regulis , præceptisque suis ad publicam , atque ad privatam utilitatem sapienter comparatis , Principibus , Magistratibus , Judicibus , & Jurisperitis sapientiæ , omnisque intelligentiæ tutissima subministrat subsidia , quibus bene regantur homines , honesteque vivant , alterum non lædant , & unicuique quod suum est , tribuant ; nescio quo factum , ut illa , procedente tempore , ad eas inciderit rerum vicissitudines : ut per plura sæcula extiterit etiam memoria ejus oblitterata , atque extincta , & postmodum revocata ab oblivione ad usum , non ut scientia , qualis erat præclarissima , fuerit exculta , sed ut rude artificium sub nundinatione verborum & vocabulorum aucupio , ad evertenda aliorum patrimonia & fortunas , ex judicum libidine , & advocatorum avaritia , cœperit exerceri .

*Causa ejus vicissitudinis.*

Sed causam , quamobrem illa pessum iverit , hanc invenio fuisse potissimam , omnium scilicet disciplinarum occasum , & incitiam illorum subsidiorum , qua laborarunt homines adulta jam barbarie , quibus tantum vera , & non fucata Jurisprudentia potest adquiri . Quare juvat me pro ratione earum rerum , quas infra tractaturus sum , de fato Romanæ jurisprudentiæ aliqua præmittere .

*Barbarorum incursiones.*

Barbari , qui sub Valentis imperio inter militiæ auxilia , summo licet Reipublicæ malo fuerunt recepti , finibus Imperii custodiendis addicti , vires ejus , idoneam hanc occasionem nacti , cœperunt explorare ; quos postquam cognitos compertosque habuerunt , modo unam , modo aliam provinciam Imperii paullatim invadentes , rem eo adduxerunt , ut totum , quate patebat , Imperium , adeoque Italiam ipsam fuerint potiti , atque publicam labefactarint libertatem . In urbem autem Romam , quæ diutius obtinuerat Imperium , ita eorum arma invexere , ut recuperandæ suæ pristinæ libertatis spem omnem amisisse videretur . Quapropter vires suas præsentens nimium adtritas , nihil quicquam prius pensiusque habebat , quam publicas eas calamitates animo volutare , easque cum transactis ejusdem Romani Imperii felicitatibus conferre ; deque humanarum rerum vicissitudine indolefcebat quam maxime .

Ne-

Neque quod Barbarorum aliquandiu in Italia sedem firmaverint suam, ideo dici poterit fereniores dies nostris inluxisse. Nam vel alia barbara gens huc convolabat, ut primam expelleret, aut ea, quæ tenebat Imperium, contra ipsam humanitatem, quæ dicitur cuique hominum non sære in victos, ita vires, libertatemque nostrorum infrungebat quotidie, ut ægre admodum ab illa dominatione sese posse eripere cerneret Italia. Quum igitur ex bello non pax, sed alia quamplurima bella suscitarentur, quemnam bonarum artium amor, & studium poterat delectare? quum in illis infelicitatibus publicis expediret cuique potius vitam incolumem degere, quam profundere litteris operam dando. Hinc non omittendum strepitum, quo universa resonabat Italia, optimarum disciplinarum oblivioni præ ceteris occasionem summopere contulisse. Quum enim Principibus illis præ bello nihil esset optatius, Italia quo mores suos ad Principum exemplum totos componeret, totam se ipsam belli artibus addixit. Hinc litterarum ignorantia inrepsit tanta, quanta nullo tempore fuit; quod non est ut explicem magis, quum in historia temporum illorum res sit satis pervulgata.

*Eorum immanitas.*

Sed statim ac barbari isti, soli nostri dulcedine illecti, se in Italorum consuetudinem dedere, pristinos suos mores præter modum efferatos ad humanitatem transtulerunt. Nostri autem, licet fero, cognitum habuere, quantum interesset, sanctiores amoenioresque musas, ac liberales disciplinas jamdiu oblitteratas, in lucem revocare; donec tandem felibus auspiciis pristinum decus quum sibi vindicasset Italia, sicuti doctrinarum inventrix olim fuerat, ita hoc tempore earum fecundissima mater jure censenda est. Quocirca (uti adposite, ni fallor, ad rem dici solet) veluti novalia, quæ alternis cessant, fertiliora evadunt; ita si Italia per temporis intercapedinem litterarum studia internixit, tantam sterilitatem profecto majori frugum ubertate pensitavit.

*Instauratio bonarum artium.*

Verum operæ pretium est videre, quam viam ad studia litterarum instauranda nostri inierint. Alii latinitatis studium & orthographiam coeperunt excolere, quo lux adfulgeret antiquis latinis authoribus. Omnium primus fertur Cassiodorus

*Primi instauratores.*

Scylacensis, qui etiam in suo præclaro opere de formulis, & de comitiva speciem antiquorum magistratuum Romanæ Reipublicæ præbuit, ut posterius non ignorarent eorum peculiarem potestatem, qua negotia sive publica, sive privata curabantur. Alii poeticæ, ut Paullus Diaconus, Paulinus Patriarcha Aquilejensis, Theophanius, & Henchebertus Monachi Cassinenses sedulo dederunt operam, rati homines harmonicis poetæ numeros illectos barbariem exuturos. Sed præ his omnibus bono publico tunc consuluerunt, qui Græcas litteras excolentes, Grecorum sapientiæ splendorem adspersere, quo præclara Græcorum gesta, & Orientalium Conciliorum Canones Græce scripta innotescerent. Laudandi hac in re Johannes Burgundius Pisanus, & Paullus Diaconus Neapolitanus. Verum non hæc tantum studia excoli cæperunt, sed & alia forsitan his utiliora; nam Gisbertus de Arvernia, qui postea sub nomine Silvestri Secundi Pontifex inclaruit, ad immortalitatem nominis sui mathematica studia postliminio reduxit, & Dungalus Papiæ, ac Petrus Grossolanus Archiepiscopus Mediolanensis conatu sanequam maximo Theologica studia exornarunt. At omnibus palmam præripuit Petrus Grossolanus Archiepiscopus Mediolanensis, cujus eximia doctrina vel ex eo elucescit, quod quum in Græciam a Paschali secundo, ut contra Græcos processionem S. Spiritus a Filio adstrueret, legatus missus esset, tanta se gessit sapientia, ut summi Theologi fuerit nomen adsequutus. Adnitentibus ergo nostris ad studiorum instaurationem, litterarum, atque ingenuarum artium cultus in Italia vel in ipsa barbarie exteris gentibus suspicienda, ubertim reviviscebatur.

*Cur jurisprudentiam diu jacuerit.*

Sed quod dolendum, nescio cur, quum temporibus hisce disciplinæ, vel recenter exorirentur, vel exsuscitarentur veteres a longa oblivione, qua ob temporum injuriam obrutæ reperiabantur, ita ut communis, & nova quædam redderetur vita doctrinis; sola tamen Romana jurisprudentia squaleret, atque ab interitu non vindicaretur omnino, velut si indigna res esset, cui cordati homines animos intenderent suos. Non me latet evenisse, ut, multis licet post annis, Amalphi, ut plerisque hominibus visum, Pandectis repertis, jurisprudentia Roma-

mana respiraverit ; atque in Schola Bononiensi a Mathilda Comitissa instituta, summis propositis præmiis, a nobilibus præclarisque ejusdem temporis ingeniis aliquantulum Romanis Legibus decus adrogatum.

Quum itaque vetus Romanorum capisset prudentia per id tempus publice doceri, pollicebantur sibi ipsi docti, clarique viri, eam ad illam redactam formam, quam olim Papiriani, Paulli, Ulpiani, aliorumque multæ eruditionis Jurisconsultorum ætate obtinebat. Sed sua eos fefellit opinio; nam viderunt aliam jurisprudentiam, & quidem a priore immane quantum mutatam; nempe, quæ sua eruditione expoliata, atque a fontibus minime deducta, sub verborum aucupio, ac involucro, veluti rude artificium ad evertendâ aliorum bona inique compactum, exercebatur ab ejusdem temporis hominibus auri magis, quam juris admiratoribus.

*Arabica philosophia Jurisprudentiæ inimica.*

Sed dices, si eorum temporum ingenia tot labores susceperunt, ut veram, & non fucatam restaurarent Jurisprudentiam, cur id amabo assecuti non sunt? Res sane intricatior est, quam quæ uno verbo absolvi possit. Quare detur venia mihi, ut paulo altius eam repetam ab origine sua.

*Causa cur vera jurisprudentia non reinvenerit.*

Quum omnes omnino tunc temporis literatores Aristotelicæ philosophiæ capti essent admiratione, optime comparatum censuerunt, si facultates omnes ad normam illius componerent. Itaque, quemadmodum ceteris disciplinis, ita jurisprudentiæ civili Aristotelica dogmata fuerunt intermixta. Verum quum obscurissimis vocabulis, per Averroem investis, scateret, & in movendis difficultatibus, inutilibusque speculationibus versaretur; factum propterea, ut etiam jurisprudentia Philosophiam istam plane rudem, & inficetiarum plenam æquis passibus sequens, non ut scientia, qualis erat, præclarissima, sed ut ars vere mechanica haberetur. Et jure merito ita se rem habere par erat; nam in eorum docendi, scribendique ratione, contempta prorsus Romanorum historia, temporum chronologia neutiquam spectata, moribus Romanis nec etiam primoribus labris degustatis, jure publico ignorato, ac litteris latinis neglectis, Romanam jurisprudentiam, quæ solummodo ab hisce facultatibus depromitur, qua ratione, quæ-

*Præpostera jurisprudentiæ instauratio.*

so,

*Alciatus primus  
cultoris jurispru-  
dentiae instaurator.*

so, poterant degustare? Propterea nil mirum si genuinum Romanorum jus non restituerint, sed tantum fucatum efformaverint; quum vera jurisprudentia non in philosophiæ Aristotelicæ placitis ab Avveroe corruptis, sed in allatis sanctioribus disciplinis foret perquirenda. Pessime igitur cum Romano jure actum, usque donec Alciatus mediis tenebris exortus, in Jani Parrhasii politioris ingenii viri schola litteras latinas elegantiores, ac rerum Romanarum historiam edoctus, coepit his subsidiis legum causas diligenter investigare, specimen ita relinquens posteritati, quo posset Romana jurisprudentia revivisci, suoque nitori restitui. Ac doctissimis ille commentariis jus civile Romanum explanans, & commenta aliorum ostendens, quamque illi a sensu Romanarum legum recederent, benignum aliis stravit iter, ut animum ad id studium adjungentes, veterem Romanorum jurisprudentiam instaurarent. Dixi Alciatum potius aliis viam hanc ad restituendam jurisprudentiam præbuisse, quam eam ipsam modis omnibus absolutam effecisse; nam quum fuisset omnium prior bene de hoc studio meritis, ejus labor, ac vires minime suffecere, ut Romanum jus ex illorum temporum barbarie numeris omnibus depurgatum redderet.

*Cujacius integrum  
jus restituit.*

Erat enim hæc laus immortali Cujacio parata, qui suis doctis ac laboriosis juris interpretamentis, sic aliorum industriam, & judicium superavit; ut quidquid est optimum, ei sit adscribendum, ipseque appellandus redivivæ jurisprudentiæ pater. Exinde discipuli ejus tantæ eruditionis copia ab eo fuerunt locupletati, ut Romanam jurisprudentiam sic excoluerint, exornaverintque, ut pene dici possit, ei condendæ non tantum contulisse primos juris auctores, quantum luminis eadem ab ejus vindicibus instauratoribus accepit.

*Perversa jurispru-  
dentia in erudi-  
tam & forensem  
divisio.*

Unde Cujacii studio, ejusque discipulorum ingenio, Jurisprudentiam Romanam perpolitam superior vidit ætas. Quid igitur? horrida illa Jurisprudentia penitus jam exolevit, nec ne? Minime gentium, quum etiamnum videamus illam in foro obtinere; nam quæ longo tempore invalescunt præjudicia, difficili plane negotio emendari possunt. Quum enim causidici, rabulæque rei forensis periti non possent aperte jurispruden-

dentia eruditæ detrudere, quum ex ea legum sensus adprime colligatur, transversis eam propterea cuniculis adgressi sunt, vulgo affirmantes, jurisprudentiam eruditam cathedris tantum mancipandam. Quapropter ineptam jurisprudentia divisionem induxerunt, forensis scilicet, & eruditæ, effutientes hanc pro solius animi oblectatione, & rerum antiquarum notitia, illam vero uti rerum judicandarum regulam ac normam habendam. Quorum opinionis perversitate nihil fingi potest importunius. Eccui enim, dummodo cor sapit, stat animo, eam civilem prudentiam, quæ summa in Reipublica Romana ingenia exercuit, atque ad omnis eruditionis fastigium fuit ovesa, feliciterque ad causas tractandas adhibita, procedente tempore judiciorum non æquam esse normam?

*Falsa tabularum  
de jurisprudentia  
opinio.*

Sed quum homines ita comparati sint, ut eis magis quod plures, præsertim ditiores, quam quod pauciores, etsi doctissimi, affirmant, arrideat; factum propterea ut superius laudata divisio licet falsissima, ita communi opinione invaluerit, ut per omnium ora volitet, frustra hoc tempore tempus terere eos juvenes, qui foro operam daturi, jurisprudentiam eruditam addiscunt. Sed in eo falli eos, qua maxime quis non videt? Quid enim veteris jurisprudentia munere gravius, quo singulorum status, & bona proteguntur ab injuriis? quid solidius præceptis regulisque suis, quas hausas ex honestate naturæ non confuse congestas, ac temere proditas, sed solida ratione a majoribus traditas fuisse didicimus? Nimirum si quam habet philosophia, habet autem illa plurimam, dignitatem, eam in jus civile translata, atque conversam probe novimus. Præterea, quidquid a Græcis philosophis de honesto, & justo, de finibus bonorum, & malorum, de regendis Populi moribus, de legibus, & Reipublica disputatum, potius quandoque ingenii venditandi, quam utilitatis causa, id a Jurisconsultis nostris collectum, nugisque excussis traductum in urbem; ut quod apud Græcos exercitatio erat ingenii, longiorisque ocii levamen, Romæ in corpus juris civilis conversum, publicæ, atque privatæ semen esset utilitatis; ut denique contemplatio Græcorum otiosa, & iners a nostris operosa, atque frugifera redderetur.

His

*Auctoris institutum.*

His igitur ab ultima rerum origine repetitis, tempus erit, ut quod in animo est planius, & apertius expromam. Dixerit heic fortasse aliquis, non opus esse mea cogitata aperire, cum ex hucusque dictis satis superque appareat, me velle jurisprudentiam forensam, ejusque sectatores toto conatu refellere, eorumque levitatem, vel potius arrogantiam coarguere; quippe qui juris Quiritium laudem, honoremque depeculati sint. Nolim autem quis in invidiam me vocare, ac si penitus omnem forensam doctrinam reprehendam. Fori enim exercitationem commendo, ejusque Magistros consuli, legique hortor. Nam sicuti eruditorum interpretum lectione optime legum vim, & potestatem tenemus, ita practicum, quos vocant, studio methodum addiscimus, qua in foro controversias componamus. Sed hoc unum contendo, sine selectorum interpretum ope, neminem vere, ac solide juris Romani sapientiam percallere. Erit enim absque rerum Romanarum cognitione, non juris Romani peritus, sed tantum forensis rabula, peculiarumque specierum confarcinator; atque ita fiet, ut si aliarum contentiones suboriantur, nisi fors ipsam speciem iisdem prorsus circumstantiis, quas ille legerat involutam, obtulerit, nesciat se extricare. Quocirca vix, aut ne vix quidem rem, de qua agitur, expediet.

*Eruditioni forensis exercitatio consocianda.*

Quapropter ambæ hæ facultates nobis sunt necessariae, altera, qua theoreticæ juris, ad genuinam civilis Romanorum prudentiæ normam comparatam, addiscamus: altera vero ut fori exercitationem teneamus. Verum qui ajunt jurisprudentiam a suis fontibus haustam tam caussis in foro tractandis obesse, tota errant via. Nam eorum sententia huc redit, ut nempe ceteris persuadeant, jurisprudentiam eo magis perfici, quo longius a principiis suis recedat; cæteras autem facultates eo absolutas, perfectioresque evadere, quo proprius sua principia attingunt. Sed quænam est hæc scientia, quæ modum non habet ullum? quæ fines suos e- greditur? quæ tota deerrat a principiis suis?

*Universi operis ratio.*

Hæc omnia, quæ longius, quam par erat, persequutus sum, causam mihi adtulerunt, quamobrem ad hoc opus scribendum adgrederer, quo scilicet juventutis erudita studia ab  
er-



errore tam turpi vindicarem, suaderemque quam sit necessaria civilis prudentia a suis repetita principiis non tantum theoricæ, sed etiam rerum ufui, sive ad causas in foro agendas advocati munere, sive ad lites componendas judicis auctoritate. Igitur quum diu multumque cogitarem, quæ argumenta pararem, quæ ad id probandum pondus haberent, ea visa sunt mihi tandem validiora, quæ ex rei ipsius constitutione depromuntur, quod probationis genus infirmari nullo pacto potest. Quare, pro eo ac potero, agendum hoc opere de erudita Romana jurisprudentia, deque ratione illam addiscendi. Ut autem veram rationem quis exequatur, hæc cum primis noscat oportet, I. jus naturæ, II. civile regimen, cui leges aptantur, III. philosophiæ Stoicæ præcepta, IV. veterum Jurisconsultorum latinam, V. Romani fori, scilicet Rom. Magistratuum auctoritatem, antiquas formulas, ac forenses per id tempus receptos mores, VI. Principis ingenium, ejusque Religionem, VII. legum chronologiam, VIII. demum Ecclesiasticam historiam. Quam hæc ad legum intelligentiam sint necessaria, non aliunde quam ex ipsa Romani juris natura probare satagam; feligam enim super unoquoque argumento peculiares leges, unaque inepta Pragmaticorum barbarorum interpretamenta ob oculos ponam. Contra vero easdem leges, illis, quæ superius recensui, adjuvantis, probe intellectas demonstrabo. His omnibus adnectam etiam fori aliquot decisiones ex Accursianorum prius, & eruditorum postmodum commentariis enatas; ut omnibus his invicem collatis, cuique exploratum sit, veterem Romanam jurisprudentiam non solum ad eruditionem, sed potissimum ad quotidianarum controversiarum judicia dirimenda magnas opportunitates habere.

Sed antequam ordiar argumenta, lubet occasionem huius operis ordine enarrare. Quum Josepho Paschali Cyrillo viro summo in juris civilis scientia, non parum operæ darem, anno ætatis meæ vigesimo tanta Romanarum legum cupido animum incessit meum, ut reliquis disciplinis valere jussis, eis nihil mihi esset optabilius. Subinde autem perbelle accidit, ut ad amicitiam accederem præclarissimi Equitis Franci-

*Præsidia ad noscendam jus civile.*

*COGNITIO.  
Juris Naturalis.  
Regiminis Civitatis.*

*Latine linguæ  
Philosophia Stoica.  
Fori Romani, &  
auctoritatis Magistratuum.  
Ingenii Principis.  
Chronologia legum.  
Historia Ecclesiastica.*

*Operis occasio.*

sci Vargas Macchiucca Advocati Fisci, viri ingenuarum artium studio, morum elegantia, ac genere spectatissimi. Vir ille amplissimus serio me monuit, parum mihi jurisprudentiam eruditam profuturam, nisi cum illius studio Pragmaticos, resque fori copularem. Itaque ex eo tempore studia mea ita composui, ut tractatus Pragmaticorum ad principia sua revocarem, exploraremque unde fuerint illorum errores, & præjudicia exorta. Quumque studio selectorum interpretum animadverterem, errandi ansam aliquando ei præbuisse ignorantiam jurisprudentiæ Romanæ, statim ac id ipsum adnotavi, & simul principia juris expendere coepi. Postquam autem adulta jam ætate ad causas in foro orandas accessi, quotidie experimento didici, quantum hujusmodi studium mihi profuerit. Quapropter exercitationis meæ causa coepi bene multa, quæ animo obvenerant, chartis illinere; quem meum laborem quum plerique homines comprobassent, feci non invitus, ut opus hoc, utcunque esse posset, luci committeretur. Sed hæc hæcenus ex quibus instituti nostri ratio intelligi facile potest.

*Jus naturale.*

Age porro, ad propositum veniamus; & primum juris naturæ cognitionem jurisprudentiæ addiscendæ necessariam esse quam maxime, demonstrare incipiamus. Ait Ulpianus in l.6. D. de justitia, & jure, jus civile effici, quum aliquid additur, vel detrahitur juri communi, hoc est naturali. Igitur civile jus quum aliud non sit, quam ipsum jus naturæ, ab illis saltem gentilibus philosophis moratoris ingenii, quoad fieri potuit cognitum; saltem per sua notiora principia, variis tamen Populorum institutis, uniuscujusque peculiari ita suadente utilitate, modificatum; duo ad illud vere intelligendum, cognitumque jam negotiis aptandum, suat sane quam necessaria, publici juris scilicet cognitio, & peritia Romanæ historiæ; altera qua ipsum civile jus depromamus e suo fonte, altera vero ut uniuscujusque Populi, & præcipue Romani, res gestas, hoc est, rerum historiam, ut legum causas exploratas compertasque habeamus. Ex quibus omnibus illud publicum civile bonum oritur, quod vel ex detractioe juris naturæ, vel additione, prout civilis societatis postulabat utilitas, processit.

Quum

Quum jurisperito commendo historiam, ut civilem prudentiam egregie calleat, de illa historia dictum volo, quæ *Regimen Civitatis.* regimen cujusque Civitatis, ejus primigenias leges, moresque civium, quibus leges feruntur, respicit. Quod ut clarius appareat, necesse est ut originem civilis juris hic breviter tradam. Priscos homines vitam aliquando segrègem egisse, neminem profecto esse arbitror, qui ignoret. Hoc in statu, qui naturalis nuncupatur, unusquisque cum sua familia domesticum componebat imperium; is enim qui erat familiæ pater, ipse dominus, princeps, & supremus erat judex omnium, quæ in sua familia eveniebant. At experientia malorum, quæ in dies singulos homines in hoc statu sentiebant, eos adegit de statu naturali ad civilem transire societatem. Itaque eo relicto, eorum voluntatibus, & viribus in unum hominem mire confluentibus, civilem efformarunt societatem. Porro voluntatibus & viribus uni subjectis, voluntas publica, summaque potestas enata est, quarum altera dicta lex est, sive communis ratio, vel civilis sapientia, & publica philosophia: altera imperium, sive vis, & potestas in universos. Hæc vero non sapientibus, sua quibus ratio lex est, & imperium, sed iis sunt posita coercendis, quorum frenandis animis ratio non valet; ut quæ perturbatio propria ratione non reprimatur, potestate, & ratione publica, poenis ad hæc irrogatis, compescatur.

Cum igitur Civitas nil aliud sit, quam publica multorum ad communem utilitatem, ac vitæ, bonorumque tutamen instituta societas, quæ perpetuis publicarum pactio-  
 vinculis, sub eadem potestate, seu sub eodem supremo regimine continetur: mores, actiones, negotia civium ad præscripta pacta debet potestas illa componere, regere, exigere; ita tamen, ut publicum bonum præferat semper privato. Nam & societas ipsa aliter servari non posset; & mens primorum civium hæc fuit, ut publica utilitas præferretur singulis, ut ipsa inita consociatio perennare posset. Hæc autem publica potestas, si penes unum omnino erit, civile societatis regimen dicetur Monarchicum; si penes Populi multitudinem per concilium congregatam, Democraticum; si tandem penes optimates, Aristocraticum.

Dixi superius publicam potestatem ad communem bonum institutam fuisse. Quum igitur publicum societatis bonum illud sit, ut publica tranquillitas inter cives servetur, hæc autem servari non possit, nisi Civitas ab interna, & externa vi protegatur; necesse est illam armis, & legibus muniri, quibus externam propulset injuriã, & internam custodiat tranquillitatem. Hæc autem tranquillitas manet incolumis, quum hominum mores formæ civilis regiminis perfecte respondeant. Verum id, nisi per leges, per quas homines socialiter vivunt, obtineri minime potest. Leges igitur tales sint oportet, qualis est forma regiminis. Itaque cum Monarchia, Aristocratia, Democratia multum inter se distent, longeque sint diversæ: earum quoque leges mirum quantum inter se pugnent. Propterea qui ad jus civile accedit, exploret primum oportet, quale sit regimen Civitatis, ut ab ejus ratione civilia jura depromet, sciatque sub qua Imperii civilis forma leges sint conditæ, ut illas suborientibus negotiis rite, atque apposite accomodet. Verum quum forma Romanæ Reipublicæ non una eademque fuerit semper, sed multiplex, & varia, prout Populi, aut optimatum invalescebat auctoritas, idque ad Augustum usque, qui cuncta discordiis civilibus fessa, nomine Principis Imperium accepit, adeoque Monarchiam instituit; Jurisconsulti erit legum Romanarum nosse tempora, earumque causas, occasionesque explorare, ut quæ latæ sunt tempore quo Romæ mera Democratia, aut Aristocratia invaluerat, non iis componat, quæ usuvenerunt in Monarchia, vel contra; nam, ut aiebam, hæ Reipublicæ formæ inter se quam maxime differunt, proindeque earum leges, quarum norma est regimen ipsum civile, inter se dissident, atque discordant.

*Philosophia Stoica.*

Vidimus quantum lumen civilibus legibus præstent jus naturæ, & forma regiminis. Sed quia sunt alia nobis subsidia ad ejus scientiam acquirendam necessaria, de his nonnulla libabimus. Sane homines in generalibus notionibus boni, & mali, justi, atque injusti inter se conveniunt; sed differunt in adhibenda ratione, qua bonum, & æquum servetur. Ea de causa nil mirum, si legum conditores licet velint omnes jus civile a justitia universali, tamquam tutissima illius norma, de-  
pro-

promere; differant tamen in iis tradendis, quæ ad eam ducunt. Unde ex hoc varietas juris civilis enascitur, ut alio hic, alibi alio jure utamur. Sed quoniam norma juris civilis pendet potissimum a Philosophia in Civitate recepta; quum jus civile aliud non sit, quam philosophiæ dictamina de justo, & æquo, uti perbelle de Romano jure agebat Tullius: fatendum tale esse in Civitate jus civile, qualis erit philosophia in Civitate receptior. Romani autem ex tot philosophorum sectis præ cæteris selegerunt sibi ipsi Stoicam, quippe hominibus præ aliis utilior, quæ scientiam, & usum rerum simul complectebatur. Unde totum jus civile hujus sectæ dogmatis adeo adsperserunt, ut impossibile sit velle jus civile Romanorum intelligere, nisi philosophiam Stoicam perfecte calleas. Sive enim jus civile ad sua principia velis revocare, sive scire, an aliqua lex Romana, Stoicorum placitis innixa, præsentis rerum usui aptari possit, nec ne; sive placet componere antiquorum jurisconsultorum dissidia, quæ ex contrariis illorum opinionibus in ipsa philosophia stoica oboriebantur, senties profecto, te Stoicorum præceptis probe imbutum esse oportere.

Latinæ literæ conferunt etiam ad enodandos, ut Gellii *Latina lingua.* verbis utar, plerisque juris laqueos, non illos quidem, quos ex barbarorum interpretum, aut ex forensibus dictionibus promanarunt: sed antiquiores altioresque, quibus Romanos Jurisconsultos sæpe implicitos invenies. Exempla ex ipsis legibus repetita inferius proferam. Qui ergo Jurisconsulti nomine ornari velint, caveant ne humaniorum litterarum studia neglegant, sed eas diligentia quam maxima pertractent; etenim verborum vim, & significationem recte nosse, non minima jurisprudentiæ pars est. Nec sine penitioris latinæ linguæ intelligentia, unquam aut veterum legum sententiam, aut scripta Jurisconsultorum, qui scribendi rationem adhibuerunt integram, vereque latinam, ullo pacto adsequi poterimus.

His omnibus, quæ ad intelligendum jus civile Romanorum necessaria demonstravimus, scientia etiam magistratuum Romanæ Reipublicæ, & cognitio antiqui fori Romani debet accedere. Etenim si lex dubia erit, usus fori consulitur, ut secundum ejusdem consuetudines jura dubia explicantur.

*Forum Romanum,  
& auctoritas Ma-  
gistratuum.*

Præ-

Præterea priusquam lex feratur, usus fori excutitur, ne Cives a jure recepto traducantur per res novas, & aliud jus invalescat a priori plane diversum, cui jam Civium mores adhærebant. Magistratum notitia est etiam adprime necessaria, ut Romanæ Reipublicæ statum pernoscamus, & leges, quæ potestatem cujusque Magistratus respiciunt, recte interpretemur. Ex quibus non leviorẽ inde fructum capiemus, quum controversias, quæ inter nostri temporis Magistratus emergunt de jurisdictione, de imperio, de præcedentia, pertractabimus; nec sine ea cognitione qui ex nostris Magistratibus illis respondeant, intelligi potest.

Hic autem advertas velim, usum fori Romani, & statum magistratum non eundem semper fuisse, sed multiplicem, atque varium, prout nova regiminis forma enascebatur. Nam si leges scriptæ, quæ mortuæ literis conservantur, formæ civilis regiminis debent aptari, eo magis idem dicendum de usu fori, atque judicum, magistratumque potestate, qui viva lex Populi sunt. Hinc alius fuit fori Romani usus in Monarchia, ac sub Democratia: aliique fuerunt Magistratus in eadem Republica Romana sub Imperio Democratico, quam Monarchico. Itaque tempora nobis notanda sunt Romanæ Reipublicæ, quo fori Romani usus nobis innotescat, ne in interpretandis iis legibus, quæ potestatem cujusque magistratus respiciunt, aberremus. Et licet Augustus illorum nomina etiam sub Monarchia servaverit, eo tamen potestatem imminuit, quo munus eorum novo regimini responderet. Quare necesse est ad intelligentiam legum, quæ respiciunt munus Magistratum, tempora Romanæ Reipublicæ explorare. Aliter enim in immanes errores incidemus, si in veterum historia Magistratum hospites, ad controversias, quæ apud nos quotidie incidunt, solvendas accedemus.

Sed de cognitione fori Romani magis sollicitus sum; quantum enim Patricii formulis, ac rebus nominibus novis impositis, aliisque callidioribus inventis Romanam jurisprudentiam in foro involverint, quo dominarentur in plebem, res est vulgatissima. Hinc adeo forum Romanum Prætoris, Ædilitiisque formulis fuit refertum, ut sive lites judiciali sen-

ten-

tentia transigerentur , vel antiquis legibus abrogatis , novæ conderentur , sive de intelligentia legum super factis singularibus decidendis ab iudicibus dubitaretur ; omne id ex fori perquisitione excuteretur , quod sub nomine juris recepti veniebat. Unde jurisperitus in perlegendis legibus Romanis sentiet , quantum hujusmodi studium sibi adjumentum adferat ad aptanda vetera Romanorum jura novis factis hodierni fori. Quin etiam infinitæ pene dixerim in Digestis , & Codice leges occurrent , quæ sine fori Romani notitia non possunt intelligi .

Dixerit fortasse aliquis , Fori Romani consuetudines , formulas , alia his similia , quæ usurpari jamdiu desierunt , quum Constantinus I. , & deinde Theodosius non obscure , uti veterum calumniosas ambages , captandæque simplicitatis laqueos prorsus abrogaverint ; operam propterea perdere , qui eruendis hisce antiquitatis latebris insudaverit . Id ego inficiari non audeo : immo ajo etiam , & confirmo ; sed vero in novo jure , quo utimur , formularum effectus quam plurimi servati sunt , qui intelligi non possunt , nisi explorentur in causis suis . Quid tandem obsoletum magis , quam Prætoriarum formularum usus , quo sub verborum aucupio , & novorum vocabulorum commento , totum civile jus abrogabatur ? Et tamen quis inficias iverit , sine cognitione prætoriarum fictionum non posse jus civile Romanum , quo nunc utimur , intelligi , negotiisque præsentibus aptari ? Quod sane suo loco , ubi de hac re instituendus sermo est , intento digito commostrabimus .

Verum licet civilia jura sint optima , perque naturæ jus traducantur , & formæ civilis regiminis , ac denique philosophiæ per cives receptæ , usui fori ad amissim respondeat : imperfecta erunt , si sub spe proemiorum non adliciantur cives ad illorum obsequium , vel metu poenarum contineantur ne peccent . Quum enim ita inter homines labefactatam per nostros primos parentes naturam compertum sit , ut nos impellamur ad malum potius , quam ad bonum : evenit ut leges quamlibet saluberrimæ , infirmæ nobis evadant , nisi vel habeant præmia , quibus ad bonum promoveantur homines eis obsequendo , vel poenas irrogent , quæ eis plectantur impro-

probi , metuque illarum a peccandi proposito deterreantur . Unde jure merito crediderunt juris publici auctores , præmiis ; & pœnis , veluti æquīs quibusdam partibus , jura componere Principes oportere .

Quapropter civile jus tam Romanorum , quam aliarum gentium in plectendis criminibus pœnas habet statutas . Sed quum nos in delictis coercendis pœnis ab Romanis dictis utamur , opus est videre quænam ratio nobis ineunda sit , ne pœnis reis irrogatis plus justo & æquo utamur , quam legislator senserit . Sane pœna quum constituatur non in vindictam , sed veluti medicina salubris ad retrahendos mortales a flagitiis , talis sit oportet , ut validior eluceat ea voluptate , qua specie boni illecti ad peccandum impellimur ; alias si hanc voluptatem , quæ esca malorum est , qua homines , ut pisces hamo capiuntur , non superaret , finem suum non adsequeretur . Facile est enim homini contemnere , imo & perpeti minora mala , quo majora bona nanciscatur .

*Physica cognitionis  
necessitas.*

Propterea quum lex pœnalis sit contra vitia salubris medicina , pro intellectu legum pœnaliū nobis tempora percurrenda sunt , quibus illas leges leges sanxere , ut scilicet inspiciamus historia Duce , quinam hominum improbiōres mores invaluerint , facinora indigniora irrepperint ; ut ex hoc rationem reddere possimus de majori , vel minori pœnarum acerbitate ; quum pœnæ eo magis sint sævæ , quo majori malitia homines ad malum impelluntur . Verum cum physica , sive corporis habitudo , aeris influxus , solique situs ad peculiaris quædam vitia quoadammodo hic magis , quam illic impellant ; propterea prudens judex in pœnis inferendis ipsius rei physicam constitutionem debet introspicere , & loci situm , in quo delinquitur , ut pœnas ipsas , æquitate suadente , veluti saluberrimam medicinam adhibeat . Sed hæc omnia sine physicarum rerum , & geographiæ scientia pernosci non possunt . Igitur hujusmodi studium in tractandis legibus pœnalibus erit jurisperito necessarium summopere ; alias non æquus , sed iniquus judex erit ; quum in pœnis inferendis legislatoris mentem prætergrediatur , vel levius puniendo , vel majori pœna , quam crimen expostulat , reum ipsum plectendo .

At-



Atque hætenus a me allatas facultates , quantum adju-  
 menti afferre possint ad intelligenda jura Civilia, satis demonstra-  
 se arbitror . Nunc pro virili parte vestigandum , qua ratione Justi-  
 nianæi Codicis leges recte interpretari possimus. Sane hoc comper-  
 tum habebimus, si rationem legum in Codicem Justinianæum  
 conjectarum præmittamus. Leges Justinianæi Codicis Rescripta  
 sunt fere omnia ( paucis exceptis , quæ sub nomine genera-  
 lium Edictorum veniunt ) vel Justiniani ipsius , vel alio-  
 rum Principum , quibus illi vel ad libellos præsentium ,  
 vel ad Magistratum absentium consultationes , quid sibi de  
 ea re fieri placeret, respondebant . Igitur si illæ peculiarium  
 rerum decisiones sunt , rerumque ancipitum definitiones ,  
 non possunt a nobis intelligi , nisi innotescat res ipsa qua-  
 lis fuerit suis circumstantiis involuta . Verum hoc opus ,  
 hic labor ; quia nulla in Codice nobis lex occurrit , quæ  
 simul facti narrationem contineat , exceptis aliquibus perpaucis,  
 in quibus, licet factum referatur vel a Principe ipso respon-  
 dente , aut a Judice Principem ipsum consulente : ita tamen  
 confuse , & intercise narratur , præmittiturque , ut dixisse  
 idem sit , ac tacuisse . Hinc tantæ in legibus Codicis tene-  
 bræ , ut Oedipo conjectore sit opus ad eas intelligendas. Vi-  
 dendum idcirco num hanc historiam rerum singularium ,  
 ex cujus defectu mira illa obscuritas enascitur , aliunde sup-  
 plere possimus. Nimirum in legibus Codicis habemus nomen  
 Principis, qui legem condidit, nomen Consulis, sub quo lata,  
 locum unde data , item nomen , & munus illius Magistra-  
 tus , ad quem directa fuit , & tandem Imperii locum , cu-  
 jus gratia fuit condita . Proinde pretiosis hisce monumen-  
 tis invicem collatis , juris civilis studiosus percurrat illorum  
 temporum, quibus latæ sunt leges, historiam , ut ex ea legum  
 causas , occasionesque depromens , ipsarum vim introspeciat.

*Subsidia ad intel-  
 ligendum Codicem  
 Justiniani .*

*Historia tempo-  
 rum , quibus le-  
 ges latæ sunt .*

Item investigandum est Principis ingenium, quod pluri-  
 mum certe ad ipsas leges refertur . Quare historia vitæ Legis-  
 latoris ab autore synchrono perscripta , diligentia quanta  
 maxima legenda est ; atque colligendum ad vitia ne ,  
 an ad virtutes fuerit pronior . Ad hæc , in quibus virtuti-  
 bus , quibusve vitiis magis excelluerit , num magis in libe-

*Principis inge-  
 nium .*

ralitate , quam in avaritia ; num magis in benignitate , quam in severitate &c. Quantum ista morum scientia conferat ad leges intelligendas , inferius probabo , quum in medium adferam nonnullas leges , quarum sensum , nisi Principum moribus a nobis cognitis , vix est , ut possimus expiscari. Sed potissimum videndum cuinam Religioni , vel cuinam Philosophorum sectæ Legislator addictus ; & quos sibi Consiliaries adjunxerit .

*Historia Ecclesiastica .*

Denique historiæ Ecclesiasticæ aliquantula notio non solum perutilis , sed necessaria est ad jura Codicis intelligenda . Constantinus enim inter alios retro Principes primus id egit , ut ad frugem meliorem antiquam Romanorum jurisprudentiam redigeret ; unde abrogata philosophia pagana , cui per omnia priscum jus innitebatur , effecit ut Christiana Philosophia juris civilis tutissima norma undique evaderet . Misso enim pristinæ , ac variæ superstitioni nuncio , Christianam Religionem fuit amplexatus ; ex quo Gregorio , & Hermogeni porrecta occasio , ut Codices conficerent suos , quo antiquæ Romanæ jurisprudentiæ reliquiæ saltem ex naufragio isto philosophiæ paganæ evaderent , ac servarentur posteritati . Quumque philosophia Christiana ex Scripturis potissimum , & ex Conciliorum Ecclesiæ regulis , præceptisque depromatur , factum est , ut novum jus civile ex Canonibus Conciliorum , ac Sanctorum Patrum sententiis conflaretur . Quo circa Canones inde usque ab eo tempore , ita juri civili immixti , ut hæ facultates , Canonum scilicet , legumque Civilium tractatio , coaluerint in unum , idemque jus , ut utriusque scientia sit juris perito in dirimendis contentionibus sanequam necessaria .

Hoc saluberrimum Constantini institutum porro sequuti sunt posteriores Principes , ut adeo jam ex tum Canones semper civilibus legibus copulati fuerint ; præcipue tamen , ex quo tempore barbaries irrepere cœpit . Unde formulæ juris Canonici , & ipsius fori Ecclesiastici agendi modus , & usus in jus civile confluxere ; nam quum per ea tempora maxima esset laicorum incititia , Clericique tantum literas noscerent , hi , post habitis aliis , ad negotia tractanda seligebantur , qui Concilio-  
rum

rum Canones , Ecclesiasticæ fori compactas formulas ad jus civile admovebant . Ex his , quæ strictim enarravimus juris studiosus colliget, quam sit ei necessaria ad intelligendum Codicem Justinianæum Historia Ecclesiastica . Verum si quis Justiniani Novellarum vim adprime noscere studeat , is me iudice non leviter , sed solido Ecclesiasticæ historiæ studio imbutus sit oportet : quum in Novellis ille Princeps adeo abunde jus Canonicum pertractaverit ; ut sine historiæ Ecclesiasticæ penitiori scientia Novellæ Justinianæ non possint intelligi .

Jam pæne exciderat meminisse, ad leges quasdam probe explanandas, easque ad quæque adposite applicandas, pagana Romanorum religionis, ejusque rituum notitiam, fore supra quam credibile cuique est, utilissimam; nam licet Constantinus primum, & sequioris ævi Principes paganam superstitionem e jure civili funditus eradicaverint: factum tamen in Codice Justinianæo Triboniani inscitia, ut aliquæ antiquæ superstitionis Romanorum reliquæ in legibus nonnullis servatæ fuerint; quarum sensum non possumus adsequi, nisi earum repetamus originem ab ipsamet pagana superstitione.

*Religio, & ritus  
veterum Romanorum.*

Hæc sunt tutissima subsidia, quibus juris civilis scientia comparanda est: id quod deinceps selectissimis argumentis ostendere operæ pretium duco. At ea argumenta non aliunde, ut fidem meam adstrinxi, expromam, quam ex ipso legum civilium corpore. Seligam enim celebriores leges, & barbarorum interpretum in eas commentaria referam, deinde eruditorum, qui historiâ duce, recta processerunt viâ, postremo Pragmaticorum sententias examinabo; ut hinc lectores perspiciant, eruditam jurisprudentiam non esse curiosam & inutilem ( quæ opinio multos decipit ) rerum antiquarum cognitionem; sed forensibus contentionibus componendis adprime necessariam. Quod vel ex hoc circumscripto argumento cuivis, dummodo cor sepiat, compartum fore, arbitror. Nos utimur jure Romano, licet aliquibus legibus nostris emendato, atque correcto; sed jus Romanum, ut superius ostendi, & porro ostensurus ero, sine laudatis subsidiis minime intelligi, nec forensibus decertationibus adplicari potest; ergo jurisprudentia erudita

erit unicuique juris perito necessaria.

*Methodus universi operis.*

Verum quoniam hoc in opere id præcipue dabo operam, ut ostendam civilia jura ita formæ civilis regiminis aptari, ut mutato regimine, & ipsa mutantur; ideo præter enarrata subsidia ad intelligendum jus civile necessaria, maximas vicissitudines Romanæ jurisprudentiæ, ob mutatum in aliam formam civile regimen, obortas pertractabo. Proinde historiam pertexam Romanæ jurisprudentiæ sub Regibus primum, relicta ea, quæ spectat Consules, quum sub his non tanta fuerit Romanæ jurisprudentiæ mutatio, ut alia jura ob mutatum regimen fuerint perneceffe condi. Deinde sub Augusto; postmodum sub Constantino; & denique sub Justiniano; ut ex legibus omnium horum Principum invicem collatis elucescat abunde, quam verissimum sit jura civilia adeo formæ regiminis Civitatis respondere, ut quantovis quisque ingenio polleat, difficile ei sit legum scientiam adquirere, nisi eas a forma civilis regiminis depromere studeat.

*Brevis expositio vicissitudinum legum Romanarum.*

Atque ut id ob oculos ponam, satius erit Romanæ jurisprudentiæ vicissitudines breviter hic percurrere. Sane sub Regibus Romanæ Reipublicæ forma democratica fuit, non pure tamen, sed, uti placet, mixta. Unde ejus ætatis civilia jura ea fuerunt, quæ democraticæ congruebant Civitati. Augustus specie servandæ pristinæ libertatis Monarchiam instituit; unde primæva jura funditus evertit; eamque civilem prudentiam instituit, quæ in speciem videretur favere libertati, reapse tamen illam everteret, atque labefactaret. Constantinus, licet regimen non mutaverit, tamen vicissitudinem aliam, & quidem longe majorem antiquæ jurisprudentiæ attulit. Quum enim philosophiæ præstantioris, Christianæ scilicet ductu, omnia expedirentur; repudiatis receptorum pridem rituum plerisque, amputata in omnibus actibus formularum scrupulositate, immutatis denique juribus, quæ scilicet fine controversia, antiquis excellentiora, & naturali dictamini magis accommodata videbantur, atque essent, ea fuit jurisprudentiæ forma inuenta, quæ Christianæ Religioni perfecte responderet.

Demum sub Justiniano novata omnia. Is enim Triboniana-

niani opera, ut antiquorum Jurisconsultorum dissidia componeret, ac jus vetus ad rationem sui temporis reformaret, illudque in ordinem redigeret; eo confundit omnia, atque nova veteribus, & novis vetera miscuit, ut uberrimam segetem posteritati relinquerit, quo vel errores Triboniani refellerentur: aut investigaretur discrimen, quod inter jus vetus, & Justinianæum intercedit. Voluit enim Justinianus novum jus condere, ac vetus omnino abrogare; sed ex antiquo jure, Triboniani incitiâ factum est, ut quamplurimæ tam in Pandectis, quam in Codice reliquæ superessent, quæ haud facile possunt intelligi, nisi ab usque origine sua repetantur. Ex quo apparet profecto, etiam post Justinianæa tempora necessariam esse nobis intelligentiam juris veteris; qua compertum habeamus, quid nam Justinianus immutaverit, quidve ex prisco jure inemendatum reliquerit.

Atque ut omnia procedant rite, & debitus ordo servetur, disseram quæ hoc in argumento tractaturus sum. In primâ parte agam de subsidiis, quæ dixi necessaria esse ad intelligendum jus civile Romanum. Sed quoniam inter hæc principem locum obtinet, cognitio formæ civilis regiminis, cui jura tamquam causæ effectus sunt nexa; ideo totus in hoc ero, ut antiquam Romanorum jurisprudentiam ex ipsiusmet regiminis formâ detegam. Porro agam in eadem prima parte de jure Romano sub Regibus; ut ex Regiarum legum indole abunde noscitur, quanti facienda sit civilis regiminis notio, ut jura rite expendantur. In secundâ parte sermonem instituam de eodem jure sub Augusto; quo tempore maxima ei contigit mutatio ob institutam Monarchiam. In tertiâ ad Constantinianæa deveniam tempora; in quibus alia jurisprudentia exorta est ex Christiana philosophia, quam Constantinus, pessumdata, Deo auspice, pagana religione, ut juris civilis norma haberi voluit. In quarta denique exponetur jurisprudentiæ facies Justiniani temporibus. Quibus vicissitudinibus examinatis, huic operi extremam manum imponam.

Verum quum ad absolutissimam Romanæ jurisprudentiæ historiam necesse etiam esset illius ortum, progressum, & usum

*Argumenta cuiusque libri hujus operis.*

usum per Colonias, Municipia, Provincias, ac Præfecturas narrare; id quoque me præstiturum promitto, si per valetudinem licebit; nam stomachi vitium in dies male me habet; super hæc otium a fori tricis, quibus vel sublimiora ingenia torpent, mihi adprecior. Frustra, an cum aliquo nostrorum hominum emolumento, tantum operæ insumpserim, æquanimi lectores judicanto.

## JOSEPHI TOSCANO

## MANDATORIZZO

J.-C. AC PATRITII ROSSANENSIS

De Causis Romani Juris

LIBER PRIMUS.

CAP. I.

§. I.

*De necessitate scientia juris naturalis ad jus civile.*

Arcus Tullius Cicero (a), quum juris civilis vellet rationem, ac specimen dare, illud vocavit : *præstabilem scientiam in fœderibus , pactionibus , conditionibus . Populorum , Regum , exterarumque nationum , in omni denique belli jure , & pacis .* Deinde vero de legibus quum scriberet , interrogatus ab Attico , quidnam de jure civili sentiret , respondit (b) : *Ego ne? summos fuisse in Civitate nostra viros , qui id interpretari populo , & responsitare soliti sint : sed eos magna profectos , in parvis esse versatos . Quid enim est tantum , quantum jus Civitatis ? quid autem tam exiguum , quam est munus hoc eorum , qui consuluntur ? quamquam est populo necessarium . . . . Quamobrem quo me vocas ? aut quid hortaris ? ut libellos conficiam de stillicidiorum , ac de parietum jure ? aut ut stipulationum , & judiciorum formulas componam ?*

*quæ*

(a) Orat. pro Balbo cap. 6.

(b) De legib. lib. 1. cap. 4.

*quæ & conscripta sunt a multis diligenter, & sunt humiliora, quam illa, quæ a vobis expectari puto.*

Qua in sententia Cicero secum ipse fane pugnare mihi videtur. Hic enim procul dubio intolerandam opinionis contrarietatem quis posset objicere, dum jurisprudentia præstabilis scientia appellatur; deinde vero eadem ad stillicidiorum, ac parietum jus refertur, perinde ac esset plena ruris, & inficetiarum. Sed in utraque Ciceronis sententia nihil profecto absonum est, quum aliud sit jus Civitatis, aliud vero illud, quod ex usu fori, judiciorumque compactis formulis, per Pragmaticorum calliditates, in veteri foro Romano inolevit. Hæc enim jurisconsultorum, & causidicorum fuit excogitata rabulatio, jurisque veri fucata facies, ut vel occultandi jus ab imperita plebe, vel cogendæ pecuniæ per has insidias facilis esset occasio. In illo contra continetur scientia præclarissima legum.

Igitur operæ pretium erit expendere, quale sit hoc jus Civitatis, ex Tullii mente depromptum. Ait ille jus Civitatis, quantum est, versari in publicis fœderibus, Regum pactationibus, ac Populorum conditionibus; denique in belli jure, pacisque. Verum quum hujusmodi facultatem assequi non possimus, nisi jus publicum universum adprime addiscamus: dicendum, hoc adeo e re jurisperiti esse, ut qui illud ignoret, jurisconsultus prorsus appellandus non sit, utpote qui ne juris quidem umbram consuetetur. Non ne enim jejunum nimis, atque exile erit studium juris, quod totum forensibus cancellis circumscribatur? Quid enim hujusmodi jurisperitus respondeat, si quærat an publica fœdera, mutata regiminis forma, successorem in Imperio teneant? Quinam Regni successio adjicienda sit, si possessorum defecerit progenies? Regalia ne, quæque inter Regalia accensentur, urgente re, alienari possint? Hæc enimvero, atque id genus alia, pro re nata definire, atque e publico jure arcessere, jus est illud Civitatis a Tullio definitum, quod præclaram, & præstabilem jurisprudentiam appellare non dubitavit.

Sed quid longe repetitis probationibus opus? ipsamet jurisprudentiæ civilis indoles, atque ratio satis superque rem, qua de agitur, evincit. Ita enim Ulpianus jus civile descri-



scripsit, ut responderit, illud esse, quum quid additur, vel detrahitur juri communi. Quum igitur jus civile, teste tanto viro, non sit aliud, quam ipsum jus naturæ, Populi suadente utilitate, nunc auctum, nunc vero dimiutum, pro necessitatibus nempe eorum, qui ejusdem Civitatis sunt, temperatum; fatendum profecto est, duo per quam maxime esse necessaria ad juris civilis intelligentiam, cognitionem scilicet non vulgarem juris publici, & rerum per sua quæque tempora gestarum, non confusam, sed probe ordinatam historiam; quibus sane facultatibus inter se copulatis, jus civile & a suis fontibus haurimus, & legum causas, occasionesque distincte internoscimus. Sic porro intelligemus, historia duce, quænam fuerit illa Civitatis utilitas, quæ Principi suaserit juri naturæ aliquid addere, vel detrahere, de iis nempe, rebus quas jus ipsum naturale permittit; nam ea, quæ præcipit immutabilia sunt. Siquidem hunc ordinem in interpretatione juris sectabimur, tunc vero illud intus, & in cute noverimus, quum ita non legum verba, sed mentem ipsam introspeciamus; sicque demum non animo ancipiti, sed obfirmato, quæ enascuntur, controversias quam facillime extricabimus; atque ex ipsarum legum ratione, in judiciis vel severitate, vel indulgentia utemur, prout negotii ipsius ratio suggererit. Igitur non per rivulos, non per Pragmaticorum ineptias, non denique per insidias caustidicorum: sed per ipsos fontes suos civile jus deducemus.

Verum quoniam animum induxi meum, quidquid in hoc opere edisseram, rationibus ex ipsismet legibus nostris depromptis fulcire; iccirco hoc ipsum pro virili adgrediar; seligamque ad id, præ ceteris, ea juris civilis capita, in quibus potissimum insudarunt Pragmaticorum ingenia; ut ostendam, facillimam intelligentiam, tutissimamque esse legum, si earum bene provisæ, & diligenter explorata principia ponantur. Sane criminum judicia, & contractuum obligationes sunt ea, quæ pene totum civile jus absolvunt. Sed quot ambagibus, contentionibusque Pragmaticorum hæc involuta sint, norunt quotquot hujusmodi scripta evolverint; quantum temporis est impendendum: quam longa, & prærupta premenda semita, ut

D

illo-

illorum mentem quis possit adsequi. Sed dic quæso, postquam nocturna, diurnaue manu versaveris illorum immensa volumina, habes ne quid certi, ubi figas pedem? non ne, ut ait Comicus, *incertior eris multo, quam dudum* (a)? Contra vero evenit si fontes ipsos, seu juris naturæ principia adeas. An hæc ita se habeant, videamus. Hoc enim est, quod palam facere in præsentia operæ pretium duco.

Jus naturæ in criminum judiciis id spectat, ut reo inferatur poena, tantaque, quanta, veluti medicina salubris, is & suo, & aliorum bono, ad bonam frugem se recipiat, abstineatque in posterum a flagitiis: ut injuriam passo, aliisque in posterum securitas præstetur: neu quis impunitatem a sceleribus sibi polliceatur: demum ut damnum injuria datum sarcatur. Hæc quidem sunt juris naturæ præcepta, quibus poenarum certi fines, earumque veluti æstimatio quædam præscribitur. Qua de re si poena tanta fuerit, ut statutos fines minime excedat: profecto legitima erit; sin vero damnatorum poena gravior, leviorve fuerit: injusta omnino existimanda est, quippe quæ legis rationem non adsequitur. Ad contractus autem quod attinet, ex ipsomet juris naturæ principio, hi sunt vel liberales, vel onerosi; in illis naturalis ratio dictat liberalitatem plus æquo extendi non debere, nec præter dantis voluntatem proferri; in his vero æqualitatem inter contrahentes servari, & quid, quantumque sit, quod utrique vicissim debeatur, decerni. Hæc sunt juris naturæ præcepta in criminum judiciis, atque in contractibus sancte custodienda, pauca quidem ut vides, & simplicissima; attamen si solerter juri civili aptentur, ea vi pollebunt, ut ex iis omnes contentiones tutissime definiri, transigique possint. Sed age videamus, an hæc ita sint; experiamurque primum in judicio criminum, deinde in contractibus.

Dixi judicium criminis poenarum æstimatione peragendum. Sed quum poena eo esse gravior debeat, quo atrocius peccatum: videndum porro est de gravitate, aut levitate criminis, ut quanta debeatur poena recte judicare possimus. Verumta-

men

(a) *Terent. Phorm. act. 2. sc. 4.*

men quia totum id ex poenarum fine deducendum est, ideo illarum rationem carptim dudum delibatam, nunc paulo altius repetamus. Tres esse poenarum causas sollertissimus Taurus Philosophus Stoicus apud Gellium (a) scripsit, nempe ut reus, inflicta poena, attentior fiat, correctiorque; ut dignitas, authoritasque ejus, in quem peccatum est, restituatur; ne prætermissa animadversio contemptum pariat; demum ut ceteri a similibus peccatis, quæ prohiberi publice interest, metu cognitæ poenæ deterreantur. Ut autem prior causa effectum suum gignat, debet poena esse molestior ea voluptate, qua delinquendo reus oblectatur; ut hac majori acerbitate ac dolore affectus, caveat in posterum a minori voluptate, ne in majoris mali scopulum vi poenarum incidat. Verum si ex delicti atrocitate noverit iudex, adeo esse rei depravatam voluntatem, ut quæcumque poena inflicta non satis sit, ut corrigatur: morte naturali, aut civili mulctabit; quum expediat magis reipublicæ civem unum, veluti putridum membrum, a societate abscindi, quam totam, improbitate unius, periclitari. Sed hic non omittendum maleficio aliquando morte naturali puniri, licet non tanti æstimeretur quoad reum, qui ultimo supplicio plectatur. Sic profecto fugitivorum defectio, quæque belli tempore, leviora licet, committuntur crimina, morte vulgo naturali puniuntur: neque vero ob delinquentis meritum, quod sane tanti non est, sed causa quidem publicæ utilitatis, cujus gratia pensatur id, quod deficit ex parte peccantis. Igitur poena vel remittitur, vel minuitur, vel augetur, sive ob criminis meritum, sive aliquando præter meritum, ob publicam, ut dixi, utilitatem.

Attamen quum delinquentis meritum, ex adjunctis ipsius patrati criminis metiri oporteat: hæc ad poenarum æstimationem exactiori trutina expendenda sunt, ut major minorve sit animadversio, quo magis minusve improbæ peccantis voluntatis propositum ostenditur. Hæc autem adjuncta in iis, quæ scelestè committuntur, quam maxime sunt considerata, de quibus nos singillatim agemus. Primum est, quod impu-

D 2

lit

(a) *Lib. VI. cap. 14.*

lit ad peccandum ; alterum quod a peccandi proposito debeat reum abducere ; tertium demum , quod ex qualitate , si-  
ve physica , siue morali peccantis oritur , quæ qualitas , non  
secus ac duo priora , auget , vel minuit delicti meritum , e-  
jusque poenam , prout scilicet peccantis consilium patefacit ;  
ut si peccans sit rusticus , an sapiens : vir an mulier , & id  
generis alia .

Inter causas , quæ reum ad peccandum impulerunt , pri-  
mum locum tenet dolus , & malitia . Quare quo majori dolo  
sunt delicta excogitata , & quo majori ea abundant malitia :  
eo sunt atrociori coercenda poena , hac potissimum ratione ,  
quia , & actum magis voluntarium , depromunt : & propo-  
situm voluntatis pravæ firmitus , constantiusque in peccando  
involvunt : & ut paucis me expediam , conicitur ex iis ,  
quanta improbitate crimen committitur . Sed voluntas mo-  
vetur ab affectibus , affectus porro alii sunt læti , tristes vero  
alii ; læti ex appetitu alicujus boni apparentis exoriuntur ,  
tristes vero ex alicujus mali metu suscitantur . Quia vero  
magis cuique consonum est sine aliquo bono , quam cum ali-  
quo malo vitam degere : idcirco affectibus lætis permota vo-  
luntas ad peccandum , eo majori poena punienda est , præ vo-  
luntate a tristibus excita , quo magis hi minuunt , illi vero  
rationem voluntarii augment . Quod autem dixi de affectibus  
tristibus , illos scilicet poenam minuere , dictum volo de illis ,  
qui ob aliquam causam metus ingentis , & verisimilis , susci-  
tantur in nobis ; quia si metus iste inanis esset , & a reo  
falsè conceptus , poenæ minuendæ prodesset omnino nihil .  
Non enim hæc species metus minuit voluntarii rationem ,  
quum non ita percellat mentem , animumque permoveat ,  
ut illa subvertatur , & quod agitur , minime attendatur .

Sed mirum profecto est , quot ex lætis affectibus crimi-  
num enascantur species . Sane hi moventur intuitu boni ali-  
cujus adparentis , quod nempe præferant , vel honestatis ,  
vel utilitatis , vel demum jucunditatis speciem . Ex primo  
genere emanat ambitio , ex secundo vero avaritia , demum  
ex tertio voluptas illa , qua quis oblectatur leges infringendo .  
Qua de re jure merito dixi , quod sæpius affirmare non tædet ,  
pœ-

poenam hic graviores esse debere voluptate, qua reus ad maleficio adlicitur: nempe ut præstetur medicina solubris, qua animi infirmitas curetur, ut deinceps, qui punitur, corrigatur, & frugi fiat. Ex hæcenus dictis de poenarum æstimatione habes, ni fallor, documentum fortasse non poenitendum, paucis quidem præceptionibus, sed solidioribus tamen, & ad infitæ nobis æquitatis regulam exactis; ut adeo tibi necesse non sit Pragmaticorum de hac re immensa volumina, plerumque obturbata tricis, evolvere.

Expositis causis, quæ ad peccandum impellunt, ad eas devenio, quæ a maleficio deberent abducere; quum non minus illæ, quam hæc ad poenarum æstimationem spectent. Igitur causæ, quæ a crimine debent hominem avertere, sunt Justitia, in quam offenditur: & Pietas, quæ, deserto officio, spernitur. Hinc sequitur, quo major sit injustitia, atque impietas, eo majorem infligendam poenam. Verum quum injustitiam a damno injuria dato metiamur: ratio ipsa docet, quo majus est damnum, eo majorem injustitiam æstimandam. Propterea videndum, an damnum passa sit ipsa societas: pluribus ne id, an paucioribus illatum: sit ne crimen inchoatum magis, quam perfectum: item ipsiusmet, qui damnum patitur, habenda ratio, nempe datum ne sit vitæ, an familiæ, an fortunis. Quum enim hæc omnia damnum pati possint, idque majus, minusve sit: naturalis ratio poscit, ut quemadmodum est injustitia, ita poena majori, minorive penetur.

Alterum, quod nos monet ne delinquatur, Pietas est. Hic sane pietatem accipio pro officio, quod vel ab aliis nobis, vel a nobis aliis debetur, propter illud scilicet naturæ vinculum, quod inter parentes & filios, uxorem & virum, inter cognatos, amicos, & socios bene vicissim meritos intercedit. Hinc sequitur, ut quo majus urgeat pietatis officium, eo major sit impietas, si qua forte peccetur, majorique poena id plectendum. Ecce tibi, quæ ratio poenarum ex justitiæ, & pietatis violatione in maleficiis habenda sit; quo reus metu hoc deterritus, studiosius in posterum animum, mentemque conformet.

Post

Deinceps sequuntur aliæ poenarum causæ, scilicet honoris restitutio in eum, cuius dignitas per scelus afflictæ est; & exemplum, quod ceteris prodendum, ne & ipsi in huiusmodi flagitia prolabantur. Non ita vero, ut per hanc honoris restitutionem intelligatur voluptas illa, qua læsus oblectetur in rei punitione; est enim hæc vindictio humanæ naturæ, non modo homini Christiano adversa, atque invisæ. Sed perinde accipi volumus, ut per illam damna dissolvantur, & compensentur, eaque securitas paretur, qua læso prospiciatur, ne novæ in posterum querimoniarum locus detur; cuius sane fiet compos, vel per mortem naturalem, si tanti habeatur crimen: vel civilem, si levius quidem sit: vel demum per custodiam carceris, cui reus mancipabitur, si par æquumque videatur.

Quum autem a noxio cive compensanda sint læso damna, nolim id intelligas pro vitæ ademptæ, aut abscissorum membrorum pretio; tanti enim hæc sunt, ut in commercium venire non possint. Igitur damnorum resectio de ea utilitate accipienda est, quæ ipsi offenso, aliisve jure perfecto debita, ablata est per injuriam. Sit exemplum: pater familias occiditur: filiis pensandum est omne detrimentum, quod ejus cæde infertur, ac reparanda utilitas illa, quæ iisdem intercipitur; dummodo utilitas hæc circa rem ipsam proxime versetur, attentæ spe verisimili, quæ quo proximior, remotiorve, eo resectio pluris minorisve æstimanda. Sed advertas, damni reparationem, ob membra insuper rupta, vel detruncata, ex usu illorum definiendam esse, ut ita ex majori, minorive lucro, quod ex defectu operarum amittitur, major, minorve utilitas reficiatur.

Ad postremam poenarum causam transeamus, nempe ad Exemplum, ne ceteri, videntes porro improbos quosque statutas poenas subire, sibi persuadeant, si forte deliquerint, se flagitiorum impunitatem minime assecuturos; qua de re crimine damnati non in locis semotis, aut occultis, sive intra carcerum latebras, sed in aperto, & palam, in omnium scilicet conspectu puniuntur. Sed heic magno animorum æstu disputant juris publici Scriptores, possit ne Princeps aliquando poenas re-

mit-

mittere , necne . Tu paucis sic habe : fanciri pœnas ad rei emendationem , atque pro publica utilitate , ne & ceteri nequiores fiant , explorati juris est . Quid igitur , si ea sit præteritæ vitæ consuetudo , moresque , ut quantum conjectura assequi possumus , facile perspiciamus , reum si culpæ pœnam effugiat , ad pristinam integritatem , innocentiamque suoapte ingenio rediturum , ac novæ virtutis exemplum universæ reipublicæ fore ? Non ne pœna hæc , atque animadversio sine causa erit ? Quid , inquam , si tot , tantaque sint delinquentis in patriam collata beneficia , ut majora sint ea utilitate , quam ex pœnarum exemplo capere posset ? Non ne frustra erit pœna ejus ? Quid denique si crimen sit ita occultum , ut vix perpauca pateat , atque ex adverso tanta spes patriæ affulgeat , ut expediat magis vitam servari incolumem , quam adimi ? Non ne poterit Princeps pœnas condonare ? Ex his , quæ veluti per saturam collegimus , intelliget sane lector , quantum veritati consonum sit , quod ante præfatus sum , jura civilia ab jure naturæ lucem , eamque non minimam foenerari .

## §. II.

*De necessitate scientiæ juris naturalis , in definiendis contractuum obligationibus .*

**Q**Uam æque sapienterque de criminibus fiant judicia , si a principiis juris naturalis depromantur , jam ostendi . Nunc autem quum ad civiles contractus oratio decurrat , eandem juris naturalis necessitatem , ad dirimendas eorundem controversias , qua par est brevitate , sum probaturus . Et quidem nulla juris civilis impeditior pars est , & Pragmaticorum quæstiunculis turbatior , quam hæc contractuum . Omnia autem expedita sane fient , si res a jure naturæ proficiantur . Ne vero ullam confusionem gignat tam late patens argumentum , præ ceteris omnibus , ea tantum contractuum genera delibare in animo est , quæ ad emptionem venditionem , utpote in hominum societate frequentiores , spectant ; ut in his unis lu-  
cu-

culentissimum veluti exemplar proponam, ex quo leges etiam istiusmodi a puris fontibus repetendas, quivis intelligat.

Jus naturæ in contractibus onerosis id precipit, ne quid voluntati contrahentium dissentiat, nec non facta recta semper fervetur æqualitas; atque hoc tum ex illa contrahentium voluntate, præter quam omnia in cassum fiunt, quam ex natura ipsiusmet contractus, exploratissimum est. Qui enim dat, ideo dat, ut tantumdem ab altero recipiat. Qua de re manifeste sequitur, in emptione venditione exactam inter contrahentes intercedere vicissim æqualitatem, scilicet re pretio, & pretio ipsi rei omnino respondente: spectatis tamen rei ipsius qualitatibus, ratione nempe habita ipsius contractus conditionum, quæ vel augment, vel minuunt rei pretium. Verum ne credas æqualitatem hanc in solis rebus spectari; nam & qualitas sive physica, sive moralis contrahentium, & modus ipse ineundi contractum in trutina poni debet, ut plane perspiciatur, intercesserit ne inter eos in contrahendo æqualitas, nec ne. Ad qualitates contrahentium spectat, si major cum minore contrahat, sanus cum furioso; ad modum vero contrahendi, si alter necessario contrahat, alter autem libere. Itaque ex his omnibus colligitur, contractuum æqualitatem, jure naturæ attento, in rebus ipsis, in personis contrahentium, atque in ipso contrahendi modo versari. Atque hæc, quibus sane parere debemus, naturalia, & simplicia principia ponenda statui, ut Pragmaticorum hac de re quæstiones facile, atque enucleate solvantur. Age vero rem pressius videamus, & experiamur, quam expedita omnia sint, si a jure naturali arceffantur.

Dixi quidem rem debere esse æqualem pretio. Ea de causa necesse est, ut venditor rei venditæ vitium, non obscure, & per ambages verborum, sed aperte, distincteque aperiat: minoris enim res emta fuisset, si ejus vitium palam fecisset. En igitur contractum irritum, ex non servata æqualitate. Sed quid si contractu perfecto, ejus deregatur conditionis res emptæ, ut licet, quo tempore contractus initus est, ab ambobus vitium ignoraretur, si tamen patuisset, minoris sterisset? Contractus hic ratus, an vero irritus? Subducatur,  
nec



nec ne tantum de pretio, quantum necesse est, ut sua æqualitas servaretur? Quæstio hæc facili negotio definietur, si ipsorum contrahentium voluntas spectabitur. Nam si merx eo vitio laborare detegatur, ut usui prorsus non sit, propter quem empta est: contractus profecto nullus erit censendus, ob voluntatis scilicet defectum in emptore, qui sane empturus non fuisset, si vitium istiusmodi cognovisset. Contra vero si merx, quamvis vitiosa, usum tamen aliquem præbeat; tunc enim rata esset venditio, & actione quanti minoris tantum ageretur, quum jus naturæ nolit aliquem cum alterius damno locupletari.

Verum non abs re fuerit huc afferre eam quæstionem, quæ priscos Philosophos, quum de utili, & honesto agerent, in partes diversas discidit: nempe, an venditor honestate servata, possit conditiones celare, quæ quamquam merci non inhæreant, patefactæ tamen pretium minuerent. Nempe confert se quis Romam ad vendendum frumentum, sciens naves bene multas in cursu esse, quæ frumentum advehunt; quarum adventu frumenti pretium vilesceret; an id emptori a venditore patefaciendum? Aiebat Antipater; negabat Diogenes ejusdem magister, magnique nominis Stoicus, ut Cicero memoriæ prodidit lib. 3. de officiis cap. XIV. At mihi Diogenis sententia arridet. Injustum quippe minime est, non detegere emptori id, quod mercem ipsam non attingit. Num enim hoc pugnat cum ejus jure, qui cum negotium est? Quum venditor dicere potuerit, (ut de ejusdem Diogenis sententia scribit Cicero): *Adveni, exposui: vendo meum, non pluris, quam ceteri: fortasse etiam minoris, quum major est copia; cui fit injuria?* Sed porro pergamus.

Quum autem jus naturæ præcipiat inter contrahentes æqualitatem servari, cur Pomponius respondit, licere naturaliter contrahentibus se invicem circumvenire? Num naturæ jus indulget aliquando fraudi, quod ubique jubet bonam fidem servandam? Mirum est quot, & quanta in hoc Pomponii responso excogitaverint Interpretes, quorum longioribus commentariis missis, brevi rem sic expedio. Commericii favore condonanda est illa læsio, quæ tantula sit, ut ex conjecta

E

con-

culentissimum veluti exemplar proponam, ex quo leges etiam istiusmodi a puris fontibus repetendas, quivis intelligat.

Jus naturæ in contractibus onerosis id precipit, ne quid voluntati contrahentium dissentiat, nec non facta testis semper fervetur æqualitas; atque hoc tum ex illa contrahentium voluntate, præter quam omnia in cassum fiunt, quam ex natura ipsiusmet contractus, exploratissimum est. Qui enim dat, ideo dat, ut tantumdem ab altero recipiat. Qua de re manifeste sequitur, in emptione venditione exactam inter contrahentes intercedere vicissim æqualitatem, scilicet re pretio, & pretio ipsi rei omnino respondente: spectatis tamen rei ipsius qualitatibus, ratione nempe habita ipsius contractus conditionum, quæ vel augent, vel minuunt rei pretium. Verum ne credas æqualitatem hanc in solis rebus spectari; nam & qualitas sive physica, sive moralis contrahentium, & modus ipse ineundi contractum in trutina poni debet, ut plane perspiciatur, intercesserit ne inter eos in contrahendo æqualitas, nec ne. Ad qualitates contrahentium spectat, si major cum minore contrahat, sanus cum furioso; ad modum vero contrahendi, si alter necessario contrahat, alter autem libere. Itaque ex his omnibus colligitur, contractuum æqualitatem, jure naturæ attento, in rebus ipsis, in personis contrahentium, atque in ipso contrahendi modo versari. Atque hæc, quibus sane parere debemus, naturalia, & simplicia principia ponenda statui, ut Pragmaticorum hac de re quæstiones facile, atque enucleate solvantur. Age vero rem pressius videamus, & experiamur, quam expedita omnia sint, si a jure naturali arcessantur.

Dixi quidem rem debere esse æqualem pretio. Ea de causa necesse est, ut venditor rei venditæ vitium, non obscure, & per ambages verborum, sed aperte, distincteque aperiat: minoris enim res emta fuisset, si ejus vitium palam fecisset. En igitur contractum irritum, ex non servata æqualitate. Sed quid si contractu perfecto, ejus detegatur conditionis res empta, ut licet, quo tempore contractus initus est, ab ambobus vitium ignoraretur, si tamen patuisset, minoris steterisset? Contractus hic ratus, an vero irritus? Subducatur,  
nec

nec ne tantum de pretio, quantum necesse est, ut sua æqualitas servaretur? Quæstio hæc facili negotio definietur, si ipsorum contrahentium voluntas spectabitur. Nam si merx eo vitio laborare detegatur, ut usui prorsus non sit, propter quem emptæ est: contractus profecto nullus erit censendus, ob voluntatis scilicet defectum in emptore, qui sane empturus non fuisset, si vitium istiusmodi cognovisset. Contra vero si merx, quamvis vitiosa, usum tamen aliquem præbeat; tunc enim rata esset venditio, & actione quanti minoris tantum ageretur, quum jus naturæ nolit aliquem cum alterius damno locupletari.

Verum non abs re fuerit huc afferre eam quæstionem, quæ priscos Philosophos, quum de utili, & honesto agerent, in partes diversas discidit: nempe, an venditor honestate servata, possit condiciones celare, quæ quamquam merci non inhæreant, patefactæ tamen pretium minuerent. Nempe confert se quis Romam ad vendendum frumentum, sciens naves bene multas in cursu esse, quæ frumentum advehunt; quarum adventu frumenti pretium vilesceret; an id emtori a venditore patefaciendum? Aiebat Antipater; negabat Diogenes ejusdem magister, magnique nominis Stoicus, ut Cicero memoriæ prodidit lib. 3. de officiis cap. XIV. At mihi Diogenis sententia arridet. Injustum quippe minime est, non detegere emtori id, quod mercem ipsam non attingit. Num enim hoc pugnat cum ejus jure, qui cum negotium est? Quum venditor dicere potuerit, (ut de ejusdem Diogenis sententia scribit Cicero): *Adveni, exposui: vendo meum, non pluris, quam ceteri: fortasse etiam minoris, quum major est copia; cui fit injuria?* Sed porro pergamus.

Quum autem jus naturæ præcipiat inter contrahentes æqualitatem servari, cur Pomponius respondit, licere naturaliter contrahentibus se invicem circumvenire? Num naturæ jus indulget aliquando fraudi, quod ubique jubet bonam fidem servandam? Mirum est quot, & quanta in hoc Pomponii responso excogitaverint Interpretes, quorum longioribus commentariis missis, brevi rem sic expedio. Commercii favore condonanda est illa læsio, quæ tantula sit, ut ex conjecta

E

con-

contrahentium voluntate remissa intelligatur. Quando enim esset litium finis, si ob læsionem vel minimam, contractus ad irritum caderent? Fit igitur commercii gratia, ut contrahentium voluntatem ita interpretemur, ut modica læsio remittatur ex ipsamet contractus vi, per quam id agitur, ut venditor pluris venditet, emtor vero minoris emat; atque hoc est, quod per vocem *naturaliter* a Pomponio præfertur, scilicet singularis illa proprietas, & natura emtionis, venditionisque contractus, in quo ita contrahentes sese gerunt.

Itaque tum ex naturali hujus contractus proprietate, quam ex causa avertendarum litium, factum est, ut contractus hic non rescindatur, nisi ob læsionem ultra justii pretii dimidium, ut habemus in *l. 2. C. de rescindenda venditione*. Sed quando huc incidimus, ubi acerrimis contentionibus inter se doctissimi quique digladiantur Interpretes, videamus & nos, an quæstio, quæ prima quidem facie tenebris videtur obducta, puris putisque juris naturalis principiis dirimi possit. Scilicet tota concertatio huc redit, num legis hujus indulgentia utrique contrahenti, nedum venditori tantum profit. Magnus Cujacius, qui sane instar omnium est, unum venditorem beneficio hujus legis juvari contendit, neque id ad emptorem proferri, quum ingens inter utrumque discrimen intercedat. Sed quantum a vero vir præclarissimus aberrat, naturalis ratio nos docet; nam licet emptor, ac venditor in causa contrahendi longe inter se distent, quum alter plerumque ob rei domesticæ angustias vendat, alter vero ad augendas res suas emat: ambo tamen ad id unum attendunt, ut quod æquum est, sibi quisque paret, venditor scilicet pretium rei æquale, & emtor ex adverso rem, quæ ipsi pretio respondeat. Qua de re quum uterque eundem respiciat finem, nimirum æqualitatem rei, & pretii: utrique æquum jus statuendum fuit. Atquæ hæc de æqualitate servanda in rebus; transeamus porro ad eam, quæ in ipso contrahendi modo, atque in personis ipsis contrahentium spectanda est.

Quum contractus liberæ hominum actiones sint, seu actus voluntarii; atque actus voluntarius non solum a voluntate, ve-

verum etiam a recta ratione proficiscatur : hinc sequitur, in ipso etiam contrahendi modo necessariam esse æqualitatem, ut ambo scilicet sint mentis compotes, & voluntatis libertate gaudeant, hoc est intelligant, velintque id quod agunt. Sed sic etiam homini deesse voluntarium censetur, si dolosis consiliis, fallaciisque ductus, contractum ineat; adeo ut veluti per insidias captus, bene sibi consuluisse putet, dum jacturam rerum suarum facit. Hinc regula probata est, jure naturæ contractum dolo initum frustra esse. Non tamen ignoro, jus civile secus statuisse, nempe istiusmodi contractum jure ipso valere : exceptionis tamen ope infirmandum, ea adhibita distinctione, dolus ne inciderit, an vero dederit causam contractui. Sed hoc civili rationi, quæ litium ambages, quantum fieri potest, averfatur,tribuendum est, non vero naturali juri; nam quum dolus sive incidens, sive causam afferens contractui, mentem decipiat, atque ideo voluntatis consensum auferat, a quo veluti naturali principio actus voluntarius manat: contractus hic, quomodocumque dolose initus, pro nullo habendus est, utpote natura sua destitutus.

Verum mens animusque non semper alieno dolo, atque insidiis intercipitur, quum sæpe decipiatur aliquo naturæ vitio, veluti furore, ebrietate, vel pupillari ætate. Quare si cum hominibus hisce vitiis laborantibus contrahatur, hi contractus plane irriti quoque erunt, quia judicii non intercedit æqualitas. Sed quid de obligatione minoris? Pollet quippe hic judicii vi, licet ea tanta non sit, prout in majori ætate. Erit ne ejus obligatio firma, & constans? Hic publici juris interpretes controversiam dirimendam autumant ex ipsamet minorennis consuetudine. Videndum enim qua se in rebus domesticis prudentia, & sagacitate gerat; nam si bene, sapienterque rebus suis consulat, legitimam ejusdem obligationem pronunciant: si secus, infirmam asserunt; culpæque tribuendum, quod contractum sit cum adolescente inconsulto, atque imperito magis, quam cum frugali, & constanti viro.

Sed sicuti mens errore, dolo, insidiis, vel aliquo naturæ vitio circumveniri potest: ita voluntatis libertas necessitate aliqua, vel metu illato coacta impeditur, ne facias, quod

velis, atque urgetur, ut agas, quod nolis; propterea juris naturalis regula hæc est, contractum initum necessitate, aut metu contrahentibus illato, ex defectu voluntatis esse nullum. Haud me quidem præterit, juris civilis peritos prope inter se congruere in hoc, scribentes contractum hunc ratum esse jure, & tantum exceptionis ope vi sua deturbandum, ea sane permotos ratiope, quod, quum voluntas coacta voluntas etiam sit, contractus rite per eam perfici possit. Sed hæc eorum nimium subtilius excogitata ratio, ex Stoicorum quidem deprompta est penu, non ab ipso naturæ jure deducta. Hoc enim quum constantem usque æqualitatem præcipiat in contractibus, ita ut omnia æqua semper lance procedant: obligationem nullam agnoscit, nisi a libera utriusque voluntate gignatur. Quod quum ita se habeat, num quis probabitur contractus, ad quem ineundum alteruter non nisi vi, & metu adigitur? Si metum inferenti jura faverent, actionemque licet exceptioni obnoxiam darent, non præmium is ex fraude sua referret, verum & sublata omni æqualitate haberemus contractum sine alterius voluntate. Itaque quum in contractu per vim, & metum inito, ab altera parte desit voluntas, atque adeo deficiat illa æqualitatis ratio, quam naturale jus in hac re, quam maxime præcipit; nihil ab origine sua erit ratum, sed omnia frustra, omnia irrita. Vide ex his, quanta lux civilibus legibus ab jure naturæ adfunditur.

## §. III.

*De lege Rhodia.*

**H**Actenus quidem, insitarum veluti rationum momentis, ostendimus, quam fulgentissima juri civili fax sit jus naturæ. Nunc vero, ut res luculentius appareat, exemplis id ipsum comprobabimus. Sed cogitanti mihi, quid in jure civili perplexum magis sit, quod tamen juris naturalis ope extricari possit, statim quidem lex occurrit ad legem Rhodiam de jactu; ad cujus sane interpretationem quot quantaque cumulaverint Cujacius, aliique integrioris judicii Doctores,

res, mirum est; sed in cassum profecto omnia, quum in ejus mente exploranda jus publicum ab historia sejunxerint. Ad rem igitur & nos accedamus.

Eudæmon Nicomediensis mare Ægæum, & Icarium per scopulosa, & infesta admodum ingressus, navim mercibus onustam misere fregit. Jactata itaque res procellarum vi ad maris littora, fuerunt direptæ a servis publicis, qui Cycladum insularum maritimæ custodiæ erant addicti; sed ille hac de re apud Imperatorem Antoninum conquestus, ut sibi res suæ restituerentur, supplex petit. Responsum autem accepit, negotium hoc maritimum ex lege Rhodia definiendum, quatenus nulla Romanarum legum adversetur. Hic Cujacius responsi rationem vestigans in adnotationibus ad Paulum *receptar. sentent. lib. 2. tit. VII. ad legem Rhodiam*, satis habuit scribere, recte ita respondisse Antoninum, quoniam tacito tunc omnium consensu, quotquot de re maritima inciderent quæstiones, legibus Rhodiis definirentur. Noverat vir fumus, quantæ turbæ, inter doctos tunc temporis viros, excitatæ erant de dominio maris. Quare ne se quoque in has tricas conjiceret, satius duxit nobis obtrudere, legem Rhodiam maritimum imperium usurpasse. Sed quum lex hæc superiori sæculo viros egregios exercuerit, atque inter hos Hugonem Grotium, & Joannem Seldenum, non abs re puto futurum, si & nos pro virili in ea enucleanda, causam ante omnia exquiramus, quapropter primævi homines a rerum communione recesserint; quum ex hac rerum divisione non modica lux huic de dominio, & imperio maris quæstioni adspargatur.

Priscos olim homines in rerum communione vixisse, res est tam veterum, quam recentium opinione usurpatum. Sed eorum aucta multitudine, communis hæc vitæ consuetudo explosa est, ne si inter se omnia communia essent, quum haud omnibus pro cujusque cupiditate satis esse viderentur, usus cuiquam tandem deficeret. Stabilibus his jactis fundamentis, nempe prisca rerum communione, & earum deinde divisione, ne cui quid deficeret, si illa communitas, & societas vitæ permanisset: controversiam hanc ceterum perdificilem, ac perobscuram de maris dominio, facile, meo quidem judicio, dirimemus.

Sunt

Sunt quidem in mari commoda sexcenta, nec sane exigua, quæ juris publici peritis placuit alia exhausti usus, alia vero inexhausti nuncupare. Quumque hæc non possint deficere, si sint indivisa, illa vero contra: colligendum ex primorum hominum mente, mare non fuisse alieno dominio subiectum, nisi earum utilitatum causa, quæ exhausti usus appellantur. Nam quis sanæ mentis sibi persuadeat, maris dominium per primos homines usurpatum, eaque communia naturæ commoda aliis omnibus per injuriam prærepta, quæ profecto per usum quemcumque exhauriri nequeunt? Non ne ita suspicari naturalis ipsa ratio vetat?

Verum nolim te fugiat, discrimen hoc usus exhausti, vel inexhausti, nonnisi suscepto maritimo commercio investum. Tunc enim quo tutius, aptiusque iter per cujusque regionis mare pateret, tantum maris cujusque gentis usui statutum, quanta ejusdem regionis ora ipsa esset, quæ a fluctibus abluatur. Præscripto hisce finibus maris dominio, coepit deinde de eo statui imperium, tum ut una quæque gens jura commercii conderet, tum ut crimina in mari patrata puniret. En igitur solutam quæstionem hanc de dominio, & imperio maris secundum publici juris dictata. Sed heic evellendus scrupulus, qui cuique injici fortasse poterit, num in dominio, atque imperio erit mare, quod neque totum, neque per partes potest possideri? Anne possideri poterit, quod usque fluit, & labitur, quodque ne puncto quidem temporis manet idem? Verum non est, cur ad dominium acquirendum rei possessio per omnes partes desideretur; satis enim erit, si per partem possideatur, neque profecto aquarum fluxus possessioni huic maris impedimento erit; quandoquidem nec eadem impedit, quominus flumina dominio subjiciantur. Atque ex his habes jam, nisi me ratio fallit, quæstionem, salebris quamvis horridam, in viam apertam deductam. Sed quid hoc ad legis intelligentiam? Maxime inquam; nam sine maris dominio, quod ex jure naturæ inveniendum erat, maritima nulla lex esse potest. Non ne frustra de lege Rhodia sermo esset, si nulla Rhodiis potestas fuisset, leges de maritimo commercio ferendi? Sed penitus legem ipsam inspiciamus: & quoniam supra tradi-



didimus juris naturæ scientiam cum rerum historia copulandam, ad jus civile plane intelligendum: historia ipsa ejus legis enarranda ante omnia est, ut ex ea cum naturali jure conjuncta, omnia feliciter procedant.

Rhodii ob rei maritimæ cognitionem, qua maxime excellebant, prisca jam inde ex memoria, leges bene multas condiderunt, quibus nautica omnia, & quotquot in mari contingerent, controversiæ, deciderentur. Verum illarum legum exolevit usus, postquam Romana Respublica Rhodios in sui potestatem redegit. Sed Imperator Claudius libertatem iis restituens, voluit pristina jura sua de re maritima restituta, quæ adeo ei æqua visa sunt, ut jusserit item controversias omnes, quæ inter ipsos Romanos de negotio maritimo oriebantur, secundum Rhodias leges dirimi.

Ita re a Claudio constituta, certi juris erat, controversiam Eudæmonis, quum esset de re maritima, ex Rhodiis statutis definiendam fuisse. Sed cur Eudæmon hic supplicibus precibus ab Antonino petiit, ut sibi bona sua post naufragium ad litus ejecta, atque a publicanis direpta, restituerentur? Non ne ipse Antoninus legem vulgaverat, ut furti poena tenerentur, qui hujusmodi bona occupassent? Hinc Eudæmon de hac re apud Provinciæ Præsides quum potuisset vindicias postulare, quæstio enascitur, cur his prætermis, ad Principis confugerit oraculum. Id enim tum licuisset, quum res esset anceps adeo, ut inter jus, & æquitatem opus esset interpretatione; ac neque ex verbis legis, neque ex mente ejusdem posset quid certi definiri (a). Quod hic quidem opus non erat, quum, ut superius tradidi, res ex constitutione ejusdem Antonini explorata satis esset, ex qua furti poena tenebatur, qui hujusmodi bona mari submersa occupasset. Verum hic rursus opus est historia.

Tradiderunt Plinius, alique veteres Scriptores (b) Nicomediam ob commercium maritimum fuisse Urbem principem totius Bithyniæ; atque inde mercatores solventes per  
Ægæum

(a) *L. 2. C. de leg. & tit. de relatio. Cod. Theod.*

(b) *Strabo lib. X. & XIV. Plinius lib. IV. cap. 2.*

Ægæum, & Icarium mare in Delum insulam metropolim Cycladum, se conferre. Verum quum hæc loca ubique scopulis, syrtibusque impedirentur, prædonibusque undique paterent, utpote opulentis vectoribus frequentissima, necesse fuit portus construere, quo mercatores tempestatibus acti confugerent, & militares custodias, ut ab excursionibus prædonum securitas pararetur. Qua de re quum hæc omnia fieri non possent, nisi ingenti pecunia per unamquamque Civitatem erogata: idcirco institutum fuit, ut a mercatoribus vectigal, portoriumque aliquod exigereetur. Sed quoniam lex Rhodia vectigal illud solvendum jufferat indefinite, eadem lex visa quidem fuit complecti adhuc speciem, si quando mercator suarum mercium per naufragium pateretur jacturam. Hac sane de causa publicani Eudæmonis bona pignoris loco abstulerant, nempe ut vectigal illud pensitaretur. At vero isthæc lex, sic universim intellecta, cum æquitate naturali pugnare videbatur. Cur enim vectigal illud pendendum ab eo, qui lucrum nullum de mercibus suis referret?

Qua de re Eudæmon non Principem rogavit, ut res sibi suæ restituerentur, quarum nulla sane erat controversia: sed tantum ut vectigal illud sibi indulgeret, quod ex verbis ipsis nimium quidem generalibus legis Rhodiæ servi Civitatis exposcebant. Nam sive tributum pro mercibus maritimis pensitatur, ut scilicet mercatoribus tutum per mare iter pareretur: sive quia æquum est, ut qui a mari dominio meo obnoxio lucrum percipit, de lucro ipso, usu rei meæ ei obveniente, mihi symbolam conferat: nequaquam sane par erat, ut Eudæmon vectigal penderet, quando lucellum nullum ex mercatura sibi fecerat; imo potius damnum maximum ab naufragio retulerat. Qua de re quum lex scripta cum naturali ratione confligeret, Eudæmon ad Principis confugit oraculum, ut publicani ei restituerent bona sua, nullo penso vectigali, quod licet lex scripta jubere videretur, manifeste tamen æquitas ipsa renuebat. Itaque Princeps respondit, lege id Rhodia judicandum, quatenus jus Romanum non adversaretur; hoc est, ut Eudæmon jus suum persequeretur apud Provinciæ Præsides, qui, jure Imperialium Con-

Constitutionum suadente æquitate, abrogabant omne id, quod vel a lege Rhodia statutum parum humanitati videretur consonum: vel ab eadem non adhuc expresse definitum, sed interpretatione institutum, tamen ab ipsa æquitate recederet. Nam licet fuisset ea lex a jure Romano comprobata: in speciebus tamen, in quibus videretur iniquior, jus Romanum servandum erat. En igitur quantam vim habeat juris publici scientia, atque historia. Horum sane ductu, atque auspiciis legem densa caligine obductam, splendidissima luce illustravimus. Propterea copuletur oportet scientia juris naturalis, & rerum historia, ut ratio civilis e sua scaturigine depromatur. Dum hæc scribimus, in lucem prodiit egregium opus Stephani de Ferrante, qui universum jus naturale Poemate elegantissimo contrahit; ex cujus lectione plura scitu sane digna comparari possunt.

## C A P U T II.

## §. I.

*De civili Romanorum Imperio.*

**H**Ætenus rationibus, atque exemplis necessitatem juris publici ad scientiam juris civilis comprobavimus. Nunc vero subsidium alterum aggredimur, nimirum quod omnium est maximum, hoc est cognitionem civilis regiminis formæ; cui sane jura quam maxime congruere, neminem præterit. Itaque quum jus Romanum e suis fontibus haurire animo constituerim, id omnino est necesse, ut ex vetustatis latebris eruam Romanæ Reipublicæ formam; ut ea adprobe illustrata, possim ejus ortum, & progressum, veluti a prima origine deducere; atque hinc convenientiam promere, quam civilia jura cum forma regiminis Civitatis habent. Neque enim Romanum jus sub Regibus explorari ullo pacto potest, nisi prius formam Romanæ Reipublicæ sub eisdem Regibus sedulo perquiram. Verum quum hæc Imperii Romani forma, de qua nunc nobis sermo est, prima fuerit, sub qua Romana Civitas, velu-

ti ab incunabulis suis coorta: hinc opus est aliqua universim de origine Civitatum, de multiplici earumdem imperio, ac de legibus societatis præfari; ut per harum rerum notiones, veluti per quosdam fontes, lector possit causas Romani juris attingere, atque adeo congruentiam illam pernoscere, quam priscum Romanorum jus habuit cum forma ejus regiminis, quod per Reges conditum fuit, atque institutum.

Priscos homines in statu naturali, per familias seorsum vitam suam egisse, neminem latet. Verum recesserunt ab eo vivendi genere, statim ac fuerunt numero aucti; nam quum alii in alios dominari, sibi que invicem naturalem libertatem eripere vellent: hinc profecto contentiones suscitatae sunt, hinc mutuae caedes, stragesque. Quare quum nemo ab alterius insidiis tutus esset, remedia excogitarunt, quibus pax tandem repararetur, & sua cuique libertas facta testata servaretur. Sed præsidium nullum sibi tutius occurrit, quam vires suas mutuo conjungere, quibus adversus aliorum cupiditates se se munirent; quare statu naturali relicto, alter alterius poscentes opem, amice conjurarunt, ac veluti in corpus unum coivere; atque hinc primarum Civitatum origo. Verum quia nulla civilis societas potest diu manere, si unicuique civium jus esset facere, quod ipse privato consilio, bono publico existimaret conducere, quum diversitas judiciorum, & voluntatum conflictus inter homines impedimento sint, quo minus res ad liquidum perducantur: hinc prisci illi homines, qui Civitates efformarunt, vires, voluntatesque suas concorditer sociatas uni subdidere, ut illius voluntas talis haberetur, ac si esset totius Civitatis; omnesque exequi tenerentur, quod ille præciperet, ob publicam utilitatem. En igitur quomodo ex hac virium, atque voluntatum conjunctione civile imperium obortum fuit. Quoniam vero aut ab uno, aut a cuncta Civitate in concilium coeunte, aut a paucioribus potest exerceri Imperium: perspicuum est in tot species distribui civilem imperii formam, quot scilicet sunt modi, quibus Civitas regi potest. Itaque si unus sit, qui imperet in Civitate, regimen ejus erit monarchicum, si pauciores aristocraticum, si vero universa Civitas per comitia congregata rem publicam gerat, democraticum appellabitur.

Ex

Ex his, quæ hætenus diximus, jam habes civilis imperii originem, ejusque formas varias. Expendendæ nunc sunt rationes, quibus condita jam Civitas longissimum in ævum perdurare possit, ac vivere, quantum humanarum rerum conditio patitur. Quemadmodum corpus humanum tunc sanitate pollet, quando ejus membra capiti congruunt: ita civilis societas tunc ad optimum statum adducitur, quum in communem aliquem sensum Cives conveniunt, scilicet ut communem singuli utilitatem propriæ cujusque præferant; illumque teneant pro bono publico vivendi modum, quem Princeps præscribit, imperatque. Sed quum hominis voluntas non possit, nisi aliquo externo signo dato innoscere: hinc necesse est, ut Princeps hanc suam voluntatem, latis legibus, subditis ostendat. Ex quo fit, ut leges civiles nil aliud sint, quam ipsius Principis voluntas explicata pro norma, quam in vita civili Cives debeant persequi.

Verum quum hæc communis utilitas pendeat a forma regiminis Civitatis, atque in hoc potissimum versetur, ut moralis civium vita imperii formæ congruat adeo, ut aliud illa non sit, ac ipsummet civile imperium, per actiones morales civium obsequentium explicatum, atque exercitum: hinc prono alveo deducitur, non posse intelligi prorsus civilia jura, nisi a forma imperii ea solemter depromantur, quum nil aliud sint, inquam, præterquam ipsissimæ Civium actiones, formæ civilis regiminis ad amissim accommodatæ.

Qua de re errant quam maxime, qui credunt posse scientiam juris civilis assequi, non explorata prius forma imperii, quod in Civitate viger. Verum quum Imperium possit esse multiplex, nempe vel democraticum, vel monarchicum, vel aristocraticum, atque adeo jura civilia alia alii formæ aptentur: sequitur ex hoc, sicuti superius laudatæ Imperii formæ differunt inter se quam maxime, ita civiles leges, quæ sub unaquaque civilis regiminis forma conduntur, longe inter se distare. Itaque in legibus exteræ alicujus Reipublicæ usurpandis, atque ad nostram transferendis, videndum ante omnia, solemterque investigandum, historia duce, an in forma regiminis ambæ conveniant. Absurdum enim est ea jura,

quæ in Reipublica democratica condita sunt, aptare litibus dirimendis, quæ in Civitate aristocratica suscitantur. Nam non esset hic legum usus conducibilis, attenta legislatoris mente, atque ipsarum ratione, sed confusio potius omnium maxima legum, ad contraria detorquens sensum, ac perversens rationem. Hinc quum Romana Respublica civilibus dissensionibus mota & agitata, per omnes imperii formas decucurrerit: jure merito a doctioribus interpretibus admoneatur, ut Romana jura per sua quæque tempora sedulo expendamus, ut inde illorum congruentiam cum forma imperii, sub quo fuerunt instituta, intelligere possimus. Quod ut magis pateat, compertumque reddatur, de statu Romanæ Reipublicæ breviter aliqua præmittamus, quæ sane frugis maximæ erunt iis, quæ infra dicturi sumus.

Sane res Romana quum creberrimis fuerit agitata motibus, nil mirum si aliis temporibus, in alias Reipublicæ formas, assidua mutatione migraverit. Orta enim Respublica sub regimine unius, atque a Romulo in summa juris æqualitate, concordiaque ordinum constituta, perque manus Regum insequentium, ad Tarquinium superbum usque traducta, sub hoc postremo decidit in tyrannidem; quo de statu per Brutum, & Valerium consules erepta, tradita sapientissimo consilio fuit Optimatum, sub imperio consulari a Patriciorum tantum ordine suscipiendo. Verum paulo post plebs Reipublicæ partem, a Patriciis ad se convertere civilibus seditionibus tentavit. Unde alios, atque alios in diem, per Tribunicium furorem, honores appetendo, Respublica adeo fuit perturbata, ut Consolatus etiam, sacrorum, itemque cum Patriciis connubiorum, atque ipsius Dictaturæ facta fuerit particeps. Qua de re quum plebs patribus par in muneribus esset, numeroque superior videretur, facile fuit, ut vel senatum in suam adduceret potestatem: ex quo sane oborta bella quamplurima civilia sunt, Optimates inter, & populares, quæ Rempublicam misere lacerarunt. Horum autem causa illa quidem pretendebatur, ut communis libertas incolumis maneret; sed revera sub hoc simulato obtentu, qui plus viriæ haberet, is communem libertatem funditus evertere

tere satagebat. Ita Graccorum factiones, Marii, & Syllæ, Cæsaris, & Pompeii Rempublicam vexarunt, irruentes in eam, veluti in prædam hostilem, quæ ad sedanda, visa tandem fuit magis e Reppublica dominatio unius; ut civium impotentium cupiditas coerceretur, quorum factionibus libertas everti, atque labefactari videbatur. Itaque res tandem devenit ad unum, scilicet ad Octavianum Augustum, qui sub nomine Principis accepit Imperium, & prudentia sua cuncta discordiis civilibus fessa componens, publicam usque adhuc exagitata restituit tranquillitatem.

Hinc sane, si jus civile a forma imperii depromendum: habueritque Romana Respublica alias aliis temporibus formas imperii: fatendum est ad intelligendum jus Romanum, necessariam apprimè esse historiam, non illam quidem, quæ, nulla temporum habita ratione, res enarret: sed eam profecto, quæ per sua quæque distributa tempora legum causas promat; nempe quo tempore, quo in Reipublicæ statu, ob cujus dominatum augendum, vel minuendum, ad quos Populi mores corrigendos, cujusnam potentia ut coerceretur, neve ex Patriciis quis, aut ex plebeis Reipublicæ potiretur, lex fuerit perlata. Ita enim his præmissis, leges expendendo, non verba tantum, sed mentem earum, rationemque tenebimus.

Verum non solum Imperii Romani forma, instituta sub Regibus, procedente tempore sub Consulibus ad maximas incidit vicissitudines, sed etiam penitus fuit immutata sub Augusto, Constantino, ac Justiniano. Sub Augusto quidem ob institutam monarchiam, licet specie pristinae libertatis restituendæ Civibus: sub Constantino deinde ob labefactatam paganorum philosophiam, cui primævum Romanorum jus innitebatur; sub Justiniano demum, qui omnia prope nova, Triboniano Duce, in jus civile invexit. Propterea mihi ex forma Romani Imperii jus civile exploranti, necesse maximopere est, ut vicissitudines Romani juris, pro varia Imperii forma ostendam, percurrendo jurisprudentiam illam, quæ fuit sub Regibus primum, deinde quæ invaluit sub Augusto, tum quæ sub Constantino inolevit: postremo illam, quæ fuit per Justinianum instituta; ut ex his omnibus

Ro-

Romani juris varietatibus colligat lector, civilia jura formæ imperii adeo congruere, ut ejusdem forma mutata, necesse quam maxime fuerit & aliud jus condi; atque oboriri.

§. II.

*De forma Romanæ Reipublicæ a Romulo instituta,  
ejusque jure.*

Quænam fuerit forma Romanæ Reipublicæ a Romulo statuta, ob rei vetustatem, haud facile est definire. Qua de re circa hoc dicam, quæ doctissimus rerum antiquarum Halicarnassæus posteris scriptum reliquit, ut ex his possimus aliquid, saltem conjectura verisimili, assequi. Itaque Romulus quum multitudinem quamdam, imo potius colluviem ex omni hominum genere, liberorum scilicet, & servorum, nobilium, & rusticorum potissimum, pauperum, & divitum, coegisset, eam imperii formam condidisse opus fuit, quæ agresti illi maxime hominum generi posset optari, non vero eam, quæ sane fuisset omnium pulcherrima, qualis est Monarchia, quæ a Platone præ ceteris imperii formis commendatur. Subdit autem idem Auctor, Romulum Thesei exemplo, qui omnium prior Populum Atheniensem ad Civitatis formam redegit, Romanum Populum in tres partes divisisse, easque postquam in triginta Curiâs partitus esset, earumque cujusque instituisset principem, Decurionem nuncupatum, ex cura, quam in suam quisque curiam haberet, iisdem ostendisse quos Deos colere deberent. Addit patricos, & plebeos inter se longo intervallo sejungisse: istis colendas distribuisse terras: illis vero Reipublicæ honores omnes, civiles nempe, & militares, sacros, profanosque contulisse, vetando ne horum ullo modo plebs particeps fieret.

Verum quia in omni Civitate par est, ut sit senatus nempe Concilium, ex sapientioribus inter cives, atque in re civili, post varios initos magistratus, peritioribus coactum, quod veluti mentem, & rationem in rebus gravioribus Civitas consulat: hinc Romulus, ut & ipse Halicarnassæus scripsit, concilium hujusmodi instituit, in quod solos Patricos cooptavit, quos



quos tamen voluit esse selectos per suffragia Curiarum, quarum sane unaquæque ex seipsa tres deligeret. Hujus Senatus Romulus seipse Principem fecit, præcepitque ut in eo omnia negotia publica agerentur, nihilve referretur in comitiis ad Populi judicium, nisi Senatus præcessisset authoritas. Porro juris dicendi potestatem, sive de re pecuniaria, sive de plectendo crimine, sibi ipsi excepit, vel Senatu, vel Populo comitante, vel etiam per se unum agendo, quoties ita expedire judicaret. Hisce omnibus addit, sententiam suam, sive apud Populum, sive in Senatu de quacumque re prolatam, prærogativam ferre, quum ipse esset jam Senatus Populique Princeps. Itaque a Romulo distributis honoribus, judiciorumque forma præscripta, reliquum erat, ut statueret de jure ferendi leges, creandi Magistratus, indicendi bella, aut pacem conciliandi. Horum omnium potestatem ipsi Populo in comitiis a Romulo fuisse collatam, narrat auctor laudatus.

Ex quibus omnibus, a Romulo institutis, possumus colligere, quænam fuerit forma Romanæ Reipublicæ, quam ille condidit. Quoniam igitur jus creandi Magistratus, ferendi leges, componendi pacem, vel bellum inferendi, partes præcipuæ sunt absoluti, & summi Imperii: hinc quemadmodum si id in uno Principe, aut in pluribus residebit Imperium, foret monarchicum, aut aristocraticum, ita dicendum democraticum, quoties ab ipsa Populi multitudine, veluti in corpus unum coacta, exercetur. Quum igitur Romulus tantam potestatem Populo in comitiis congregato detulisset, in proclivi est colligere, Rempublicam democraticam eum condidisse. At inquires, quum ex Romuli institutione unis Patriciis munera omnia publica, atque honores deferantur, quod est Reipublicæ aristocraticæ: nequaquam dicendum democraticam eandem esse, qua ex adverso, nulla habita generis, aut opulentiae ratione, Patriciis æque, ac plebeis regimen civile impertitur. Fateor hoc ita esse; sed ut difficilis hic nodus expediatur, liceat mihi de democratia aliqua dicere, quibus penitus forma Romanæ Reipublicæ sub Romulo, ejusdemque civilia jura innotescant,

Duo sunt democratiae genera, unum nempe democratiae  
mo-

moderatæ, alterum vero mere popularis. De utroque videamus. Civitatis democraticæ mere popularis duæ sunt notæ, nempe ut Cives omnes ex æquo liberi, & in vivendo eum teneant modum, ut unusquisque pro lubitu suo vitam degat. Ex hoc ratio promanat, cur prisca oratores, uti Isocrates, Demosthenes, ipseque Cicero nil optarent magis, quam suorum Civium ex æquo libertatem servari in columen. Quum enim hi scriberent, atque viverent in statu Reipublicæ mere popularis, nil mirum, si inter Cives æqualitatem ad libertatem servandam optaverint; inde enim fiebat ut honorum, & munerum ex æquo omnes participes essent, nulla habita generis, ordinis, status, opulentia, vel paupertatis ratione (a).

Sed juvat me, rei hujus enucleatius explicandæ gratia, quædam de hac Civium æqualitate, in statu Civitatis mere popularis viventium, præfari. Est duplex hæc æqualitas, nempe vel arithmetica, vel geometrica; hæc publicis negotiis expediendis sub imperio democratico aptatur, illa vero onerosis rei pecuniariæ contractibus exequendis respondit. Ceterum si proportio hæc arithmetica, in Civitate democratica circa publica negotia transigenda, per vota Civium adhibeatur, ut quum jus suffragiorum par omnibus esset, atque in singulis quibusque Civitatibus longe plures populares, quam Optimates versarentur: patriciorum vota ab illis plebejorum superarentur; ac proinde penes infimæ fortis homines totum regimen, atque imperium esset. Atque hæc Civitas diceretur mere popularis, ubi nimirum negotia publica per Civium singulorum suffragia expediuntur, nullo habito patricos inter, & plebejos discrimine.

Altera nota Reipublicæ mere democraticæ, sive popularis, est licentia, nempe voluntas illa suo arbitratu vivendi. Si enim servi ideo dicuntur esse in statu servili, quia non suo, sed alieno arbitrio vitam suam debent accommodare: dicendum contra liberos esse, qui ut eis adlubescit vivunt; dummodo tamen hæc eorum vivendi licentia contraria non sit

(a) *Aristotil. cap. 2. politic.*

sit ipsi publicæ honestati. Hinc patet ex dictis, cur Scriptores rerum Imperii democratici definierint libertatem (a) per licentiam vivendi, habentes pro eodem utrumque; quia nempe illi in Imperio democratico erant mere populari, in quo ex æqualitate libertatis oriebatur vivendi licentia, sive æqualitas. Attamen quum procedente tempore, experientia rerum magistra fatis docuerit, quæ, quantaque mala ex hoc liberrimo Civitatis statu progignantur: sapientiores politici vel hanc regiminis formam in primordiis Civitatum longe rejecerunt, vel si illam in Civitate jam formata invenerint, quam maxime conati sunt, ut paulatim, & sensim in melius converterent, scilicet in democratiam moderatam, si monarchiam non valerent instituere. Et merito hoc factitarunt; nam quæ in mala Civitas illa non incidit, labiturque præceps, in qua ita vivitur, ut religiosum, secretumque rerum publicarum arcanum ipsi etiam plebeculæ concedatur? Quam venalia forent judicia, si plebs, & pauperes controversias omnes judiciari sententia ipsi definirent? Propterea Sapientiores legislatores in Imperio democratico adeo se se gerunt, ut jura condant, quibus a statu populari recedatur, condaturque democraticum moderatum. Operæ igitur pretium facturum duco, si modum investigem, quem illi teneant, ut democraticum imperium moderatum instituant.

Sapientissimi igitur viri, ut consilium suum assequantur, seligunt primores Civitatis ingenuos, qui ætate, opibus consilio, auctoritate ceteros antecellant; iis Magistratus omnes, & divinarum, humanarumque rerum, totiusque Reipublicæ curam demandant. Ceteros vero jubent esse plebem, quam rerum publicarum minime participem, abducunt ad agrorum cultum, pastum pecorum, opificia quæstuosa, quam longissime a Civitate: tum ut habeant, quo vitam non inertem agant, tum maxime ut ob curam rei rusticæ, atque itineris longitudinem, perraro in Urbem se conferant, nullusque rerum novarum metus sit. Attamen quia in hac imperii forma, in qua honores solis patriciis conferantur, invidia sæ-

G

pe

(a) Cicero lib. 1. de offic. Plato de legib. lib. ... Hora. lib. 2. saty. 7.

pe atrox inter illos , & plebem solet oboriri : ideo hoc ita sapientes illi definiunt , ut licet honorum minime particeps plebs sit , habeat tamen in honorum collatione suffragium , quo patricius non nisi ex voluntate plebis Magistratus consequatur ; ut hoc veluti libramento quodam plebs , & patricii ad concordiam quoquo modo ducerentur .

Attamen ex hac imperii forma metuimus fane a Patriciis , nec temere quidem ; nam quum illi honoribus , & vi polleant , facillime possunt Civitatis formam , democraticam nempe in aristocraticam avertere , magistratu ipse , qui apud eos unus residet , impunitatem facinoris pollicente . Quod quum Romulus sensisset , non sine consilio instituit , ut publicis in rebus res nulla rata esset patriciorum firmata sententia ; nisi foret deinde a Populo probata in comitiis ; & vicissim ne quid statueret Populus , nisi præiret Senatus autoritas , ut hac injecta æquatione inter plebem , & Nobiles , ad imperii firmitatem , neque hi , aut illa possent res novas moliri .

Verum hæc , quæ huc usque diximus de varia imperii forma , deque mere populari , aut mixta democratia , facillime possunt nos manuducere ad introspectendum , quænam fuerit forma Romanæ Reipublicæ a Romulo instituta . Rem singillatim expendamus . Ille quidem honores omnes Patriciis contulit , licet præcedentibus plebis suffragiis , terras soli Romani ex æquo inter Cives , nempe Patricios , & plebem divisit , præcepitque , ut illæ a plebe colerentur . Jus pacis , belli , legumque ferendarum ipsi populo , in publicis comitiis congregato , exercendum demandavit ; denique nil sanciri in Republica liceret Senatus sententia , nisi id ipsum demum iussum a Populo in comitiis esset . Contra vero nihil referri ad Populi iudicium , nisi Senatus prævissset autoritas . Colligas ex his oportet , formam Romanæ Reipublicæ sub Romulo fuisse imperii democratici , sed tamen moderati . Reliquum modo est , ut expendamus , huic Imperii formæ quænam jura publica , quæ autem privata congruant , ut priscum Romanorum jus a sua origine depromamus .

## §. II.

## §. II.

*De legibus publicis a Romulo institutis.*

**J**Am vero id imprimis facit ad moderatam democratiam (a), ut plebs extra Urbem ad agrorum culturam, ad pastum pecorum, atque alia his similia amandetur, ne intra moenia opificium exerceat. Si enim operi intenta intra Urbem usque versaretur, timor profecto esset, ne res novas moliendo, negotia publica perturbaret. Futurum esset enim, ut & ipsa appeteret honores, quos videret tantum a patriciis iniri. Contra vero agro colendo dans operam, rusticoque labori mancipata, non solum lucro istiusmodi contenta civicos Magistratus non appetet, sed etiam itineris longitudine retardata, atque deterrita Urbem fastidiet; adeo ut ne comitiis quidem indictis accedat ad ea. Quo profecto quid optatius in hoc Respublicæ statu? Quo enim minor plebejorum numerus in ferendis suffragiis, eo superior Patriciorum ordo a comitiis discedit, publicaue quies tutior. Hinc ratio intelligi potest, cur Romulus plebem abduxerit a Civitate ad colendos agros, artesque mechanicas vetuerit; hinc tot tantaque præmia in Rebuspublicis democraticis; hinc tanto honori habita est agricultura, ut patriciis etiam, functis honoribus vel consulatus, solemne fuerit rus se conferre, quo pretium fieret huic vitæ generi, quod amplecti, sectarique optimates ipsi non dedignabantur. Fuit etiam Romæ in more, ut Tribus rustica præferretur Urbanæ. Quod sane tunc factum, quum plebs urbana nimium aucta est, ut ejus numerus minueretur, ne tanta multitudo periculo esset: neve patriciorum quietem interverteret. Hac enim ratione allekti Cives ab Urbe se ultro rus, agri colendi gratia, conferebant.

Sed potissimum ad democratiam pertinet, ut inter Cives, quantum fieri possit, bonorum æqualitas intercedat, ne qui majoribus divitiis, opibusque polleat, communem libertatem evertat. Hinc est, ut in condenda imperii democratici

G 2

for-

(a) *Aristot. lib. VI. polit. Cap. 4.*

forma, rerum æqualis divisio fuerit inter Cives instituta, ac deinceps sæpe nova bonorum divisio iniretur, quoties aliquorum avaritia æqualitas illa intercidisset. Atque hæc ratio est cur Athenis, Spartæ, Romæ, dum democratice vivebatur, adeo de re agraria certatum sit, de usura vetanda, ac de obæratīs levandis. Hac enim via potentium aliquorum opes minuendo, id fiebat, ut Imperii forma democratica aliquantulum delabens, denuo ad pristinum restitueretur. Hinc consulto per legem Liciniam cautum, ne quis ex Civibus, quamvis Patricius, plusquam quingentos terrarum modios possideret; hinc Athenis notati infamia, qui avita prædia venderent (a); hinc in Republica Hebræorum solemne, ut possessiones alienatæ unoquoque Jubilæo ad pristinum dominum redirent. Erant enim hæc omnia remedia præsentissima ad restituendam bonorum æqualitatem, quæ rebus publicis in sua democratiā servandis perutilis, ac fortasse necessaria erat.

Verum quum quæ usque adhuc dixi, ad democratiā puram pertineant, videndum de iis nunc, quæ democratiā moderatam respiciunt. Illius proprium est, ut honores, siue civiles, siue militares, haud omnibus ex æquo conferantur, ut nulla scilicet civium ratio habeatur. Propterea Romulus quum in urbe sua democratiā moderatam instituisset, ad honores tantum Patricios debuit vocare, sicuti sane quidem factum est, præcedentibus tamen plebis suffragiis. Est autem in historia Romana satis vulgatum, quantam hæc honorum petitio solis Patriciis collata, inter hos, & plebem invidiam conflaverit, ut ad motus civiles sæpe sæpius ventum sit, clamante illa ex tot tantisque bellis, inter duros labores, & vulnera feliciter confectis, nil aliud, quam tenue satis stipendium referre; utilitatem autem omnem, & commoda unis patriciis cedere. Sed verosimillimum est hoc Romulum præsensisse. Quare juvat intueri, quam rationem iniecit ad hanc invidiam plebis demulcendam. Etenim quum ea sit amicitiae, & concordiae ratio, ut inter amicos odium avertatur: propterea Romulus anaisus est, ut inter Patricios,

(a) *Aristotil. loco cit.*

cios , & plebem summa , ac non intermissa intercederet amicitia . Quamobrem inter hanc atque illos patronatum instituit , cujus vi plebs Patricios coleret , eisque singulis anni temporibus munuscula quædam grati , & obsequentis animi veluti symbola daret . Patricii vero eam ab injuriis defenderent , rebusque urgentibus juvarent . Quod sane Romuli inventum , saltim per aliquod tempus , perutile visum est Reipublicæ ; videns enim plebs Patriciorum auctoritatem in sui præsidium verti , æquo animo ferebat , ut Patricii domi militiæque honoribus fungerentur .

Hæc sunt , quæ dicere habui , de prima forma Romanæ Civitatis . Ceterum quia jura formæ civilis regiminis aptantur , nunc progreditur oratio ad promenda jura tam publica , quam privata , quæ Romulus condidit , apta quidem regimini civili a se instituto . Sed quum regiminis forma , atque jura civilia pro gentis moribus juberi debeant , dicendum aliquid de Romanorum per id tempus moribus , ut ex illorum ingenio satis nobis comperto , eorundem legibus intelligendis major lux affulgeat , Romulus ut nascentem urbem hominibus replet , asylum aperuit , quo quisque confugeret . Ita probi homines , & improbi , sive servi , sive liberi , vel divites , vel pauperes , nullo habito discrimine eo confluxere . Quare quum hanc hominum turbam , agreste plerumque genus , atque efferatum , improbumque , frustra Romulus ad legum & magistratuum observantiam induxisset , nisi antea in comitiis legis utilitas comperta fuisset , propterea ut magistratuum plebs pareret imperio , eos in comitiis creari voluit , quibus non videretur fas esse refragari , & obsistere ; quippe qui illi imperarent , quos illa ipsa dignos honoribus per suffragia in comitiis censuerat . Denique neutiquam allici potuisset ad pacem fovendam , & necessitate impellente , ad bellum suscipiendum , nisi ante in ipsum foedus , ejus cognita utilitate , jurata esset : & belli causas in comitiis pernoctet , quo vel res repeteret , vel injurias ulcisceretur . Hæc nimirum sunt jura publica Civitatis Romanæ a Romulo condita ; quorum intellecta ratione , tam ex forma illius regiminis , quam ex moribus illius Populi , dixeris sane haud potuisse Romulum aliam formam

mam civilis regiminis, aliaque jura instituere, nisi hæc, quæ poterant tunc temporis moribus illius populi aptari. Quapropter licet Monarchia ceteras imperii formas procul dubio antecellat: sola tamen democratia, ob agrestes Populi illius mores, utilior tunc visa est.

### §. III.

#### *De jure privato a Romulo instituto.*

**P**ost jura publica sequuntur ea, quæ unius cujusque Civis rem domesticam spectant. Sed quum familiarum bene compositum ordo, sive officio inter virum, & uxorem, patrem, & filium, ad publicam tranquillitatem præ ceteris conferat: ideo ab his oratio mea necesse est initium ducat. Prima igitur Romuli lex, quæ vetustatis latebris eruta nobis occurrit, est ea, qua ille præcepit, ne Patricii religionis intuitu, matrimonio cum plebe sese jungerent; neve ex civibus quis nuptias cum extero iniret, scilicet cum eo, qui neque origine, neque allectione civis Romanus foret. Legem hanc, quo sanctior evaderet, religionis vinculo munivit. Adjecit enim mulierem per nuptias ad virtutem domestica sacra transire. Et quoniam alia essent sacra patriciorum, alia vero plebis, subdit hæc sacra confundi inter se, atque everti, si Patricii, & plebei inter se inirent connubia. En religionis colorem quæsitum, quo speciosissimo titulo lex sanctius servaretur. Nunc vero facili negotio intelligitur, cur per omnium veterum jurisperitorum ora volitaverit, nuptias esse communicationem omnis juris divinarum, humanarumque rerum.

Sed hæc religionis ratio in hac lege condenda, speciosum tantum nomen erat; quum Romulus aliud in mente serio agitare. Timebat enim summopere, nec temere, si Patricii cum plebe matrimonio jungerentur, ne quis ex eis plebis favore communem libertatem posset evertere, atque Imperii Romani potiri. En legis hujus arcanum hisce verbis per Halicarnassum proditum: *Ne familiis (inquit) (a) conjugii, atque adfinitatis vinculo sociatis, ordines in concordiam coi-*

[a] *Alicarnassæ in Romulo.*



*coirent.* Quæ in causa etiam fuit, quapropter idem Rex cives vetuerit matrimonium cum exteris inire; quia nempe per hanc nuptiarum necessitudinem, poterat exteris parari accessus ad urbis dominatum. Intellexit vero Canulejus, seditiosus Tribunus, legis veram rationem. Quare ut Rempublicam turbaret, ausus fuit matrimonia Patriciorum cum plebe exposcere. Sed haud secus fuit rejectus, ac si contra religionem ipsam facinus maximum attentasset. En Patriciorum voces apud Livium prolatas: *Quas, quantasque res Canulejum aggressum? colluviem gentium, perturbationem auspiciorum publicorum, privatorumque afferre? Quam enim aliam vim connubia promiscua habere, nisi ut ferarum propè ritu vulgentur concubitus plebis, patrumque, ut qui natus sit, ignoret cujus sanguinis, quorum sacrorum sit? dimidius Patrum sit, dimidius plebis, nec secum ipse concors?*

Vetito Patriciorum connubio cum plebe, omniumque civium cum exteris, jura condidit pro asservandis officiis inter virum, & uxorem, Patrem, & filios. Etenim tantam contulit viro in mulierem, Patrique in filios potestatem, ut si matrimonium usu, farre, aut coemptione (de quibus nil dico, quum omnibus hæc pateant) contractum esset, vir in mulierem, pater in filios jus vitæ, & necis nancisceretur. Non me latet, ex jure naturæ eam potestatem habere virum in mulierem, patrem in filios, quæ necessaria est, ut societas conjugalitatis possit consistere, ope paterni regiminis. Quum enim vir judicii firmitate, atque ratione mulierem antecellat, finit ipsa ratio, ut non hæc, sed ille familiæ caput sit, cui ipsa mulier subdatur ad ea, quæ rem domesticam spectant, servata tamen eidem libertate in ceteris rebus, quæ minime ad familiam pertinent. Quæ ergo ratio Romulum impulit, ut hac in parte jus naturæ non sectaretur, non erit abs re vestigare, saltem per verisimiles conjecturas, quando præter has, nil certi suppetit.

Mulieres Sabinæ recens raptæ, quum maximo odio persequerentur Romanos, verosimillimum, est vix potuisse a viris in officio contineri, nisi facta eisdem a Romulo summa hac potestate; ut metu saltem adactæ in matrimonio constarent,

&c

& sensim amor, ac concordia maritalis fuscitaretur. Sed equidem haud repugnaverim, si dixeris par æquumque quam maxime fuisse moribus tunc temporis agrestibus, atque ferinis, ut tantam in uxores, atque in filios Patres acquirerent potestatem, quo homines incipientes a pueritia domestico imperio assuescere, possent deinde nullo negotio parere summæ Imperantium Potestati. Ceterum quantum hæc potestas, viri nempe in mulierem, fuisset societati conjugali perutilis, experientia rerum perdocuit; quum non nisi post Spurium Carviliū, hoc est anno biscentesimo post Romulū, fuerint Romæ audita divortia; quamvis Romulus ipse viris divertendi a suis uxoribus, iustis tamen de causis, jus dedisset. Sed dices, ob tantam virorum potestatem effugisse mulieres connubia; quum amissa libertate æternæ servituti manciparentur. Nihil profecto minus. Romulus enim id ea arte delinivit, ut mulieres viri potestatem crederent sibi potius profuturam, quam damnum allaturam. Nam Romulus, specioso quodam figmento, constituit mulierem, tamquam filiam familias, subdi viro, veluti patri cuidam; ita ut mortuo viro, bonorum ejus cum ceteris filiis æqualem partem sortiretur: & his deficientibus, hæreditatem omnem acquireret. Itaque onus hoc lucro illo hæreditario commutando, tantum abest, ut mulieres a nuptiis averterit, ut potius allexerit, atque ad eas impulerit.

Quum apud Apulejū locus perobscurus occurrat, nec nisi hac intellecta lege, explicari possit: non abs re puto, si paululum aliquid temporis impendam ad illius expositionem. Laudatus auctor in secunda sua apologia quemdam Pontium insectatur, quod mulierem suam exhæredem scripisset, ducentis tantum denariis relictis, *ut intelligeretur potius eam exterruisse iratus, quam oblitus præterisse*. Quæ verba, ut intelligantur, præ omnibus advertendum, quum pater posset jure Romano impune filium occidere, potuisse eo magis illum exhæredare, aut præterire. Verum quia lex in dubio semper ad humaniorem partem hominum facta, præsumptionesque flectit: hinc si manifestum non esset, patrem ideo filium non scripisse hæredem, quia voluisset eum exhæredatum,

tum, lex præsumebat filii sui fuisse oblitum. Quapropter filius, ope exceptionis hujus, testamentum paternum infirmabat; ideoque pater, qui filium in testamento non nominando volebat eum præteritum, rem aliquam, licet minimam relinquebat, quæ sub nomine legati, pœnæ, vel notæ nomine veniebat; ut hoc adscripto legato, filius in jure præsumtionem illam minime allegare posset, patrem nempe ideo eum præteriisse, quia fuerat ejusdem oblitus. Id ipsum vir opus erat ut faceret cum ea muliere, quæ per solemne matrimonium in suam transferat potestatem, si eam exhæredare volebat; alias ipsa tamquam a viro suo præterita, ut alter filius infirmare poterat testamentum. Propterea ne mulier hoc faceret, dicitur Pontium iratum potius, ut eam exterreret, legare voluisse; quia hoc adjecto legato, id eveniebat, ut ipsa non posset, tamquam prætermissa à viro suo, testamentum, in quo præterita fuerat, sive exhæredata, infirmare. Atque hinc satis novimus hac lege obsoleta, Prætoris edictum *unde vir & uxor*, ac quartam uxoriæ, quibus nunc utimur, inventum; quæ sane reliquæ sunt vetusti juris, ab ultima antiquitate ad nostram usque memoriam servatæ.

Ex legitimis nuptiis oritur patrum potestas in filios; quæ quanta esset penes Romanos, mox dicam, postquam antea jus naturæ hac de re quid definiat, paucis aperuero. Jus naturæ tribuit potius patri, quam matri potestatem in filios; propterea quod hæc potestas, quum ad filiorum pertineat educationem, illi profecto tribuenda est, qui sanioris judicii pollet ratione, quam mulieri, quæ sane est infirmioris consilii. Sed quum educatio sine potestate effectum suum minime sortiri possit: hinc dicendum potestatis tantum tribuisse patri naturæ jus, quantum necesse est, ut filius in officio contineatur, ætatis tamen proportionem servata. Quum igitur filius in prima ætate majori indigeat educationis ope, minori vero in adulta, & in virili ea, quæ faciat, ut ille quum adhuc sit sub patria potestate, uti familiæ pars, suas actiones, quæ rem domesticam respiciunt, ipsius familiæ capiti subdat: hinc est ut patris in impuberem de jure naturæ potestas sit major; minor vero in filium adultæ ætatis; & in virum tanta, per

H

quam

quam faciat, ut ille quum adhuc solutus non sit patria potestate, suas tamen domesticas actiones recte componat cum familiæ statu, cujus cum pars adhuc sit, necesse est, ut ejus principi subdatur; in reliquis autem omnibus, quæ familiam non respiciunt, liber. Quod si fuerit emancipatus, Parentibus tantum præstabit obsequium, pro ea, quam adhibuerunt curam, ut is bonus civis evaderet. Hæc patria potestas de jure naturæ. Sed aliud visum Romulo, nempe elargiri patri in legitimis nuptiis tantam potestatem, quantam gens nulla ubique terrarum haberet. Itaque dedit parentibus in filios jus vitæ, & necis, ut possent etiam impune filios interimere; cujus si quæras rationes, hæc verosimiles possunt adduci; nempe ut illa tunc temporis effrœna gens, tantæ potestatis in filios præmio, alliceretur, venire vaga relicta, ad legitimas nuptias, filiosque justos procreandos, quo Respublica numerosior esset, & bene instituta multitudo augeret Imperium. Præterea ut deterrerentur filii familias, qui inconsulta ætate novas res sæpe moliebantur. Et quidem voti compotes fuissent, nisi a parentibus morte mulctati fuissent, ut prostat in historia exemplum Bruti, qui filios, reditum in Urbem Tarquiniis parantes, imperterritito vultu peremit, docens posteros, patriam jucundiorum esse filiorum vita, quæ tamen adeo parentibus est cara. Quare apposite ad hoc faciebat, ut nulla quamvis excelsa dignitas in Republica solveret patriam potestatem, quo in officio filii inter omnes honorum gradus continerentur, neve per lubricum ætatis res novas appeterent. Hæc dixisse sufficit de patria potestate sub primis Regibus. Ceterum sub Imperio fuit illa diminuta, jure potissimum liberos occidendi abrogato; atque ea profecto ratione, quia domesticum hoc imperium democratico quidem regimini, non vero Monarchico, in quod demum res romana delapsa est, par erat.

Verum licet posset pater impune filios occidere, datum tamen non erat, eosdem, nisi recens natos, ac sanguinolentos adhuc exponere. Nam per hanc expositionem, quæ ceteroquin gentibus aliis in more erat, minuebatur numerus civium, sine quibus res romana ad bellum satis valida esse non poterat. Demum jussit Romulus sanctos esse Urbis muros,

ros, portasque; quod Græcis etiam usurpatum fuit, apud quos Diis Marti, & Neptuno mos erat ea dicare. Cujus juris causa hæc plane fuit, ut sanctitate hac populus inductus, muros, & portas Urbis muniret, atque in Urbis defensione fortiter contendens pro aris, & focus strenue pugnaret. Demum jovi Feretrio dedicavit templum; auspiciaque quamplurima instituens jussit nihil nisi auspiciato fieri. Verum auspicia hæc omnia ut apud Patricios essent imperavit, quo magis iis esset parata occasio intervertendi quid quid plebs vellet, contra eorum sententiam, in publicis negotiis attentare.

## §. II.

*De Numa Pompilio.*

**N**escio profecto Numa ne magis, an Romulus Urbem Romam condidisse dicendus; an vero ambo ex æquo rerum romanarum fuisse auctores; an demum pace magis Numa, quam Romulus bello Civitatem auxisse. Nam licet prior ille Rex variarum turbam efferatam gentium composuisset ad formam Civitatis; illudque agreste genus adduxisset ad socialem vitam: tamen iis legibus Civitatis statum, civiumque mores firmavit, ut cives nihil profecto, quam bellico strepitu, ac furore arderent. Ex quo factum est, ut eo ferociæ pervenerint, ut facile dixeris Romanos strenuos milites, cives autem improbos. Itaque talis Romuli Urbs in proclivi erat, ut quam citissime suapte natura præceps rueret. Etenim quæ Civitas non dicam diu, sed vel paululum stare poterit, si pacis studia procul absint? Alter Rex scilicet Numa pacis rationes præ rebus omnibus præoptavit; iisque virtutibus, quæ ejus æclæ perpetuo sunt, ita exornavit Civitatem, ut illo Martis nimio furore sedato, Civitas quam longissime viveret, utpote & belli, & pacis artibus temperata. Hinc judicet lector, Romulus ne, an potius Numa firmaverit Romanum Imperium.

Sed veniamus ad rem, & quamnam regiminis formam præ mentis oculis habuerit Numa in Romano Imperio, ape-

riamus; ut ex ea detegere possimus legum, quas sapientissime tulit, rationes. Verum quum hoc pendeat a statu, in quo per id tempus versabatur res romana, liceat sane quidem mala præfari, quibus tunc laborabat Civitas; ut inde facillime intelligantur leges Numæ, per quas remedium comparatum est, quo Urbs convalesceret, incolumisque servaretur. Morte Romuli perturbata Civitate, quia plebs suspicabatur a Patriciis dominandi cupiditate illum fuisse interemptum, odium quamaximum est hinc obortum, plebem inter, & nobiles. His accedebat quod Sabini, qui quamvis essent cives Romani, quia tamen exteri romanam felicitatem ægro ferebant animo, avidè res novas propterea appeterent. Quæ contentiones effecerunt, ut diu Civitas Rege careret, non sine publici boni perniciæ. Verum sedatis motibus, divina dante providentia factum, ut cunctis suffragiis Numa Pompilius Romanorum Rex crearetur. Ortus hic Curibus ex genere Sabino, humani, divinique juris consultissimus, edoctus non tam peregrinis artibus, quam disciplina tetrica, ac tristi veterum Sabinorum, quo inter gentes per id tempus genere, nullum quondam incorruptius fuit.

Numa igitur, accepto Regno, Romam se contulit, ibique, antequam imperium auspicaretur, operam dedit, ut quænam esset Civitatis indoles, quæve mala avertenda callide pernosceret. Vidit igitur odium Sabinos inter, ac Romanos maximum, quo fiebat, ut illi, quamvis & Cives Romani essent, in negotiis tamen publicis pro salute Civitatis tamquam externos, ne dicam hostes, seipsos gerebant. Vidit civium omnium animos assiduæ bellis nimium efferatos; hinc fidem non solum cum exteris, sed & inter se concidisse, justis, injustisque discrimine omni sublato. Denique assuetudine belli dissolutos eorum mores reperit ab omni honestate, ut nec educatio filiorum esset, nec castitas in matrimonio servaretur. Quare mitigandum ferocem populum armorum desuetudine ratus, jura dedit, quibus Civitas vinculo Religionis in Deos formaretur ad pietatem, ad colendam justitiam inter se, & externos, ad servandam matrimonii castitatem, ad victus cultusque sobrietatem fovendam, ad animos demum communi concordia sociandos.

dos. Sed leges tamen Civitatis nihil immutavit; quum sibi statuisset id ipsum Romuli regimen tueri, civium tantum more in meliorem frugem redacto. Quoniam vero Numæ res erat cum rudi, & imperita tunc temporis hominum multitudine, cui propterea difficile erat jura dare: ideo fabuloso commento simulavit cum Dea Ægeria congressus nocturnos habere, ejusque se monitu, quæ acceptissima Diis essent, instituere; ut hoc religionis metu injecto, posset cives in officio continere.

Jam vero Numa, istiusmodi sibi civili regimine ob mentis aciem posito, jura dedit, quæ cum suo instituto prorsus congruerent. Cum finitimis itaque pacem, foedusque percussit, eorumque animos cum Romanis amicitia, & concordia sociavit, ut belli omnis eliminaretur occasio. Sed inita pace cum exteris, reliquum erat, ut amotis Sabinorum, & Romanorum discordiis, Civitas concors evaderet. Vidit experientia suadente, corpora solida, diversæque naturæ inter se facillime jungi, atque, si in partes minutissimas, ac prope ad pulverem redigantur, in unum coalescere corpus. Hac ratione posse civium animos sociari concordia ratus, Sabinos pariter, ac Romanos per plura artificum Collegia æqualiter distribuit, & in unoquoque eorum parem numerum Sabinorum, & Romanorum constituit, ac veluti inclusit; ex quo factum ut ob mutuas necessitates, & quotidianum inter ipsos, Romanos nempe, & Sabinos commercium, odium omne sublatum fuerit, ac proinde Civitas concors evaserit.

Itaque Numa inter cives, & externos firmata concordia, Urbem novam conditam vi, & armis, jure eam, legibusque, ac moribus de integro condere parat, præscriptis rerum divinarum cæremoniis, statuta inter cives ipsos, & externos justitia, ac firmata demum societate. De Deo hoc tradidit Populo, illum esse spiritum infinitum, ac simplicissimum; ideoque ne crederet posse eum templo includi; aut per animalium effigies, aliaque symbola referri. Quod sane licet verum esset, tamen eo tendebat Numa, ut ab expensarum profusione traduceret Populum in vitam sobriam, atque frugalem, dum experiebatur in diem rerum profusam liberalitatem, atque luxuriam nec etiam in re religiosa probari. Dies quamplurimos, supplica-

tio-

tionefque ritibus, cærimoniisq̃ue facris refertiffimas instituit, præcinentibus muficis, & præcone clamante ad populum, ut hoc ageret. Quibus omnibus fiebat, ut & Populus affuefceret paci, & religionis ufum acquireret. Dies faftos, & nefaftos in speciem religionis difcrevit; fed revera, quia par non erat, ut quotidie Patricii cum illa turba agerent. Auspicia, ab ipfo Romulo tradita multiplicavit. Tot denique Sacrificia instituit ad placandos manes, ad jufta parentanda, ad expiationes publicas, & privatas peragendas, vel ut bona advenirent, vel ut averterentur mala: ut populus ad hæc omnia confultanda, procurandaque tempus omne impenderet; atque ita bellici furoris oblitus, priftinam ferociam exueret, humanitatemque acquireret. Verum haud absurdum eft advertere, fuiſſe ab eo omnia cruenta sacrificia vetita, ne fcilicet horum uſu populus ad ferociam iterum impelleretur. Itaque tantum juſſit Diis *farre roſto, & mola ſalfa*, vino de vite culta, oleoque ſupplicare; ut hujusmodi Sacrificiorum Studio, cives quam maxime agris colendis operam darent, laboriſque aſſiduitate feſſi, bellandi cupiditatem, feritatemque quæ otio nutritur, deponerent.

Hæ ſunt leges adverſus Deos; videamus nunc illas, quæ juſtitiam ſpectant inter cives ſervandam, & fidem ob juſtitiam colendam inrer Cives, & externos. Agrum Romanum circumſcriptis limitibus populo aſſignavit, ut ſuum ſibi quiſque, quod eſſet, cuſtodiret, neu invaderet aliena; quod nunquam inſtituerat Romulus, ne finibus circumſcribendo, quod jure ad ſe pertineret ſibi præcluderet, quod aliis per injuriam auferre quotidie intenderet. Itaque Numa agrum publicum, ſuis diſtinctum finibus, æque Civibus diviſit, ſingulis quibuſque partibus termino poſito, ut omnem diſcordiarum cauſſam præcideret. Quod ſane, ut majori vi polleret, Deum Terminalem unicuique agro ſtatuit ea irrogata pœna, ut qui eum exaraffet, aut effodiſſet, is ſacer eſſet, hoc eſt ab unoquoque poſſet impune interfici. Numa igitur ſicuti diſciplina ſacrorum, & Deorum cultu munivit Rempublicam: ita etiam agros religione circumdedit, & metu Deorum Terminalium, ab omni incurſione tutos effecit. Præterea præmia ingentia proponi juſſit eis,



eis, qui agrum colerent, poenasque inferri, qui negligerent culturam; cui rei propterea, qui præsentes, instituit agrorum Magistros; & jure merito, nam hoc præ ceteris rationi ipsius regiminis congruebat summopere; quum nihil aliud sit validius ad desuetudinem belli, quam terrarum cultura. Cujus profecto dulcedine eo facilius allicimur ad pacem appetendam, quo magis experimur in diem, quanto præstantius, atque utilius sit homini rustico tuta frui pace, quam spe incerta triumpho, in certo, ac cruento bello involvi, atque implicari.

Ad fidem in contractibus servandam, hoc ingeniosissime Rex invenit. Vidit contractus testium præsentia munitos magis præ omnibus servari; quum illorum præsentia veluti obex quidam sit, ne contrahentes, verecundiæ saltim gratia, illos inficias irent, quod sane secus erat in negotiis, quæ sine testibus inibantur. Hinc consultissime fidei contrahentium sine testibus Deum quemdam præesse finxit, injecto metu de interitu ipsius Civitatis, si quis violasset religiosam hanc fidem. Quod speciosum inventum ita quidem fuit ad rem, ut per quamplurimos annos res dubiæ, atque ancipites solo juramento transigerentur.

Sed ut justitia, & fides etiam exteris servaretur, Collegium instituit Fæcialium, quorum tantum jus erat & bella indicere, & pacis fœdera ferire; ita ut sine illorum judicio, ne Rex quidem posset arma inferre; ac si quis in Republica ut alter Romulus regnaret, ejusdem martialis furor Fæcialium sententia vel sedaretur, aut certe leniretur. Horum etiam Fæcialium munus erat ad hostes se conferre, eisque Jovem obtestando nunciare, vellent ne pacem potius, an bellum. Quod si satis res repetentibus non facerent, iidem pio bello hostium pervicaciam refrigendam declarabant, idemque inter sollemnia indicebant.

Propter castitatem maritalem sanxit, ne pellices tangerent Junonis aram, nisi demissis crinibus; in signum mœstitiæ cederent Junoni agnum. Juno eadem est ac Luna; a qua quum res omnes recipiant fœcunditatem, Gentes eam sibi matrimoniorum Deam adoptarunt. Idem autem apud vetustos Romanos erat tangere Junonis aram, ac matrimonio jungi. Itaque

que non nisi matrimonio caste viventes tangebant Junonis altare. Unde Numa quo & mulieres nuptæ caste viverent, imo & femella quæque de plebe, relicta venere, alliceretur ad pudicitiam: noluit ab eis in publicis sacris aram Junonis tangi; ne hac injecta verecundia, clam prostatam pudicitiam, palam facerent, ac relicta venere, vel ad pristinam castitatem redirent, vel legitimas nuptias appeterent. Nec eo minus ad id consultissimum fuit, ne scilicet filii familias, lubrica impellente ætate, seipsum veneri manciparent, sed ut maturius uxorem acciperent, imperavit ne pater filium, quem junxit matrimonio, venderet amplius, stante jure patribus a Romulo dato, ut possent ad trinam usque venditionem emancipare filios. Non enim fas erat, eam, quæ virum liberum accepit, eundem servum habere. Itaque per hoc libertatis præmium a Numa filiis familias statutum, fiebat, ut illi patres precarentur, ut sibi uxorem darent, cujus ut compotes fierent, interim vitam honestam agebant; per quam patres liberorum prudentiam in agendo, atque in rebus dominicis curam videntes, eorum festinabant nuptias.

Denique jussit *pisces non nisi squamosos polluceri, præter scarum*. Sed quinam sit hujus legis sensus, diu a doctioribus philologis quæsi. Verum nihil inveni quidem, quod satis probabile videretur. Hinc erutis venerandæ antiquitatis monumentis, hanc, si hariolari licet, cepi conjecturam. Veteres philosophi credidere ingentem esse salis vim ad Venerem incitandam, ideoque finxere Deam illam ex spumis aquarum maritarum abortam. Hinc teste Plutarcho in quæstionibus convivalibus, Sacerdotes Ægyptii piscibus se abstinabant; nec sale cibos adspergebant; sed pisces molles, utpote magis aliis maritimis innutritos aquis, falacius spiritus venereos concitare jactabant. Quare sic scripsit Apicius helluonibus acceptissimus: *Pisces quidem molles; & suaves gustui sunt, & ad venerem conferunt præcipue*. Fortasse de his piscibus sermo est in Exodo, ubi sic habetur: *Recordamur piscium, quos comedebamus in Ægypto gratis*. Qui sane pisces projiciebantur pauperibus, quorum ob egestatem non erat cur de venere vereretur. Hinc fortasse illud Numerorum: *Quod habet pinnulas, & squamas comederis*. Neque abs re est, quod

quod dicit Plinius, consuetudinem fuisse in conviviis nuptialibus novis nuptis pisces ad edendum dari. Igitur factum, ex his, ut Numa hos pisces vetuerit, non modo in sacrificiis, quæ Neptuno nautæ faciebant, sed etiam in sollemnibus illis conviviis, quæ ipse, rebus Sacris procuratis, inter Cives instituerat; ut eorum amicitia religionis vi sanctius foveretur. Idque Cives videntes, hos pisces in sacrificiis, sacrisque conviviis vetitos, crederent sane immundos; immunditiaque eorum deterriti in cenis quoque domesticis effugerent, ne scilicet obscœna libidine prurirent. Sed inter squamosos excepit *scarum* ob sui pretium, ne Romani immodicis sumptibus indulgerent; quia ratio ejus regiminis ad id erat accommodata, ut ad sobriam, frugalemque vitam Romanos adigeret; cujus causa factum fuit, ut vinum etiam a rogo abesset. Hæ sunt Numæ leges, universum rationi ejus regiminis aptæ, nimirum ut populus evaderet pius primo in Deos, deinde justus, fidelis, castus, humanus, & sobrius, ac frugalis. Sed ad hæc non armorum vi eum adegit, ex qua simulata pietas, ac fucata virtus plerumque exurgit; sed mero religionis metu, ac jurisjurandi sanctitate, quibus unis Urbem munire curavit.

§. III.

*De Servio Tullio, ejusque civili regimine.*

**L**icet post Numam alii fuerint Reges in Romana Republica, scilicet Tullus Hostilius, Ancus Marcius, Tarquinius Priscus: attamen quia nullas hi leges pertulerunt, ideo eorum intermissa historia, utpote minime faciente ad instituti nostri rationem, quæ in legibus unis pertractandis versatur, ad Servium Tullium decurrit oratio, cujus civile regimen, legesque, præmissis paucis, nunc explicandas aggredior.

Res est in Romana historia omnium sermone trita, quibus artibus, quibusve facultatibus fuerit a Servio Tullio partum imperium. Curante enim rem Tanaquile, muliere sagacissima, post Tarquinii Prisci cædem, & simulata ejusdem filiorum

tutela, fuit ille Regno potitus. Sed infirmum fatis, atque invalidum erat imperium, tum Servii peregrina origine, ejusque servili conditione, tum etiam filiorum Tarquinii adolescente ætate, quos majorennēs Regnum sequebatur. Sed quibus artibus Imperium hoc, tam male partum, firmum, potensque fiat, atque ad diuturnitatem stabile: res est inter politicos quam maximis difficultatibus involuta. At huc longa eorum dicta redeunt, ut Princeps eam instituatur civilis regiminis formam, quæ civium ingenio, eorumque commodis maxime conveniat; ita enim quum omnium intersit tale imperium servari, quod suis cujusque rationibus, utilitatique serviat, fiet ut illud per se infirmum, & caducum, animorum Civium sociata concordia, validissimum evadat. Atque hanc semitam sectandam sibi Servius statuit. Sed ut assequamur quas rationes inierit, quæve media ad id paravarit, atque inde Servii regimen intus, & in cute, ut dici solet pernoſcamus: plebis æque, ac Patriciorum indolem penitus introspicere necesse est.

Ad id suapte natura plebs fertur, ut vix, aut ne vix quidem petat honores, si a publicis oneribus, quantum fieri possit, sit immunis. Contra vero Nobilitas ita præceps ruit ad honores, ut non fastidiat oneribus publicis rem suam ultra vires imminui, dummodo sola honoribus omnibus fruatur. Hinc Servius eam posuit civilis regiminis rationem, in qua plebs viveret a re tributaria immunis; sed tamen esset non solum ab honoribus exercendis exclusa, ex Romuli instituto, sed suffragiorum jure in rebus publicis, mira tamen arte, excideret. Ex adverso nobiles non tantum honores haberent omnes in Republica, uti Romulus jusserat, sed etiam jus belli, pacisque, legum ferendarum, & creandi magistratus, ex eorum sententia solummodo penderet, modo tantum in civilibus oneribus tribuerent, ut dixeris prope solos patricos publica onera sustinere. Itaque Servius rem ita tranſegit, ut quod de jure suffragii plebi auferretur, id eidem compensaretur onerum tenuitate.

Verum ad hoc opus erat Servio instituere aristocratiam; & democratiam, jam inde a Romulo fundatam, funditus evertere,

tere; quod sane licet plebi maxime esset invisum, tamen solertissimo Regi non deerant artes, & subdola quædam prudentia, qua scilicet sensim immutaret omnino Reipublicæ formam, in speciem autem videretur pristina democratia incolumis servari.

Et ne diutius lector ancipiti animo hæreat, age artificiosum Servii commentum, ex ipsis veterum scriptorum monumentis eruamus. Rex descripsit Populum in sex classes, easque deinde divisit in centum nonaginta tres centurias, quarum prima referta ditioribus civibus, continebat plures centurias, quam aliæ; ceteræ deinceps minus divites enumerabat, donec ad ultimam classem deveniebatur, quæ infimam plebem, & pauperrimam complectens, scilicet proletarios, & capite censo, unam tantum centuriam conficiebat. Rebus ita dispositis imperavit, ut in posterum non per Curias, uti Romulus instituerat, sed per centurias suffragia ferrentur, perque eas item indicerentur publica munera. Hinc factum est, ut quum prima classis præ aliis sequentibus plures contineret centurias, rerum agendarum vis omnis penes primores Civitatis esset, iidemque vicissim onera publica magis aliis subirent. Verum si prima classis inter se dissentiret, quod raro sane accidebat, atque ad alias decurrere opus esset: secundæ classis centuriæ vocabantur, ut alterutri primæ classis parti suffragiis suis momentum facerent. Quod si & secunda classis secum discors in paribus adversis suffragiis esset, ita ut nec ipsa primæ classis paritatem dirimeret: vocabatur tertia, atque ita deinceps. Sed nunquam fere res eo cadebat, ut ad infimos perveniretur. Itaque infimæ classis tenuissimorum, quum una esset centuria, per se nihil poterat statuere, sed suffragio suo definiebat quod per alias classes non potuerat, ob æquales contrarias sententias, absolvi.

Contra vero tributorum onera a pauperibus in ditēs, hoc artificio, inclinata sunt; non enim viritum, & sine discrimine, opulenti, an tenues essent, sed pro pecuniarum, ac facultatum ratione pensitabantur; ita ut centuria qualibet pro uno capite habita, ditiores singuli grave onus ferrent, levissimum vero egentiores. Ita plebs, quum nemo suffra-

gio in publicis rebus, sicut antea in curiis, exclusus videretur, quumque onerum gravitate non minimum levata esset: facile in hac nova Reipublicæ forma adquevit. Sed falsa tamen turpiter in hoc est, quod animum non advertit se olim in curiis viritim suffragia tulisse, ita ut quot capita, tot essent suffragia; in centuriis tamen licet suffragerentur omnes, suffragiorum tamen numerum pro numero centuriarum aestimari. En igitur regimen plebi pariter, ac Patriiis mire accommodatum, unis propter onerum tenuitatem, alteris pro splendore dignitatum, & rerum publicarum administratione; regimen inquam, quod intererat omnium diu servari, ita uniuscujusque suadente utilitate. Nam si quisquam alius, præter Servium, esset Regno potiturus, verebantur sane Romani, num hanc novam formam Civitatis is servaret, an vero veterem, nempe illam per Curias, revocaret. Hoc sane a Servio institutum regimen; & tamen quod in eo magis mireris, non solum privatæ, verum etiam publicæ utilitati peropportunum visum. Nam quid civili publico bono aptius, quam plebem a publicis negotiis removeri? Quid justitiæ magis consonum, quam servata fortunarum ratione, tributorum onera distribui? Quod profecto obtinuit Servius commento suo centuriarum, & classium. Regimen igitur hoc Servii, licet quidem subdolum, tamen ad publicam justitiam, & ad cujusque utilitatem tractum.

Verum his expositis, videamus modo, quibus rationibus Servius usus sit, ut civium numerum, eorumque bona pernosceret, ut illorum legitimus census describeretur. Populum Romanum a Romulo in tres divisum Tribus, ipse distribuit in quatuor; quarum unaquæque certum civium numerum præferret; vetuitque, ne alterius tribus civis ad alteram transfirer; & præscripto munere sive civili, sive militari, quod in sua quisque Tribu expleret. Hinc magistratus creavit per unamquamque illarum, ut curiose explorarent quid unusquisque civium in sua Tribu ageret; ut inde civium numerum, ætatem, bona, strenuitatem, artem, ingenium, vivendi genus referrent ad Principem; quo ei compertæ essent Reipublicæ vires ad publicam utilitatem.

Quo

Quo facto, agrum Romanum in viginti quatuor partes divisit, nomine dictos pagos; quorum unumquemque monte, veluti sæpe quadam, circumduxit; atque illuc portio quæque Populi ita distributa, ut noctu se reciperet; sique hostes forte improvise irrumperent, Urbs ipsa Civium numero per pagos disposito muniretur. Jussit item anno quolibet gentem uniuscujusque pagi in se congregatam festos dies agere, ex loco ipso appellatos *paganalia*; quorum ad sumptum omnibus tributum quoddam indixit, habita tamen rerum uniuscujus ratione, & sexus differentia, ac discrimine cujusque ætatis; quum aliud ab impuberibus, aliud vero ab adultis penderetur. Ex quo profecto numerus civium, sexu, & ætate distinctus, inter ditiores, & pauperes dispertitus, plane noscebatur. Præter hæc imperavit cognatis, & parentibus, ut triplex persolverent tributum; primum die Natali liberorum, tamquam sacrificium Junoni Lucinæ faciendum; secundum Deæ juventutis in adulta eorum ætate, tertium denique Veneri Libitinæ, quum ex hac vita decederent. Ex quibus omnibus edoctus numerum, ætatemque Civium compertam habendo, censum instituit; rem quidem non minus pacis tempore, quam belli Civitati perutilem; & metu legis de incensis latæ obtinuit, ut unusquisque bona sua, servos, liberos, uxorem, ætatem, vivendique artem distincte profiteretur apud ærarium; qua professione peracta, & habito censu, tum demum in classes, & centurias Populum omnem divisit.

Fuerunt Classēs sex, & centuriæ centum tres & nonaginta, in quibus non locorum, aut communium sacrorum, sed census rationem habuit. Quare in primam Classē coniecit, qui centum millia æris, aut majorem censum haberent; eaque classis continebat octoginta peditum centurias; quarum quadraginta juniorum erant, totidem seniorum, & duodeviginti equitum. Altera centurias decem, totidem juniorum, & duas fabrum complectebatur: eratque intra centum usque ad quinque, & septuaginta millia census. Tertia continebat eodem ætatis discrimine, peditum centurias itidem viginti, eratque census millium quinquaginta.

Quar-

Quarta item habebat centurias viginti, additis Tibicinum duabus; eratque census quinque, & viginti millium. Quinta constabat triginta peditum centuriis, ætatis etiam ratione distinctis; quindecim nempe seniorum, juniorum totidem; eratque undecim millium census. In sextam demum classem conjecti fuerunt egeni, & tenues, nempe proletarii, qui tantum propaganda, & alenda prole Rempublicam juvabant; & capite censi; quod propter inopiam caput tantum, & nomen, non autem bona profiterentur; ejusque classis nulla prope est habita ratio, nullus descriptus, aut definitus numerus, qui semper pro una centuria censebatur; atque ita centuriæ omnes numerum referrent centum nonaginta trium. Post hæc Servius suis quemque armis instructum, in suisque centuriis, jussit Populum totum adesse in Campo Martio; quem *suove-aurilibus* lustravit. Atque his ita peractis, jussit quolibet quinquennio censum iterari.

Ex quibus omnibus, huc usque enarratis, intelligat lector, quam necessarium sit, ad civilia jura intelligenda, pernosse regimen Civitatis, cui procul dubio jura congruunt. Romanæ Civitas sub Romulo vixit democratice mixtim; quare leges ejus primigeniæ democratiæ indoli ac naturæ consentiunt. Præterea voluit turbam illam, unde profectam, ad focialem vitam instituere; hinc genti illi alienigenæ, agresti vagæque opus fuit imperare leges severiores, tam pro Patria, quam pro maritali potestate; ut a prima ætate solutus ille, atque effrænis populus domestico imperio assuetus, publicæ deinde potestati pareret. Item in recentis Urbis primordiis, quæ in diem crescens invidiam finitimorum timebat, belli magis populum, quam pacis avidum cooptavit; propterea ad novum tuendum imperium, augendumque, jura ad arma priora sancivit, & artes quæ ad pacem faciebant, prohibuit. Ex adverso Numa, quum Populi morem efferatum a belli aviditate ad pacis studium avertere intenderet, ideo jura dedit, quibus populus ad pietatem in Deos ferretur, ad humanitatem, justitiam, & temperantiam. Hinc res Divinæ Sacerdotibus attribuit, solemnes ferias, festosque dies quam plurimos instituit; ut dum populus his occuparetur, defervesce-

ret



ret martialis furor. Demum Servius quo Regno tutius, fir-  
miusque potiretur, formam Civitatis a democratia ad aristo-  
cratiam avertit, atque ita, ut vetusta libertas nihil videre-  
tur immutata; quapropter leges dedit, quibus foveretur ari-  
stocratia, proscripta democratia. Patriciorum, ditiorumque  
gratiam sibi conciliavit; quorum ope poterat firmitatem Im-  
perium suum, ceterum incertum, sortiri. Est igitur quam maxi-  
me scientia civilis regiminis necessaria, ad jura civilia intelli-  
genda; quia hæc ab illo, veluti fecundissimo matris corpore,  
suapte natura oboriuntur, atque ad idipsum, veluti ad Ly-  
dium lapidem probantur.

## §. IV.

*De Republica Atheniensis sub Solone.*

**S**Tatueram præsentī argumento, expositis jam Romanæ  
Reipublicæ legibus, sub primis Regibus ex eorundem  
regimine perlatis, finem imponere; quia ad instituti mei  
rationem probandam satis dictum putabam. Sed quoniam in  
his pertractandis quædam mihi, sane scitu perdigna, de Re-  
publica Atheniensium sub Solone, & Lacedæmoniorum sub  
Lycurgo occurrerunt, ideo liceat mihi in hoc argumento diu-  
tius immorari; quum haud supervacaneum sit id ipsum,  
quod in Regno Romano vidimus, florentissimarum undique  
Rerum publicarum instituto comprobare. Igitur ad rem. An-  
te Solonem Athenis imperavit Draco; sed autoritate potius,  
quam legibus; nam licet leges quasdam ipse pertulerit, hæc  
tamen propter nimiam severitatem, deflectebant ad feritatem,  
potius quam humanæ imbecillitati naturæ congruerent, quam  
ille voluisse videtur prope extinguere. Etenim quum minima  
quæque crimina maximis exæquaret, interrogatus olim cur o-  
mnibus delictis capitale supplicium statuisset, respondit, se  
crimen vel minimum morte dignum existimare, in majori-  
bus vero nullam pœnam invenire morte majorem. Qua sane  
responsione ex Stoicorum doctrina id voluit, se non ex ma-  
gnitudine facinoris æstimare crimina, sed potius ex vitio pec-

peccantium animo; ut nulli unquam maleficio impunitas esset. Igitur Draconis leges, quæ data occasione, ea immanitate sæviebant, cui humana natura aptari non poterat, ex seipsæ statim conciderunt; quum neque Populi, neque alterius magistratus autoritate fulcirentur. Nam quis poterat tueri id, quod omnibus erat æque formidandum, quum levibus erroribus sapientissimi etiam quique obnoxii sint. Itaque istiusmodi leges severitas ipsa relaxavit, earum vice conditis aliis a Solone, postquam fuit Archon ab Atheniensibus constitutus.

Verum quia instituti mei non finit ratio, ut civilia tantum jura explicem, nisi detegam ea ab ipso civili regimine profecta: propterea enarrandus est status Reipublicæ Atheniensis usque ad Solonem, ut ex eo regimen ejus introspecientes, jura introrsum, & non in rugosa pelle, ut dici solet, intelligere deinde possimus. Quum Solon accepit Rempubicam, invenit eam intestino morbo laborantem, & adhuc veterum seditionum reliquiis periclitantem; nam quot erant factionum capita, tot diversas Civitatis formas in Imperio appetebant; & quidam qui habitabant Urbem, fovebant demokratiam, qui autem in mediterraneo morabantur, aristocratiam peroptabant; sed oram maritimam prope tenentes ejus mentis erant, ut imperium temperatum constitueretur in Civitate. Sed his potentium discordiis accedebant, quæ ex proletariis, & capite census obveniebant ob disparem fortunam, & usuras, quas potentiores ex mutuaticia pecunia per summam avaritiam exigebant. Itaque sperantes rebus novis suam levare inopiam, seditiones publicas augebant.

Has inter turbas, rerumque confusiones, confragrosa omnia circumspiciens Solon, huc tandem devenit, ut Rempubicam institueret, quæ æquo jure, tum a nobilibus, quam a plebeis gereretur; eo scilicet temperamento, ut scripsit Justinus, ut ita omnium ex hoc ei parta gratia, Civitatem ab interitu imminenti servaret incolumem. Itaque ex æquo, ut Seneca ait (a), *jure Solon fundavit Athenas, quo se inter ple-*

(a) *Epist. XC. lib. 11. 7. 4.*

*plebem, Senatūque gessit ab utrisque parem gratiam traberet.* Hac igitur per eum ratione inita, statutum fuit, ut quidquid apud Magistratus fieret, posset de eo provocari ad Populum coeuntem in foro. Ex hoc patet, voluisse eum instituere democratiā, habito tamen aliquo temperamento, ne si Respublica foret mere popularis, uti ante fuerat, in eundem offenderet scopulum. At quemadmodum ea omnia gesserit, ex Historicorum monumentis licet colligere.

Etenim Populum Atheniensem per quinque classes divisit, quarum prima ex iis confecta est, qui ex censu quingentas mensuras haberent, tam liquidorum, quam aridorum fructuum; quibus talentum, vice tributi, solvendum indixit. Secunda ex iis, qui tercentas haberent fructuum mensuras, quos equites creavit, statuens ut suis sumptibus alerent singuli singulos equos Reipublicæ causa, & dimidium talenti vice tributi persolverent. In tertia classe descripsit eos, quibus esset census biscentum mensurarum; quorum tributum Reipublicæ pensitandum statuit minarum decem. In ultima demum forensem turbam, aliosque minoris census partitus est, quos noluit sane quid Reipublicæ pro oneribus publicis pensitare; ut ea ratione posset plebis gratiam inire. Quo peracto censu, populoque ita per has classes distributo, constituit, ut rem judicariam soli Patricii, ditioresque ex Civibus exercerent; ea certe de causa, ne particeps judiciorum etiam foret plebs, ob egestatem, quæ sæpe homines ad flagitia urget, atque adeo venalia judicia fierent. Non tamen vetuit, imo potius iussit iudices legi præcedentibus plebis suffragiis; ceteras autem dignitates sacras, ac profanas ex æquo inter Nobiles, ac plebem exerceri permisit.

Quamquam autem affine sit hoc Civitatis systema, per Solonem institutum, ei nempe, quod constituit Servius: tamen in hoc differt potissimum, quod postrema Romanorum classis non nisi unum suffragium ferret, quum illa Atheniensis tot suffragia habebat, quot erant ejusdem classis capita; ut Rex ille Romanus aristocratiam, Solon vero democratiā constituerit in Civitate. Itaque ille, quo Patricii omnes rem civilem transigerent, in unum contraxit suffragia plebis; hic vero

K

tot

tot percensuit, quot erant Cives in foro; nempe ut esset democratica Civitas, ac rerum peragendarum ratio, earumque iudicium ex æquo pertineret ad omnes. Verum quia procedente tempore, singula hæc uniuscujusque ex plebe suffragia in rebus publicis poterant rem eo adducere, ut Civitas efficeretur denuo mere popularis, quum suffragia Nobilium, utpote minora numero, vincerentur a plebe secus sentiente: ideo Solon hoc temperamentum injecit plebem inter, & Nobiles. Senatum nimirum Areopagitarum instituit, vel obsoletum revocavit ex iis, qui annum Magistratum gesserant. Novem autem Archontibus, qui antea summi iudices erant, nihil novi muneris adjecit, præter examen reorum; noluitque præter hujus Senatus auctoritatem referri quidquam ad populum; ne scilicet ille statutos limites transfret. In quo nimirum convenit cum Romulo, qui pariter, ne Patricii, aut plebs Civitatis statum immutarent, imperavit, ne quid populus statueret, nisi præeunte Senatus auctoritate, neve decreta Senatus firmitatem haberent, nisi fuissent a plebe adprobata.

Verum redeamus ad rem. Dixi superius Solonem invenisse Civitatem divulsam in tot secum discordes factiones; illudque propterea instituisse regimen, quo communis concordia conciliaretur. Par igitur, æquumque fuit ea jura dare, quibus Civitas, quantum fieri posset, mutuis officiis, mutuoque amore coalesceret, dissensionibus undique amotis. Prima igitur ejus lex fuit, ut haberetur infamis, qui, civili aliquo oborto dissidio, alteri dissentientium parti non accederet. Sed lex hæc tantum abest ut foveret Civium concordiam, ut videatur potius seditiones ipsas augere quam maxime. Ita sane esset, si legis nobis lateret ratio. Verum Gellius (a) rerum peritissimus sic eam tradidit: *Si boni omnes, qui in principio coercendæ seditioni impares fuerint, populumque percitum, & amentem non deterruerint ad alterutram partem, divisi sese adjunxerint; tum evanescit, ut quum socii partis seorsum utriusque fuerint, eoque partes ab iis, ut majoris auctoritatis viris, temperari, ac regi cœperint, concordia per eos potissimum restitui* con-

(a) Lib. 2. cap. 12.

*conciliarique possit ; dum & suos , apud quos sunt , regunt , atque mitificant , & adversarios servatos magis cupiunt , quam perditos . En igitur qua de causa lex hæc faciat ad concordiam , ea nempe parando media , quibus sedarentur civiles motus .*

Nec minus inter cives fovebat concordiam illa lex , qua liberis non existentibus , cuique permisit de bonis suis testari ; de qua ita Plutarchus : *Solon autem cum permisisset pro voluntate cujusque , ni superessent filii , heredem constitui ; visus est amicitiam propinquitati , & gratiam necessitati præferre , pecuniasque , & bonorum possessionem esse habentium statuisset .* Scio per hanc legem labefactari bonorum æqualitatem , regimini democratico tantum perutilem ; cujus gratia vetita olim ante Solonem in Atheniensi Republica testamenta . Attamen advertendum Solonis tempore ita discordiis turbatam Civitatem fuisse : ut visum ideo ei magis utile fuerit , hanc bonorum inæqualitatem pensari animorum concordia , quam bonorum testamentaria successio fovebat .

Verum utcumque hæc sint , hanc bonorum æqualitatem altera lege appositissime reparavit , illa scilicet , qua statuit , ne deinceps haberent creditores jus in libertatem obæeratorum , quos prius uti servituti addictos , aut sibi habebant , aut aliis vendebant ; eorumque quoque gratia ingeniosissime pecuniæ auxit æstimationem ; ut & creditores , quod suum esset , reciperent : & debitores nomina solvendo patrimonium non exhaurirent ; atque hoc , ut instauraretur inter cives bonorum æqualitas , ad regimen democraticum sane quam perutile visum . Hinc alia salubri lege sanxit , ut Omnis Civis artem aliquam profiteretur , vetito sub infamiæ poena otio , & ut nemo posset Athenis morari , quam triduo , si noller aliquam artem exercere ; ut ita cives neque otium , neque egestas vexaret , quæ profecto effugi Athenis non nisi per artes poterat , propter agrorum , solique sterilitatem . Hinc jure merito ita severiori lege artes commendavit , ut vetuerit posse patrem in judicio alimenta petere a filio , quem artem aliquam addiscere minime curavit . Prohibuit item ne filius aliceret patrem , si illè ex concubina fuisset progenitus ; quia

non ideo concubuit, filiosque genuit, ut homines daret Civitati, sed ut libidinem expleret suam. Hæc sunt jura Solonis, per omnia comparata civili regimini; quo ille denuo, abrogatis legibus Draconis, condidit Athenas.

### §. V.

#### *De Republica Lacedæmoniorum sub Lycurgo.*

**Q**UOD attinet ad formam Civitatis, sub qua reperit Spartanos Lycurgus, sat habemus eam fuisse Oligarchicam, quam antea Democratia floretet. Civium vero vivendi consuetudo per ea tempora, uxorum libertate, & licentia corrupta nimis erat; nam earum viri diutinis bellis occupati, ut plurimum Urbe carebant. Huc accedebat paucorum præ aliis rerum opulentia, qua fiebat ut luxuriose vivendo, corrumperent aliorum mores. Itaque eam regiminis rationem invenit Lycurgus, ut democratiam mere popularem, quæ adversatur potissimum oligarchiæ, instauraret, rerumque profusione vetita, ad temperantiam, & sobrietatem civium mores componeret, atque firmaret.

Hinc Ephoros instituit, ex quocumque Civium ordine eligendos, nempe tam ex nobilibus, quam ex plebe, nullo habito discrimine. Quibus concedidit totum regimen Civitatis, scilicet divinarum, humanarumque rerum jura; ut hac ratione æquo jure omnes publici regiminis essent participes, quæ Reipublicæ popularis certissima nota est. Id autem ea de causa a Lycurgo factum est, ut, quod fore sperabat, ad singulorum utilitatem formata Respublica diu esset duratura. Sed talis eum fefellit opinio; nam in rebus humanis compertum est, neminem prope intra fines suos contineri. Hinc Ephori Spartæ, quemadmodum Tribuni Romæ, eas excitant publicas seditiones, ut mirum profecto dixeris, ni uno ictu Cives omnes perierint.

Itaque Lycurgus hoc systemate sibi parato, necesse erat, ut ea, quæ Reipublicæ populari congruunt, statueret; cui rei quum sit bonorum inter Cives æqualitas appositissima, pro-

propterea Spartæ agrum divisit , distribuitque Civibus ex æquo. Idipsum conatus est etiam Romulus, quia ambobus regimen democraticum constituere in animo fuit. Sed Numa, servata rerum divisione, quam fecerat Romulus, tantum uniuscujusque agrum sepe, veluti limite circumscripsit, statuitque id sub religionis metu servari; quoniam agrorum limite servato, quisque retineret, quod suum erat; atque ita bonorum servaretur æqualitas, Romano regimini per id tempus summopere utilis.

Verum jure merito scripserunt Aristoteles, aliique politici, in hoc errasse quamaxime Lycurgum, quod quamvis, bonorum facta divisione, prohibuisset, ne quis sortem suam alicui venderet: dedit tamen ut posset eam unusquisque sive donatione, sive testamento relinquere. Ex eo enim fiebat, ut denuo bonorum inæqualitas inter Cives oboriretur, quum non minus venditione, quam testamento, ac donatione dominia rerum transferantur. Quare se sapientius, quam Lycurgus, hac super re gessit Romulus, vetando ne quis ullo modo bona, quæ ei prima sorte obvenerant, distraheret; quod item deinde lege *Cincia de donis, & muneribus* factitatum, ne quis sua omnia bona, sed ad certam quantitatem usque, per ipsam legem definitam, donaret. At inquires, in Judæa, ubi etiam democratia vigeat, fundum alienare licuisse. Sed tamen vertente Jubilæo ad pristinum dominum redibat, atque ita bonorum æqualitas per aliquod tempus abrupta, repararetur. In eo item non parum falsus est Lycurgus, in Republica sua populari permittere patribus unicam filiam, eamque hæredem ex asse, cui vellent darent nuptum; quum ex hoc bonorum æqualitas tolleretur, Civitatisque forma everteretur. Secus enim statutum fuit Romæ, ubi vetitum, ne qua filia hæres ex asse scriberetur. Non item in Judæa, in qua filia unica, non nisi viro ejusdem Tribus poterat nubere; quum & Romæ, & in Judæa modis omnibus absoluta democratia esset. Demum non possum, quin fatear, & in hoc a recta semita aberasse Lacedæmoniorum Regem, quod potestatem cuicumque fecerit, ut doti filiæ quotquot bona vellent diceret; id enim fortunarum æqualitatem, cui cavendum erat



in forma democratica , de medio tollebat . Qua de re quanto prudentius factum est a Solone , qui prohibuit mulieribus dotem dici , ea simulata ratione , quod non bona , sed mores deberent esse dos mulierum ?

Perspecto Lycurgi civili regimine , ejusque causis expofitis , reliquum est , ut leges ejus promam , quæ civem respiciunt , omnemque prorsus luxum proscribunt in Civitate . Sane quidem expensarum profusio quum ab opulentia proficiscatur , id faciebat ad rem , ut decerptis , diminutisque paucorum opibus , bona æqualiter inter Cives distribuerentur . Quod quum fecisset is in bonis soli , in mobilibus quum id ipsum minime facere potuisset , solertissimum tamen inivit consilium , nempe statuit , ut abesset deinceps pecunia aurea , vel argentea , & ferrea tantum foret in usu ; ut scilicet ejus cupiditas defervesceret , tum inter Cives ob difficilem custodiam , tum apud externos ob vilitatem materiæ . Ex quo factum , ut quum mercatores Spartam venundandis mercibus non accederent , omnis luxus , expensarumque profusio ab Urbe exularet . Nec eo contentus , ut luxuriam omnem a Civitate repelleret , convivia instituit publica , voluitque ut una discumberent tam pauperes , quam divites ; ac statuto ciborum genere omnibus æquali , notavit infamia , qui alio cibo uterentur , præscriptumque modum in eo non servarent . Quare factum est , ut quum nemo posset statutam metam transilire , expensarum profusio eliminaretur .

Pauca dicenda supersunt , ut Lycurgi legum explicationem absolvam . Quum is Spartanum Populum ad virtutem bellicam instituere vellet , ejus morem ita composuit , ut modis omnibus bello magis , quam paci congrueret . Hinc illud in conviviis ciborum genus , quibus nec corporis agilitas , nec mentis acies impediretur . Jussit propterea Cives pedibus nudis , nudato capite , solaque tunica indutos incedere ; ut hac vitæ consuetudine labores bellicos minime fastidirent . Hinc agrorum Elotis relicta cultura , artiumque exercitio , per quæ hebetatur , ac prope frangitur virtus militaris , ad luctam , aliasque istiusmodi corporis exercitationes Cives apulit ; quibus fortitudo , corporisque agilitas comparatur . In com-



communibus autem illis conviviiis nil aliud edictum, commendatumque voluit, quam militarem strenuitatem; ut inde adolescentes ipsi ab incanabulis pene belligerandi studio imbuerentur.

Sed hic sistamus paululum, ut Legislatorum in regimine statuendo rationem detegamus. Romulus æque, ac Lycurgus Civitatem quisque suam voluerunt bellico furore æstuantem; hinc ambo operaria artificia noluerunt per cives exerceri. Contra Solon Athenis, Numa Romæ voluerunt Civitatem bello temperatam, & pace; propterea uterque hujusmodi artes commendarunt Civibus; maxime vero Solon, qui noluit filium ad patrem alendum teneri, a quo ad artem aliquam institutus non fuerit; & peregrinum otiosum triduo amplius Athenis morari vetuit, qui nulli se arti addixerit.

Romulus, ac Solon instituerunt Civitates democraticas, licet moderatas; quare ambo Patriciis detulerunt honores, præcedentibus tamen suffragiis populi, Romulus nempe tam civiles, quam militares: Solon autem solos judiciales, veritus ne si plebeji quoque, & pauperes iudices sederent, justitia ob paupertatem eorum periclitaretur. Itaque ambo libramentum aliquod inter Nobiles, & plebejos injecerunt, ut regimen servaretur incolume; Romulus scilicet statuendo, ne quid fieret a Patribus injussu Populi, neve quid referretur ad Populum, nisi auctore Senatu; Solon autem Areopagiticum Senatum instituendo, veluti repagulum aliquod, ne Nobiles civile regimen immutarent. Verum ex adverso Lycurgus voluit Civitatem mere popularem; quapropter Ephoros instituit sive Nobiles, sive plebeji essent, ut ita universi sine discrimine participes forent regiminis.

Numa, Solon, quin & Lycurgus, quum Civitates regendas dissensionibus refertas accepissent, id omnes spectarunt, ut amotis dissidiis, cives concordes efficerent. Quapropter leges ad id ipsum appositissimas pararunt, sed alius alia via. Numa Cives per Collegia distributens; Lycurgus per convivia; Solon per leges testamentarias; Romulus etiam per patronatum Patriciorum in plebem, eorum dissitos animos consociavit. Numa, & Solon Civibus commendarunt artes, sed has pro-

prohibuerunt Lycurgus, & Romulus; quum hi voluerint Civitatem omnino bellicosam; illi vero legibus, & pace temperatam. Denique Numa, Lycurgus, ac Solon Civitatem præoptarunt procul esse in rerum usu a luxuria. Hinc Numa sobrietatem vel in sacris imperavit; inde ut intelligeret Populus quanto studio luxuria rerum fugienda sit, quum ne Religionis quidem causa admittenda foret. Lycurgus pecuniam ferream cudendam imperans Mercatores ab Urbe expulit; & Solon iussit infamem esse, qui bona sua abligurierit, ut ita unusquisque in rebus servaret modum. Hoc est illud antiquum, & vetustum jus, quod ex vario sapientissimorum Principum regimine detectum, instituti nostri firmandi gratia explicare non alienum putavi. Interea ut æquo animo me ferat lector oro, si longior fuerim, quum prolixitas hæc rerum, quæque fuerit, utilitate ac pondere pensanda sit.

### C A P U T III.

*De aliis subsidiis ad acquirendam jurisprudentiam necessariis.*

#### §. I.

*De veteri Jurisconsultorum latinitate.*

U<sup>S</sup>que adhuc satis multa dixisse arbitror, ut evincerem quam necesse sit ad intelligendum jus civile, notitiam juris naturæ, & Civitatum regiminis perceptam habere. Verum quia præter hæc alia subsidia necessaria sunt ad juris civilis cognitionem assequendam; ideo de his nunc mihi est agendum, & primo de veterum latinitate, quam juris civilis potissimam esse causam nemo diffitebitur. Sane me pudet dicere, & tamen temporum iniquitate dicendum probandumque est, latinum sermonem per quam necessarium esse ad Romanam jurisprudentiam intelligendam. Si enim ars ulla sive liberalis, sive mechanicæ exerceri, intelligique minime potest, ejus notionibus propriis ignoratis; cur jus civile ab hac regula receptissima excipiendum erit?

Non-

Nonne latinæ linguæ peritiā evolvit arcana juris prudentiæ, detegitque intimas Jurisconsultorum sententias, quæ germanis vocabulis, & aliquando obstrusioribus, ac peculiaribus latine dicendi generibus, obsignantur? Et quamquam Jurisconsultorum, quorum fragmenta reliqua sunt, plerique latinitate jam inclinata floruerint: studio tamen, ac religione verborum, qua maxime scientia legum adservabatur, ita excellebant, ut auream prope latinitatis ætatem elegantia, & proprietate reddiderint. Sui igitur erroris convincantur plerique illi, quos non pudet effutire, linguæ latinæ peritiā juri civili prodesse parum, & pro illo puro, putoque Romanorum sermone satius esse latinitatem addiscere, quæ hodierno usui forensi facta est peculiaris. Apage falsam istam, atque ineptam imperitorum opinionem; quæ quum non nisi increbescente barbarie inoleverit, jam diu est, quum fuerit peritorum interpretum unanimi profligata judicio. Sed tandem veniamus ad rem.

Quod in perlegendis Jurisconsultorum fragmentis debemus advertere, illud maxime est, ut sciamus quomodo illi sapientissima sua responsa aptaverint ad rem, de qua agebatur. Etenim quum omnis quæstio, quæ inter duos litigatores versatur, vel juris sit, vel facti: hinc Jurisconsulti, si quæstio de jure esset, dicebantur de jure pronunciare; si vero facti, hac utebantur formula: *ita factum esse, vel ita factum videri*; aut contra. Sed ut proprius rem ipsam attingamus, explicemus porro, quænam sit juris, quæve facti quæstio. Est juris quæstio, quum constat factum esse id, de cujus justitia quærimus; facti vero quum non constat, an id factum sit, super quo lis orta est, cujusque nomine reus appellatur; quodque vicissim affirmat actor. Quid autem super facti quæstionibus judex debeat respondere, & quomodo se ipsum gerere, nullus est juris locus, qui nobis occurrat, certam, determinatamque regulam tradens. Nam ut ait Cicero, in his quæstionibus, facti scilicet, bonus ac prudens judex statuet, an ex re nata, perpensis diligenter omnibus circumstantiis, satis probatum sit, nec ne, ut *ex lege 3. D. de testibus*. Itaque nullæ juris regulæ super ipso facto nobis traditæ sunt,

L

nem-

nempe an res hac ex. gr. facta sit, nec ne; quam hoc ex probationibus, hisque deficientibus, ex conjecturis promendum sit, quas a Rhetoribus Jurisconsulti mutuati sunt; nam de facto ipso conjecturas evolvere, ac excutere Rhetorum potius, quam Jurisconsultorum facultas, & manus erat. Itaque quod ad conjecturas potissimum facit, id est, quod attente iudex animadvertere debet, *quid ante rem, quid cum ne, quid post rem evenerit*. Hoc facto, jus ei praescribit statuitque, ut faciat de probationibus ipsis, teneatque id quod magis verosimile sit. Sed hoc ne, an illud potius sit, suo relinquit arbitrio, nempe ut sibi videbitur. Hinc Papinianus ait (a): *facti quaestio in arbitrio judicantis est*; & Paulus (b): *facti quaestio in potestate judicantium est; juris autem auctoritas non est*. Quae loquutionis formula non id nobis innuit, quod in potestate iudicis sit ferre quam velit sententiam de jure, quod ex facto vero, aut praesumpto huic, vel illi oritur; sed tantum, quoad in ejus sit potestate, ejusque arbitrio servatum, omnibus circumstantiis attentis, pronunciare, illud ne factum sit, an non; num ita, an alio modo; an id magis sibi ipsi verosimile videatur. Itaque non jus, quod ex facto oritur, sed facti ipsius veritas, vel falsitas, ejusque verisimilitudo penes iudicem est.

Verum hic notandum tam Jurisperitos, quam Magistratus, imo ipsos Principes saepissime fuisse consultos, quid juris ex aliqua re nata sibi esset; cujusmodi multa Principum, ac Jurisconsultorum in corpore juris, & praecipue in Codice Justiniano extant Rescripta, vel Responsa; a quibus quum libelli supplices factum ipsum continentes per Tribonianum fuerint avulsi, factum ex hoc est, ut sint ambagibus involuta, aliisque negotiis in dies emergentibus non possint aptari; quum periculum sit, ne ex facti ignorantia circumstantiae in diversum nos trahant. Quare opposite scripsit Capitolinus in Marco: *Fuit in jure non incallidus, adeo ut statisset omnia rescripta veterum Principum tollere, ut jure, non rescri-*

(a) *Leg. penul. ad Sen. Consul. Turpilia.*  
 (b) *Leg. ordine ff. ad municipalem.*

*Scriptis ageretur, nefas esse dicere, leges videri Commodi, etque Caracalla, et hominum imperitorum voluntates, quum Trajanus nunquam libellis responderit, ne ad alias causas facta preferrentur, quae ad gratiam composita viderentur. Scilicet, ut mihi videtur, ob eas facti circumstantias peculiares, quae facile ab aliis speciebus possunt abesse. Hinc caveat Advocatus, aut Judex, ne in speciebus obvenientibus, Principum Rescriptis, aut Prudentum Responsis nimis indulgens, ob facti, ejusque adjunctorum varietatem in justitiam peccet. Sed ex his ad alias jurisconsultorum formulas transeamus.*

Scite Theophilus dixit (a) jurisconsultorum responsa in sententias dividi, ac opiniones; ex primis juris certitudo depromitur, eamque formulam usurpabant saepissime, ut dicerent, *putare, arbitrari, opinari, probabilius magis esse, verius videri, quid sequendum nobis sit facile esse judicare*. Quo loquendi modo non id praeferebant, ut rem crederent dubiam; sicuti visum Accursio, aliisque, qui latinitatem vetustam cum illa forensi ætatis suae metiebantur: sed ut jus certum statuerent, alia prorsus in dubitatione nisi dicendi ratione; nimirum *videamus ne iniquum sit (b), videndum est (c), cavendum est (d)*. Per quae non id agebant, ut rem in ancipiti relinquerent, nulla data responsione, ut sibi suasit Accursius; sed quod responsitabant in jure non esse certum. Quapropter si nobis lex affulgeat, quam in partem potius fuerint proniores, id nobis sectandum erit; quum jam legis vim iis dederit Justinianus in suo Codice *Titu. de veteri jure enucleando*.

Sed quid? innumera pene juris capita sunt, quae sine veteris latinitatis ope intelligi omnino nequeunt. Non ne sexcenta Aedilium, Praetorumque sunt Edicta, adeo peculiari-  
bus vocabulis, retrusioribusque nominibus referta, ut iis igno-  
ritis, jus Praetorium, ac Aedilitium in obscuro lateat? Quorum sane  
si quæras, hæc ratio erat. Quum Praetor Romanus sensim edi-

L 2

Etis

(a) *Tit. institut. de jure natu.*(b) *L. 4. de ritu nuptial.*(c) *L. 57. de evictionib.*(d) *L. 4. de verbor. obligat.*

Etis suis juris civilis asperitatem, sub æquitatis specie lenire suscepisset: quumque is custos juris esset, non arbiter, aperteque facere non posset, eo magis, quod sub auspiciis magistratus juratus esset in leges: ea utebatur arte, ut novis vocabulis, atque aliis aliisque fictionibus jus civile corrigeret, suppleretque; atque ita jus omne intervertendo, intra leges tamen consistere videretur. Sic filius emancipatus jure civili nihil juris habebat in hæreditate patris, ob agnationem jam solutam. Sed hoc ipsi naturali æquitati adversabatur; nam licet emancipatus agnatus jam non esset, filius tamen erat. Tunc igitur Prætor hoc modo rem componebat, scilicet illum non ut hæredem, sed ut bonorum possessorem statuebat; quod licet in nomine inesset discrimen, re tamen atque effectu ipso idem erat; jus civile legitimam, validamque minoris obligationem habebat. Prætor autem æquitatem motus ob ipsam ætatem minorem, eandem illam rescindebat. Quare quum non posset aperte illam infirmare, id agebat, ut fingeret minorem in eo statu existimari, in quo erat antequam juris vinculo se obstringeret; atque in eo quum non adhuc obligationi se reddidisset obnoxium, fiebat profecto, ut haberetur ab ea solutus. Itaque per hanc restitutionem in integrum revera jus civile abrogabatur a Prætore, quum illud obligationis tempus spectaret, hic vero tempus quod eandem antecessit; atque hinc fiebat profecto, ut haberetur ab ea solutus.

Sed audio nescio quem mihi objicientem illa Gellij (a): *Verbis uri, aut nimis obsolescis, exculcatisque, aut insolentibus, novitatisque dura, & illepidæ, par esse delictum videtur: sed molestius equidem, culpariusque esse arbitror verba nova, incognita, inaudita, dicere, quam invulgata, & sordentia. Nova autem videri dico etiam ea, quæ sunt inusitata, & defixa, tametsi sunt vetusta.* Sed locus hic licet probatissimus, nihil tamen ad rem nostram; nam licet frustra esset si tempus impenderemus tantum in evolvendis vetustis latinis auctoribus; quum jam diu sit, quum Prætoris formulæ, ac duodecim Tabu-

(a) Lib. 11. cap. 7.

bularum prisca vocabula adeo recefferint ab usu, & exoleverint, ut omnino nequeant hoc tempore usurpari. Verum hic non agitur de hoc vetusto dicendi genere rebus nostris aptando, in quo sane urget argumentum Gellj; sed de legibus civilibus Romanorum intelligendis, ubi necesse dicimus esse veterem illorum latinitatem pernoscere, ac vocabulorum vim, & virtutem callere, ne scilicet jus illud, quo vivimus, inter horridos vepres, atque ignorationis latebras delitescere videatur. Et quod ita res se habeat, ab ipsarum legum corpore repetamus exempla.

Perpulchra est quaestio illa apud Ulpianum. Quidam duos sibi hæredes ex asse instituerat, unum nempe prædiorum, quæ Romæ, alterum vero illorum, quæ in Italia sita erant; sed hæc præ illis longe majoris æstimationis erant. Quum vero testator æs alienum contraxisset, dubitandi ratio hic erat, an is quem fructuosiora prædia sequebantur, in expungendis nominibus magis teneretur. Respondit Jurisconsultus (a) negando. Quando enim æqualiter ambo erant hæredes, & onera sunt hæreditaria, æs alienum pro medietate quisque dissolvere debebat. At enim quo quis majus ex hæreditate lucrum percipit, æquum est, ut eo gravius onus subeat. Sed respondit idem, *fundos vice præceptionis accipiendos*; quæ verba veterem ignorantibus latinitatem adeo sunt tenebrosæ, ut prorsus nequeant se extricare, legisque rationem assequi; quod profecto secus esset, si *præceptionis* vocem intelligerent. Et quidem vox hæc *præceptio* legatum præfert, quod a testatore ex hæredibus uni relinquitur, nempe ut is rem illam, antequam hæreditas dividatur, habeat præcipuam. Quo posito, quum onera activa, & passiva hæreditatis ad hæredes transeant, qui nempe titulo institutionis tales sunt, non autem ad singulares successores, sive legatarios, quumque hæredes nostri instituti sint ex asse, ac proinde æqualiter: hinc quamvis alter hæredum ingentioris pretii prædia habuerit, nequaquam gravius onus sufferre debet, quum quod superat in prædiis suis hæreditariis, titulo sit legati *præceptionis*; & legata

(a) L. ex facto 35. D. de hæredibus institu.

gata profecto quaecumque ab oneribus hereditariis immunia sint.

Potuissem sane hoc uno argumento rem hanc absolvere; sed non est abs re nonnulla alia in medium afferre. Veritum est mulieri ex Senatus Consulto Vellej, pro aliquo intercedere. Sed quum verbum hoc (nempe *intercessio*) fuerit ab Accursianis, & Bartholiniis pro fidejussione usurpatum: hinc multas suscitant quaestiones; quando ne dicendum sit mulierem pro alio intercedere, ita ut nulla ne, an valida sit ejus obligatio. Quumque fidejussio debeat alienae obligationi accedere, mire se torquent, quum mulier pro alio se se principaliter obligat. Sed secus cum doctioribus interpretibus, qui veterem latinitatem callent. Vox enim haec *intercessio* non solum fidejussionem complectitur, sed quodvis aliud obligationis vinculum, quo mulier non pro se, sed pro alio obstringatur, sive accessorie, sive principali nomine id faciat, nempe si expromittat, obligatumque prius liberet, aut alterius vice se obliget principali nomine. Sequitur hinc ut in omnibus his speciebus quum mulier pro alio intercedat, Senatus Consult: jure gaudeat (a), modo tamen creditor sciat mulierem pro alio principaliter intercedere; secus enim mulieri Senatus Consul. minime refragraretur (b) ob vulgatissimum illud in jure, quod *deceptis, & non decipientibus jura subveniant*. Sane deciperet mulier in hoc casu creditorem, quum ei ignoranti pro alia legitima obligatione suam infirmam obtruderet; si enim plane mulier consilium suum detexisset, forte creditor non recepisset ejus obligationem. Verum si mulier alterius novaverit obligationem, licet juvetur Vellejano, quum id non nisi sciente creditore fecerit; attamen ejus obligatione per exceptionem S. C. infirmata, prior obligatio veteris debitoris restituitur; quum æquum non sit creditorem utramque amittere, priorem nempe ob mulieris novationem, posteriorem vero ob Vellejani exceptionem. His jam præmissis, exponamus exempla.

Rem sane notatu dignam exhibet Ulpianus (c). Tutores  
ut

(a) L. 1. §. omnis D. ad Velleja.

(b) L. sed si ego D. eodem.

(c) L. quam §. 2. ad S. C. Vellej.



ut pupillum are alieno liberarent , atque ita usurarum impendia præciderent , prædia quædam vendere statuerant . Sed intervenit apud eos mater , ne distraherent ; quumque metus esset , ne a pupillo deinde adulto convenirentur usurarum causa , quas ille effugisset fane solutione sortis , si distracta essent prædia : mater indemnitate[m] promisit . Pupillus autem factus major de hoc ipso Tutores convenit , qui pariter in jus vocarunt mulierem ob promissam indemnitate[m] ; quæ fane Sen. Consul. objecit . Verum hic Jurisconsultus respondit mulierem Sen. Consul. exceptione minime juvari ; quia nulla est hic obligatio , nempe neque vetus , neque nova , quam mulier intercedendo in se recipiat , sed tantum ea quam mulier ipsa contraxit , quæ dici non potest intercessisse , sed potius negotium suum gessisse . Igitur quum hic nulla sit intercessio ; hinc fit , ut Sen. Consul. locus non detur , quod mulieribus non nisi intercedentibus favet . Adeo ut sic rem hanc exprimat Paullus 2. *sententi. 11. cap. 2. mulier , quæ pro tutoribus filiorum suorum indemnitate[m] promisit , ad beneficium S.C. non pertinet* . Eadem prope est sententia illa ab Africano in *L. Tutor 19. per eundem* relata , in qua Titio dubitante de adeunda hæreditate cujusdam tutoris , qui male tutelam gessisse existimabatur , pupilli mater indemnitate[m] promisit . Quum enim cautio hæc indemnitate[m] vera intercessio non sit , mulier S. C. exceptione non juvabitur . Videsis propterea ex his omnibus , quam necessaria sit ad scientiam legum , genuina veteris latinitatis cognitio .

Inter juris interpretes , ac Pragmaticos etiam contenditur summopere , si criminis judicium cum actione civili concurrat , prius ne agendum sit civiliter , an vero actio criminis præferenda sit ; ex. gr. postquam per vim quis possessione spoliatus est . Si agatur a spoliato , tum de vi , tum de possessione , utrum ante cognosci debeat de vi , an vero de possessione . *Vetusto quidem iure sic erat definitum (a) , si de vi & possessione queratur : prius cognoscendum de vi , quam de proprietate rei Div. Hadrianus rescripsit* . Verum de jure no-

vo

(a) *L. 37. D. judicis.*

vo sic statuit Constantinus : ut hoc loco scripsit Gothofredus (a). *Violentia causam examinari oportere, & in ea requiri, ac investigari quis, ad quem venerit possidentem, ut ei, quem constituerit expulsus amissa possessionis iura reparentur. Quo facto, hoc est possessione jam restituta, violentus poenae non immerito destinatus, in totius litis terminum differatur, ut agitato negotio principali, si contra eum fuerit iudicatum in insulam deportetur.* Hanc legem Constantini cum illa Hadriani superius laudata, aperte pugnare scripserunt Hotomannus, & Cujacius, ea moti ratione, quia in hac possessionis iudicium violentiae crimini praefertur, secus ac in illa statutum fuerat. Hinc Pragmaticorum insurrexerunt contentiones. Sed recte animadvertit Gothofredus eos fuisse deceptos in proprietate sermonis; nam quod dicitur in lege de iudiciis *si de vi, & possessione quaeratur*, vox *possessio* accipienda est pro rei proprietate; quo facto nulla invenitur antinomia. Nam quum Constantinus voluerit esse primum de *possessione* cognoscendum, hoc non ideo affirmavit, ut iudicium civile praeferreret criminali: sed quia hoc ipso, quod iudicium criminale redditur, ventilaturque, de possessione cognoscitur; nempe ut ante omnia spoliatus restituatur; deinde vero veniatur ad poenam, scilicet ad deportationem, si spoliator non fuerit dominus. Et si dominus sit pro vi illata bonorum medietate multabitur, ad vindictam publicae disciplinae; quum nemo possit propria auctoritate rem suam vindicare, quod fieri non potest, nisi proprietatis iudicium antecedit. Hinc est cur hoc criminis iudicium ultimo loco ponatur, non vero illud, nempe commissae violentiae, quod simul & semel cum ipso possessorio transigitur. Nulla igitur contradictio inter jus vetus, & novum, quum veteri adhuc iure non posset violentiae causa pertractari, nisi simul cum ea de possessione ageretur. Hinc quum legamus, Hadriani lege de vi prius, quam de possessione cognoscendum; *possessio* illa debet accipi pro rei proprietate, ut in calce ejusdem legis habetur. Unius igitur vocis ignoratio viros summos in errorem rapuit; ejusdem

(a) L.3. ad l. jam de vi lib. 9. Cod. Theodof. tit. X.

dem vero intelligentia in concordiam mire eosdem adducit.

In lege 14. Codic. Theod. *de accusationibus, & inscriptionibus* habetur : *Quod si quis exerat actionem internecini, vel crimen intendat suspectæ mortis*, debeat inscribere in crimen. Vir clarissimus Cujacius ad titul. *de falsis* credidit, actionem internecini esse illam civilem de homicidio ; quod falsissimum est. Nam titulus ipse *de inscriptionibus*, in quo hæc actio conjuncta legitur crimini suspectæ mortis, satis commonebat eam non civilem, sed criminis actionem esse. Si igitur criminis hæc actio est, cur dubitatum an hæres deberet in eam inscribere, quum exploratissimi juris sit accusatorem debere inscribere in crimen? Sed quoniam internecini crimen est veneficii accusatio, quo suspicatur ab hærede fuisse testatorem peremptum, ex ipsius vocis significatione en tibi, quod injicitur dubium. Quum teneatur hæres ulcisci defuncti mortem, videtur non debere inscribere in crimen, quum inter voluntariam accusationem, & officii necessitudinem valde intersit. Verum id, si esset filius, aut Mater, vel Pater, aut extraneus, cui ultio isthæc imperata fuisset a testatore ; hi enim inscriptionis vinculo sunt immunes ; quia non voluntate, sed officii necessitudine criminis actionem intentant. Sed quid ad hæredem extraneum, cui non fuerit hoc a testatore mandatum? Contra vero hic etiam ex pietatis officio, & inconsulto calore, quam voluntate, accusare servos domesticos de defuncti morte suspectos videtur. Sed utcumque res se habeat, lex sanxit, ut & in actione internecini inscriptio esset in crimen. En quanti est facienda latinitatis jurisconsultorum scientia ; & quanta errorum seges ex ejus imperitia ad nos redundat.

## §. II.

### *De Philosophia Stoica.*

**I**Nter vetustos Philosophos jure merito principem locum Socrates obtinet ; ante eum enim in eo Philosophorum scientia tota versabatur, ut alii assidua speculatione astra per-

M

cur-

currerent, ut de futuris rebus conjecturas caperent; alii naturam ipsam introspicere conarentur, quo rerum naturalium, quoad liceret, rationes explorarent. Sed ille hanc contemplationem Græcorum sterilem, ac inertem, quæ potius ingenii exercitatio, longiorisque ocii levamen, quam scientia haberi poterat, reddidit operosam, atque frugiferam; quippe qui illam convertit, transfuditque in eam scientiam, quæ publicæ, atque privatæ fecundissima seges esset utilitatis, in philosophiam nimirum moralem, qua homines sociabiles, & probi Cives fiunt. Hac igitur nova philosophia a Socrate instituta, per quam homines ad societatem, civilitatemque formantur, unaquæque Civitas, omnisque culta natio eam capeffere, addiscereque festinavit. Jam vero jus civile, quum aliud non sit, quam norma bene honesteque vivendi; illud erit Civitatis jus, qualis philosophia ab eadem Civitate adoptata. Quare hoc spectans Ulpianus ait, Romanos non fucaram, sed veram philosophiam sectari, jus nempe per hanc definiens, ut unum illud idemque esse cum philosophia, significaret.

Verum enimvero post Socratem adeo per omnes gentes fuit hoc sapientiæ studium diffusum, ut ex eo sectæ quamplurimæ, & quidem aliæ alia sentientes, fuerint ortæ. Nam erant qui rerum contemplationi tantum navabant operam; alii vero, qui speculationem simulque actionem jungebant, vocatique Stoici. Quam sane philosophiam præ ceteris Romani sibi cooptarunt; quum per hanc sapiens accederet ad Rempublicam. Hæc inquam, tempore procedente, adeo per omnes juris civilis partes fuit sparsa, atque diffusa, ut ardua res sit, ac prorsus desperata Romanorum jurisprudentiam addiscere, nisi revoces eam ad Stoicam sapientiam, cui tota profecto innititur, infidetque. Verum demigrante Romam pulcherrima hæc scientia, contigit sane tractu temporis, quod & ceteris rebus usuvenit, nempe ut obortis dissentionibus, divisio fuerit in eam quoque inducta. Itaque inter ipsos Romanos fuerunt, qui ita arcte ei adhæserint, ut ne latum quidem unguem a vetustis jam traditis placitis, regulisque discesserint. Alii vero interpretationibus novis, magis tamen æquitati, quam litteræ consonis, eam profitebantur. Demum orti sunt

&

& alii, qui æquitatem una cum litterali ejusdem sensu copulantes, hac via enata dissidia componere studebant. Hæ sunt nimirum illæ tres Jurisconsultorum sectæ, notissimæ satis Sabinorum, Proculianorum, & eorum, qui appellabantur Medii, sive *Herciscundi*, qui scilicet illos tam dissitos inter se in concordiam adducerent, partim litteram, partim vero æquitatem sectantes. Ex his inter se tam discordibus sectis prostant in jure civili tot, tantaque dissona jurisconsultorum responsa; quemadmodum enim alii in alia erant hæresi, ita diversis principiis ducti aliter respondebant in jure. Sic igitur Stoicorum, aliorumque sectæ principia sollicitè exquirenda sunt, ut & jus civile Romanorum possimus intelligere, & Jurisconsultorum responsa, inter se pugnantia, ad cujusque sectæ revocata dogmata, componere valeamus. Nec sane cura hæc, & studium in hoc uno vertitur, ut vetustarum rerum notitia curiositatem nostram expleat: sed ut potissimum ex eo illam comparemus scientiam, qua nobis innotescat, responsa jurisconsultorum occurrentibus negotiis aptanda ne sint, nec ne, prout Stoicæ principia hodierno usu recepta sunt, aut exoleverint. Igitur quum Stoicæ hujus sapientiæ studium sit nobis adeo necessarium, sinat lector, ut ordine rem hanc a suo veluti fonte repetam, ut inde ejus proprietates, notionesque undequaque appareant.

Illud potissimum erat hujus philosophiæ institutum, ut sapiens accederet ad Rempublicam; cujus rei profecto luculentissima sunt scriptorum veterum testimonia. Laërtius de Zenone hæc tradidit: *Accedere dicunt Sapientem ad Rempublicam, nisi quid impediatur, ut ait Cbrysippus in primo de vitis, idest ad Magistratus, & judicia, & ad oratoriam solos esse idoneos.* Gellius item (a): *Civitates, & Rempublicam (si nihil prohibeat) constanter, & fortiter, & perite Stoicus administrat.* Ac denique Plutarchus sic: *Etenim Magistratus gerunt, & judicant causas, & consultant, & leges ferunt, & puniunt, & honorant.* Hinc nil mirum si Marcianus hanc philosophiam præ ceteris extulit (b), ac summam stoicam sapientiam nuncupet;

M 2

quum

(a) *Lib. X. cap. 22.*(b) *L. 2. D. de legibus.*

quum hæc sola traderet sapientes participes fore totius civilis regiminis ; quia ceteræ tantum contemplationi rerum , nequaquam vero rebus agendis studiosos addicerent .

Erat igitur hujus philosophiæ studium præcipuum , ne homines relinqueret inertes , sed ut faceret actuosos . Verum quia in rebus humanis nihil infestius esse potest , quam pertinaci animo insistere in eo , quod successu rerum falsum deprehenditur : non mirum si hinc ea hujus philosophiæ prima rudimenta essent , ut receptæ opiniois freret crebra mutatio , quoties quid verosimilius occurreret in contrarium . Quapropter scripsit laudatus Laërtius de Chrysippo Stoico hæc : *Ampliabat autem ipsa volumina sæpe de eodem dogmate tractando, omneque quod incidere scribendo, ac sæpe corrigendo.* Et Seneca (a) : *Non est levitas a cognito, & damnato errore discedere; & ingenue fatendum est; Aliud putavi, deceptus sum: Hæc vero superbiæ stultitiæ perseverantia est. Quod semel dixi, qualecumque est, fixum, ratumque sit.* Et denique Epictetus Stoicorum facile Princeps (b) : *stultum neque mutari, neque rumpi posse.*

Sæculi fuerunt hanc methodum etiam Romani Jurisconsulti . Quare multoties eorum responsa contraria de eadem re Triboniani inscitæ tribuenda non sunt ; sed ipsis illorum auctoribus , qui a priori sententia, suadente postmodum alia verosimiliori ratione , discedebant prudenter ; quorum exempla non pigeat referre , quum sint perpulchræ , & scitu dignæ . Ita se gessit Scævola in l. *qui bona* §. *si quis duobus* de acquirendo rerum dominio . Ita Papinianus omnium jurisconsultorum Princeps in l. 6. , & 7. D. de servis exportandis , & Sabinus in l. *item, quod* D. de hæredibus instituend. ac Paulus in l. *quæsitum* 78. §. penult. de legatis 3. ita scribens . *Quum vir ita legasset, quæ uxoris cāussa parata sunt, ei do, lego : ego apud Prætorem fideicommissarium petebam etiam res æstimatas, quarum pretium in dotem erat : nec obtinui, quasi restator de his rebus non sensisset. Atqui si in usum ejus data sint,*

(a) Lib. 4. de benefic. cap. 37.

(b) Cap. 15.

*sunt, nihil interest, ab ipso, an ab alio comparata sunt. Postea apud Aburnium Valentem inveni ita relatum; Mulier res aestimatas in dotem dederat; ac deinde maritus ei legaverat his verbis; Quae ejus causa parata emptaque. Dixi emptorum, paratorumque appellatione non contineri ea, quae in dotem data essent; nisi maritus eas res, posteaquam ipsius factae essent, in uxoris usum convertisset.*

Adhibebant etiam summam industriam; qua verborum proprietatem in loquendo, ac scribendo assequerentur, verborumque detegerent origines, inde ut interrogati consulti-que concisis, brevibusque verbis, hisque ad rem sermonis elegantia aptatis responderent. Quod sane tractatus eorum de regulis juris abunde testatur, in quo animadvertere licet, eorum sententias ea expositas brevitate sermonis, ut dixeris plus dictum, sed minus scriptum. Sane Laërtius testatur, Zenonem afferenti euidam breviter sibi videri dicta philosophorum; respondisse vera loqueris; oportet nempe & syllabas ipsorum esse breves, si fieri possit. Atque ut Jurisconsultorum adducamus exempla, tradidit Gellius (a) de Labeone ita: *Latinarum vocum origines, rationesque percalluerat, eaque praecipue scientia ad emendandos plerosque juris laqueos utebatur.* Ex quibus apparet celebriores Jurisconsultos germanam Juris intelligentiam non modo ex verbis ipsis latinis infusa sententia, sed ex retrusioris Philosophiae penetrabilibus eruisse.

Sed interim a Stoicorum loquendi formulis ad rem deveniamus. Sane jus civile nil aliud est, quam justitia civilis, quum ad eam juris praecepta, scilicet honeste vivere, alterum non laedere, suum unicuique tribuere, omnino revo-centur. Quum igitur Romani jurisperiti eam fuerint sectati justitiae definitionem, quam quidem a Stoicis acceperant; dicendum est pene omne civile jus a Stoicis principiis pendere, quoniam prima ejus origo a Stoica philosophia petita est. Itaque videndum quid Stoici senserint de justitia, ut cum ea deinde juris civilis scientiam comparemus. Seneca, qui inter Stoicos vindicat sibi primas, haec de justitiae definitio-

ne

(a) *Lib. XIII. cap. 10.*

ne scripsit (a) : *Philosophiam quoque fuerunt , qui aliter atque aliter definirent ; alii illam studium virtutis esse dixerunt , alii studium corrigendæ mentis .* Sed nos pressius videamus ex jurisconsultis nostris quomodo plerique justitiam definierint. Sane Ulpianus in titulo *de justitia*, & jure hoc modo definit justitiam : *Jus naturale est ( ait ) quod natura omnia animalia docuit . Nam jus istud non solius humani generis proprium , sed omnium animalium , quæ terra , marique nascuntur , avium quoque commune est . Hinc descendit maris , atque femina conjugatio , quam nos matrimonium appellamus ; hinc liberorum procreatio , hinc educatio . Videmus etenim cetera quoque animalia , feras etiam istius juris peritia censerit .* Quæ justitiæ definitio per omnia Stoicorum placitis respondit . Hinc Plutarchus Chrysippum insignem Stoicum eodem modo definiisse justitiam ait , cujus verba ita retulit in libro primo de justitia : *Chrysippus ait bestias etiam beneficio natorum , ratione quadam familiaritatis inter se devinciri , demptis piscibus .* Qua de re , quum Romani Stoicorum placita per omnia sectati fuerint , non mirum si ex Stoicorum sententia scripserint justitiam hominibus communem esse , & brutis .

Sed videamus cur Stoicis arriserit ita definire justitiam . Causam autem potissimam , eamque justissimam fuisse invenio , ut scilicet magis inter homines possit excoli , servarique societas ; etenim justitiam definiendo per id , quod commune hominibus , ac brutis est , inde fiebat ut homines brutorum exemplo ad justitiam , humanitatemque inter se colendam proniores evaderent . Unde Seneca ita scripsit (b) : *Nulla secta benignior leniorque est , nulla amantior hominum , & communibus bonis attentior ; ut propositum sit usui esse , aut auxilio , nec sibi tantum , sed universis , singulisque consuleri .* Quod jure merito dictum ; nam sic per humanitatem , & facilitatem quamdam quum fuissent traducta , atque diffusa hujusmodi philosophiæ dogmata jam fere per totum civile Romanorum jus : ille deinde invaluit usus , percrebuitque

(a) *Epist.* 89.

(b) *Lib.* II. *de clement.* cap. 5.



que inter homines, ut illud quod inter eos est præcipuum, nempe libertas, foveretur quam maxime, & justitia excoleretur, non illa quidem, quæ nimio rigore hominibus fiat asperior, ut summum jus sit summa injuria; sed æquitate, & humanitate, quam maxime temperata. Hinc apud eos, nempe Stoicos, recepti juris fuit, hominem natura liberum, non servum putari; & si servus fortunæ ludibrio evaderet, habendum servum respectu tantum operarum. Item hominem, cujus gratia omnia condita sunt, fas non esse haberi in fructu; ac pecuniam, veluti suapte natura sterilem, nullum posse foetum gignere; ideoque odiosam esse usuram, quum res, nempe pecunia eo vertatur foeneratorum rapacitate, ut pariat illud, quod ejus naturæ adversatur, scilicet usuras. Hæc omnia fuerunt Stoicorum dogmata, quibus magis inter homines societas, ac justitia, suadente æquitate, foveretur.

Hinc videamus, principia isthæc per Jurisconsultos Romanos e Stoica disciplina venientes, in jus disseminata, atque traducta, quo rem adduxerint. Apud Stoicos libertatis favor erat summus, pariter ac maximus fuit apud Romanos; quare libertatem inter, & servitutem fluctuantibus animis, libertas servituti præferebatur. Hinc recepti juris erat in possessorio vindicias secundum libertatem dari. Item conditiones legato, aut institutioni contra libertatem insertas, a legato, vel testamento rejici, remanente tamen hæreditario lucro penes hæredem, legatariumque, cujus fuerat, conditione adjecta, libertas coercita. Demum favore libertatis illud etiam constitutum fuit, servum liberum institutum, sed substitutum non adjecta libertate, etiam in substitutione illam tacite adjectam, repetitamque censi. Usura non minus apud Romanos, quam apud Stoicos, ut dixi superius, odiosa fuit; unde apud Romanos jurisperitos rationes illæ valebant, quibus quantum possibile foret, usura coerceretur. Verum quum ex his principiis quamplurimarum legum ratio pendeat, quæ alioquin obscurissimæ forent, operæ pretium est Senecæ verba hac de re quamvis longiora perscribere. Ait ille (a).

Vi-

(a) *Lib. VII. de benefic. cap. 7.*

*Video istic diplomata, & syngraphas, & cautiones, & vacua quædam habendi simulacra; umbras quasdam avaritiæ laborantis, per quas decipiant animum inanium opinione gaudentem. Quid enim ista sunt, quid fœnus calendarium, & usura, nisi humana cupiditatis extra naturam quesita nomina? quid sunt ista tabulæ? quid computationes, & venale tempus, & sanguinolentæ centesimæ? voluntaria mala ex constitutione nostra pendentia, in quibus nil est, quod subjici oculis, quod teneri manu possit, inanis avaritiæ somnia. Quam usuræ definitionem, tam vivis depictam coloribus, si conferas cum ea, quam Pomponius tradit in l. usura 121. de verb. significat. dixeris utrumque uno ore loquutos. Inquit enim hic Jurisconsultus: Usura pecuniæ, quam percipimus, in fructu non est, quia non ex ipso corpore, sed ex alia causa est. Ex quibus omnibus velim causam advertas, cur Romanis tanto odio usura fuerit, ut sortis ipsius obligatione non deberetur, nisi separatim, ac distincte pacti essent; neque pacto nudo, sed stipulatione adjecta (a); imò licet per stipulationem conventa esset, levibus tamen conjecturis deinde suadentibus in contrarium, censebatur vel remissa, vel diminuta ad mensuram postremæ exactiōnis, si nempe creditor per aliquod tempus minus quam conventum fuerat exigisset usuras (b). Quum enim illa usura haberetur odiosa, non erat profecto interpretatione juvanda, sed potius minuenda, imò & aliquando condonanda; nam agebatur de lucro ab ipsa re, contra sui naturam, per humanæ malitiæ commentum percipiendo.*

Ex his nunc mihi paratur occasio illustrandi celeberrimam legem *Centum Capuæ* (c), quæ tot strenua tamdiu torisit ingenia. Hæc est facti narratio: Promisit quis centum solvere Capuæ, cui fidejussor accessit. Verum debitor statuto tempore, & condito loco conventa non adimplevit. Quare creditor fidejussorem convenit tam de sorte, quam quanti ejus interfuit Capuæ potius, quam ubi conventum fuerat solutum

(a) *L. si pro patre §. sed utrum de. in rem verso:*

(b) *L. 3. C. de usuris. L. si post moram D. de eo, quod certo loco.*

(c) *D. de eo quod certo loco.*

tum esse. Videbatur explorati juris deberi illud interesse a fidejussore, qui rei obligationi accessit. Nam si principalis debitoris id erat juris vinculum, ut sortem cum usuris solvèret, idem videbatur dicendum de fidejussore; quum obligatio principalis, & accessoria non diverso, sed eodem jure debeant censerì. Sed secus respondit Africanus his verbis . . . *Neque enim hæc causa recte comparabitur obligationi usurarum; ibi enim duæ stipulationes sunt; hic tantum una pecuniæ creditæ. Quæ verba erunt instar oraculi, nisi ad ea intelligenda adhiberemus Stoicam rationem. Quum enim ex Stoicorum placitis odiosæ sint usuræ, hæc sane stricto jure non debentur, nisi promissæ. Ergo necesse sunt duæ stipulationes, una sortis, altera usurarum, ut ex ambabus conveniatur & reus, & fidejussor. Hic vero una tantum stipulatio fuerat, sortis scilicet, usurarum vero nulla. Sed nihil hoc ad interesse ob moram debitoris principalis, de quo lex loquitur: fateor enim fidejussorem ad usuras a reo promissas ex stipulatione teneri; non tamen tenebitur ad interesse, siue usuras ob moram, quum res dissimilis sit; quod est responsum Africani. Itaque usuræ stipulanti promissæ a reo, & a fidejussore debentur quidem; sed hoc quod interfit ob moram, ut in hac re, quum a fidejussore promissum expresse non sit, & usuræ sint odiosæ, non debentur. Nec sane mora principalis debitoris fidejussori nocere potest, ut in usuras, quas ipse non promisit, ipse quoque teneatur; nam hic aliud opus erat pactione, & quidem diversa a prima, quia juxta Pomponium in laudata superius legē de verborum significatione, usura est ex alia causa, idest ex nova obligatione.*

Videtur mihi de hoc argumento dixisse satis; attamen ob rei gravitatem, licet alia quædam addere, & quidem non invenusta; quæ in jure civili veluti Stoicorum sunt semina. Stoicis visus foetus adhuc in ventre inclusus non esse animal, sed tantum pars maternorum viscerum, de quo ita tradit Plutarchus (a): *Plato animal censet in utero infantem, quia & moveatur in utero, & alatur; Stoici vero partem i-*

N

psam

(a) Lib. V. de placitis philosoph. cap. 15.

*psam ventris, non animal. Quemadmodum enim fructus, qui stirpium partes sunt, ubi maturavere, defluunt; ita de foetu censendum est.* Quod autem hoc principium fuerit a Romanis jurisperitis probatum, patet ex quamplurimis juris locis, & præcipue ex hoc Papiniani responso, quod abs re non est hic perscribere: *In falcidia placuit, ut fructus postea percepti, qui maturi mortis tempore fuerint, augeant hereditatis æstimationem, fundi nomine, qui videtur illo in tempore fuisse pretiosior.* Circa ventrem ancillæ vero nulla temporis admissa distinctio est: nec immerito: quia partus nondum editus, homo non recte fuisse dicitur (a). Quo statuto principio illud etiam in Romano jure sequebatur, non puniri poena ordinaria legis Corneliæ, sed tantum extraordinaria, qui foetum adhuc inclusum in utero necarent, ut ex l. 4. D. De extraordinariis criminibus, & l. si mulierem D. ad l. Corneliæ de sicariis. Et si de his plura desideres, videsis hujus juris vestigia in l. 2. §. 1. D. De ventre inspiciendo, & in l. 2. de mortuo inferendo.

Verum prætereundum non est, licet a Romanis fuerit ad jus civile Stoica philosophia aptata, accidisse tamen huic, quod & ceteris rebus inter homines labentibus annis solet obvenire, nimirum ut haud maneant eodem in statu, sed paulatim veluti a se diffuant, atque ad alia convertantur. Itaque temporis progressu, aliæ, atque aliæ sectæ obortæ sunt, atque inter se contrariæ. Erant enim Sabiniani, quorum Princeps Attejus Capito fuit, qui adeo ad priscae illius philosophiæ dictata se referebant, ut ne per traversum quidem unguem discederent ab antiquorum traditionibus, vetustatem ipsam in jure semper sectantes. Igitur eorum qui in hanc familiam commigraverant, id erat ingenium, ut semper sequerentur ea, quæ magis naturali rationi, civiliq[ue] juri vetustiori congruerent. Quapropter emptionem rebus etiam hinc inde datis censabant posse perfici, repetentes id a rerum permutatione contractuum omnium vetustissima; & naturali rationi insistentes, pro possessione rerum affirmabant sufficere etiam ad juris effectum naturalem possessionem (b). Hinc in-

fe-

(a) L. 6. D. ad l. falcidiam.

(b) L. pupillus D. de acquir. rer. dom.

ferebant, colonum, usufructuarium, creditorem esse habendos uti possessores. Longus nimis profecto essem, si singula hujusmodi vellem hic percurrere. Itaque his prætermiſſis, dicam uno verbo, in eo totum versari Sabinianorum studium, ut semper æquitatem naturalem, & quæ a majoribus tradita erant, præferrent curiosis disputantium rationibus, & verborum subtilitati.

Verum contrariam semitam Proculiani tenebant, nimirum id agebant, ut subtilitatem juris, ingeniosamque disputandi rationem in omnibus objicerent. Ex quo factum, ut affirmarent verum, quod apud Sabinianos falsum existimabatur. Quare Celsus, qui ex hac familia prodivit, Sabinianorum æquitatem perstringens, ait (a): *Esse enim hanc questionem de bono, & æquo; quo in genere plerumque sub auctoritate juris scientiæ perniciose erratur.*

Hinc Pomponius de Labeone Proculianæ sectæ auctore hæc scripsit (b): *Labeo ingenii qualitate, & fiducia doctrinæ fretus, quod præ ceteris sapientiæ operam dederat, plurima innovare instituit.* Non mirum igitur si ejus vestigiis discipuli inhærentes tot nova in jus invexerint, & quidem traditionibus vetustis adversa, inter quæ sane non prætermittendum est, Sabinianos, & Proculejanos in rerum etiam mensura dissenſisse inter se; nam hi proportionem in rebus adhibebant arithmeticam, illi vero geometricam. Ex quo fit ut Jurisconsultorum responsa non raro sibi invicem adversentur. Sic Geometricam proportionem capiunt *l. si is qui 50. D. de legatis 1. l. si ita 13. D. de liberis, & posthumis. l. 4. Si ita 47. D. de hæredibus instituendis.* Contra vero secundum arithmeticam scripta est lex 23. *C. de legatis*, eidemque Trebatius alludit in lege *vulgaris 21. D. de furtis*. Quid plura? Propterea hæc a me dicta sunt, ut juris studiosus in legibus inter se pugnantibus advertat jurisperitorum varias sectas; ut inde eorum dicta contraria componat, atque ad uniuscujusque sua principia revocet; quod etiam tuta norma erit

N 2

ad

(a) *L. 91. §. sequitur D. de verb. obligat.*

(b) *L. 2. §. post hunc de orig. juris.*

ad conciliandas Constitutiones Imperiales , quæ & ipsæ aliquando inter se in contentionem veniunt. Nam quum Principibus in legibus ferendis adfiderent jurisperiti , qui alii aliam sectam sequebantur , facile intellectu est pro sua quemque sententia operam Principi consulenti præbuisse ; atque inde leges quoque Imperatorum inter se dissentire , prout contraria Jurisconsultorum erant in jure principia. Neque dicas hoc secus esse sub Principibus Christianis , ac si pagana philosophia a Constantino refrixerit , & Evangelica invaluerit ; nam licet gentilium dogmata primus ille Christianus Imperator sustulerit ; id tamen factum est in futilibus illis stultæ superstitionis figmentis : ceterum non is ei animus fuit , ut quæ rerum naturam , civilemque politiam spectabant principia everteret ; quod sane exemplis comprobandum .

Constantius Imperator quum jussisset , filii demortui bona , nullo habito eorum discrimine , patri jure peculii deferri , deinde mutata sententia statuit *L. 4. C. Th. de bonis maternis* , ut decedente filio intra ætatis annum sextum , bona , quæ a materno genere obvenerant , deferrentur matri , ejusque cognatis ; si vero defunctus esset post sexennium , sine ulla distinctionis ratione , sequerentur patrem , atque hoc ex æquitate ait constituisse . Verum quid hæc annorum distinctio ad æquitatem ? Ego quidem , quum ante actam ætatem meam doctissimis quibusque juris Interpretibus evolvendis transfegerim , nullibi profecto Constitutionem hanc illustratam nactus sum . Unus V. C. Jacobus Gothofredus in suo perpetuo , atque immortalis commentario in Codicem Theodosi , nodum vidit , sed haud satis , ut mihi videtur , licet felicissimo ingenio fuerit , expedivit . Aliquam tamen faciem nobis prætulit , ut lex alioquin obscurissima , in apertam tandem lucem prodiret . Itaque ut & nos opellam nostram quantumcumque in ejus explanatione impendamus , præmittenda duxi quædam , partim ex jure naturæ , partim vero ex philosophiæ Stoicæ deprompta penu .

Erat apud Stoicos recepta opinio , quolibet sexennio labente quid novi naturam acquirere ; quare nonnisi sexennio transacto finiebant infantiam . Hinc juris publici studiosis placuit ,



cuit, filium hoc tempore potius sub matris, quam patris potestate esse, tum ob necessaria alimenta, quæ habet a matre: tum etiam quia ob infantem ætatem non indiget adhuc cura potius patris, quam matris, qui utpote mulieris ingenio præstantior, tempori illi servatur, ubi opportuna evadat educatio, scilicet postquam ætate grandior internoscere, rationis ductu, quid agat incoeperit. Qua de re bona materni generis ad filium profecta, intra sexennium suam adhuc primam originem fervare putabant Stoici, hoc est censeretur materna; tum quia hoc tempore quid novi filius non accepisset: tum etiam quod maternæ potius, quam paternæ potestati subesset. Quum bona igitur sequantur conditionem personæ, inferebant ea adhuc habenda, uti erant prius, materni nempe generis; atque adeo æquitatem suadere, ut filio intra sexennium moriente, bona ejus deferrentur matri; vel ea defuncta, ceteris cognatis. Hoc profecto præferunt illa legis verba, *ut ex utraque familia manantes facultates, singulis quibuscumque exiisse potius, quam adepta esse videantur*; quum intra sexennium nihil novi filii natura adquisierit. Ex hoc item rationem tute intelliges, cur moriente filio transacto sexennio, bona ejus, nulla habita distinctionis ratione, Patri peculii jure cederent. Tum enim hæc Stoicorum opinio de mutatione naturæ ineunte septennio locum tenet; ac tum juris publici consultorum sententiæ in hoc statu de patria potestate datur locus. Quare quum filius ineunte septennio sit non sub matre, sed tantum sub patris potestate, & bona ob novam filii qualitatem amisissent antiquæ originis rationem, factum est, ut ea solus pater nulla distinctione acciperet.

Ex hucusque dictis probe intelligas velim, quam necessaria sit philosophiæ Stoicæ scientia ad intelligendum jus, tum vetustum Pandectarum, quam novum in Codice. Et licet Justinianus fuerit conatus, quinquaginta perlatis decisionibus, Papinianas, & Proculeanas sedare contentiones: factum tamen Triboniani inscitia, ut quamplurima illorum vestigia in jure Justinianæo tibi occurrant, a quibus obscuritas summa in evolvendis legibus oboritur, nisi Stoicæ sapientiæ effata præsentissimo subsidio erunt.

Com-

Commodum argumentum, quo de agimus, persecutus est V. Cl. Antonius Sergius Jurisconsultus Neapolitanus, in sua peculiari Dissertatione *de Vera Jurisconsultorum Philosophia*, propediem lucem visura, in qua, pro ea quam in aliis suis egregiis monumentis prodidit, excultra eruditione, eum res sane scitu dignas complexurum pro certo habeo. Sed, quod nostra hac tempestate latandum, Vir doctissimus Antonius Genuensis non modo suis præstantissimis scriptis, quæ per universam Europam magno plausu pervolitant, sed voce etiam magna auditorum frequentia, illud Physicæ genus proficitur, quod humanæ vitæ cum primis est frugiferum. Etenim recis futilibus illis Philosophorum speculationibus, universam Philosophiam traducit ad rerum agendarum studium, ad officia hominis, ad reipublicæ rationes, quæ sanè illa est, quæ ad legum nimium probam intelligentiam cum primis conducit.

## §. III.

*De Geographia.*

**A**D legum intelligentiam facit etiam Geographia; nam in legibus pœnalibus, & in jure commercii, Populorum cum primis mores, Civitatum ingenium, soli qualitas debent spectari; pœnæ etenim eo sunt minus, magisve sævæ, quo homines ad vitium sunt proniores. Quem enim fugit, sæpe homines ad vitium magis, quam ad virtutem, ad hoc potius, quam ad illud procliviores esse, vel quia improba aliqua consuetudo invaluerit in Civitate, vel quia ejusdem soli natura, aut Cœli indoles ad corporis habitum, nescio quid aliquid influere videatur? Hinc est, ut proportionem servata, leges pœnales sint aliæ alii genti vel mitiores, vel rigidiores, attenta scilicet cujusque indigentia, cui pœnis, veluti medicina salubri debet prospici. Quod ut luculentius innotescat, nonnulla afferamus exempla.

Spartæ poterat quivis de frugibus impune furari, quanto unius diei posset inediam explere. Sed id naturali rationi dissonum videtur, tum quia furtum naturali jure veritum, tum



tum etiam ob causam inertis vitæ, cui facile poterat unusquisque assuescere. Nam si vitam quotidiano frugis furto possis in diem sustentare, certo certius laborem effugies. Sed aliud profecto animo spectavit Lycurgus; quum enim Spartanus Populus desidiam, atque incuriam nimium esset additus, id Rex concessit, ut unusquisque suarum rerum satageret, custodiamque navus subsideret; item ut inde evaderet civis in arte militari peritior; quum contra poena afficeret furem, quem dominus in ipso facinore comperisset; quam poenam sane effugisset si ita se solertem gessisset, ut domini conspectum eluderet. Præterea quemadmodum Athenis civi cuicumque commendabantur artes, ita ex adverso Spartæ verabantur. Num Lycurgus otio cives marcescere voluit? Minime vero. Quum enim ager Spartanus satis suapte natura felix esset, ejus cura apud Helotos deposita, furore potius martiali eorum animos incendere curabat, quo magis magisque in diem, per tela, per ignes, imperium proferret. Sed secus erat ager Atheniensis, infelix nempe malignusque; artibus autem elanguescentibus, haud sane fuisset, unde vitam sustentarent. Quæ causa est, quapropter totus fuerit Solon, ut artes omnes quaquaversus proveheret. En igitur Geographiæ studium quantum ad jura civilia intelligenda sit adjumenti. Sed veniamus ad jus Romanum, in quo versamur.

Lex prostat in titulo de annuis legatis (a), in qua memoratur quædam pecunia relicta Reipublicæ Sardoniorum causa certaminis Chrysantiani. Accursius sic eam explicavit: *Reipublicæ Sardoniorum, ut inde fieret in quolibet quarto anno quodam certamen sive ludus, qui appellabatur in dicta Civitate Chrysantianus*. Quæ interpretatio ridicula sane est; Chrysantus enim Philosophus civis erat Sardonius in Lydia, jussus ab Imperatore Juliano, ut ad se veniret. Ille renuit dicens, nullo ad hoc divino afflatu permoveri, sine quo nefas putabat quid agere. Iratus ex hoc Julianus illum mandavit interfici. Sed ejus Civitas, ne hoc tantæ pietatis in Deos exemplum posteris deperiret, in memoriam Chrysanti ludos

fu-

(a) Lex cum erat.

funebres, quibus manes placari credebatur stulta gentilitas, quolibet quadriennio fieri instituit (a). Et hæc vera est legis hujus explicatio.

Verum præmissis aliis, quorum cognitio, licet ex locorum certa notione proficiantur, tamen nullius frugis præter eruditam rerum notitiam, veniamus potius ad ea, quæ si ex hac scientia minime repetantur, maximo profecto cum in judicando, tum in consulendo detrimento erunt; quæ temere in forum inuenta, in alienam perniciem evadent.

Constantinus Magnus, qui abrogata illa veterum philosophia pagana, populorum mores convertit ad Christianam sapientiam, inter alia optima, quæ condidit, instituta, usurarum illuviem ad justam metam coercuit. Quapropter in notissima lege *Eos qui C. de usuris* ita rem hanc composuit. Homines illustres a negotiatoribus distinguens, istis quidem quæ artem profitebantur, magis indulgit: illis vero minus. Itidem pecuniæ usuram separavit a frugibus; primam intra centesimam omnino cohibuit; frugum vero usurarum vice permisit tertiam partem stipulari. Verum hæc immensa satis usura est; quæ quum maximopere centesimam superet, facit, ut lex hæc sibi ipsi contraria videatur; nam quum in ea pro ultima usurarum meta statuatur centesima; iniquum sane videtur in frugibus istiusmodi admitti usuram, quæ longe centesimam ipsam excedat. Ita quidem esset, nisi ex ipsa constitutione appareret, quem ad locum scripta sit: de quo videamus.

Sane subscriptio ejus est Cæsareæ in Palestina, cujus ex agro, utpote fecundissimo, uberius sane, quam aliunde percipiebantur fructus; ita ut ideo pro fructuum usura ipsius sortis medietas jure pacta videretur, ut testatur Div. Hieron. (b), qui hoc tempore ex Palestina scribens ait: *Solent fœneratores argumentari, & dicere, dedi unum medium, qui satis fecit decem modios; non ne justum est, ut medium modum de meo plus accipiam, cum ille mea liberalitate novem, & semis*

(a) *Pancir. notitia U. J. cap. 68.*

(b) *In Ezech. lib. 16. cap. 18.*



*semis de meo accipiat?* Pensitabatur igitur Cæsareæ usurarum vice in frugibus medietas ipsius fortis. Quo posito, quum Constantinus ad tertiam partem contraxerit; dixeris sane eum & has usuras moderatum. Verum quum hæc lex fuerit localis, videas certe quam immensum aberrant ii, qui ex ea generale conficiunt axioma, statuentes in fructibus, usurarum vice, tertiam partem fortis jure pacisci posse. Et tamen in foro per omnium Pragmaticorum placita usu receptum est, venditionem pacto retrovendendi factam, tunc dici usurariam, quum fructus tertiam partem ipsius fortis exsuperant. Opportune hic lectorem monere non erit abs re, universum hoc usurarum argumentum egregie pertractasse in sua lectissima Differtatione *de usuris*, propediem lucem visura, Carolus Carfora, Sapientissimi Regii Consilarii Francisci Carforæ ex Fratre Nepos, vir sane clarissimus, & qua morum probitate, & modestia, qua græca, latinaque eruditione omnibus jucundissimus, mihiq; cum primis spectatissimus, a quo me plura didicisse ingenue fateor. Sed ad alia pergamus.

In lege *Lucius D. de evictionibus* quæstio hæc proponitur Paulo. Cajus quædam prædia sua sita prope Rhenum vendiderat Titio, qui partem conventi pretii tantum solverat, de residuo habita fide. Interim Imperator Alexander, cui Paulus ipse erat æqualis, eadem prædia veteranis donavit. Hac donatione facta, quum venditor petiisset ab emptore reliquum venditionis pretium, emptor evictionis exceptionem objecit, tantumque abesse ut reliquum pretium solveret, ut etiam venditor ad restituendum quod fuerat solutum teneretur. Videbatur in jure hoc judicium secundum emptorem esse transigendum; quum naturali jure periculum evictionis pertineat ad venditorem. Sed tamen contradicente generali jure, respondit Paulus pro venditore.

Mirum est quamdiu hæc lex interpretum vexaverit ingenia. Multi enim multa dixerunt, & quidem a re aliena, quæ quidem videre poteris apud Amaja (a), qui geographia

O

du-

(a) *Lib. 1. cap. 1. de Principis potest.*

duce præ ceteris enucleate exposuit hanc legem. Is igitur ad rem appositissime scripsit, hæc prædia prope Rhenum sita fuisse. Ea Imperator ob custodiam Rheni, a qua Imperii salus pendebat, militibus in præmia assignavit. Igitur illorum evictio non venditoris culpa, sed publica utilitate sic exigente, enata fuit. Quod quum ita se habeat, damnum ad emptorem pertinere debet, qui quum rei sit dominus, ejusdem periculum perferre debet; res enim si quando pereat, domino nimirum perit. Adde quod emptor hic in nullo damno versatur; nam si prædia illa non fuissent per Imperatorem data militibus, certe quidem & is amisisset, quum eorum potiti essent hostes, deficiente custodia.

Probat etiam Geographiæ necessitatem lex 32. (a), in qua Imperator Honorius, & Theodosius de Orientalibus Naviculariis statuunt, ut sicuti antea Orientales Navarchi ad Constantinopolitanam Urbem vectabant Alexandria frumentum, ita deinceps, eorum munere fungerentur Navicularii Alexandrini, Carpathii, atque ii, qui terras ad mare Ægæum incolebant. Hujus rei causam fuisse notat doctissimus Gothofr. Orientalium desidiæ; additque tempore hujus legis frumenti penuriam fuisse, atque ex ea Constantinopoli famem sævam evenisse. Igitur ambo Angusti id onus cum emolumentis, quibus prius fruebantur Orientales mandarunt Alexandrinis, hæc tamen iis injecta lege, ut naufragii periculum eos sequeretur, etiam si haud probatum esset eorum culpa navem fregisse. Quod quidem videtur iniquum; ut enim rei periculum ad navicularium pertineat, necesse sane est, ut ejusdem culpa anteat. Quapropter videamus nos Geographia duce, quomodo lex hæc luce sua inspergi possit. Sane tam ipsa Alexandria, quam insula Carpathus, & mare Ægæum propiora Urbem Constantinopolim præ Orientalibus erant; quare si quod forte naufragium accidisset, utique culpæ eorum tribuebatur. Nam quum iter proximum esset, poterant quidem id tempus sibi parare aptius, quo infortunii periculum abesset. Atque hæc satis jam dicta puto de Geographiæ utilitate, vel potius neces-

(a) *Lib. 13. Codic. Theod. tit. 5.*

cessitate, sine qua commercii jura intelligi ullo modo non possunt. Reliquum est ut videamus quantam perspicuitatem ejusmodi studium legibus poenalibus afferat; inde enim apparet, qua ratione illæ occurrentibus hodie negotiis adhiberi possunt.

Prostat in tit. XI. Cod. Theod. lib. IX. hæc constitutio: *Si quis posthac reum privato carcere destinavit, reus majestatis habeatur. Datum pridie Kalend. Maji Thessal.* Verum siquidem est, eum, qui carcere privato utitur, jurisdictionem Principis minuere; attamen non tanti habendum est illud crimen, ut reus poena severissima legis Juliæ Majestatis puniatur. Sane hæc lex rescripta fuit Æritrio Præfecto Augustali. Igitur Dioecesim Ægyptiacam spectabat, sive Alexandrinam, ubi quum frequentes excitarentur tumultus, ac potentiores sæpe inopes opprimerent, quid mirum si, ut turbis his prospiceretur, quæ potentiorum superbia, atque insolentia plerumque movebantur, poena hæc tam acerba fuerit irrogata? Quapropter quum universe id constitutum non esset, sed peculiarem locum, certamque Provinciam respiceret, iniquus sane esses, si alio constitutionem forte hanc protraheres. Itaque merito Justinianus illam abrogavit, ejusque in locum mitiorem suam edidit, nempe ut reus totidem dies publico carceri addiceretur, quot ipse alterum in privato detinuerat (a). Ulpianus ait (b) in Arabia poena capitis afficiendum eum, qui scopelissimum in alieno agro fecisset, hoc est qui lapides in eo posuisset; quum, ut idem scripsit, indicio sibi id esset, quicumque agrum illum coluisset, eundem certam, atque acerbam mortem per insidias obiturum. Quæ sane poena in istiusmodi nugis iniqua non erat, quando justus de gentis more atrocium minarum, infestæque crudelitatis metus erat. Plura de hoc si cupias, vide Pancirol. (c).

Denique ut argumentum hoc absolvam, Leo, & Anthemius Augusti poenam severissimam in eos sanciunt, qui per Civitates vel agros *Bucellarios, vel Isauros habent* (d). Ex hac

O 2

autem

(a) Gothofr. hic.

(b) *Lege Sunt quædam D. de extraor. crimin.*(c) *Notit. utriusque Imperii cap. 116.*(d) *T. ult. ad legem juliam C. de vi publica.*



autem *Bucellarium*, & *Isaurorum* interpretatione quanta futilis eruditionis deliria exciverit Accursius, juvat animadvertere. Sic enim venuste satis commentus est: *Bucellarii latrones sunt qui, a minimis incœperunt, puta a bucella panis; vel versus, quia ponunt in ore captorum lignum, ut non clament. Isauri autem etiam latrones sunt, sed aliis perfidiores, ut supra de feriis. Quis risum teneat? Hæc sane sunt, quæ grassante barbarie, ac Geographiæ scientia prorsus abacta, effutiebant viri tunc temporis clarissimi. Sed videamus nos in hac fulgentissima temporum luce, qui fuerint *Bucellarii*, quive *Isauri*, ut inde legis vim penitus introspeciamus. *Bucellarii* teste Suida erant Gallogræci, sive Galathæ, unde Gahogræcia dicta est *Bucellariorum* regio, de quibus vide Pancirolum (a); quare eos ita Porphyrogenita recensuit in Themate sexto: *Habet a sinistra partes quasdam Bucellarii, & initium Cappadociæ, ad dexteram autem Isauriam.* Item Cedrenus in Romano Argiro: *Prasianus pro monacho traditur, ejusque mater ex Mantinea Monasterio, quod est in Bucellario, in Franciam transfertur.* Dicebantur autem *Bucellarii*, quum *bucellam*, sive panem aliorum, quibus mancipabantur, & apud quos morabantur, comederent: quare plerumque militiæ stationariæ Romanorum nomen dabant. Sed postquam milites ii missionem impetrassent, raptu, & latrocinio per summam licentiam vivere pro suo ingenio solebant. Quum autem sæpe Potentiores *Bucellariis* istiusmodi ad latrocinia, ad quæ erant paratissimi, uterentur, hinc factum est, ut Imperatores constituerint ne quis per Civitates, vel agros *Bucellarios* haberet, nempe istiusmodi homines Gallogræcos, gentem prædæ, & rapinis natam. Quod autem attinet ad *Isauros*, qui & ipsi in eadem constitutione in prædiis, aut juxta se habere vetantur, hi sunt qui ad radices montis Tauri morabantur, erantque inopinis excursionibus, occultisque item latrociniiis nobiles, furandique artem adeo percallebant, ut improbos quosque antecellerent. Atque ea de causa ita eos Principes execrati sunt, ut & sævioribus poenis addixerint, & a generali criminum indulgentia*

ex-

(a) *Notit. utriusque Imper. cap. 57.*

exceperint. Tales erant Buccellarii, tales & Ifauri, populi pessimi, fures, sicarii, prædones, cunctis cædes inter, & rapinas miscendis aptissimi. Verum si has poenas furibus omnibus irrogaveris, non æquus judex eris; nam non vigerent pariter æqualiterque in ceteros eæ legis rationes, quæ contra Buccellarios, & Ifauros faciunt. Quare non satis doctis interpretibus arridet usus fori, qui ex Pragmaticorum inscitia invaluit, ut fures omnes exciperentur ab generali indulgentia criminum. Ex his omnibus vel leviter a me degustatis, nemo quidem ita bardus erit, quin videat, quantæ utilitati, atque adeo necessitati studioso juris interpreti sit Geographiæ scientia; ut tum commercii leges uti par est intelligantur, tum ut poenæ, pro regionum indole, sapienter minuantur, vel augeantur.

## C A P U T IV.

*De antiquo usu Fori Romani in causis decidendis.*

**J**Ure merito ad intelligendam priscam Romanorum jurisprudentiam, mira eruditorum omnium consensione, scientia antiqui Fori Romani commendatur. Qui enim fieri potest, ut leges sine ea pernoscantur, quæ sæpe sæpius a recepto per forum usum pendent, eæque maxime, quæ vel cujusque judicis respiciunt potestatem, vel negotiorum formulas præscribunt, vel actus legitimos præferunt, quibus omnibus jus Romanum est refertissimum? Denique ut uno verbo dicam, præter hanc scientiam, fugient re omnino Prudentum interpretationes; quibus illi jus duodecim tabularum, obscurissimum alioquin exponebant, usum fori sectando, quæ sub nomine recepti juris veniebant. Neque dicas frustra nos in id operam impendere, quum consuetudo hæc jamdiu exoleverit, & uniuscujusque Civitatis forum suas quoque consuetudines, atque alias, ac illas Romanæ Reipublicæ habeat. Verum id quidem: sed ne tu quidem inficias iveris, extinctis quamplurimis, quæ Romani fori usum olim spectabant, manere adhuc eorum consequentias, quæ veluti justa & generosa proles, numquam  
fa-



fane, dum Justinianæum jus inter nos vivet, interibunt; sed in foro, judicumque nostrorum subselliis usque vigeant. Anne quæso, cuncta hæc judicialibus hujus ætatis negotiis aptari commode poterunt, nisi ad origines suas, atque ad legitimos fontes referantur? Sed ne lectori forte fastidio sim, rem hanc ita transigam, ut prætermisissis iis, quæ nostra tempestate emolumento vix sunt, ut est vetusta litis contestatio, fidejussio, comperendinatio Prætoris, in interdicens formulæ, vindictiarum solemnities, atque id genus alia, illa tantum pertractem, quæ nobis sint utiliora. Itaque de tribus modo statui agendum, de Magistratibus nempe, eorumque potestate; de formulis, quibus mos erat negotia expedire; & de consuetudinibus demum, sive de illo jure recepto, quod ex Prudentum interpretationibus obortum fuit. Quæ, ut mox videbimus, quantum nobis in re judiciali suppeditent bonæ frugis copiam, vix est ut dici possit. Ad rem itaque.

## §. I.

*De antiquis Romanis Magistratibus.*

**I**N triplici differentia jus omne versatur, nimirum in res sacras, publicas, & privatas. Sacrorum cognitio ad Pontifices pertinebat; publicorum ad Senatum, Populumque Romanum; quæ demum juris privati erant, Prætoris subiciebantur potestati; quæ omnia hisce versibus comprehendit Ausonius:

*Jus triplex, tabulæ, quod ter sanxere quaternæ,  
Sacrum & privatum, & Populi commune, quod usquam est.*

Hæc autem non perinde dicta sunt, ac si singula quæque pertractanda aggrediar; sed pauca ex his delibabimus, quæ dicendis lucem afferunt.

Magistratus aut ad publicas, aut ad privatas quæstiones dirimendas fuerunt constituti. Verum harum cognitio presiori nomine vocabatur Jurisdictio, illarum autem Imperium. Sed Imperium hoc dividebatur in merum, & mixtum; hoc jurisditioni ipsi coërebat, illud autem erat sejunctum ab ea, Quid-



Quidquid Magistratus agit vi publicæ potestatis, id Jurisdictio nominatur, quo in sensu ab ipso Imperio non distinguitur. Verum si in suam quodque vocabulum proprietatem vindicamus, Jurisdictio ab Imperio ipso longe differt, quia potestas animadvertendi in facinorosos Imperium est: caussarum autem, sive controversiarum civilium definitio, Jurisdictio proprie dicta nominatur; quæ ut Ulpianus tradidit, est *Prætoris potestas dandi judicem ad dirimendas controversias*; nam per id tempus illud juris erat, ut Prætor non per se, sed per alios judicaret. Verum quia ex hac Romanorum consuetudine plurimarum rerum nobis aperitur intelligentia: necesse est ut rem hanc ab origine quodammodo sua repetam.

Prætor, alique illustres Magistratus per se quidem non judicabant, sed dabant tantum judicem, eique sententiæ ferendæ præscribebant formulam, a qua is non poterat aliquantulum discedere. Atque hic dicebatur judex datus ex formula ipsi data præscriptaque ad ferendam sententiam. Quod si de negotio dirimendo, ei formula non proferretur, tantumque datum, ut judicaret, prout ex re nata sibi ipsi visum esset; tunc non judex, sed Arbiter appellabatur. Ex qua consuetudine ortum est, ut quædam judicia stricti juris, quædam vero essent bonæ fidei, haud secus ac judex judicandi formulæ addictus, nec ne erat. Hæc sunt stricti juris, & bonæ fidei judicia, inter quæ tamen quam magnum discrimen intercedat, non est ut dicam, quum hodiernus usus satis comprobet. Sed licet Prætor non judicaret, erant tamen quædam ob sui præstantiam prætoriali sententiæ servata, uti erat libertas, qua nihil inter mortales præstantius, ac possessionis vindiciæ per interdicta Prætoria ob publicam tranquillitatem, quæ sane interturbata possessione potissimum labefactatur. Quæ omnia tribus nimirum verbis explicabat Prætor, scilicet vel dabat, vel dicebat, vel addicebat; dabat nempe judicem, dicebat quemque liberum, aut servum; addicebatque possessionem secundum vindicias per interdicta. Quæ cognitiones extraordinariæ vocabantur; quia præter ordinem tam de jure, quam de facto, non datis iudicibus, ipse



cognosceret . Sed prætereundum non est per Diocletianum hæc consuetudo exolevisse ; quum Prætori , aliisque illustribus Magistratibus imperasset ut in posterum per se judicarent . Ex quo factum , ut hic titulus in Digestis hac epigraphe scriptus sit *de jurisdictione* , sed in Codice hoc addito , *omnium iudicum* ; quum in illis jus vetus , in hoc autem jus novum memoretur .

Sed antequam ab hoc argumento discedamus , discriminis causam , atque originem , Imperium inter , & Jurisdictionem , non erit abs re exquirere . Vetus mos apud Romanos fuit , ut nemo Populi injussu posset in Civem Romanum animadvertere . Hinc patrato facinore , iudex creabatur a Populo , ut poenam legitimam infligeret ; de quo Pomponius ita scripsit (a) : *De capite Civis Romani injussu Populi Romani non erat lege permissum Consulibus jus dicere ; propterea quæstores constituebantur a Populo , qui capitalibus rebus præessent ; hi appellabantur quæstores parricidii , quorum etiam meminit lex duodecim tabularum* . Itaque pro re nata Populus creabat iudices , qui delicti probationes undique conquirentes , hinc quæstores sive quæsitores dicti sunt .

Sed hæc consuetudo , inclinata jam libertate , & nobilium adulta potentia , exolevit , nimirum Censorino , & Manilio Consulibus , anno sexcentesimo quarto Urbis ; quo sane tempore aliquorum criminum quæstiones perpetuæ institutæ sunt ; ita ut in eorum reos , sine Populi jussu , Prætori , aut Consuli animadvertere liceret . Id apparet ex Cicerone in Bruto : *Carbone forum tenente plura fieri judicia cæperunt ; nam & quæstiones perpetuæ hoc adolescente constitutæ sunt , quæ ante nullæ fuerunt . L. enim Piso Tribunus plebis , legem primus de pecuniis repetundis Censorino , & Manilio , Coss. tulit* . Dicuntur autem quæstiones perpetuæ , quod injussu Populi exercebantur ; atque ita Prætores sortita Provincia , non statim illuc se conferebant , sed annum morabantur Romæ , ut eorum quisque iudicium ferret in illa criminum specie , cujus quæstio sorte obvenerat . Ex quibus satis intelligis originem Im-

pe-

perii, & qua de caussa ordinariæ potestatis nomen illud non complectatur; si enim speciali lege mandabatur sub generali potestate, postquam quis Consul, aut Prætor factus fuerat, comprehendi plane non poterat. Habes igitur ex his omnibus ortum, & progressum Jurisdictionis, & Imperii Romanorum Magistratuum; habes item discrimen inter utrumque ab origine sua. Si autem plura desideres, adeas juris interpretes, qui certatim de hoc scripserunt, maxime vero Nood, Duarenium, & Sigonium; nam meum tantum est primas rerum notiones tradere, quibus sane lector imbutus ad jurisprudentiam eruditam tandem accedat.

Criminum forensi usu absoluto, instituti ratio postulat, ut de iis verba faciam, quæ civiles controversias respiciunt. De quibus illud præmitto, caussam vel tantum fuisse juris, & Prætor dabat Arbitrum, vel Centumviros: vel facti quæstio agitabatur, & Recuperatores dabantur. Hos judices dederunt primum Reges, post eos Consules, postremo Prætores, in quos demum fuit istiusmodi Consulatum translata jurisdictio. Sed Prætor, si quæstio esset facti, judicem dabat, vel ejus loco tres Recuperatores; si autem juris, eam Centumvirorum consilio demandabat.

Verum quia Decemviri, Recuperatores, Centumvirique in jure memorantur sæpissime, ideo sedulo de his agendum est. Decemviri stitibus judicandis erant ii, qui Prætoris Consilium constituebant, eique tamquam judices adsidebant, quorum quinque erant Senatores, quinque vero Equites. Hinc lucem accipit Ulpianus in lege Ælia Sentia, ita scribens: *Minor viginti quinque annis, non nisi causa apud Consilium probata, manumittere potest.* Nam Consilium hoc est illud Prætoris tribunal ex Decemviris constitutum. De eodem conventu loquutus est Antoninus sic: *Qui apud Consilium manumittuntur, post causam a iudicibus probatam, & manumissionem sequutam, non solet status in dubium revocari.* Et Cicero in oratione pro A. Cæcinnâ: *Decemviri, inquit, prima actione non judicaverunt, sed postea re quæsitâ & deliberatâ, sacramentum nostrum iustum judicaverunt.* Ex quibus duo habentur, tum hos Decemviros fuisse veros, germanosque judices, non autem consilia-

liarios, ut quibusdam visum: tum etiam ante Augustum creatos. Itaque Decemviri tamquam iudices Prætori adfidentes, sicuti Romæ Prætoris consilium publicum constituebant, ita in Provinciis illud Præses ex viginti Recuperatoribus congregabat (a).

Præterea hæc inter Recuperatores distinctio erat. Quidam eorum erant a Præторе iudices dati, ut inter Cives, & peregrinos dirimerent tantum eas contentiones, quæ ex ipso facto oriebantur, ex præscripta tamen eis formula, a qua vel minimum recedere non poterant, sicuti scripsit Cicero (a): *Quod Prætores quærebant, quæ in verba Recuperatores darent.* Constituebantur autem alii, ut iudices essent, si res aliqua certæ quantitatis condiceretur jure dominii. Ex quo iis nomen inditum, nempe ut res amissa recuperaretur quemadmodum scripsit Plautus ita (b): *Postquam quidem Prætor recuperatores dedit, damnatus demum vi coactus reddidit ducentum, & mille philippum.* Hæc sunt quæ de Decemviris, & Recuperatoribus dicenda putavi. Remanet, ut de centumvirali consilio ceterorum omnium amplissimo aliqua dicamus, hoc tamen servato ordine, ut primo ejus desegamus originem, deinde limites jurisdictionis describamus, demum modum, sive ordinem, quem servabat in judicando, depromamus; est enim ex his utilitas maxima, quæ leges quamplurimæ, ceterum obscurissimæ, plane intelliguntur.

Olim Tribunal hoc centum & quinque iudicibus constabat, quibus deinde, nempe Plinii temporibus, alii septuaginta quinque accesserunt. Prætor sortiebatur eos ex Curiis, ternos scilicet per unamquamque Curiam. Sed hæ Curiæ quum triginta quinque essent, erant Centumviri centum & quinque. Verum Romanis adlubuit eosdem Centumviros rotundiori numero appellare, omissis quinque. Decemviris jus erat eos vocare ad Consilium, quum forte rem judicio dirimere opus esset. His Centumviris Decemviri una cum Præto-

re

(a) Cicero in Verrem.

(b) Actio 5. de Agirinenfibus.

(c) Bacch.

re prærant, qui sane confessus tam amplissimi habebatur Princeps. Sed operæ pretium est hæc omnia antiquorum scriptorum auctoritate firmare. Auctor apud Pisonem de his hæc scripsit:

*Seu trepidos ad iura decem citat hasta virorum,*

*Et firmare jubet centeno iudice causam.*

Quæ nam autem essent ab hoc Consilio judicanda, prodit Cicero (a) his verbis: Nam volitare in foro, barere in iure, ac Prætorum in Tribunalibus judicia privata magnarum rerum obire; in quibus sæpe non de facto, sed de aequitate, & jure certetur; iactare se in causis centumviralibus, in quibus usucapionum, tutelarum, gentilitatum, agnationum, alluvionum, menorum mancipiorum, parietum, luminum, stillicidiorum, testamentorum ruptorum, aut ratorum; ceterarumque rerum innumeralium iura versentur; cum omnino quid suum, quid alienum, quare denique civis, an peregrinus, servus, an liber quispiam sit ignoret, insignis est impudentia.

Centumviri igitur, harum controversiarum causa, ad Basilicam Juliam coibant, in quatuor consilia distributi; atque hoc ordine; Prætor medius cum suis Decemviris illis omnibus præsidebat, quorum nempe duo ad dexteram, duo ad sinistram locabantur, quod innuere voluit Quintilianus (b) scribens, Centumviros in hastas duas distributos; hasta enim Prætorem notabat. Ita enim judicantibus Centumviris eorum iudicium duplex vocabatur; sed si omnes ad unum confessum coirent, iudicium quadruplex erat, dicebaturque. Quumque eadem causa ageretur uno eodemque tempore per quatuor hæc consilia, necesse est ut ita se invicem prope essent, ut qui loquebatur in uno Consiliorum, facile audiretur & ab aliis; de quibus hæc Plinius (c): Proxime cum apud Centumviros in quadruplici iudicio dixissem, subit recordatio egisse me juvenem atque in quadruplici. Ex quibus potest inferri etiam Advocatos provectæ ætatis causas in hoc Tribunali disceptrasse.

P 2

His

(a) Lib. 1. de Orat.

(b) Lib. V. cap. 2.

(c) Episto. lib. 4.

His jam prænotatis, videamus modo quantam lucem leges ipsæ ex illis accipiant, quamque turpiter in interpretationibus erraverint, qui hæc eadem ignorarunt. Sane quidem ex horum principiorum iustitia, factum est, ut ne Jurisdictionis quidem nomen intellexerint veteres. Ecce tibi quam lepida obgan-  
 niat Accursius, dum titulum de Jurisdictione commentatur: *Jurisdic-  
 tio, & judicium*, ait, *inter se idem sunt, quia judicia  
 ratione jurisdictionis exercentur*. Non ne id falsissimum est, si  
 consulas quæ diximus nos de Jurisdictione, & Imperio? Sic  
 etiam verba illa *legis ult. C. de petitione hæreditatis: Magni-  
 tudo etenim, & auctoritas centumviralis judicii non pariebatur  
 per alios tramites viam hæreditatis petitionis infringi*: ita fuerant  
 ab eodem exposita, ut per centumvirale judicium Romanum  
 Senatum intelligeret, qui profecto nunquam causas judica-  
 bat. Quod autem in lege *petitor* (a) his verbis habetur: *Pe-  
 titor vel possessor damnavit hæredem, ne centumvirale judicium  
 exerceat*, sic explicavit: *Judicium centumvirale, idest petitionem  
 hæreditatis inventam a Senatoribus, qui centum erant numero.*  
 Quæ omnia nemo non videt, quam insulsa sint, atque a vero  
 dissona; nam neque Centumviri Senatores erant; neque hæc  
 actio, scilicet petitio hæreditatis pertinebat ad Senatum.

Demum propositis illis elegantissimæ legis verbis: *Cum  
 filius* (b), *divisis Tribunalibus, actionem inofficiosi testamenti ma-  
 tris pertulisset, atque ita variae sententiæ judicum extirissent*; sic  
 interpretatus est: *Diversis Tribunalibus, idest apud diversos judi-  
 ces pro tribunali cognoscentes. Idem dico etsi essent delegati,  
 vel si unus esset tantum; quia actor contra unum, non con-  
 tra alium apud judicem probavit.* Quæ sane opinatio non in hi-  
 storiam peccat tantum, sed legis sensum ita subvertit, ut  
 falsissimæ sententiæ inde in forum subreperint. Hæc enim  
 divisa tribunalia sunt. Centumvirorum consilia non in unum  
 coeuntia, ut sæpe solebat fieri, sed in duo distributa, ut su-  
 pra differuimus. Neque omittendum est aliud lepidissimum  
 ejus commentum in lege 10. D. de inofficioso testamento,

cu-

(a) 31. D. de liberatio lega.

(b) L. 76. D. de legatis 2.



cujus hæc sunt verba : Sic pars judicantium de inofficioso testamento contra testamentum, pars secundum id sententiam dederit ( quod interdum fieri solet ) humanius erit sequi ejus partis sententiam, quam secundum testamentum spectavit ; nisi si aperte iudicem inique secundum scriptum heredem pronunciasse se apparebit . Is illam judicantium partem intellexit iudices ab ordinariis delegatos, atque inter se dissidentes ; quum ex adverso ii essent Centumviri ipsi, quorum pars favore testamenti, alii contra judicarunt .

Nec minus absurda interpretatio illa est in l. lectos ejusdem Accursii . Paulus ita scripsit (a) : *Lectos emptos Aedilis cum in via publica positi essent, concidit, si traditi essent emptori, aut per eum steterisset quominus traderentur, emptoris periculum esse placet . Et subdit . Quod si neque traditi essent, neque emptor in mora fuisset, quominus traderentur, venditoris periculum erit (b) .* Jam vero postrema hæc verba videntur id affirmare, perfecta emptione, rei venditæ & nondum traditæ periculum pertinere ad venditorem ; quod procul dubio aperto juri adversatur, quum emptori potius nocere debeat . Vidit sane nodum Accursius, quem quum vellet solvere, magis tamen implicuit ; sic enim belle rem composuit : *Dic quod si in specie facta fuit venditio, pacto suscepit venditor periculum : si autem in genere tunc est planum ; quia genus non perit .* Non ne is, pace tanti viri dixerim, foedius rem turbat ? Num contractum hunc emptionem nuncupabimus, quando emptionis deficit essentia ? Compertum sane vel tironibus adolescentulis est perfecta emptione, dominium rei venditæ statim in emptorem transire, & cum dominio periculum ; pacto autem secus . Appellanda ne est emptio, ubi vel dominium, vel periculum ad emptorem non abibit ? Hinc sane diræ illæ Pragmaticorum contentiones sententiis Supremorum Tribunalium aliis atque aliis diremtæ . At vero quæstio evanuisset profecto, si vim, & rationem legis intellexisset . Ideo enim rei venditæ periculum in hac

(a) L. 12. D. de periculo ; & com. rei vend.

(b) L. 14. D. eodem .

(c) Panciroli. lib. 2. variat. cap. 40. & Mornaci. hic .

hac lege venditoris est, etiam perfecta emptione, & non emptoris, quia ipse fuit in culpa, ut Ædilis lectos venditos, & nondum traditos concideret, quum in via publica posuisset, cujus cura, & jus penes Ædiles erat. Quod sane minime intelligere poterat Accursius, qui Magistratuum Romanorum jus ignoraverat, ac proinde in tot turpissimos errores decedit. Quod iis exemplo esse potest, qui Romanæ Reipublicæ institutionum notitiam, velut rem supervacaneam contemnunt, nec ad germanam Romanorum jurisprudentiam intelligendam esse necessariam effutiant.

## §. II.

### *De fictionibus, formulisque antiqui Fori Romani.*

**A**Ntiquum Romanorum jus formulis, fictionibusque quamplurimis, & prope, ut ita dicam, infinitis fuisse referendum nemo est inter eruditos quin fateatur. Erant enim hæc tunc temporis politicæ Urbis apta nimis, imo necessaria summo opere; nam si Patriciorum respicias ingenium, invenies plane ad id paratum, quo per varias formulas, fictionesque jurisprudentiam intra ordinem custodientes, facilius in plebem dominarentur; si Prætorum evolvas edicta, pariter in omnibus occurrent tibi formulæ, fictionesque, rerumque vocabula nova. Etenim neque aliter poterat Prætor rigidum jus civile, nisi per istiusmodi involucrum corrigere, atque emendare; jurabat enim sub auspiciis magistratus in jus civile; quare, ne ejus sanctitatem violare videretur, undique conquirebat omnia, quibus derogationes suas, legesque occultissime obtegeret. Nonne igitur tenebris involuta tibi Romana jurisprudentia videbitur, si hæc, antea quam eo accesseris, probe tibi nota perspectaque satis non fuerint? Sed hæc utpote spinosiora horrebunt: ita ut ad ingentia Pragmaticorum volumina percurrendum sit, ex quorum ambagibus in novas magis, & turbatiores difficultates incidis. Sed ut de his omnibus veritas magis elucescat, Substitutionis pupillaris titulum, veluti specimen quoddam apponam; cujus sane ad intelligentiam, si formula-



**larum Romanarum, quibus involutus est, vim, & potestatem** noveris, facillime perveneris; & quæstiones omnes quot quot tibi exscitantur, apertæ tibi, & patentes erunt. Secus vero omnia latebunt in obscuro.

Ut autem ab origine sua omnia repætamus; pupillaris substitutio est pupilli testamentum, factum tamen a patre vi patriæ potestatis ob ipsius pupilli evidentem utilitatem, cui expedit potius illum habere hæredem, quem pater facit, quam eum, quem lex ipsa præscribit. Verum quia lege cautum, ne quis alteri testamentum faciat; quum testamentum a proprio, & non ab alieno debeat pendere arbitrio; hinc ne quis videretur suo ingenio jus evertere, inventa est per prudentes illa substitutionis appellatio, qua cui liceat testari, fas sit etiam substituere. Videamus igitur ea, quæ in jus inducta sunt, ut testamentum hoc appareat substitutio, quum revera filii testamentum sit, a patre tamen conditum.

Institutio, ac substitutio, dummodo in eodem testamento fiant, iisdem perficiuntur solemnibus; quare propter substitutionem pupillarem opus non est iterare solemnia; sed eadem ipsa in testamento adhibita satis erunt ad illius validitatem. Parum interest institutio ne, an substitutio in testamento præcedat; hinc non obest substitutioni, si ea institutionem antecedit. Denique quia substitutio pupillaris, & hæredis institutio in unum coalescunt, hinc est ut ab hæredibus institutis, & pupillariter substitutis una detrahatur falcidia, & detur juri accrescendi locus tamquam inter cohæredes unius testamenti. Attamen quum accessorium extinguatur, si principale non existit, fit ut pupillaris substitutio evadat infirma, uti accessoria, si testamentum paternum, quod est principale, rumpatur, vel quocumque modo fiat irritum (a). Hæc sunt quæ ab eo descendunt, ut hoc testamentum filii substitutio appareat; videamus ea, quæ dependunt ab eadem, ut testamento filii.

Substitutio inquam pupillaris revera aliud non est, quam testamentum ipsius filii, factum tamen a patre; quod in se  
duas

(a) L. 129. §. 2. de regul. juris.

duas continet hæreditates, nimirum alteram ipsiusmet patris, alteram vero filii. Quare pupillaris substitutus nequit unam adire, alteram vero repudiare; sed ambas aut adire, aut repudiare opus erit. Sed quia hæres testamentarius excludit legitimum, propterea substitutus hic uti hæres testamentarius ipsius pupilli præfertur omnibus legitimis; imo matri ipsius pupilli, & non solum in bonis, quæ a patre pupillo obvenierunt, sed etiam in iis, quæ mortuo patre illi delata sunt; adeo ut ne legitimam quidem portionem petere possit. Nam hæc ad eos pertinet, quibus si testamento relicta non esset, licet inofficiosi querela testamentum idem rescindere; quod sane matri jus non est, nisi quum ipse filius, suisque verbis testamentum condit.

Sed porro pergamus. Quum hæc pupillaris substitutio vera pupilli testamentum sit; substitutus, hæres principalis erit pupilli, licet per consequens, hoc est per eundem pupillum etiam patris hæres fiat. Igitur indignus, qui succedat patri, si substituatur pupillo, poterit ejus esse hæres; nam quod spectat successionem, ille legitimus judicatur, qui potest principalis hæreditatem adire, nequaquam spectato quia indignus sit alterius hæreditatis, quæ per consequens, & accessorie illi immixta reperitur (a). Hinc si quis substituatur pupillo sub proximioris nomine, nil præterea adjecto, is talis censendus erit, qui pupillo, & non patri, proximior erit; nam non huic, sed illi succeditur, & proximitas existimatur ab eo, cui succeditur. Hinc etiam fit, ut quum substitutus pupilli hæres sit testamentarius, pupillus, mortuo, patre in alterius potestatem non recadat; nam hæredem testamentarium habere non poterit, qui sub patria potestate est, sed tantum legitimum.

Ex hætenus dictis satis apparent rationes, quibus intelligeremus ea, quæ in hoc argumento occurrunt, spectata vel rei veritate, vel ejus fucata facie, qua simularetur alia ac esset. Videamus modo, quæ ab ipsius privilegii causis pendent. Istiusmodi privilegii causa fuit, & pupilli utilitas, nempe

ut

(a) *L. si is D. de vulgari.*

ut haberet hæredem illum, quem pater vellet, ac sub tutela agnatorum effugeret insidias; & patria potestas, cujus vi quum filius & pater pro una persona habeantur, poterat hic pro filio testari. Hinc sane est, ut pater non unis filiis, sed nepotibus etiam substituatur si velit; nam hi omnes sub ejus sunt potestate, dummodo tamen illo mortuo in alterius potestatem minime cadant; imo substituet non solum institutis, sed etiam exhæredatis, nempe ad illa bona, quæ possent iis aliunde obvenire. Est enim substitutionis pupillaris causa non ipsa institutio, sed potestas patria, quæ quum in exhæredatos vigeat adhuc, & iis pupillariter substitui potest. Sed hoc dictum puta ex veteri jure, non vero novo, ubi nonnisi justis de causis exhæredatio permittitur; quarum quidem pupillorum ætas incapax existimatur. Quum autem potestatem non habeant adscendentes ex materna linea: stricto jure non poterant illi substituere; licet æquitate suadente receptum tandem fuerit contrarium, si filios nepotesque hæredes instituunt. Sed transacta pupillari ætate, quum possit per se filius testari, ideo substitutio pupillaris in adulta ætate expirat, utpote cessante privilegii causa, & ratione. Quod si pater tempus legitimum prætergressus sit in substitutione pupillari, id profecto caderet; nam quod in ejus favorem introductum est nempe filii, non potest in ejus odium retorqueri, quum præcideret filio adulto testandi potestatem. Hoc modo, illegitime nempe, & ultra ætatem facta substitutio, ne in bonis quidem paternis, veluti quoddam tacitum fideicommissum, vim aliquam habebit, quum recepti juris sit substitutionem directam non posse in obliquam, & precariam transire (a). Quæ hæcenus a nobis dicta sunt, & per sua principia rite deducta, si cum Pragmaticorum tricis conferas, intelliges profecto quantæ tenebræ per illos in universam jurisprudentiam inductæ sint; a quibus nonnisi præeunte Eruditorum face, poteris te extricare, qui omnia clarissima luce consperferunt.

Q

§. III.

(a) *L. verbis 7. D. de vulg.*

## §. III.

*De jure recepto in foro Romano ex Prudentum disputationibus.*

**I**Nitio Urbis Romæ Populum Romanum sine certa lege, sine certo jure, sed tantum manu Regum gubernatum, scripsit Pomponius de origine juris; subditque exactis Regibus omnes leges, sive potius consuetudines, quæ ex Regum judiciis obortæ, vim legis tenebant, lege tribunicia exolevisse. Sed quum eo res recidisset, ut omnia Consulum manu & arbitrio expedirentur, factum porro, licet post quamplurimas disputationes, ut certum Jus in Civitate constitueretur, quod legibus Duodecim Tabularum effectum. Atque hinc nimia Consulum potestas, veluti quodam injecto æquilibrio, temperata. Sed videntes Consules suam potestatem valde imminutam, assidua legum Duodecim Tabularum interpretatione, quasdam excogitarunt una cum Patriciis formulas, quibus inter se homines disceptarent, ut his saltem auctoritatem suam, legibus perlatis labefactatam, aliqua ratione repararent. Verum Flavius Scriba, ut plebis gratiam sibi demereretur, hoc artificiosum Patriciorum inventum evulgavit. Et quamvis novis negotiis novas formulas, novaque agendi genera aptariat: Hæc quoque Sex. Ælius Populo tradidit, quod propterea dictum est *Jus Ælianum*. Verum ex his omnibus de legibus Duodecim Tabularum disputationibus, quædam consuetudines in jure ortæ sunt sub nomine auctoritatis Prudentum, adeo ut antiqua jurisprudentia nullo prorsus modo, illis ignoratis, intelligi possit. Nam licet novum jus per Justinianum conditum sit: tamen tot veteris juris firma adhuc manent vestigia, ut percipi hoc plerumque non possit, nisi res repetantur a principiis suis. Quod an ne ita se habeat res, sequentia probabunt exempla.

Vulgata satis est inter Pragmaticos quæstio, an plurium annorum stipulatio una sit, an vero tot stipulationes, quot erunt anni. Visa res haud anceps ex lege *Si Sticum* 16. *de verborum obligationibus*, ubi Paulus ita respondit: *Stipulatio hujusmodi in annos singulos una est, & incerta, & perpetua; non quemadmodum simile legatum morte legatarii finitur*. Itaque

que ex his verbis mira consensione scripserunt, stipulationem plurium annorum unam censi; contra ac in legatis, ubi tot sunt legata, quot anni. Ex quo principio sic posito deduxerunt in stipulatione, licet plurimorum annorum, quum una sit, unam sufficere præscriptionem; in annuo vero legato, quum tot oriantur ab eo actiones, quot anni vertunt, anno quolibet opus esse nova præscriptione; quum præscribi non possit actio, quæ nondum enata sit. Item affirmarunt in huiusmodi stipulatione, quum una sit actio, & tempore ipso contractus enascatur, satis esse, si stipulator tunc tantum temporis idoneus fuerit actioni acquirendæ; at in legato in singulos annos, quotannis aptus debet legatarius inveniri, ut legatum adquirat. Verum solertissimus Donellus denso huic Doctorum agmini unus restitit, & falsa omnia liberali ore pronuntiavit, si nempe univærsæ, & præter exceptionem loquantur; posse enim aliquando annuam stipulationem esse multiplicem pro annorum numero; & legatum simplex unumque, licet in annos singulos scriptum. Quod sane quum explicari non possit, nisi detecta vetusta stipulationis origine, liceat de ea ante omnia quædam præfari.

Quam Patriciorum permagni interesset certis formulis omnia concepta peragi, quod supra vidimus; quumque fervida Romanorum ingenia ad promittendum plus æquo propensa, sæpe inconsulta temeritate in immanem rei familiaris jacturam prolaberentur: noluerunt sane ex quacumque pactio-  
ne obligationem, actionemque oriri. Hinc pacto nudo omnem actionem denegarunt, quam tantum tribuerunt certis, & solemnibus verbis, per quæ consulto concepta, tamquam civilem modum adstringendæ fidei, plane pateret, sponforem deliberatam veramque ad id habuisse voluntatem. Hinc sane apud eos usu receptum, ut pro legitima obligatione stipulatio intercederet, nempe quædam seria conceptio verborum, quæ voluntatis ad se obligandum determinatæ symbolum esset. Sed & alia deinde consuetudo emerfit, ut istiusmodi stipulatio ad ea potissimum adhiberetur, quæ fore perpetua maxime optabant. Ex quibus iteratis sæpe sæpius actibus factum, ut stipulatio haberetur perpetua, licet ad certum annorum nume-

rum præscripta ; quare statim, & ipso jure nascebatur actio, quamquam ea per debitorem elideretur exceptione voluntatis finitæ, utpote transacto tempore, ultra quod noluit stipulator obligari. Ex his jam intelligis, cur stipulatio annua censeatur una, quum ex sui natura habeatur perpetua ; quam perpetuitatem quum annua legata per se non habeant, factum ut annua legata tot essent, quot anni forent. Atque ita legis verba planissime intelliguntur : *Stipulatio hujusmodi in annos singulos una est, & incerta, & perpetua*. Ideo enim est una stipulatio, quia est perpetua, & elapso convento obligationis tempore, ipso jure non finitur.

Sed in alia omnia abeundum est, si stipulatio annua ea temporis conditione concipiatur, quæ suamet natura contractus perpetuitatem evertat. Tunc enim annua stipulatio non simplex erit, sed multiplex, quot scilicet erunt anni. Et ne forte credas id temere a me prolatum, prostat nobis Justiniani Constitutio, quæ incipit *Sancimus C. de donationibus*, cujus in §. 4. anxie Imperator exquirens, num in annuæ donationis stipulatione tot sint donationes, quot anni abeunt, ita ut summam excedens, quotannis insinuari debeat : an vero una sit donatio perpetua semel insinuanda : hac distinctione demum, in diversum abeuntibus veteribus, rem ita absolvit. Vel donatio isthæc annua ita concepta est, ut ex utraque parte hæredum facta fuerit mentio : & tunc una erit ejus stipulatio ; scilicet vero si adjectum forte sit vitæ tempus, quot anni enim, tot stipulationes censebuntur ; ita ut quotannis nova insinuatione opus sit. Atque hanc addit rationem ; in priori enim specie stipulatio perpetua habetur, ac proinde una ; in posteriori vero, quum finiatur vita donantis, vel ejus, qui accipit donationem, quæ est conditio ex sui natura perpetuitatem destruens, censeatur temporalis, ac proinde iterari insinuatio debet quotannis.

Verum ut lector intelligat, quam utiliter hæc etiam nostris forensibus negotiis congruant, ægre ne ferat, si quæstionem quamdam in foro excitatam, atque ab argumento, quo de agitur, haud alienam afferam. Quæsitum fuit, an conventum fœnus in annuis redditibus possit reduci ad minorem quantitatem,

tem, quam pactum fuit. Jam vero totius difficultatis cardo hic est, conventa ne stipulatio interusurii annui una sit, an vero plures, quot procedunt anni. Nam si una esset, legitima interusurii mensura illa fuisset, quæ tempore contractus legitime convenisset. Contra vero plures stipulationes, singulis quibusque annis novam usuræ formam induent; quotannis enim spectari debet quid intersit creditoris sua carere pecunia, quidve fœnoris eidem esset, si eam aliis occupasset. Itaque verterentibus annis, agi posset ut minuerentur usuræ. Ajo ego in posita disputatione, non tantum spectandum esse contractus tempus, sed etiam insequens deinceps, quo scilicet usura exigitur; ita ut possit debitor ad annos agere ad deducendas usuras. Enim vero stipulatio hæc non est una, quum non sit perpetua, quippe quæ insitam conditionem temporariam secum habet; nempe ut ex voluntate possit debitor nomen expungere, atque ideo sortem exsolvere *l. 4. D. de pactis*. Quare quum tot sint stipulationes, quot procedunt anni, ita ut quolibet anno nova semper ad usuras conventas nascatur actio, potest debitor in annos singulos ad subtrahendas usuras agere. Id etiam probari potest ex *l. quum quidam D. de usuris*, ubi scripsit Paulus: *Si debitores, qui minores semissibus præstabant usuras, fisci esse cœperunt; postquam ad fiscum transierunt, semisses cogendi sunt præstare*. Quum igitur usuræ minores semissibus inter privatos conventæ, Fisci privilegio augeantur ad semisses, si debitores ad fiscum transiverint: fatendum est, harum stipulationem unam non esse & individuum, sed multiplicem & variam, quando fiscus conventam quantitatem prætergressus est.

Sed quod lex præcipit privilegio fisci, ad quoscunque creditores haudquaquam trahendum. Auget quidem usuras fiscus creditor, sed easdem augere nequit creditor privatus; auget fiscus peculiari privilegio, quo gaudet, sed non privatus, qui eo caret. Ecce tibi, quæ scripsit Ulpianus *l. 6. D. de jure fisci*: *Fiscus, quum in privati jus succedit, privati jure pro anterioribus suæ successionis temporis utitur: ceterum postea quam successit, habebit privilegium suum . . .* Et quidem usuras exinde petit fiscales, etsi breviores de-

bean-

beantur. Igitur actu successionis nihil amplius habebit fiscus jure privati, cui succedit; postquam vero successit, utetur privilegio suo petens usuras semisses, quamquam minores deberentur ei, cui successit. Quid ergo nos legem *Quum quidam* attulimus? Nimirum ut inde probaremus, stipulationem, licet semel initam, posse tamen fieri multiplicem, ut profecto sit a fisco creditore; non autem ut obtrudamus, creditores omnes vel privatos, labentibus annis, innovare eas posse, ut augeant usuras.

Itaque sic statuimus, numquam privatum creditorem agere posse ad augendas usuras semel conventas; licet ex adverso agat debitor ad easdem minuendas. Et sane ratio discriminis hæc est. Creditor fortem, dum usuræ solvantur, repetere nequit; debitor contra de voluntate nomen solvere potest. Ergo quum a creditore stipulatio sit perpetua, ac proinde una: quod foenus legitime initio præfinitum est, mutari, eo agente, amplius non potest. Sed quum a debitore stipulatio sit in conditione temporaria, quæ natura sua perpetuitatem tollit, quod ad hoc, singulis annis alia, atque alia censetur; atque ideo legitimæ usuræ quotannis in minorem quantitatem deduci possunt. Ex quibus colligimus, posse quidem debitorem agere ad minuendas usuras, nequaquam vero creditorem ad eas augendas, si discefferis a fisco; quum creditor fortem repetere nequeat; debitor vero ex sua sententia possit restituere. Hinc quæso colligas, disputationes has non de apicibus juris Romani, sive de gerris germanis esse: sed frugi uberrimæ, & foro nostro emolumento maximo; suamque inficitiam ostendere Pragmaticos, dum eas, ut exangues, & nugatorias negligant & abhorreant.

## C A P U T ULTIMUM.

*De iis, quibus opus est ad Principum Constitutiones intelligendas.*

**H**Actenus de iis, quibus leges Pandectarum, ut par est, intelligere possimus. Ratio nunc ordinis postulat, ut vide-



deamus, quæ via nobis munienda sit ad rectam intelligentiam Constitutionum, quas maxime Codex Justinianæus complectitur. Itaque inspecta ratione, qua jus vetus, & consultorum prudentia a causis suis depromatur, ad eas decurrat oratio, quæ præ mentis oculis habendæ sunt, ut jus novum, hoc est Codicis Theodosiani, & Justinianæi, solida, atque æqua interpretatione exponatur. Sed quænam hæc sint, ex natura ipsarum legum habemus. Enim vero leges, quæ nobis utroque in Codice occurrunt, vel ipsius Justiniani, vel aliorum Principum Constitutiones sunt, vel generales, vel particulares, aliqua nempe Imperii necessitate suadente, aut Magistratu de eo, quod in jure dubium controversumque erat, Principem consulente. Quoniam vero historia est testis temporum, & nuncia vetustatis, legum ipsarum fontes ope Scriptorum, quantum fieri potest, temporibus illis æqualium, aperiri nobis poterunt; per illos enim, oculis veluti ipsis intueri nobis licebit Constitutionis cujusque conditorem, Principem, occasionem quæ ejus mentem impulerit, Reipublicæ necessitatem, Consules sub quibus editæ fuerint, locum ubi datæ, cui nam genti demum, aut cui Magistratui scriptæ. Atque hæc profecto causæ sunt, apprime Constitutionum cognitioni necessaria, quæ non nisi per historicos nobis patefieri possunt. Verum illæ, quæ ad Magistratum consultationes prodierunt, quum non possint intelligi, nisi facti ipsius, cujus gratia fuerunt scriptæ, adjuncta comperta sint nobis: hinc est, cur nobis plerumque sint obscurissimæ, omni amissa spe eas intelligendi; quum Tribonianus consultationes ipsas, in quibus factum exponebatur, absciderit in Codice Justinianæo, tantumque Principis Rescriptum digesserit, & secuturo ævo tradiderit: Ex quibus vide quam imperite actum sit, hujusmodi rescripta vim legis generalis habere, quæ tamen singulari speciei prospiciebant, quæ qualis fuerit ignoratur. Ecce tibi, quid hac super re Arcadius edixit in l. 9. C. Theodosii de diversis rescriptis: *Rescripta ad consultationem emissæ, vel emittenda in futurum iis tantum negotiis opitulentur, quibus effusa docebuntur.* Et merito quidem, quippe periculosum est maxime ex particulari Principis responso legem universalem effi-

efficere. Itaque ut uno dicam verbo, in Codice Justiniano Constitutiones tantum generales, duce historia, captui nostro sunt, non autem Rescripta, quæ ad Magistratuum consultationes de privata, & certa aliqua controversia prodierunt, cujus nempe adjuncta penitus ignota sunt.

Sed quum leges omnes conditoris indolem, & pietatem omnino redoleant, num quis germanam earum expositionem jactabit, qui antea Legislatorum ingenium religionemque rimatus non fuerit? Itaque ad sacratissimas Constitutiones recte interpretandas ante omnia quærendum, quæ religio in Principis animo versetur: deinde quibus virtutibus ornatur, quibusque vitiis turpetur; nimirum ad humanitatem ne potius, & clementiam, an ad feritatem, & duritiam pronior fuerit; nec tantum Imperator ipse Legislator, sed & Præfectus Prætorio, quem Principem consuluisse in legibus condendis nemo unus ignorat. Præter hæc chronologiæ ratio habenda, quæ quanti in hac potissimum parte sit, paullo infra videbimus: item Magistratuum antiquorum potestas advertenda quam maxime, tum ut eorum discrimen pateat, tum etiam, quo pronior sit ad Magistratus nostrates inductio in contentionibus nostris secundum leges eas dirimendis. Demum quum a Constantini ævo factum sit bono publico, ut philosophia Christiana ita fuerit immixta juri civili, ut cum Jure Canonico in unum convenisse visum sit, maxime vero sub sequentibus Principibus, ubi grassante barbarie, & laicorum potissimum ignorantia formulæ quoque judiciariæ juris Canonici in jus civile irreperunt: hinc necesse est, ut jurisconsultus notitiam certe non vulgarem habeat Ecclesiasticæ historiæ, ex qua una canones depromuntur. Sed quod mireris, necesse etiam est ut cognitionem aliquam veteris Romanorum superstitionis nobis comparemus; nam licet Constantinus, alique sequioris ævi Principes paganam religionem a jure civili quam maxime conati fuerint eradicare funditus, factum est tamen Tribonianus inscitia, ut quamplurima illius vestigia in jus novum irreperint, quæ sine subsidio veteris Romanorum religionis prorsus intelligi non possunt. Atque hæc sunt, quorum ope posse  
nos

nos probe pernoscere Imperiales Constitutiones affirmo. An id ita se habeat, argumentis ab ipsas re petitis agendum.

§. I.

*De Chronologia legum.*

**T**emporum chronologia quam necessaria sit ad probe Constitutiones Principum exponendas, ex legibus ipsis mox explicandis satis patet. Et quidem lex *Quisquis cod. ad legem Juliam Majestatis* jure merito videtur iniqua, si quidem exterior ejus facies, prout nempe verba sonant, spectetur. Iniquissima enim erit res, barbarico more sævius, pœna eadem puniri Principum occisores, atque eos, qui adversus viros illustres, qui Concistorio Principis intererant, Senatoresque, privata quamvis ultione conspirarent. Crudelitatem enim non ferendam sapit, filios eorum etsi innocentes paterna hæreditate mulctari, hoc uno contentos, quod ipsius vita non adimatur. Præterea injustissimum est, conjunctos, familiares, amicos, qui majestatis reorum infelicitate commoti Principis clementiam auderent implorare, notari infamia. Ex quo data occasio doctissimo Cujacio, aliisque optimæ notæ interpretibus legem hanc appellandi sævam, non ratione pœnarum, quibus rei Majestatis plectuntur, sed quod eandem subeant pœnam, qui Principem, ac qui ejus ministros occidunt, & tamen hæc non ita se habebunt, si chronologia duce legem interpretemur. Age vero id videamus.

Quamvis illa Arcadii, atque Honorii nomine scripta legatur in Codice tam Theodosiano, quam Justinianæo, tamen soli Arcadio tribuendam hæc suadet ratio. Legitur quidem data Anciræ, quæ Metropolis erat Orientis, & ad Eutychianum missa, qui Præfectus Prætorio Orientem regebat. Non igitur Honorio, cujus imperio Occidens parebat, sed Arcadio, qui in Oriente imperabat, adscribenda est. Ex quo sane velim advertas duorum Principum nomine scriptas Constitutiones, non semper ambobus dandas esse. Sæpe enim si-  
ve ad concordiam illorum præferendam, si-ve ad significandam

R

Im-

Imperii originem, quod olim fuerat unum, indivisumque, legem illi ab uno conditam, alterius etiam nomine in lucem publicam edere solebant. Quare ut verus auctor palam fiat, necesse est ut Consules, sub quibus lata, Magistratusque, ad quos dirigitur ex historia detegas: num scilicet in Occidente, an vero in Oriente præfuerint; ut in hac Constitutione factum, cujus nimirum Consules occurrunt Cæsarius, & Articus, qui fuerunt in Oriente. Sed quum hi Consulatum gesserit anno trecentesimo nonagesimo septimo: ex epocha temporis hujus lex est interpretanda, nimirum a rebus publicis quæ in Imperio per id tempus versabantur.

Certe quidem uno ore historici synchroni (a) docent, eo tempore Arcadium vix ætatis suæ annum vigesimum attingisse, & Rufino misere jam vita functo, scilicet anno trecentesimo nonagesimo quinto, successisse Eutropium, atque ad initium usque anni trecentesimi nonagesimi noni, in dignitate perstitisse. Igitur ex his jam habemus hanc legem fuisse perlatam sub Eutropio, quum data fuerit anno trecentesimo nonagesimo septimo.

Re ita ex historia per sua tempora jam digesta, videamus legis causas sub Eutropio. Exploratum omnibus profecto est, qua infelicitate tunc temporis sub Eutropio laboraverit res Orientalis. Fuit enim Eutropius, ut animo pravus, ita opibus præpollens; adeo ut tanta esset ejus tyrannis, ut dixeris Arcadium ipsum Eutropii vile mancipium. Quin nec sanctæ Dei Ecclesiæ pepercit. Mortuo enim Nectario Archiepiscopo Constantinopolitano, in ejus locum, præter Canonicam electionem, Joannem quemdam substituere ausus est. Abstulit etiam Ecclesiis immunitatem, ut eo magis sæviret in eos, qui sibi forte erant invidi. Quod si in ea, quæ ad religionem spectant, tanto furore debaccharetur, quid sceleris in re civili virum impium, æque ac audacissimum prætermisisse putes? Quippe hoc animo infederat suo, summa rerum quondam potiri; hinc ea sibi parabat, quæ ad id aditum faciliorem darent. Quare ut Arcadium potissimum suis invidum,

&

(a) *Zosimus lib. V. Socrates lib. VI. cap. 2. Sozom. lib. VIII. cap. 2.*

& exteras gentes sibi conciliaret, honores omnes tam civiles, quam militares peregrinis, & barbaris magis, quam civibus conferebat. Obortæ ex hoc proinde quærelæ, & quidem maximæ. Sed profecto illæ, aut ad Principis aures non perveniebant, aut si quæ forte pervenerant, calliditate sua & insidiis facile comprimebantur. Hac sane de causa Synesius Episcopus, publice habita ad Arcadium oratione, hoc potissimum ei commendavit, ut viros probos eligeret Magistratus, civesque bene de re publica meritos ad honores eveheret. Sed Eutropio frustra fuerunt omnia; nam gentes, quæ Imperatori parebant, spe dejecti, undequaque conciebant turbas, motus excitabant, subvertebant Imperium, Principis administratos palam contemnentes, eosque sæpe, ortis seditionibus, interimentes. In tanta vero Reipublicæ turbatione, quæ undique intestino odio, atque internecionibus vexabatur, quid Arcadius aptius agere poterat, ne Imperium periclitaretur, quid flagitiosissimus, & solertissimus Eutropius pro sui suorumque securitate poterat moliri? Id scilicet Principi proposuit, ut ad comprimendos subditorum motus, legem quam severissimam ferret; qua, quum Magistratibus communicaretur ipsius Principis Majestas, ut & iis veluti Princeps ipse, sacrosancti forent, atque iisdem poenis tenerentur, qui Magistratum, ac qui Principem occidisset. Fateor quidem hoc fuisse nimium, nempe ut illa ipsa Majestas, quæ tam arcte Principis personæ insider, & aliis impartiretur; idemque sit Principem, ac Magistratum interficere; sed salus publica lex esto suprema.

Hoc ita inspecto Constitutionis tempore, ejusque historia leviter perstricta, facili sane negotio, quæ antea obscura, aliisque ea ignorantibus inaccessa, pervia sunt, ac luce sua donata. Primo intelligimus causam, quapropter in Occidente diù lex hæc incognita fuerit, nempe quia Orientem unum turbæ illæ vexabant; nulla enim ratio suberat, cur per Occidentem etiam vulgaretur, a quo tanta mala aberant. Secundo compertum jam habemus, cur & reos Majestatis lex faciat eos, qui per scelestas factiones ad publicorum Magistratuum necem conspirant; quia id unum intendebat Imperator, & Eutropius, ut istiusmodi conspirationes adversus

Magistratus initas averterent. Quapropter turpiter fallantur ii, qui crediderunt Majestatis reum esse, qui in Principis invidiam ejus ministros interimunt, quum conjurationes illæ in necem Magistratum, non vero Imperatoris odium ini-  
rentur; imo etiam suammet injuriam ulcisci videbantur, quum  
exteri homines & barbari civibus in honoribus præferrentur.  
Prætereundum autem hic non est, ingeniose satis doctissimum  
Gothofredum hujus legis partes percensere l. 34. C. 39. de hæ-  
reticis; item 16. de pœnis; C. 37. de appellationibus; in  
quibus sane coitiones omnes prohibentur: maxime vero Mo-  
nachorum per id tempus vulgares pro reis intercessionibus; nam  
conjurationes illæ ita animum Principis deterruerant, ut a  
Monachorum deprecationibus metueret, quando ab impoten-  
ti magis Eutropio, quam ab innocenti Monachorum ordine  
cavendum erat. Ex his videsis, quam necessaria sit chrono-  
logia ad perfectam Constitutionum Imperialium intelligentiam.  
Sed haud absurdum erit & pauca de altera Arcadii Constitutio-  
ne proloqui, quæ ita scripta est (a): *Sancimus ibi esse pœnam,  
ubi C. noxia est: propinquos, notos, familiares procul a calumnia  
submovemus; quos reos sceleris societas non facit.* Videtur sane  
lex hæc cum illa supra exposita de crimine Majestatis pugnare,  
qua innocentes adhuc filii paterna hæreditate mulctantur. Quare  
interpretes doctissimi quique multum adlaborant, ut utramque in  
concordiam adducant; nec desunt qui alteram ab altera de-  
rogatam audacter jactarunt. Sed frustra omnes ad id operam  
impendunt, quum a recto tramite aberrant. Tu vero, si  
suam cujusque ætatem consulas, nodum facili negotio solves.  
Ecce tibi. Anno trecentesimo nonagesimo nono XVI kalen-  
das Februarias improbus Eutropius, lege per Arcadium publice  
perlata, reus Majestatis peractus est; quo sane tempore quum,  
ut fit, frequentes delatores ad necem etiam innocentium  
conjurassent, factum est inde, ut damnato Eutropio, quam-  
plurimi ut rei, licet immerito, ad Principem deferrentur. A-  
nimo id advertens Arcadius, VIII. kalendas Augusti ejusdem  
anni, quo fuit proscriptus Eutropius, Constitutione sua, quam  
supra

(a) *L. sancimus C. de pœnis.*

supra perſcripſimus definiuit, an propinqui, amici & familiares Eutropii rei Maieſtatis cum eodem haberentur nec ne. Quum vero lex hæc propter Eutropium Eunuchum, qui filios non haberet, lata eſſet: fruſtra proſecto conati ſunt interpretes explicare, quinam per vocem *propinquos* in ea intelligendi eſſent, & an lex hæc derogat legi *Quisquis*, ubi filii quoque, licet innocentes, a paterna hæreditate ob crimen Maieſtatis patris cadunt.

Verum non omittendam exiſtimo præclaram illam Imperatoris Conſtantini Conſtitutionem ex titulo *Sine conſu*, vel *reliquis*, quæ & ad argumentum noſtrum facit. Jubeſt in ea Conſtantine, nullam eſſe in venditione legem, qua tributorum tam temporis præteriti, quam futuri onus pertineat ad venditorem. Age vero. Pactum hoc Fiſcum non tenere, intelligo ſatis; quum creditori nullum debitoris cum aliis quibuſcumque pactum noxæ ſit; *Non enim quod noſtrum eſt, ab alio, nobis inuitis, auferri poteſt*. Sed illud me ſolicitum habet, quod conventio iſthæc etiam quod ad ipſos contrahentes nulla ſit, quum pluriſimi ſane res vendi poſſet ſi tributum onus penes venditorem maneat; quemadmodum ex lege 42. D. de pactis, palam ſit, ubi hæc conventio rata habetur. Quid igitur? num huic vetuſto juri per Conſtantinum derogatum eſt? Minime proſecto, ſi pro temporum ratione rem perpendamus.

Illa quidem apparet ſcripta ad Antonium Marcellinum Primæ Lugdunenſis Præſidem, & data Agrippinæ, Conſtantino II., & Licinio Coſſ., quorum Conſulatus annum fuiſſe trecentefimum duodecimum, recte conjicit doctiſſimus Gothofredus ex duobus Panegyricis Eumenii, hoc eodem anno Conſtantino dictis; in quibus ſane gratiæ ei aguntur de remiſſionibus tributorum per Galliam, & de ſalubri ratione inſita quoad tributa futura, ne ſcilicet Civium patrimonia nimis oneribus deperirent. His præmiſſis, videamus modo quid eodem tempore de eadem re Salvianus ſcripſerit, ut legis ſententia undequaque nobis pateat. Hæc ſunt ejusdem verba (a): *Nam illud quale? quam non ferendum, atque moſtrigerum,*

Ⓞ

(a) Lib. 4. de gubernatio. cap. 8.

¶ quod non dicam pati humana mentes, sed quod audire vix possunt, quod plerique pauperculorum, atque miserorum spoliati resculis suis, & exterminati agellis suis, cum rem amiserint, amissarum tamen rerum tributa patiuntur, cum possessio ab eis recesserit, capitatio non recedit? proprietatibus carent, & vectigalibus obruuntur? quis aestimare hoc malum possit? Rebus eorum incumbunt invasores, & tributa miseri pro pervasoribus solvunt; post mortem patris nati obsequiis juris sui agellos non habent, & agrorum munere enecantur. Ex quo loco id habes, ut per noscas legem hanc fuisse localem; item & temporariam, scilicet ad evertenda illa mala, & emptorum fraudes proscribendas, quibus Gallia per id tempus misere captabatur. Igitur si emptoris fraudem de medio tollas, nullus ambigendi locus, quin conventio rata sit, ut tributi onus adhuc post venditionem venditorem sequatur ex lege Pandectarum. Atque de hoc argumento satis multa dixisse puto.

## §. II.

*De notitia Magistratum Romanorum.*

**M**agistratum antiquorum scientia non solum utilis, verum & per quam necessaria nobis est ad jus Imperiale enucleandum. Sane quidem qui hac scientia erit destitutus, neque leges, quæ Magistratibus favent, neque eas, quæ ad uniuscujusque faciunt potestatem, & imperium potest intelligere. Num sine eorum cognitione leges de re juris dicundi, imperiique exercendi, acerrimis nostræ ætatis contentionibus, quas quotidie in foro obstrepere videmus, commode aptari possunt? Est igitur pernecessaria priscorum Magistratum notitia, nec sane obturbata, nullaque habita distinctione, sed alia aliis acomodata temporibus, prout diversi, aliterque pro temporum ratione juri dicundo præerant. Nam quum Magistratus sit viva populi lex, non minus ille, quam hæc scripta Civitatis regimini debet congruere. Hinc alii fuerunt Magistratus in Romana Republica, ac in Imperio: alii sub Augusto, ceterisque Principibus usque ad Constantinum, alii autem



autem sub Constantino ipso postquam Byzantii novam fixit Imperii sedem. Erant qui democratico regimini conveniebant alii omnino ab illis, qui in Monarchia, nempe sub Augusto, jus dicebant; sed omnes, quum religioni ethnicorum devoti essent, paganam superstitionem fovebant maxime. Ubi autem Constantinus orthodoxa dogmata amplexus, eam publice proscripsit, alios sane, diversosque Magistratus instituit. Ut igitur per diversa tempora alios, atque alios magistratus distinguamus, summa necessitas urget, ut per exempla rationes deducamus, quo luculentius res appareat.

Imperator Julianus in lege *Providendum de decurionibus Cod. Theodosi* statuit, recens ad Curiam adlectos non teneri ob debita præterita susceptorum, quæ hi præcedentibus delegationibus contraxerant. Verum quum vulgo Susceptores qui nam sint fuerit ignoratum, factum ex hoc, ut tricis omnia oboluerint. Videamus ergo quale fuerit susceptorum munus. Hi per ea tempora fuerunt, qui curam exigendi tributa suo periculo suscipiebant. Quoniam vero ad munus hoc legabantur a Decurionibus, quorum potius erat istiusmodi tributorum excussio: hinc pro susceptore Decurio tenebatur, veluti tacito quodam fidejussionis jure, quum per se stetisset, quin ad hoc munus locupletem non legisset. Sed quum id culpæ novo Decurioni non daretur, utpote qui susceptorem ipse non nominasset, propterea jure merito non poterat ullam pro alienæ nominationis sarcina molestiam sustinere.

Exposita jam hac lege, veraque ejus sententia tradita, videamus Pragmaticorum menda, qui hoc ignorarunt. Quidam sane ex illius contorto sensu dixerunt, recens Collegio adscitos teneri ob nomina a decessoribus, occasione ejusdem Collegii facta. Quod profecto a sanctione hujus legis alienum est; quum numquam fuerit dubitatum, debita contracta causa alicujus Collegii obstringere quoscumque successores. Non enim corpus, deficientibus prioribus, aliisque deinceps succedentibus, videtur aliud esse, quum unum semper idemque existimetur. Tradiderunt alii, ex hac lege inferri posse novum fundi possessorem non teneri ad solvenda tributa fiscalia, quorum sane dies priori domino cesserat, veneratque. Hæc sane omnia

omnia quam procul a vera legis intelligentia absint, mirum profecto videri non debet, quum vulgo susceptorum significatio lateat.

Facit etiam ad argumentum nostrum lex secunda (a), quæ quamvis ex Pandectarum voluminibus depromatur, juvat tamen maxime & huc afferre, ut luculenter ostendamus, quanti sit Magistratum cognitio ad legum omnium, non unius tantum Codicis intelligentiam. Docet igitur hic Ulpianus primo capite legis Juliæ teneri, qui sciens scripserit, aut recitaverit quid falsum in tabulis publicis. Id sane exponens Accursius ait hoc intelligendum de Notario, qui contra Rempublicam, aut Principem falsum scripserit præfiscini? Quid interpretatione hac imperitius fingi potest? Enimvero pudeat Juriconsultum agere, & quæ publicæ tabulæ fuerint ignorare: itidem Notariorum nostrorum originem nescire; quæ omnia si fuissent comperta, ridiculam expositionem certe quidem non pronunciasset; Igitur tam quid fiat hæc publicæ tabulæ, quas non intellexit Accursius nos videamus, ut inde legis sententiam eruere valeamus. Sunt quidem actus publici, non illi profecto quos in lite conficiebant exceptores, sed quos quisque sibi peragebat, inde ut fidem publicam mereri possint. Dicam planius, negotia omnia etiam extrajudicialia, quæ inter contrahentes peragebantur, ut fide digna censerentur, necesse erat ut ab Actuario præsentis iudice, redigerentur in scripturam; non enim tunc temporis Notariorum invaluerat usus, ut quidquid apud eos fieret, præsentibus testibus, fidem publicam mereretur. Itaque hæc erat contrahentium consuetudo, negotiis coram iudice compositis, statim hæc per scripturam tabulis ab Actuario mandabantur; tunc vero quidquid gestum inter eos legebant plene, legitimeque probatum putabatur. Atque hæc scripturæ sunt quæ in jure publica gesta, monumenta, instrumenta forensia, vel simpliciter publica, aut publicæ testificationes, publicæ tabulæ, & demum insinuationes appellantur sæpissime. His præmissis expeditissima erit lex nostra; ideo enim Ulpianus re-

spo-

(a) *Ad l. Julianam Majest.*

spondit lege Julia teneri, qui falsum in tabulis publicis scripserit; quia, quum publica auctoritate negotia absolverentur, hoc est scriptura iudicis confecta auctoritate, ut fidem sibi pareret; is qui falsam exarabat scripturam, auctoritate sibi concredita abutebatur: quare nil mirum, si teneretur lege Julia. Atque hæc contra Accursium, qui minus recte, legem hanc, quæ negotia omnia comprehendit peracta coram iudice, ad nostrorum Notariorum fraudes contra Principem, vel Rempublicam detorquet.

### §. III.

#### *De Religione Principis, ejusque indole.*

**Q**UANTUM profit intelligendis Principum Constitutionibus, eorum religionem, atque ingenium cum primis explorare, satis viri politici docuerunt. Quare quum in utroque Codice Imperatores legum illarum conditores alii fuerint Pagani, alii Christiani, Catholici alii, alii vero Hæretici, imo & quidam Apostatæ foede desciscences a Christiana Religione, uniuscujusque sane religio attendenda est in interpretatione eorundem legum. Neque vero inter hæc prætermittenda est eorundem indoles, quæ mirum quantum in illorum cujusque sanctiones influit; veluti si Princeps ad humanitatem nimirum propendat, ejusdem leges videas pro poenarum æstimatione leviores; contra vero sæviores, si illa severiorem morem præferat. His addenda est etiam Præfecti Prætorio indoles; nam quum Princeps in legibus ferendis eum plerumque consuleret, fieri vix poterat, quin Jurisconsulti ipsius ingenium in sanctionibus illis spatiaretur; itaut appareat profecto, quasdam Constitutiones nonnisi ex indole Præfecti Prætorio explicandas esse. Sed hæc omnia, pro instituti nostri ratione, exemplis fulcienda sunt; & primo quod spectat Principis religionem, conferamus, quæso, Constantini Constitutiones cum illis, quas Julianus Imperator confixit. Quum ille Imperator Christianus piusque Princeps fuisset, ita in suis legibus se gessit, ut eversa idololatria gentium, quas imperio regebat, mores com-

S

po-

poneret ad Christianam philosophiam ; ex adverso Julianus, utpote Princeps Christianæ veritatis desertor , id egit potissimum , ut suis Constitutionibus pagana superstitio emortua jam , revivisceret. Atque ut id clarius innotescat , penitus sane Juliani mens animusque in legibus ferendis spectandus .

Cum veteres , tum recentes Scriptores tradiderunt , omnium persecutionum , quibus Ecclesia ab incunabulis usque vexata est , illam Juliani sævissimam fuisse ; nam quum ceteri Christiani nominis hostes vim apertam adhibuissent , iste contra novis dolis instructus , procul a cruciatibus , divitiarum , atque honorum illecebris Christianorum animos pro uniuscujusque ingenio expugnare conabatur . Religionis libertatem sub speciem benignitatis edixit ; sed revera ut Christianam Religionem labefactaret , funditusque everteret . Nam quum inter ipsos Christi fideles quamplurima per id tempus serperent schismata , id spectavit vasserrimus , atque impius Princeps , ut data de hoc omnibus libertate , Christiani inter se dissentientes , suarum disputationum vi interirent . Ideoque quippe cruciatibus abstinuit , quod Martyrum sanguine Ecclesiam fuisse adultam , & Christianam fidem firmatam viderat . Fuit igitur Juliani persecutio eo acerbior , quo simulata pacis , ac piæ indulgentiæ nomine , veluti insidiis , faciliorem everSIONem parabat . At quod magis subdoli animi versutias ostendit , pietatis nomine prohibuit , ne antiquorum gentilium libri legerentur ; quum Christi sectatoribus iis oblectari par non esset , quibus a veritate averti possent . Sed alio sane pravus Imperatoris intendebat animus , nimirum ut Christianis arma deessent ad ethnicorum superstitionem prosternendam , quæ pagani ipsi Scriptores vel inviti facile præberent . Igitur in Juliani Constitutionibus imprimis animadvertendum , aliud eum scripsisse , aliud vero voluisse ; nam quum philosophiam is affectaret , eam profecto mirum in modum addidicerat artem , qua simularet , ac fraude dolisque sua consilia calidissime obtegeret ; id autem ex dicendis luce clarius patebit .

Prostat in titulo de sepulchro violato ejus Constitutio , qua præcipitur , ut Christianorum cadavera noctu efferrentur ; atque hac de causa , quod fas non esset , ut quos inter tanta

iq-

intercedebat caritatis necessitudo, diu ipsi exequias prosequerentur, quum dolor in exequiis *secretum amet* & *mortuorum nihil intersit, utrum per noctes, an per dies efferantur* (a). At vero aliud is de more suo spectavit, nimirum ut paganorum ritus ad pristinum revocaret. Etenim Romanis solemne erat infimæ plebis cadavera noctu, divitum autem per diem efferri, ut patet ex Halicarnassæo (b), qui scripsit: *Unor Julii mariti occisi cadaver, ut hominis privati, & plebei, noctu entulit*. Sed alia prorsus Christianis erat sententia; hoc est ut gaudium magis in funeribus ob spem resurrectionis, quam luctum testarentur, diu suos cujusque generis efferrebant. Itaque Julianus in hac sua Constitutione licet, ut *facum* faceret, alia scripserit: id tamen mente conceperat, ut Manium superstitionem, quantum posset, revocaret, Fidelesque Christi, veluti infimæ sortis homines aspernaretur. Habes ex his, quanti referat Principis religionem præ mentis oculis habere, si justus Principalium Constitutionum interpret audire cupias.

Age vero, ne prope ab argumento discedamus, in titulo de Decurionibus Juliani sanctionem hisce verbis scriptam legimus (c): *Eos indulserunt veteres Principes, qui materno genere Curialibus Antiochenis adscribi, quos Patris dignitas nullius vindicaret jure Civitatis. Data V. Kalendas Septembris Antiochie Mamertino, & Nevitta Coss.* Compertum sane ante Julianum in munera Curialium successione, ob onus prope intolerandum, paternam tantum originem spectatam, nunquam vero maternam. Quæ autem ratio est, quapropter Julianus hanc novam legem exemplo veterum Principum concinnaverit? Dicam, postquam breviter de Constitutionis hujus auctore præfatus fuero. Certe quidem ejus conditor fuit Julianus; nam licet Ulpianus in lege prima *ad municipalem* asserat in jure municipali aliquando habitam rationem etiam materni generis; at tamen jus municipii differt quamplurimum a Curiis; nam illud Civium frequentiam in municipiis respiciebat, hoc au-

S. 2

tem

(a) L. 5. Cod. Theod.

(b) Lib. 4. cap. 45.

(c) L. 51. lib. 12. Cod. Theodos. tit. 1.

tem ad Curias spectabat . Quare merito tam Zosimus (a) , quam Leo Imperator (b) auctorem faciunt Julianum . Itaque quum versutissimus ille Princeps legem hanc procul dubio condiderit , pro suo quidem ingenio ea est interpretanda . Et quidem Decurionum munus grave nimis onus fuisse , neminem later , ob immodicas potissimum impensas , quas eos subire necesse erat . Sed quoniam Julianus oneribus Cives , quam maxime posset , levare pollicitus erat ; contra vero Decurionum ordinem in diem deficientem supplere cupiebat ; hinc ut voti compos fieret , nec promissis deesse videretur , Decurionum munus honorifico nomine decoravit ; eique veluti privilegium quoddam largiri jactabat , ne scilicet novo ad Curias investito nexu , quererentur Cives , novum sibi ac insuetum impositum onus . At vero cur Antiocheno potissimum Populo , qui sibi erat invisus , privilegium tam præclarum constitutum est ? Erant sane Curiae idololatriæ fomenta quam maxima , ob publicas celebritates , ac festos ludos , quos statis temporibus Decuriones oportebat in honorem Deorum Populo edere . Hinc Curiarum Sacerdotium , quod his curandis præerat , severissime a Sacris Canonibus per id tempus vetitum (c) . Quapropter quum pagana superstitio penderet potissimum a Curiis , maxime studebant Principes Christiani , ut Curiarum numerum minuerent ; ex adverso vero pagani , ut augerent magis , vel diminutum repararent . Quoniam autem Christianus Populus Antiochiæ maximam partem Christianus erat , ac Decurionum ordo sensim elanguescere videbatur ; eum sane Julianus ut instauraret , hanc in odium Christianorum Constitutionem in speciem honorificam edixit , ut origo materna , Patre non existente , Curialis originis spectaretur in Curiis ; atque ita augerentur Curiales , & religio pagana magis magisque foveretur . Ex his omnibus intelligitur ratio , cur Julianus in lege quinquagesima de Decurionibus statuerit , ut Christiani revocarentur ad Curias , utque Curiae tantum , non autem

(a) *Zos. lib. III. cap. II.*

(b) *Leo l. 61. de Decur.*

(c) *Concil. H.iberit. & ibi Mendona .*

tem Decuriones immunes essent a lustrali collatione, five a tributo negotiationis (a). Quum enim Curiae ipsae paganae superstitioni essent semper addictae, Decuriones autem aliquando Christiani; id constituit Imperator, ne isti hac gauderent immunitate, qua frui superstitiosas Curias optabat.

Sed juvat tres leges ex titulo de Medicis, & Professoribus inter se conferre, ut huic disputationi nihil deesse videatur. Sunt haec nimirum Juliani prior, posteriores vero Valentiniani. Ait igitur ille: *Magistros studiorum, doctoresque excellere oportet moribus primum, deinde facundia; sed quia singulis Civitatibus adesse ipse non possum, jubeo, quisquis docere vult, non repente, nec temere prosiliat ad hoc munus, sed judicio ordinis probatus, decretum Curialium mereatur optimorum conspirante consensu*. Subditque, ut in Codice Theodosii legimus: *Hoc enim decretum ad me tractandum referetur, ut altiore quodam honore nostro judicio studiis Civitatum accedat*. Haec ille vaferrime praescripsit, ut majori honore viderentur Professores exornari, si Principis probarentur judicio: sed revera ut ab honoribus civilibus prohiberet Christianos, paganos vero admitteret. Ex quo proinde factum, ut vivente Juliano, Professores pene omnes artium liberalium fuerint pagani, quo gentilium superstitio his ducibus, & praeceptoribus in integrum restitueretur.

Videamus porro quid Valentinianus, & Valens in eadem rem constituerint. *Si quis erudiendis adolescentibus vita pariter & facundia idoneus erit, vel novum instituat Auditorium, vel repetat intermissum . . . (b)*. Quum enim per Julianum Christiani fuerint a publicis scholis eliminati, id egerunt Valens, & Valentinianus post Julianea tempora, ut Christiani denuo artes liberales profiterentur, quorum magisterio adolescentes ad Christi Religionem a primis usque annis formarentur. Hoc sane innuunt ea verba; *vel novum instituat Auditorium, vel repetat intermissum*. Tandem vero Valens, & Valentinianus in l. 8. ejusdem tituli denuo instituerunt, ut ele-

(a) L. 4. lib. 13. C. Theod. tit. 1.

(b) L. 6. Cod. Theod. de Medicis, & Professorib.

electi ad se demum referrentur, quo qui dignior a Principe judicatus esset, Magisterii honore fungeretur. Atque hoc, quemadmodum mihi videtur, ut fronte adversa Juliano oblucentur, hoc est, ut ab honore docendi vanæ superstitionis sectatores averterent, Christianæ vero veritatis asseclas probarent. Itaque Julianus, & Valens cum Valentiniano eadem quidem in Constitutionibus suis præscribunt, sed alia profecto intendunt; ille quidem ut Christianis Paganos præferret, hi autem ut probatione sua Christiani in omnibus anteferrentur. Ex quibus igitur satis evinci potest, quantum scientia religionis Principis faciat ad ejus intelligendas Constitutiones. Sed nec id quidem satis: videamus jam historię Ecclesiasticę necessitatem.

#### §. IV.

##### *De necessitate Historię Ecclesiasticę.*

**Q**Uamplurimas esse Constitutiones tam Constantini Magni, quam insequentium deinceps Imperatorum, maxime vero Justiniani ipsius, rem Ecclesiasticam non leviter attingentes, neminem latet. Quare pessime secum ageret legum interpretes, qui historię, & politię Christianę rudis Principum Constitutiones exponendas temere adgrederetur. Rem ita se habere exemplis probemus. Utar autem inter ceteras tribus potissimum Constitutionibus, quę uti sunt celebriores, ita sane clarius argumenti nostri veritatem ostendent. Præeat igitur lex sexta de Sacrosanctis Ecclesiis, quę edita est verbis hisce C. Just. : *Omni innovatione cessante, vetustatem, & Canones pristinos Ecclesiasticos, qui usque nunc tenuerunt, etiam per omnes Illyrici. Provincias servari præcipimus, ut si quid dubietatis emergerit, id oporteat (non absque scientia viri Reverendissimi Sacrosanctę legis Antistitis Ecclesię Urbis Constantinopolitanę, quę Romę veteris prærogativa latatur) Conventui Sacerdotali, Sanctoque judicio reservari. Datum prid. Idus Julii Eustachio, & Agricola Coss. quatringentesimo vigesimo primo.*

Legem hanc sic commentatus est Accursius: *Hęc lex dicit, quod*



*quod cessante omni innovatione, serventur antiqui Canones facti pro Ecclesiis. Sed quid si dubietatis emerferit circa dictos Canones? terminetur consilio Antistitis Constantinopolitani omni innovatione cessante. Quia forte erat facta innovatio ab aliquo tyranno, qua Canones desierunt in usu. Hæc fuit Accursii interpretatio, quæ sane quam inepta, atque insulsa sit, quidque sibi velit Constitutio, Historiæ Ecclesiasticæ ope intelligendum. Ut autem ad rem veniamus, aliqua de jure metropolitico ex Sanctis Canonibus delibanda sunt.*

Ecclesia in metropolibus constituendis politiam civilem initio imitata est, scilicet ut illa Urbs esset metropolis, quæ in Provincia quoque Imperii Romani primas teneret; quum Reipublicæ Christianæ interesset, ibi Metropolitæ, & Patriarchas esse, ubi Primates gentium, & Archiflamines erant, potestatemque judicariam exercebant. Hinc sane intelligo, penitusque intropicio, cur Nicænum primum Patriarchalia, sive Metropolitana jura confirmans, non aliunde quam de consuetudine repetat originem: *Antiqua consuetudo* ait in Canone 6. ubi de hoc agitur. Quæ quum ita sint, anfas Græci arripuerunt, quibus Theodosium juniorem, cujus Constitutiones retulimus, per insidias captarent. Nam diviso in civili regimine Illyrico a Theodosio seniore in binas Provincias, Occidentalem alteram, alteram vero Orientalem, dividendum & bifariam in politia Ecclesiastica dixere. Et sicut antea Illyricum totum, ut Provincia Occidentalis, suberat Occidentis Patriarchæ, hoc est Romano Episcopo, quum in statu civili pareret Præfecto Prætorio Occidentis; ita in posterum, qua parte sub potestate Præfecti Prætorio Occidentis esset, spectaret ad Episcopum Romanum; qua vero subjectum esset Præfecto Prætorio Orientis, subesset Episcopo Constantinopolitano, ut Primati Orientis. Atque hoc ut servaretur antiquus rerum ordo ab usque sui origine, sive ut politia Ecclesiastica de more sequeretur ad unguem politiam civilem. His in speciem sane probabilibus a Græcis jactatis, Theodosii animum haud ægre induxerunt, ut Constitutionem, de qua disseruimus, emitteret, ne quid scilicet novi in Ecclesiam Dei contra vetustatem inveheretur, sed ut ex antiquis Canonibus  
omnia

omnia regerentur, hoc est, ut in re Ecclesiastica ea Provinciarum foret descriptio, quæ cum re civili congrueret. Porro Canones pristini, quorum Constitutio meminit, Concilii Constantinopolitani sunt, a quo sane datum Episcopo Constantinopolitano, ut Orientis totius, post Romanum Pontificem, esset Patriarcha Honorarius. Quum enim Constantinopolis altera Roma nuncuparetur, quemadmodum Romanus Episcopus Primas erat totius Occidentis; par ita videbatur esse, ut ille Constantinopolitanus totius Orientis Primas diceretur. Hinc si qua controversia per Orientale Illyricum de rebus Ecclesiasticis emergeret, ad Reverendissimum Episcopum Constantinopolitanum, ejusque Synodum, sive Conventum Sacerdotalem deferretur, quemadmodum in quæstionibus Ecclesiasticis Illyrici Occidentalis consulendus erat Romanus Pontifex. Sed monere opportunum hic est, sermonem hunc esse de Episcopo Romano, ut Occidentis Patriarcha, non vero de eodem ut Reipublicæ Christianæ visibili Capite, cujus nempe Primatus ex ipso Divino jure profluit.

Sed dolis, inquam, ceperunt Græci Theodosium Imperatorem. Nam licet Ecclesia in jure metropolitico constituendo rem civilem esset sequuta, non erat tamen cur jus metropolitico, postquam statutum fuerat receptumque, cum Provinciarum civilium mutatione, denuo & illud mutaretur, ut scripsit Innocentius Primus ad Alexandrum Episcopum Antiochiæ. *Nam quod siscitaris (ait) utrum divisis Imperiali judicio Provinciis, ut duo Metropoles fiant, sic duo Metropolitanis Episcopi debeant nominari; non ergo visum est ad mobilitatem necessitatum mundanarum Dei Ecclesiam commutari; honoresque aut divisiones perpeti, quas pro suis causis faciendas duxerit Imperator. Ergo secundum pristinum Provinciarum morem Metropolitanos Episcopos convenit numerari.* Atque hæc ratio fuit, quare Bonifacius II. ubi primum Theodosii Constitutionem audivit, acriter sane apud eum questus fuerit, quum per eam non parum Patriarchatus Romanus minueretur, abscisso nempe Illyrico Orientali. Quapropter eam Theodosius revocavit nova Constitutione; quam quidem inventam ab Holstenio, & uti veram habitam a Marca, Balutius transcripsit in notis ad

ad eundem Marcam ad lib.IV. cap.2. *de concordia Sacerdotii & Imperii.*

At enim abrogata ab ipso conditore lege hac, nulla quidem suberat ratio, cur eadem Codici Justiniano adjiceretur. Sed dandum id esse Triboniani inscitiae vulgo putant, qui leges plures una cum hac lege, quamvis antiquatas, vel usu desitas, Codici tamen temere inseruit. Verum quum mihi id non arrideat, alia profecto suppetit causa ex temporis illius historia accersita. Erat tunc Episcopus Constantinopolitanus Epiphanius pro quo constitutio isthac per lata fuit, deque ejus moribus hac scripsit Stephanus Larissae Episcopus Epist. 24. *Unum studium habet, ut in Sanctis Thessaliae Provinciis Ecclesiis dominus, atque iudex esse videatur.* Et denuo: *Putat de Sacrarum Ecclesiarum Regiae Urbis jure aliquid minui, quod ego Apostolicam Sedem vestram visus sum nominasse.* Quibus ex verbis doctissimus Lupus (a) putat, eam Constitutionem, licet Theodosius abrogasset, fuisse tamen a perfidis Graecis more & consuetudine retentam, vel saltem spem eos firmam fovisse, fore ut aliquando restitueretur. Quare si Justinianus eam retulit in Codice, id ea mente effecit, ut Episcopus Constantinopolitanus statim ac haberet temporis opportunitatem, posset hac de re denuo jus suum in judicio persequi. Hac sunt quae de hac lege ex historiae Ecclesiasticae penu deprompta dicenda putavi. Videat hinc lector, quanti rerum Ecclesiasticarum notitia conferat ad plane intelligendas Imperiales Constitutiones.

Sed accedamus modo ad Constantii Constitutionem, quae scripta ad Leontium his verbis est: *Ecclesiae Urbis Romae Clericis concessa privilegia firmiter precipimus custodiri. Datum Kalend. Novembris Constantio Aug. IX. & Julian. Caesari II. Coss. (b).* Per haec verba jubet Constantius firmitatem habere privilegia Clericis Ecclesiae Romanae concessa; idque confirmat etiam illa ejusdem tit. lex 14. ad Felicem Episc. missa, & lecta apud Acta anno trecentesimo quinquagesimo septimo. Nihil hic moror Accursianorum ineptias, quibus ambae Con-

T

stan-

(a) Tom. III. cap. 8. in notis ad Nicen. 2.

(b) L. 13. Cod. Theod. de Episc.

stantii leges visæ fuerunt ad Christianam pietatem facere; propterea quod per eas facta testæ privilegia Clericis Romanæ Ecclesiæ indulta servantur. Aliud sane voluit, intenditque Constantius; idque nonnisi ex historia Ecclesiastica eruendum. Liberius Pontifex, Arianorum persecutione furente, Constantii jussu in exilium est missus Arbitrione, & Lolliano Consulibus, hoc est, anno trecentesimo quinquagesimo quinto, quo scilicet tempore Leontius, ad quem Constitutio hæc missa fuit, Præfecturam Urbis gerebat. Biennio jam exacto Liberium fuisse sedi suæ restitutum, unanimi consensione tradunt historici Ecclesiastici, hoc est, post Concilium Syrmienſe, quod in annum trecentesium quinquagesimum octavum incidit. Igitur tempore hujus legis 14. & inſequenti anno trecentesimo quinquagesimo septimo, Apostolicam Sedem tenebat Felix, qui licet mente, & opinione Arianus non eſſet, cum Arianis tamen communicabat, a quibus electus fuerat. Jam vero hoc tempore in Ecclesia Romana, quamvis omnia turbatissime agerentur, atque error Arianus quaquaverſus debaccharetur, tamen non pauci inventi ſunt, qui strenue Felici obſisterent, & Liberio conſentirent. Quoniam autem palam ab his jaſtabatur, immunitates, aliaque privilegia Clericis indulta abneganda iis eſſe, qui cum Felice communicabant, hæc ſane ad Catholicos unos pertinebant, ut adverſus Donatiſtas, alioſque hæreticos Conſtantine M. aliiſque Imperatores expreſſis verbis ſæpe ſignificaverant. Hinc Conſtantine, quum eſſet ipſe etiam Arianismo infectus, lege illa Clericos Arianos munivit, imperando ut & hi immunitatibus Catholicis datis perfruerentur. Sed ne in Deceſſorum ſtatuta offendere videretur; ideo proſecto vagis, generalibuſque verbis uſus, conſtituit, *ut firma eſſent privilegia conceſſa Clericis Romanæ Eccleſiæ*, quæ tunc temporis a Felice regebatur; nempe ut ſub iſta univerſalitate verborum Clericos omnes Romanæ Eccleſiæ, vel etiam Arianos complecteretur. Igitur hæc lex, quæ prima fronte videtur fovere pietatem, intus ſane, & revera ex Principis religione iniquiſſima eſt, utpote Arianismo indulgens, ejuſque ſectatoribus; quo Arianos ſubdoluſ Princeps magis ſibi alliceret, atque ii. Felicem ſuum ad-

adversus Liberium studiosius tutarentur. Ex his, quæ hætenus edisseruimus, clarissime perspicitur, quanti facienda sit Ecclesiasticæ historiæ, Religionis Principis, atque ætatis legum conditarum cognitio, ut ad veram, & non fucatam perveniantur jurisprudentiam.

### §. U L T I M U S.

*De cognitione veteris Romanorum Religionis, ad juris civilis intelligentiam.*

**I**N-præfatione libri hujus inter subsidia ad plane intelligendum antiquum Rōmanorum jus, enumeravimus etiam cognitionem veteris Romanorum Religionis; propterea quod sine ea plurimarum rerum intelligentia comparari certe non potest. Nam etsi Constantinus primo, ac deinceps ceteri Christiani Principes in condendo novo jure hanc potissimum navarunt operam, ut paganam superstitionem funditus labefactarent; attamen per totum qua late patebat jus, incuria præsertim Triboniani, ubique dispersas sententias videre est, quæ futilem illam Paganorum superstitionem adhuc sapiunt. Itaque ut ad rem veniamus, ante omnia id curabo, ut causas juris civilis, quod in rebus humanis versatur, & res divinas complecteretur, patefaciam; deinde vero alias percurreremus leges, quas sine veteris religionis luminibus haud intelligi posse videbimus.

Ex Ulpiano jurisprudentia definitur (a) *divinarum, atque humanarum rerum notitia, justi atque injusti scientia*. Quam juris definitionem sic enucleatius expresse runt Basilici: *Scire res sacras, & profanas, & in his licitum, atque illicitum*. Quum enim cognitio rerum tam divinarum, quam humanarum, five earum naturæ, consequentiarumque, secundum veteres Stoicos ad philosophiam pertineret, & juris scientia nihil aliud esset, quam philosophia ipsa Romanorum Jurisconsultorum, qui maximam partem Stoici profecto erant; hac de

T 2

caussa

(a) L. 10. p. 2. de *justi. & ju.*

caussa in definienda jurisprudentia , res divinas humanasque arcto foedere conjungere . Itaque de religione , ejusque sacris , ac solemnibus Jurisperiti erat respondere . Atque hæc ratio est , cur uno ore commendentur apud veteres illi Jurisconsulti , qui divina , humanaque callebant . De Scævola sic scripsit Valerius Maximus (a) : *Cum bene ac diu jura civium , & ceremonias Deorum ordinasset .* Et Tacitus (b) de Atejo : *Ateii Capitonis insignior infamia fuit , quod humani divinique juris sciens , egregium publicum , & bonas domi artes debonestavisset .*

Hæc autem longiori sermone non indigent . Norunt enim omnes , quanta cura studioque utramque scientiam addiderint , quamque diligenter in responsis suis disseminaverint Jurisconsulti Romani . Verum quia res , quas hoc in opere suscepi pertractandas , ab origine sua repetere , atque undequaque rimari in animum induxi ; hinc paulo altius de hoc differere liceat . Sane quidem quum satis Romulus intellexeret , quantam vim religio haberet , ut in officio cives continerentur , imperavit , ut quæ religionem , resque divinas spectarent , Patriciis paterent ; quibus unis civile regimen concediderat . Quumque jus civile nonnisi Patricii possent profiteri ; factum hinc est ut totum juris corpus divinis rebus inspersum fuerit , non secus ac humanis . Itaque quum penes solos Patricios auspicia , aliaque id genus essent , commodum eisdem erat , quando vellent cum Populo agere , comitia intervertere , aliaque vel sinere , vel impedire , prout e re sua sibi videretur ; quoniam ex ejusdem Romuli instituto res nulla fieri posset , nisi auspicato fieret . Ex his omnibus rationes tibi proditæ sunt , cur jus civile rebus ad religionem spectantibus refertissimum sit . Quamvis autem Christiani Principes paganam philosophiam ex omnium animis eradicare , adeoque jus civile vanis illis , superstitiosisque figmentis emendare , tergere , ac purgare conati fuerint : quia tamen nimis istiusmodi piis in speciem technis implicatum undique erat , fieri nulla ratione potuit , ut quædam superstitionis vestigia com-

(a) *Lib. 8. cap. 8.*

(b) *Lib. 3. cap. 70.*

compilatorum industriam effugerent.

Apposite Modestinus inter alios exemplum luculentum affert (a). Mævia decedens servis suis nomine Sacco, & Eutychiæ, & Hirenæ sub conditione libertatem reliquit his verbis: *Saccus servus meus & Eutychia, & Hirenæ ancillæ meæ omnes sub hac conditione liberi sunt, ut monumento meo alternis mensibus lucernam accendant, & solennia mortis peragant. Quæro quum assiduo monumento Mævia, Saccus, & Eutychia, & Hirene non adsint, an liberi esse possunt?* Modestinus respondit, neque contextum verborum totius scripturæ, neque mentem testatricis eam esse, ut libertas sub conditione pœnæ suspensa sit, cum liberos eos monumento adesse voluit: officio tamen iudicis eos esse compellendos testatricis iussioni parere: *Hæc Jurisconsultus.*

Quam perperam lex hæc, quæ paganam superstitionem omnino sapit, a Triboniano in corpus juris conjecta fuerit, ex dicendis patet. Propositum ei erat speciem referre conditionis legato adjectæ, quæ quamvis sub verborum cortice videretur esse conditio, revera tamen ex mente testatoris modus esset. Sane inter modum, ac conditionem latum discrimen vertitur; quippe conditio adjecta legato id facit, ut illud adquiri non possit, nisi conditione impleta: secus vero est in modo; nam modus impositus minime obstat, quin eo potiamur, onus tamen subeuntes defuncti voluntati parendi. Sæpe vero ex mente testatoris conditio præfert modum, & contra modus conditionem, quod ex conjecturis, vel ex scriptura, vel ex mente testatoris, vel demum ex natura ipsius rei legatæ depromptis, solerter inquirendum est. Sed quod mirari licet, cur Tribonianus ad hanc speciem adstruendam eo Modestini exemplo usus est, quod undique pagana superstitione scateret? Non ne sexcenta ei poterant exempla occurrere, præter illud ab ethnicis cæremoniis arcessitum? Verum tantum abest ut exemplum hoc quæstionis statum attingat, ut valde turbet, subvertatque. Etenim in veteri quoque jure improbæ conditiones rejiciebantur a legato, hæredisque institutione, ac potissimum a libertate, cui favor summus erat penes Ro-

ma-

(a) L. 44. D. de manumissis testam.

manos. Quæ autem conditio magis improba sub Christianis Principibus, quam ea, quæ vel minimum quid ex pagana religione oleret? Tale igitur est exemplum a Triboniano proditum, ut non solum rem non adstruat, sed evertat potius; quum conditio hæc etiam si eo nomine nuncupari fas sit, uti improba in Religione Christiana omnino rejiciatur. Vide igitur quam absurde ex Modestino exemplum illud in jus novum conjectum fuerit, quod a lege ipsa reprobatum damnaturque sub Principibus Christianis.

Sed quum lex paganas cæremonias, ac jura Manium meminerit, aliqua de his delibare haud supervacaneum erit, saltem ea, quæ ad faciliorem ejus rei intelligentiam pertinent.

Vulgarissimum est, quot ritibus, cæremoniisque stulta gentilitas rem funebrem celebraret, quantaque religione Manes inferias faciendo veneraretur; maxime vero religiosum censebatur in sepulchris monumentisque lumina ardentia apponere. Immo a funibus accensis dictum funus, tam veteres, quam recentiores quidam arbitrantur. Arbiter in Satyrico de matrona *Æphesina* hæc scripsit: *Adsidebat agre fidissima ancilla, simulque & lacrymas commodabat lugenti, & quoties defecerat in monumento lumen renovabat.* Et Dio in larvali illo convivio Domitiani: *Primum omnium juxta unumquemque columnam collocat, factam instar sepulchri, in qua nomen ejus erat scriptum, pendebatque de ea lychnuchus parvus, ut afolet in monumentis.* Mos hic accendendi lucernam in monumentis, ex *Ægypto* forte Romam commigravit. Herodotus enim sic lib. 2. de filia Micerini Regis: *Cui singulis diebus omnifarj odores inferuntur, noctibus perpetuo incensa lucerna astat.* Similis prope res refertur in lege *Titio centum 71. §. 2. de conditionib. & demonstrat.*, in qua hæc habentur: *Titio centum relicta sunt; ita ut a monumento meo non recedat.* Ex hoc autem paganorum more, accendendi nempe lumina in sepulchris, commoda mihi paratur occasio explicandi Concilium Illiberitanum, quod tamdiu doctorum torfit ingenia; sic enim habemus in Can. 34. *Cereos per diem placuit in cæmeteriis non incendi; inquietandi enim non sunt Sanctorum Spiritus. Qui hæc non observaverint, arceantur ab Ecclesia.* Non igitur prohibet Concilium cereos accendi,



cendi , nisi in cæmeteriis . Non æe dicendum propterea id vetitum , ut eradicaretur illa paganorum superstitio accendendi lumina in monumentis in manium honorem ? Et quamvis Christiani non ex hac stulta gentiliū opinione morem hunc retinerent , quem plerique antiquorum ad Christianum usum bona mente traduxissent , sed ad meritum nostrorum martyrum : ne tamen gentiles crederent a Christianis adhuc religionis suæ dogmata fervari , jure merito id a sanctis illis Patribus vetitum .

Vidimus jam quid sibi velint in lege nostra lucernæ accensæ in veteribus monumentis : reliquum est ut illa explicemus , quæ attinent ad præceptum testatoris , nempe , *ut liberti quolibet anno mortis ejus sollemnia peragerent* . Plures profecto sunt , qui rem funebrem Romanorum ; ejusque ritus omnes accuratissime pertractarunt ; neque enim aliud est inter Romanas antiquitates , quod æque cum feralibus illis cæremoniis comparari possit . Quapropter prætermisissis rebus aliis , quæ propiora ad legem nostram interpretandam sunt , attingamus . Parentabant veteres sacrificiis , quæ inferiæ appellabantur , Manibus peragendo . Inferias scripsit Festus , sacrificia esse , quæ Diis manibus inferuntur . Sed inferiæ istiusmodi non sacrificia tantum amplectebantur , sed & luctum , & epulas . Itaque sacrificiis Manes placabant : lactu utebantur ad memoriam defuncti colendam : epulæ vero tam defunctorum , quam viventium causa celebrabantur .

Conficiebantur hæc sacrificia liquoribus , non modo victimis . Liquores erant aqua , lac , vinum , & sanguis . Hinc profecto mensæ , aræque passim in sepulchris erectæ ; putabant enim Romani hisce liquorum speciebus animas defunctorum oblectari . Sic Servius in Æneid. versus illos :

*Inferimus tepido spumantia cymbia lacte  
Sanguinis , & sacri pateras .*

Interpretatur : *Ideo lactis , & sanguinis mentio facta est , quia affirmantur animæ lacte , & sanguine delectari* . Ejusque rei rationem vestigans subdidit : *Bene animam lacte , & sanguine dicit elicitam ad tumulum . Lacte namque nutritur corpus post animæ conjunctionem , & anima sine sanguine nusquam est ; quo effuso recedit .*

Adde

Adde quod crederent sanguine etiam manes propitiari. Sane mos apud veteres erat occidendi prope rogos, ubi cremabantur cadavera, hostes, deinde servos, demum vero, postquam humaniores facti sunt, pecudes illis subrogatas. Ex quo ratio certe innotescit, cur ludi gladiatorii penes Romanos in re funebri ederentur; quod profecto significavit Apulejus scribens lib. 8. *At ego sepulchrum mei Leopolemi tuo luminum cruore libabo, & sanctis manibus ejus istis oculis parentabo.* Erant præterea & epulæ, quæ in re funebri agitabantur, fiebantque ex fabis, apiis, lactucis, panibus, ovis, lentibus, atque etiam carnibus, pulticulisque, sale tamen adpersis. Ex quibus lucem accipit illud Arnobii lib. 7. adversus Gentes. *Nam pulticula, thura cum carnibus rapacium alimenta sunt ignium, & parentalibus conjunctissima mortuorum.* Sed istiusmodi epulæ vel publicæ erant, vel privatæ; atque hæ quidem vivorum, illæ vero defunctorum gratia fiebant, atque appellabantur *silicernia*. Nihil autem ex his accipi poterat, aut degustari, sed imminuta omnia offerenda erant cum silentio Diis manibus; rebatur enim stulta gentilitas, defunctorum animas ab inferis excitatas aliquando cibo vesci, & delectari. Quapropter apud Romanos vulgaris illa dira imprecatio, *cænam e rogo rapere*, qua sane inimico tantum rei domesticæ inopiam imprecabantur, ut ad degustandas mortuorum cœnas impelleretur.

Epulæ privatæ erant, quæ vivorum gratia parabantur, nempe causâ defuncti familiæ, conjunctorumque ejus sive amicitia, sive sanguine. Verum non uno tantum die istiusmodi epulæ dabantur, sed easdem repetebant tertio, septimo, & nono die, quod novendiale dicebatur: aliquando etiam iterabant vigesimo, trigesimo, & quatragesimo non sine maxima superstitione. Sed quia in novendiale epulum incidit fermo, notandum non dictum novendiale, quia novem diebus continuis defunctis iusta persolverentur, sed quod nono die finem luctus ille haberet, & familia certo februi genere funebri polluta purgaretur; quod sacrificium *Exverræ* appellabatur, quemadmodum Fastus ait: *Exverræ sum purgatio domus, ex qua mortuus ad sepulturam efferebatur.* Hæc sunt illa mortis solemnities in lege nostra commemorata.

Ve-

Verum quum hæc solemnia publicæ quoque quolibet anno pro omnibus defunctis mense Februario fieri cœpissent, potentiores morem hunc probantes, & sibi maxime istiusmodi inferias annuas dari voluere. Quia plebei etiam Patriciorum, ditissimorumque exemplum sequuti, in idem frequentes conspirarunt, & quolibet mense, nedum singulis annis, feralia isthæc sacra sibi fieri præcipiebant: quarum sane gratia bona quædam legabant, quorum ex fructibus iusta hæc iterarentur, ut patet luculentissime ex lege *Annua 20. D. de annuis legatis in §. 1. in hæc verba: Attia fideicommissum his verbis reliquit: Quisquis mihi heres erit, fidei ejus commissio, mi det ex redditu cænaculi mei, & horrei post obitum, Sacerdoti, & hierophylaci, & libertis, qui in illo templo erunt, denaria decem die nundinarum; quas ibi posui.* Quæ verba sic interpretatur doctissimus Gothofredus: *Nundina hic denicales sunt feria, & novendialia.* Sed ad rem profecto sunt quamplurimæ inscriptiones, quas collegit vir Doctissimus Gutherus de jure manium, quarum en tibi unam, & quidem appositissimam ad legem nostram illustrandam:

L. IVLIO SECVNDO  
VTRICLARIO · COR  
C. I. P. A. QVI · LEGAVIT  
EIS. TESTAMENTO  
SVO · ASS · CC · VT · EX · VSVR. EOR  
OMNIBVS · ANNIS · SACRIFIC  
IO · EI · PARENTETVR (a).

Ex quibus omnibus usque adhuc dictis, atque ab origine sua repetitis, habes, lector humanissime, Constitutionis nostræ sententiam, quæ sane non nisi ex superstitionis veterum Romanorum illustratis iustis patere poterat.

Sed quum supra Novendiale sacrificium meminerim, post scilicet novem luctus dies, quorum postremo completis ad tumulum solemnibus, funeri finis fieret, familiaque luctu polluta purgaretur: proditur hinc ratio, cur intra has ferias, quæ veteribus dictæ *denicales* a nece nempe, miles a sacra-

V

men-

(a) Lib. 2. cap. 12.

mento militari excusaretur si abesset, reo si defereret vadimonium, neque cautionibus iudicio sisti obtemperasset, indulgeretur. Erant quippe atrii istiusmodi dies, quibus adeo censebatur polluta familia, ut nil posset auspicato fieri; quare sic ait Columella (a): *Nos apud Pontifices legimus, feriis tantum demicalibus mulos jungere non licere, ceteris licere*. Itaque quum Justinianus Novella sua 115. cap. 1. sanxerit ne heres conveniretur a creditoribus intra novem dies a morte defuncti; non ne dixeris cum rem Romanorum funerariam, familiarumque lustrationem, quæ impedimento erat, ut dixi, ne quid auspicato fieri posset, respexisse? Non diffiteor, fas esse per aliquot dies luctum peragere; neque superstitiosum esse, si aliquandiu negotia protraherentur, modo a familiarum lustratione, aliisque id genus sacrificiis discesseris: sed intra novem dies nec plus minus, parentalia includi, omniaque negotia interim tantum vetari, hoc profecto est, quod paganam superstitionem aliquo modo sapit. Vide quæso quid de hoc scripserit Augustinus (b). *Nescio, inquit, utrum inveniat alicui Sanctorum in Scripturis celebratum esse luctum novem dies, quod apud Latinos Novendiale appellatur. Unde mihi videntur ab hac consuetudine prohibendi, si qui Christianorum istum in mortuis suis numerum servant, qui magis est in gentiliū consuetudine*. Qua de re laudandus minime est Tribonianus, qui concinnando sub Christianis Principibus juris corpore, reliquias paganæ superstitionis servatas voluit.

Verum si hucusque dicta cum aliis comparabimus, quæ apertam superstitionem præferunt, eo magis videtur Tribonianus culpandus. Rem age persequamur. In lege 9. D. de rerum divisione, ex Ulpiano hæc refert: *Sacra loca ea sunt, quæ publice dedicata sunt, sive in agro, sive in Civitate sint. Sciendum est locum publicum tunc sacrum fieri posse, cum Princeps eum dedicavit, vel dedicandi dedit potestatem. Illud notandum est, aliud esse sacrum locum, aliud sacrarium. Sacrum locus est locus consecratus: Sacrarium est locus, in quo sacra reponuntur*.

(a) Lib. 11. cap. 22.

(b) Quest. 172. ad Genes.

nuntur: quod *Q* in edificio privato esse potest: *Q* solent, qui liberare cum locum religioni volunt, sacra inde evocare. Quot sane verba sunt, tot fere stultæ superstitionis vestigia, quæcum Christianorum moribus atque institutis minime erant copulanda. Sed quod magis mirandum, id est, quod de exauguratione sacrorum locorum refert ex more priscorum gentilium. Et quidem solemne veteribus id fuit, si forte sacellum aliquod, fanumque exaugurare, sive religionem solvere voluissent, Deos inde evocare, quod intellexit Festus quum scripsit (a). Quæ cum ex veteribus in novas evocarentur, septem Curiarum per Religiones evocari non potuerunt. Et Livius (b): Nam cum omnium sacellorum exaugurationes admitterent aves in termini fano non addixere. Qua de re vide ex his, quæ sit exauguratio, sive sacrorum evocatio. Quæ autem perversitas tanta sub Justiniano Imperatore, ut referret exaugurationis ritum, qui in paganorum more erat, quum ea potius referri debuissent, quæ Sacri Canones pro Christiana veritate invexerant?

Sed porro pergamus. Celeberrima est lex *Sed si vir 31. D.* de donationibus inter virum, & uxorem, ubi legimus in §. 8. & 9. *Si vir uxori munus immodicum Kalendis Martiis, aut natali die dedisset, donatio est: sed si impensas, quas faceret mulier, quo honestior se haberet, contra est. Non videtur locupletior facta esse mulier, si aut in opsoniis, aut in unguentis, aut in cibariis familia donatam sibi pecuniam impenderit.* Omni procul dubio lex hæc latet in obscuro, nisi lucem a veteribus Romanorum moribus ad eam illustrandam arcessemus. Itaque videamus brevi, quinam fuerit *dies natalis*, quæque *matronalia*, quæ Kalendis Martii agebantur. Mos Romanis fuit, ut quotannis natalem suum celebrarent, de quo hæc Div. Augustinus (c): *Considerato quæso, quando aliquis homo potens, aut nobilis natalem suum, aut filii sui celebrare desiderat, quanto studio ante plures dies quidquid in domo sua sordium invoe-*

V 2

(a) Lib. 11.

(b) Lib. 1.

(c) De tempore serm. 1.

*neris, ordinat emundari, quidquid ineptum, & incongruum projici, quid utile, & necessarium præcipit exhiberi. Domus etiam si obscura fuerit dealbatur, pavimenta scopis mundantur, & diversis respersa floribus adornantur, quidquid etiam ad lætitiæ animi, & corporis delicias pertinet, omni sollicitudine providetur.*

Solebant autem diebus his natalibus cognati vicissim, & amici munera dare, & accipere. Ecce tibi Martialem ita scribentem (a):

*Natali tibi, Quinte, tuo dare parva volebam*

*Munera: tu prohibes; imperiosus homo es.*

Inter ea imprimis mittebantur aves (b), annuli, lunulæ, aliaque hujus generis ad mundum muliebrem pertinentia. Præterea erat dies *Nominum* a die natali diversus, eratque in puellis ab ortu suo octavus, in pueris nonus; puella enim & puer lustrabantur, unde dies lustrici, ac nomina imponebantur. Qua de re sic Festus scripsit: *Lustrici dies infan-  
tium appellantur, puellorum octavus, puerorum nonus, quia  
his lustrantur, atque eis nomina imponuntur.* Sed fiebat hæc lustratio, impositioque nominis variis adhibitis solemnitati-  
bus. Expiatum enim infantem, & adversus fascinum probe præmunitum eximebant cunis, & per ædes ditissimorum Ci-  
vium, & per Deorum, Dearumque templa, cum boni om-  
nis causa, tum religionis ergo circumferebant: deinde ve-  
ro indebatur nomen, atque ad convivium propinqui adhibe-  
bantur. Denique intra tricesimum a nativitate diem pro-  
fessio natalitia ad Acta fiebat: donaque, & munera infanti,  
eiusque matri mittebantur.

Habes ex hucusque dictis diei natalis solemnia, ejusque discrimen a die nominum. Verum quia in hac tractatione, quid-  
quid asseritur legibus comprobare mihi constitui, ne incepto  
desim, rem, qua de agimus, jure Romano confirmare con-  
siliū est. Quærens Paulus in l. cum plures D. de administra-  
tione Tutorum, qua ratione tutor se gerere debeat in administran-  
dis

(a) *Epigram. 9. ver. 54.*

(b) *Idem Epigr. 9. ver. 36.*

dis rebus pupilli, hæc ait §. 3. *Cum tutor non rebus duntaxat, sed & moribus pupilli præponatur, in primis mercedes præceptoribus, non quas minimas poterit, sed pro facultate patrimonii, pro dignitate natalium constituet . . . sollemnia munera parentibus, cognatisque mittet.* Quæ autem sint hæc sollemnia munera certe veteris scholæ interpretes ignorarunt, sed ex dictis humanissime lector tute intelligis. Itaque sunt munuscula illa, quæ invicem cognati natali die sibi missitabant, quæque ex more recepto adeo invaluerant, ut necessario mittenda essent etiam a Tutoribus, quibus alioquin res pupilli distrahere minime fas est. Sed non minus præclara est lex cum quidam 23. D. de annuis legatis. *Cum quidam Decurionibus divisiones dari voluisset die natalis sui, Divi Severus, & Antoninus rescripserunt, non esse verisimile testatorem de uno anno sentisse, sed de perpetuo legato.* Qua ex lege patet, quosdam adeo perpetuitatem nominis sui peroptasse, ut, ne memoria eorum periret, præceperint etiam post mortem diem natalem celebrari, ad hoc muneribus constitutis, quæ mos erat elargiri diebus natalibus. Itaque nomen *divisiones* in lege hac idem valet, ac distributiones, sive natalitiæ largitiones.

Inspecto jam more de natali die celebrando, reliquum est, ut de *matronalibus*, ad legis superioris intelligentiam, pauca dicamus. Erant matronalia festa illa, quæ matronarum gratia Kalendis Martiis agebantur a viris, qui Junoni pro conservatione conjugii supplicabant, deque collatis beneficiis gratias referebant; sicuti & mulieres idem pro viris faciebant diebus *saturnalibus*. Tunc igitur temporis mos item erat munera dare vicissim, atque accipere; quare Tertullianus inquit (a): *Januaria, & brumæ & matronales frequentantur, munera commeant, strenæ consonant, lusus, convivia constrepunt.* Et Martialis (a):

*Scis certe, puto, vestra jam venire  
Saturnalia, Martias Kalendas:  
Tunc reddam tibi, Galla, quod dedisti.*

Quum

(a) De idolatria.

(b) Lib. 5. Epigr. CX.

Quum igitur vulgo diebus his mutuo munuscula dari fo-  
lerent, dubitandi causa emerfit, utrum viri donatio uxori facta,  
quæ solitas, statasque horum dierum largitiones excesserit, inter  
solemnia munuscula haberi debeat: an vero ea sit, quæ a legibus  
virum inter, & uxorem vetatur. Et Jurisconsultus ait donationem  
esse prætextu muneris simulatam, ut legi fraus fieret. Sed  
in hac specie ex his, quæ differuimus vide, quam male se  
gesserit Tribonianus. Agebatur hic de fucatis munusculis, qui-  
bus legi fraus fieret. Non ne sexcenta alia ei præsto erant exem-  
pla, quibus id poterat illustrare? Quid ergo responsum opus  
fuit a Pomponio de vetusta paganorum religione petatum,  
nempe de festo matronalium, quod in Junonis honorem a-  
gebatur, usurpare?

In titulo *de bonis eorum, qui ante sententiam mortem  
sibi consciverunt*, quærit Papinianus, an, & quando bona eo-  
rum, qui mortem sibi ipsis inferunt, Fisco addicenda sint.  
Atque hac præmissa distinctione, metu ne poenæ ob sceleris  
conscientiam, an vero vitæ tædio quis sibi mortem consci-  
verit, sic quæstionem transigit: Si metu poenæ sibi manus vio-  
lentas intulerit, Fisco esse bona ejus adjudicanda; aliter ve-  
ro, nempe si tantum vitæ tædio, atque (a) adjecta hac ra-  
tione: *Qui rei criminis non postulati manus sibi intulerint, bo-  
na eorum Fisco non vindicentur: non enim fatis sceleritatem ef-  
se obnoxiæ, sed conscientia metum in reo veluti confesso to-  
neri placuit.* Porro autem cur bona eorum, qui præter cri-  
men mortem sibi inferebant, publicanda non essent, ratio est,  
quia apud Romanos ex Stoicorum omnium sententia hæc  
fas erat. Ecquis est, qui æque ferat Tribonianum senten-  
tiam hanc Papiniani in compilationem suam conjicientem?  
Par ne fuit sub Principibus Christianis absurdum gentilium  
Philosophorum dogma juris corpori inferere? Deus quippe,  
qui nobis vitam dedit, ipse ejusdem moderator & arbiter  
est. Itaque satis non fuit Triboniano ritus paganorum qua-  
quaversus in corpore juris disseminare, quin & dogmata  
adlibuerit eorundem adferre. Quam igitur necesse est,  
ad

(a) L. 3. §. Papinian.



ad absolutam juris Justinianæ intelligentiam, historiam veteris Romanorum religionis internoscere, quum Tribonianus non solum ritus, sed etiam dogmata illorum in novum jus conjecerit? Opus sane præclarum aggredieretur, qui leges omnes e paganis ritibus perperam a Triboniano depromptas colligeret in unum, easque explicaret, ut jus novum ita a veteribus superstitionibus emendaret.

In lege *Aut facta* D. de poenis idem Tribonianus hæc refert §. 8. de cæde imprudenti: *Eventus spectatur, ut a demensissimo quoque facta: quamquam non minus lex eum, qui occidendi hominis causa cum telo fuerit, quam eum qui occiderit, puniat: & ideo apud Græcos exilio voluntario fortuiti casus luebantur, ut apud præcipuum Poetarum scriptum est.* Istiusmodi expiandi cædes etiam imprudentes frequentissimus fuit penes Græcos, ac Romanos usus, quum crederent manes numquam quiescere, nisi occisor sacro aliquo eos placasset; de quo vide Gutherum de jure manium, & Kirchman de funeribus Romanorum. Quare minus recte sententia hæc relata est ab Triboniano in jus novum, quod depurgatum omni a superstitione esse debebat. Fateor profecto quædam Concilia cædem etiam inopinatam poena Canonica affecisse, ut Il-  
liberitanum Can. 5. Epaonense Can. 34. Basil. Can. 57. Can. Apost. 66. Attamen hæc omnia sine ulla superstitione, sed ad homicidii tantum horrorem incutiendum, nempe ut fideles adverterent, quam grave id criminis sit, si imprudens adhuc canonica poena mulctaretur. Ex quibus omnibus usque adhuc dictis pernoctare licet, plures illas leges sine notitia Religionis veterum Romanorum, intelligi ulla ratione non posse.

Atque hæc sunt, quæ ad perfectam juris scientiam dicenda putavi, probationibus plerumque ex ipsis legum fontibus desumptis. Operæ nunc pretium facturum puto, si ad susceptæ disputationis partem alteram accedam, quæ tota profecto in Romana jurisprudentia sub Cæsare Augusto Imperatore illustranda seorsim impenditur. Quum enim alia sit Respublica Democratica, ac Monarchica, ac proinde leges aliæ alii formæ accomodentur; necesse fuit ut & jurisprudentia Augustalis longe ab illa, quæ ante vigeat, distaret. Quo discrimi-

ne posito, par æquumque est, ut postquam generatim de Romana jurisprudentia loquuti sumus, juris nunc illius species, postquam scilicet libertas extincta est, peculiari ratione inspiciantur.

*Finis libri Primi.*

# JOSEPHI TOSCANO

## MANDATORIZZO.

De Romana Jurisprudencia sub Cæsare  
Octaviano Augusto

L I B E R II.

P R O L E G O M E N O N .



Uod plerumque iis, qui Terrarum Orbem peragrant, & mihi rerum historiam ab ineunte ætate perlegenti contigisse fateor. Illi quidem huc atque illuc properantes, quum oculos insatiabili cupiditate assatim pascere festinent, nihil distincte cernunt, nihil distribute judicant, nihil pro dignitate admirantur: ubi vero, signo veluti receptui dato, se ex longo illo, vagoque itinere, aliquo, ut quieti tandem consulant, receperint; tunc sanè tamquam in tranquillo portu consistentes se colligunt, omniaque quæ antea raptim, confuseque conspexerant, in memoriam revocantes, articulatim dividunt; missisque ceteris, ut memoratu indignis, magnifica quæque, atque admirabilia prædicant, extolluntque. Haud profecto secus me olim in veterum monumentis evolvendis gessisse memini: in rerum enim publicarum fatis, in Imperiorum mutationibus, virorumque illustrium fortuna nihil aliud, quam mentem multiplici illarum vicissitudine, ac varietate oblectare curavi. Sed postquam ex musis mansuetioribus ad severiores me recepi, tum vero cogitatione, quæ antea animi tantum gratia in hoc Orbis Terrarum theatro perlustraveram, repetens, pernovi demum

X

quan-

quanta ubertate atque opulentia amœniores literæ, historiæque affluerent. Cuncta enim, quæ antea uno veluti hauſtu, ac permiſte imbiberam, in ſuam quæque ſedem tribuens, & quæ utilia eſſent atque frugifera, ab iis, quæ anicularum erant oblectamenta, ſecernens, vidi tandem ampliffimam inefſe ſegetem, cum diſciplinis omnibus comparandis, tum graviffimis rebus ſuſtinendis. Etenim in hiſtoria, quæ veritatis lux eſt, Theologus firmiſſima dogmatum noſtrorum adjumenta intuebitur, continentem nempe in Patrum teſtimoniis traditionem, non intermiſſam Epiſcoporum ſucceſſionem, ſanctiſſimæ Conciliorum decreta, graviffimasque Eccleſiæ in hæreticorum deliramentis proſtigandis ſententias. In hiſtoria, quæ vitæ ma-giſtra dicitur, juris publici ſtudioſus conſonas hominum opi-niones dignoſcet, eaſque, in quibus cultiſſimæ quæque, o-pimeque moratæ gentes convenerint, aut diſſentierint, quidque integra, communisque ratio omnibus concorditer præceperit, aut prohibuerit, intuebitur. Itemque vir civilis in hiſtoriæ vetuſtatis nunciæ annalibus opulentiſſimorum Regno-rum ortus, eorumque occaſus, unde eorundem viciffitudines, quibusque de cauſis ſteterint, vel corruerint, intelliget. Ac denique ab hiſtoria juris prudens lucem plurimam mutuabi-tur ad legum vim virtutemque introſpiciendam; ex rerum publicarum ſcilicet indole, ex philoſophorum ſcitis eo ad-vectis, ex populorum natura & moribus, ex locorum in-genio, temporumque, quibus civitates conditæ ſunt, varietate. Hanc proſecto eſſe hiſtoriæ vim, ſi antea quidem vide-ram, maxime vero ex quo tempore ad forum acceſſi, atque ubi ad hanc potiſſimum, quæcunque ea ſit, opellam animum ap-puli, plane exploratæque expertus ſum; ut unam ſane hanc viam, qua ad intima juris adyta permeemus, expeditiorem, ac quaſi compendiariam pateri pro certo affirmem. Hac præ-ſertim meas has lucubrationes aggreſſus ſum, eademque, ſi annuant ſuperi, finem exoptatum attingere mihi polliceor. Itaque quum libro primo Romanæ jurisprudentiæ intelligen-tiam ex hiſtoricis fontibus univerſe hauſerim, hoc altero ſin-gulatim, imperante ſcilicet Auguſto, inſtitutum eadem hiſto-ria duce & auſpice perſequar. Sed in hac, quam mihi con-ſi-

stui, sparta exornanda, nobilissimorum pictorum in viris summis assimilandis morem imitabor. Hi enim quemadmodum cetera minus curantes, oculos maxime vultumque, ubi animi vis, virtutesque, ac vitia, tamquam in sedibus suis, optime dignoscuntur, solent referre; ita nos Romanam historiam, quantum leges spectat, percurrentes, missis aliis omnibus, de eo tantum, quod ad splendidissimam virtutem illam attinet, qua homo propius Deo, rerum omnium moderatori, atque arbitro accedit, hoc est de Iustitia verba faciemus.

Igitur quum leges civili regimini, populorum moribus ingenioque, loco, & tempori, ut sæpe dictum est, respondere debeant, ut Augustanam Jurisprudentiam probe, & per causas suas intelligamus, res Romana sub eodem Augusto, tam publica, quam privata in propatulum proferenda est. Si enim vetus illa Reipublicæ popularis forma, quæ jamdiu invaluerat, in novam, & monarchicam jam tandem conversa est; & ratio omnis regiminis tunc temporis mutanda fuit, ut alii essent, ac antea Magistratus, alia fori consuetudo, alia demum leges, quæ recens institutæ politicæ congruerent. Itaque civili Romanorum vita sensim ad novam Reip. formam traducta, immutata omnino Urbis facies visa est, omniaque novata; quamvis, ut fucus vulgo fieret, cuncta latenti quodam religionis arcano involgebantur, ne libertas, quam perditæ deperibant, amissa videretur.

Nos igitur ut ordine & ratione de re differamus, physicorum consuetudinem profecto sequemur. Quemadmodum enim illi non res tantum naturales, earumque naturam speculantur, sed omnium horum etiam causas rimari alte solent; ita profecto viri politici est, non modo rerum publicarum statum mutationesque scrutari, sed maxime rationes, atque initia a sedibus suis repetere. Hinc quum sub Augusto Monarchia inceperit in Romana Republica, neque id uno eodemque temporis momento, sed paullatim ac veluti per cuniculos, meum esse existimavi statum Romanæ Reipublicæ a consulari Imperio ad Octavianum usque strictim in hisce prolegominis persequi, ut ex ipsamet rerum constitutione pa-

lam fiat, cur, & quibus ex causis sub Augusto novam Romam induerit formam, unde ea jurisprudentia investa, quæ per id tempus Romanorum moribus responderet. Rem igitur, ut propositum est, aggrediamur.

Urbem Romam principio Reges habuere, quorum tamen potestas ad Tarquinium superbum usque valuit: eo etenim ob filiorum sive verum, sive confictum crimen e Regno expulso, Consulare imperium per subdolas Patriciorum artes investum fuit, nomine tenas tantum e Regio discrepans; ita ut sicut antea unus Rex erat, ita deinceps duo, sub diverso licet nomine, forent. Sed, ut in superiori libro sat probavi, Servius Tullius, quo sibi Patricios, Primoresque Civitatis alliceret, plebe non invidente, aristocratiam in Urbem Populi distributione per classes, & centurias miro artificio invexerat: per hanc enim, populo per centurias suffragia ferente, summa profecto rerum penes Patricios erat, & ditiores, quorum plures erant classes & centuriæ; contra vero ceterorum quam pauciores centuriæ essent, quamvis in belli pacisque muniis faciendis vincerentur, invidiæ id sibi non erat: quippe tributorum onera a pauperibus maxime in ditiores inclinabantur, quando non amplius viritum, sed pro census & centuriarum ratione tributum pendi statutum erat. Porro autem hæc Aristocratia ratio per Servium ad Patriciorum commodum inita, eadem ad Consules transmissa fuit, ut ejectis Regibus, eosdem consulum nomine mansisse, Primoresque Patriciorum, apud quos summa potestas esset, in eorum locum successisse certo affirmes.

Sed ne plebs rem persentisceret, & in Consulari Imperio Regiam Majestatem, quam maxime horrebat, agnosceret, Consules quam solerter cavebant. Quid ad Regiam hanc potestatem occulendam Valerius Poplicola non est molitus? Quas subdolas ad hoc non iniecit rationes? Vocato ad concilium Populo, fasces submitti jussit, tamquam hominum, quod ei veluti rerum moderatori prastaretur. Quumque domum in edito Urbis loco sibi ædificandam curavisset, vulgatoque hinc rumore, regnum ab se affectari, statim eam dirutam voluit: atque ita vitandæ suspicionis causa modo huc modo illuc

illuc divertens, populo ostendit adeo Consulem a cupiditatis Regni crimine abesse, ut ne esset quidem, quo se ad habitandum reciperet.

Mirum autem est, quam populares leges tulerit. Vetuit ne quis Populi injussu Magistratum gereret, sacrandumque caput ejus, qui secus egisset, speciose dictitans, supremum rerum omnium arbitrum populum esse. Prohibuit, quominus Consul in caput Civium jus diceret, & si verberibus civis damnaretur, posse eum jussit ad populum provocare. Voluit demum, ut quaestores a populo creandi publicæ pecuniæ præessent, ne quid esset, quod Consulis animum vel fortem constantemque remitteret, vel pravum, insolentemque ad libertatis perniciem urgeret. Hæ fuerunt leges Valerii, quibus aliquantulum Consulare Imperium minuit, sed ut diuturnius illud redderet, magisque firmaret.

His artibus plebs delinita quievit parumper. Sed sentit demum Regiam jam potestatem in Consulare nomen recidisse: etenim honoribus omnibus uni Patricii perfungebantur, penes eosdem rerum sacrarum cognitio; judiciorumque vis, atque norma a Consulum voluntate pendeat. Præter hæc bonis omnibus militiæ inter sudores & vulnera partis Patricios solos locupletantibus, ea semper omnium egena inopia summa laborabat. Hæc profecto in causâ fuerunt, quapropter viribus omnibus adnisa fuerit, ut tantam Consulum potestatem vel labefactaret, vel saltem minueret. Hinc in sacrum montem, finitimo ingruente bello, secessit; negavitque ad Urbem sese redituram, nisi crearetur magistratus plebejus, cujus potestas ea esset, ut intra moenia patriciorum in Civium libertatem vim impediret. Atque hic Tribunus plebis fuit, qui deinceps adeo per fas, perque nefas crevit, ut Consules ipsos carceri manciparet, quique tot tantasque calamitates in Urbem importavit, ut Respublica sæpe concidisset, nisi fato quodam esset ab interitu erepta. Neque Magistratu hoc a Patriciis per vim extorto plebs stetit: ad id etiam vires suas, animumque appulit, ut jus certum statueretur in Urbe, neu deinceps Consulum voluntas judiciorum regula esset: quapropter leges duodecim tabularum partim ex

Græ-

Græco jure excerptæ, aliæ ex Romanis consuetudinibus proficiscentes vulgatæ sunt. Ecce tibi quot modis, quotque viribus plebs imperium consulare discerpere conata sit.

Verum non deerant Patriciis subdolæ artes, quibus plebem eluderent, quæque ei concessa fuerant, irrita facerent. Nam anno ducentesimo quinquagesimo nono Dictator creatus fuit, hoc est supremus ille Magistratus, qui sex licet menses, tanta tamen polleret potestate, ut cives necare, & verberare, & in Senatores, Consules, atque in Tribunos ipsos sine provocatione animadvertere impune posset. At enim cur plebs in comitiis per sua suffragia passa est, ut summus hic Magistratus ex Patriciorum ordine diceretur? Vidit sane illum nonnisi suadente necessitate, & per semestre tantum tempus creari, eoque imperante, Senatus interim, Consulique potestatem interquiescere: atque hac profecto de causa sic facilem præbuit assensum. Sed eam opinio fefellit: non enim animadvertit Dictatorem creatum iri, quoties nempe Senatui videretur, hoc est supremum hunc Magistratum dictum iri, quum jura omnia Patribus libuerit mutare, atque subvertere: nam, ut innuimus, Dictatore creato, Magistratum omnium vis atque potestas intercidebat, ac jura sive publica, sive privata conticescebant.

Quamobrem plebs pacta omnia cum Patriciis inita, per eorundem technas in irritum cecidisse videns, aliam atque aliam viam semper in diem furens aggressa est, ut imperium Consulare infirmaret. Petiit igitur, evicitque instando, ut Comitiorum forma mutaretur, ac Tributa comitia denuo instituerentur: & quidem sicut in centuriatis omnia ad Patriciorum arbitrium expediebantur, quum plures essent eorum centuriæ, quam plebis; ita in his maxime plebs valebat, quum tot essent suffragia, quot capita. Quin res ulterius processit: quum enim sæpe antea experti essent, facile sibi esse cuncta, quæ vellent, data quandoque occasione, a Patriciis per vim metumque extorquere; id etiam efflagitarunt, ut honorum fierent participes, sibi cum Patriciis matrimonio jungi liceret, juris dicundi potestas communicaretur, utque sua scita omnes cujuscumque ordinis tenerent.

His



His omnibus accessit deinde summus honor consulatus, ac demum Dictaturæ, quæ firmissima fulcra erant Patriciorum auctoritatis. Nam anno Urbis tercentesimo octogesimo sexto Sextius ex plebe Consul fuit, & anno tercentesimo nonagesimo primo Martius Rutilus item plebejus Dictator dictus est. Itaque plebe tot honoribus cumulata, tantaque potestate aucta, factum, ut sicuti prisco jure nil ratum, nil firmum esset, nisi Senatus accederet auctoritas, ita recenti jure omnia essent infirma, si plebi non adlubescerent.

Imminuta nimium Patriciorum auctoritate, ob Consulatum potissimum, ac Dictaturam cum plebe communicatam, tanto vulnere medendo sedulo consultum est: atque id assequuti tandem sunt, ut Prætor saltem, atque Ædilis curulis ex ordine patricio crearentur. Tritum autem satis est, quanta vi & dignitate polleret Prætor: eo enim ejus potestas evecta est, ut sub formularum technis, atque vocabulorum novitate, & aucupio, leges abrogaret, æquitatisque nomine suppleret. Neque minor Ædilis potestas erat: nam is publicos ludos, quibus adeo Populus Romanus oblectabatur, curabat, templa, & ædes inspiciebat, atque ut cetera mitam, rebus venalibus jus dicebat. Sed nec diu hi Magistratus penes unos Patricios mansere, quum anno Urbis quadringentesimo secundo fuerint jam cum plebe communicati. En honores Romanos nunc penes Patricios, nunc vero apud plebem, prout cujusque ordinis vires in civilibus factionibus magis valerent. Sed advertas velim, quæ mæla, quot quantæque calamitates ex his obortæ: id enim agebant Patricii, ut a plebe extorta per civiles motus eriperent. Contra plebs viribus omnibus nitebatur, novas semper insidias ad defatigandos Patricios excogitando, ne partos honores amitteret.

Sed abs re hic non erit pernosse, cur plebs antequam honorum omnium particeps fieret, non adeo frequentes exciverit motus, quemadmodum sane quum par facta fuit Patriciis. Siquidem ex hoc tempore adeo quies publica turbata, ut nonnisi uni imperio delato potuerit publica salus reparari. Hujus profecto rei rationem prodit nobis Aristoteles

les (a), cujus verba hic exscribere placet. *Mutantur*, inquit, *Respublica etiam quum Civitatis partes, quæ contraria esse videntur inter se, coquantur, ut divites & Populus: media vero pars est exigua, vel nulla. Nam si alterutra pars longe excellat, reliqua adversus eam, quæ aperte sit potentior, non solet periclitari.* Quæ sane verissima sunt: nam, ordinum æquatio, per quam omnes sunt pares, id efficit, ut alius alii parere detrectet; unde sane civiles motus erumpunt: plebs enim in honorum jure Patriciis æquata, haud facile in officio contineri posset. Quanto igitur sapientius se gessit Romulus, qui Rempublicam ita instituit, ut Patricii longe plebem antecellerent, neu tamen exercerent Magistratus, nisi per Populi suffragia in comitia coeuntis, ut hoc statuto inter utrosque temperamento, rebus novandis occasio non esset? Atque hinc intelligimus, cur Cicero, aliique summi viri in Romana Republica optaverint, ut medius ordo, scilicet Equitum, aliquanto eveheretur: erat enim hoc remedium præsentissimum, ut inter Patricios, ac plebejos frenum quoddam injiceretur, ne contra Reipublicæ formam potentiores novas res molirentur. Sed redeamus in viam.

Jam plebs æquato rerum omnium jure, Patriciorum voluntatibus obsecundare indigne ferebat. Sed quum nihil valeant honores, si absint vires, fortunarumque copia præsto non sit, hinc animum intendit, ut partis honoribus ex Patriciorum bonis tandem ditesceret: qua de re vulgatam legem agrariam toto conatu adnixa est rogari, justitiæ æquitatisve commento ingeniose quidem objecto: obtendebat enim par æquumque non esse, tot agrorum jugera viribus suis, laboribusque Reipublicæ parta unis tantum Patriciis deferri. Sed videns Senatus legem hanc malorum esse foecundissimam segetem, quot deinceps experientia rerum magistra perdocuit, ne per seditiosos Tribunos rogaretur, impedivit: sed per Licinium potius Stolonem cavit, ne quis plus quingentis jugeribus agri possideret. Lex autem hæc quamvis aliquantulum plebis furorem potuisset lenire, parum tamen profuit, quum ipse Sto-

(a) *Lib. V. cap. IV. Politic.*

Stolo ejus criminis reus factus fuerit, simulata licet filii emancipatione, ut legi suæ fraudem faceret. Ex quo sane ratio proditur quantum jus valeat, quum præsto sit potentia, quæ possit illud subvertere.

Mirum autem est, quot turbas lex hæc in Romana Republica exciverit. Tribuni enim ut plebem sibi allicerent, sæpe eam rogare nisi sunt; neque deerant ex Patriciis, qui sane novitatum cupidi, quo plebis gratiam inirent, eidem faverent. Sed satis pervulgatæ sunt Gracchorum seditiones, Tiberii scilicet & Caji. Et quidem Tiberius, ut cum bona utriusque gratia res componeretur, rogavit, ut lex agraria valeret in posterum, nulla habita de ante actis ratione. Sed ne id quidem Patriciis adlibuit, qui legem hanc de medio tolli omnino exoptabant. Hinc Tiberius factus summopere Senatui invisus, ut Patriciorum insidias evaderet, magis magisque plebis gratiam sibi captare curavit: quapropter leges rogavit ad labefactandam Aristocratiam appositissimas.

Jussit igitur stipendia militaria brevius contrahi, atque ad dirimendas controversias tot ex Equestri Ordine legi Judices, quot ex Senatoribus erant; atque ex omnium Magistratuum sententiis ad Populum provocari. Vide hinc ad effringendam unius ordinis potentiam, quantum valeat, medium ordinem quadam vi pollere. His perlatis legibus, quæ Patriciis non parum detrahebant, Tribunus plebis per illorum fraudes interfectus fuit, & quidem coram ipsa plebe, quæ adeo eum prosequabatur. Successit ei Cajus, qui non solum superiores leges repetitis rogationibus tulit, sed & nova capita adjecit, quibus eorumdem auctoritas labefacteretur; nempe ut omnes habitatores Latii Cives Romani essent; utque Civitate Romana potirentur Latinorum coloniæ, quarum quæ jus suffragiorum in Magistratibus creandis non haberent, in rogandis tamen legibus suffragarentur. Atque hoc, ut plebis in comitiis suffragia auget, cujus profecto gratia Latium ultra Alpes extendit, quo plures essent illi, quos veluti hostes in comitiis contra Patricios armaret. Demum jussit a Senatu judicia ad Equestrem ordinem transferri, hanc obtendens causam, quod tunc temporis Patres innumeris ob-

voluti criminibus, alii peculatus, alii reputandarum, ambitus demum alii, potissimum rei id in judiciis suis agebant, ut indulgentissime sibi invicem parcerent. Ad id apposite Cottæ, & Acilii exempla in medium afferebat: hi enim ingentibus criminibus convicti, judiciali tandem poena ab iis soluti per Urbem discurrebant. Quibus sane a Cajo peractis, supremaque potestate ad Populum translata, mirum quantam apud eum gratiam iniverit. Sed hac eadem de causa misere occubuit. Nec tamen duorum Gracchorum cruenta cædes civilibus seditionibus modum imposuit; quæ profecto adeo deinceps percrebuerunt, ut per Marii & Syllæ, Cæsaris & Pompei, Octavii atque Antonii discordias funditus res Romana perierit, nec nisi sub eodem Octavio demum in novam formam revixerit.

His præmonitis, atque ex historiæ monumentis depromptis, opportunum jam esset novum Augusti regimen, eique respondentem jurisprudentiam auspicari. Sed quum nondum illius causæ ex iis, quæ dicta sunt, satis exploratæ perspectæque sint, eas ante omnia pressius pertingere satius duxi. Duo igitur in his Prolegominis pervestiganda supersunt, scilicet Monarchiæ Romanæ initia, atque ejusdem causas: quibus profecto expositis, in proclivi erit Augusti in Republica gerenda rationem, ejusque leges recens conditas intelligere, quando principiis perspectis, facili negotio ad consequentias devenitur. Sed quum initia Romanæ Monarchiæ a Sylla primum, a Julio Cæsare deinde repetantur, ab his orationem instituere operæ pretium duco.

CA-

CAPUT I.

*De Romanæ Monarchiæ primordiis.*

§. I.

*De Rerumpublicarum conversionibus.*

**H**Umillima quæque, & minima si forte contingat, ut a priori statu alio transeant, id sane neque per se fit, neque uno eodemque temporis momento. Et quidem causæ præeant opus est, quibus ea paullatim deficient, ac veluti per gradus contabescant, ut in novam deinde formam convertantur, aliamque prorsus induant speciem. Quod quum ita natura artificiosa omnium matre comparatum sit, idem profecto sub Cornelio Sylla contigisse in Romana Republica statuendum est. Quum enim is neglecta veteri Aristocratia, & Democratia, Monarchici Regiminis fundamenta prior jecerit, idque deinceps Cæsar, & Octavius confirmarint, a causis suis id profectum pro certo affirmo, nec casu quodam, aut temere accidisse existimandum. Has ego causas Romanæ Monarchiæ rimari quum statuerim, abs re haud puto fore, si, antequam intima ejus adyta ineamus, de Rerumpublicarum vicibus, ac mutationibus verba faciamus.

Mutantur Civitates, atque in alias, aliasque regiminis formas dilabuntur vel interna, vel externa vi: illa quidem propter civium seditiones, hac vero ob hostes, qui rerum potiti imperium, quod magis visum, in victos exercent. Quod spectat civiles seditiones, in memoriam revocandum est, tres esse cujusque Civitatis ordines: alii enim ditissimi sunt, alii proletarii, sive capite censi, alii demum, qui medium inter hos obtinent locum. Itaque in civilibus motibus inspicendum est, quinam ordo seditionem faciat, quibusque ex causis ad res novas impellatur: alii enim alia de causa nova moliuntur. Sed ut enucleatius res pernoscat, variae Rerumpublicarum formæ distinguendæ sunt. Imperium, ut alibi dictum est, vel Aristocraticum est, nempe paucorum, &

optimatum ; vel Democraticum , five Civitatis in comitiis coeuntis ; vel Monarchicum , si summa rerum unus potiatur . Ad hæc Democratia ipsa duplex est , moderata , & popularis : in priori quidem generis & census in publicis honoribus ratio habetur ; in altera vero omnia promiscue se habent , atque ex æquo omnes participes sunt regiminis .

Jam vero si Democratia sit moderata , Patricius , & plebejus uterque novis rebus studet , alius ut fiat mere popularis , alius vero , ut in Aristocratiam dilabatur : iidem hoc agunt in Aristocratia , nempe ut Democratia fiat plebejus , Patricius autem , & dives vel ut in sua forma maneat , vel in Monarchiam vertatur . Attamen quum hæc omnia luculentissime explicaverit Aristotiles (a) , a quo majori luce illustrantur , ejus verba transcribenda sunt ; ait enim : *Primum autem existimare oportet multas initio Reipublicæ administrandæ formas existisse , quum inter omnes quidem conveniat id quod justum , idque quod proportionem æquale est , esse spectandum . Sed ab hoc aberrant ; quemadmodum & prius dictum est . Democratia enim orta ex eo est , quod qui quavis re pares essent , se simpliciter pares esse existimarent . Nam quia similiter liberi sunt se simpliciter æquales esse putant : Oligarchia autem ex eo nata est , quod qui sunt una aliqua re inæquales , se omnino inæquales esse putant . Quia enim copius rei familiaris alios superant iccirco se simpliciter inæquales esse autumant ; inde fit ut illi quidem proinde ac si sint æquales omnia æqualia sibi tribui æquum esse censeant ; ii proinde quasi sint inæquales superiora omnia habere studeant . Nam quod superat inæquale est . Habent igitur omnes hæc Reipublicæ administrandæ formæ aliquid juris , sed simpliciter pravae sunt , & propter hanc causam quum utrique non pro sua existimatione , suæque opinione Reipublicæ administrationis sunt participes seditiones inter eos commoventur .*

Ex quibus verbis proditæ jam tibi sunt mutandorum imperiorum rationes ; idque ex ipsamet eorum natura patet . Quum enim , ut dictum , in democratia moderata ratio eadem sit Civium libertatis , & æqualitatis , non sine tamen quodam

co-

(a) *Lib. V. Politic. cap. I.*

eorum discrimine in honoribus, atque judiciis, ex hoc ipso sæpe seditio oritur, quum Patricius, & dives superior in rebus quibusdam, in ceteris omnibus superior etiam haberi cupiat; contra plebejus par in ceteris, æque liber in omnibus esse velit. Hinc sane ille ad aristocratiam Rempublicam verti, hic autem ad democratiam popularem delabi student. Huc propemodum laudati auctoris sententia recidit, quæ profecto digna tanto viro est. Nam in Romana Republica a Romulo usque, qui in ea democratiam moderatam instituit, quot quantasque seditiones plebs & Patricii exciverunt? Hi quidem propter magistratus, quos gerebant, plebem sibi æqualem adspernabantur, ac proinde aristocratiam anhelabant, nihilo vero minus plebejus obstrepebat, honores, & commoda unis Patriciis cedere indigne ferens; se vero militiæ laboribus fessum, vulneribusque confectum hisce omnibus privari. Hæ sunt civilium discordiarum in democratia moderata causæ. Videamus modo eas, quæ Aristocratiam obturbant. Hanc sane totam ratio generis, census, & virtutis constituit: quare quo majori quis divitiarum copia affluit, eo magis ceteris dominari studet, ut Crassi, Luculli, Pompeji, & Cæsaris testantur exempla. Immo vero si quis ob diuturnos honores, ob bella confecta, hostesque debellatos, ceteros antecellat, is eo se dignitatis evectum intuens, alios sibi pares indignatur, & aristocratiam averfatus, Monarchiam affectat, uti factum a Sylla, Cæsare, ac demum ab Antonio, & Octavio legimus.

Indicatis qui seditiones movent, opportunum est causas perquirere unde illæ oriuntur; quod ejusdem Philosophi verbis explicandum putavi (a): *Ergo (inquit ille) quemadmodum affecti quidam sint, qui seditiones movent, expositum est: de quibus autem rebus seditiones moveant, sunt quæstus, & honores, hisque contraria. Etenim aut ignominiam, aut damnum fugientes vel suum, vel amicorum, seditiones in Civitatibus movent.* Itaque plebs in democratia moderata quietem publicam turbat, vel ob honores, quibus unos Patricios exornatos videt, vel ob bonorum copiam paucos tantum sequentem, vel ad  
firam

(a) *Lib. V. Polit. cap. 2.*

suam inopiam fugiendam : quæ sane quum causæ sint ad rem , de qua agimus , appositissimæ , sedulo expendendæ sunt , simulque excogitanda remedia , quibus adhibitis possit Civitas contra seditionum morbum muniri . Rem igitur studiosius persequamur . Diximus supra , Rempublicam democraticam sitam esse , potissimum in bonorum æqualitate inter cives ; & merito quidem : nam quum in hac civilis regiminis forma præ oculis maxime habeatur civium æqualitas , nemo sane æquo animo feret , paucos divitiis affluere , alios vero summa egestate laborare . Hæc quidem fortunarum copia quemadmodum illis frequens occasio est evertendi Civitatis regimen , ita indigentia hos ad res novas impellit , si non divitum odio , saltem ut per Civitatis mutationem paupertatem effugiant . Hinc quamplurima dissidia Romæ oborta sunt , propter nimias Patriciorum divitias . Ac ceteris omissis , tot tantæque acerrimæ dissensiones ob legem agrariam , & usurarum remissionem excitatæ . Nempe ut remediis his adhibitis æqualitas illa , Patriciorum aviditate sublata , aliquo modo repararetur . Hinc per legem Voconiam rogatum , ut ne filia quidem unigena heres ex asse esset . Hinc per legem Cinciam *de donis & muneribus* prohibitum , quominus quis quæcumque vellet donaret . Erant quidem hæc omnia remedia præsentissima , ut dixi , ad amissam æqualitatem Civitati restituendam : quare consultissime addidit Aristoteles , ne in democratica Civitate copia fieret testandi , nisi in favorem filiorum , ne cui ex hæreditate nimia bonorum copia obveniet , quod bonorum æqualitatem inter Cives infringeret . Caveant hinc viri politici , ut in democratia id saltem plebs habeat , quo paupertatem effugiat . Itaque initio hujus regiminis sic bona dividenda sunt , ut prohibeatur , ne ea quis alienet , ut Romæ , Athenis , Spartæ , & Judææ , apud quos democratia viguit . Quod si temporis progressu prior hæc bonorum distributio dissolvatur , ad novam profecto deveniendum , ut in iisdem Civitatibus factitatum advertimus . Sin vero adeo plebs aucta sit ; ut tantæ multitudini priora bona non sufficiant , neque suppetant alia , quibus alantur egentissimi quique ; in colonias deducantur : atque ita vitam inertem fugien-



gientes , agrorum cultura , & pastu pecorum se sustentent .  
Sed porro pergamus .

Turbas etiam excitat plebs , si soli Patricii gerant Magistratus : qua de re consultissimum in regimine aristocratico , vel Democratico erit , si in honoribus non unius generis , sed census etiam ratio habeatur , quum ita & plebejo spes injiciatur ad honores perveniendi , si forte fortuna aliquando distescat . Neque id etiam parum proderit , si Patriciorum ordo amplissimis honoribus ornatus , idem ingentium tributorum onera toleret , plebs vero quam minime gravetur . Sic enim vicissim re compensata , æquo animo plebeji Patriciorum honores ferent , quum ad vitæ commoda magis , quam ad exoptandos magistratus plebs rapiatur . Quod sane fecit Servius , summo iudicio inventa nova Populi divisione per classes , & centurias , ut nos in ejus historia prodidimus . Quid si cum summis honoribus ingentes sumptus necessariique conjungantur ? Eos certe , quorum tam immodica impendia affeclæ sunt , averfabitur plebs , nec umquam exoptabit . Atquæ hæc ratio est , cur apparatus muneribus Magistratus Romani fulgerent , nempe ut non solum plebejorum animi magnificorum ludorum oblectatione conciliarentur , sed etiam immodicas horum expensas videntes , honores ipsos a se ultro averterent . Hinc repetitis rogationibus vetitum , lucrum in Magistratu quæri , prædia in Provinciis , dum administrantur , emere , fœnori ibidem pecuniam dare , vel mercaturam quamcumque facere . Hinc totæ leges de repetundis , de peculatu , de ambitu , ab ipso Senatu constitutæ : scilicet ut persuasum plebi esset , Patricios in honoribus longe a divitiarum cupiditate abesse . Sed omnium sapientissimum Romuli consilium fuit , quo cautum ne ullo fungerentur honore Patricii , nisi per Populi suffragium in comitiis , ut hac facta æquatione , ordines in concordiam coirent , plebs nempe æquo animo ferret honoribus privari , quum suffragii jure potiretur .

Immutari etiam solet civile regimen , si ex Civium ordinibus , alter alterum ob res feliciter gestas longe superet . Sic Italiam Annibale oppugnante , Patricii in Urbe dominabantur , plebs autem jacebat . Pulso autem Annibale , confecto-

Et quoque per plebis cades & vulnera atrocissimo bello, hæc victoria elata inceptit paullatim insurgere, agros poscere, honores appetere, ac totam ad se Rempublicam convertere: qua de re ne plebs palmis deinceps intumesceret, atque ita Rempublicam turbaret, institutum est, ut externa maxime auxilia in exercitu essent. Sed nova hinc mala exorta sunt: etenim devictorum hostium victoria cui bono militi extero erat? Hinc sane viris politicis persuasum est, ex hoc potissimum, quod milites exteri asciscerentur, Chartaginem interiisse. Quod si Senatus, publicumque Consilium juverit, qui strenue, feliciterque se in Republica gesserit, is profecto Democraticam formam in Aristocratiam invertere conabitur. Sic Athenis factum, ubi quum Themistocles, Senatu Areopagitico juvante, Persas feliciter perfuderit debellaritque, hac parta victoria, major vis, & firmitas Aristocratiae accessit. Atque hac de causa monent viri docti, ut, si forte fiat, ut alter ex Ordinibus in Republica, ob res prospere gestas, inter ceteros emineat, statim ad æqualem auctoritatem ordo medius attollatur: ita enim veluti libramento quodam intercedente, neque plebs, neque Senatus novis rebus studere videbuntur. Hinc Romæ quum advertissent Gracchi Senatum in dies magis magisque vi, atque auctoritate crescere, Equites medios ad judicarios honores extulerunt, & plebis suffragia, data Latinis Civitate, quammaxime auxerunt. Ecce tibi cur Cicero semper studuerit, ut Equites Ordini Senatorio concordia conjunctissimi essent: nam tunc procul a Rebuspublicis, vel Democraticis, vel Aristocraticis seditiones sunt, quum medii Ordinis dignitas augeat. Itaque adnissus est Cicero, ut *multitudinem cum Principibus, Equestrum Ordinem cum Senatu conjungeret*. Additque: *Neque ulla vis tanta reperitur, quæ conjunctionem vestram, Equitumque Romanorum, tantamque conspirationem bonorum omnium perfringere possit* (a).

Sed sicuti in Democratia, ut monui, frequentes turbæ contingunt, novarumque rerum metus suboritur, si alter ex ordinibus alteros excellat: ita sane ad Aristocratiam ipsam in-

(a) In Catil. 4. 10.

invertendam plurimum valet; quum eorum, penes quos est imperium, unus assurgat, ceterosque bonorum copia auctoritateque civili, vel militari superet. Hinc Athenis, aliisque in Rebuspublicis Democraticis, atque Aristocraticis receptus Ostracismus est, ne si quis majori auctoritate polleret, statum Reipublicæ perverteret. Hinc Romæ institutum, ne uni plura simul imperia mandarentur, neve civile, vel militare munus ad longum tempus daretur, ne scilicet, qui plurimum, & diuturna Magistratum gestione imperando assuevit, aliis deinde parere indigne ferret. Ex quo nam tempore summam Pompejus potestatem affectavit? Certe postquam diutinis, ac non intermissis honoribus functus est, maxime vero ubi in mare, qua late patet, imperium adversus piratas datum. Non ne Cæsar post longum imperium Proconsulare, per venit tandem ad supremum auctoritatis fastigium? Jure igitur merito in bene constituta Aristocratia, vel Democratia nullus Magistratus perpetuus est: & si quando summam rerum uni demandari necesse sit, ea intra perbreve temporis spatium coercetur. Sic Romæ nonnisi per annum consulare imperium dabatur, & ad Dictaturam gerendam semestris tempus statutum.

§. II.

*De Mario, & Sylla.*

**P**ROditis jam vicissitudinum Rerumpublicarum causis, ad aperienda nunc Romanæ Monarchiæ primordia per historiam Marii & Syllæ, Cæsaris & Pompei, Augusti demum & Antonii accedamus. Si enim singulæ quæque res ex suis causis gignuntur, atque his præcognitis facile illæ compertæ exploratæque fient; hinc sane lector intelliget, cur a Mario, & Sylla Monarchiæ Romanæ repetenda sint initia. Et quidem quum sub his Reipublicæ status maxime turbatus esset, eo adducta res est, ut imperium Romanum omnino corrueret, nisi in novam formam per maximam mutationem converteretur. Inter enim tam infensas, infestaque

Z

que

que Patriciorum, plebisque discordias, sæpe quidem veteratores subdoli que ingenii homines in medium prodibant, qui scenz servientes, his aut illis pro tempore studentes, sibi, ut dici solet, caneant, summamque rerum affectabant. Quamvis enim plebs, cui adeo cordi erat libertas, tam stulta non esset, nec Patres tam bardi, ut non viderent *tot honores uni collatos, immodicasque potestates concreditas animum cuiusque extollere atque corrumpere*; seditiones tamen illæ sæpius erumpentes Romanorum animos eo ferebant, *ut essent illis persimiles, qui tempestate jactantur: eodem enim modo uni, ac alii susque deque & in omnes partes arripiuntur, ac si quid eos vel minimum fefellerit, prorsus submerguntur* (a).

Itaque semper quidam cives infestis potentioribus, infirmioribus opem præstare assolebant. Sed eosdem deinde, postquam ad invidiæ gradum evexissent, odio prosequerentur: & quamquam factionum duces sæpe extincti jacerent, semper tamen ex iis nova monstra pullulabant, quæ iterum atque iterum quietem publicam labefactabant. Hinc incrementibus in dies turbis cædibusque, ac Civitate calamitatibus pene perditâ, ad supremum tandem excidium avertendum, necesse fuit summam dominationem uni concedi, *qui cuncta discordiis civilibus fessa sub nomine Principis accipiendo, imperium componeret*.

Cajum Marium in suburbio Arpinensi natum scripsit Plutarchus: qui quum parentes haberet admodum pauperes, non potuit sane in Urbem commigrare, ut moribus iis ab ineunte ætate institueretur, qui viro politico, & ad Rempublicam accedenti pares essent. Sed adulta tandem ætate Romam profectus, licet rusticitatem illam suam a se excutere non potuerit; subdit tamen idem Plutarchus, ex moribus suis eam nactum vitæ consuetudinem, quæ bellandi arti, & antiquæ Romanorum parsimoniz, ac vivendi frugalitati satis conveniret. Prima is contra Celtiberos, sub Scipione Africano Namantiam expugnante, meruit stipendia: quumque hoc in bello strenue se gessisset, ejus vires Scipio in dies validiores

res

(a) *Dion lib. 38.*

res expertus, summopere eum amabat, occasionesque undique commendandi captabat, quo majori semper animo ad virtutem incenderetur. Hinc interrogatus Scipio, qui nam Dux post sui fata Romanos regeret, respondit, Marium fore. Quod sane Scipionis effatum, veluti vox quædam emissa cælitus, ad spem maximarum rerum Marium extulit: quapropter satius duxit ad Rempublicam accedere, quam continuis, ac non intermissis stipendiis bellis adesse. Petiit igitur, obtinuitque favente Marcello plebis Tribunatum: sed dum Tribunus erat, totus in hoc fuit, ut plebem foveret, rebusque novis sibi alliceret, quo majorem nancisceretur dominationem. Id enim tunc in more erat, ut inter turbas callidi, atque ambitiosi homines vel Senatum, vel plebem colerent, prout cujusque partes magis vigerent, ad imperium sibi conciliandum. Itaque Marius quum videret plebem tunc temporis viribus Patricios superare, illius auram sibi captare viribus omnibus adnissus est, maxime vero legibus illis perlatis, quæ Senatus magis magisque imminuerent potestatem.

Igitur ante omnia legem illam rogavit, qua comitia ex centuriatis Tributa fierent, ut scilicet Senatus, & Patriciorum auctoritatem funditus everteret, viresque novæ plebi adderentur. Sed quum per hanc immutationem plebs in rebus maximis dirimendis semper superior discederet, quippe cujus suffragia patriciorum, ac divitum numerum superaret, ea lex merito a Senatu rejecta fuit. Tum Marius Senatum ingressus, ac Consulem Cottam dissentientem in carcerem rapi jubens, tantum metum ceteris injecit, ut voti tandem campos fieret. Quod sane audax facinus, sicuti plebs gratiam maximam, ita odium summum Patrum ei peperit: quod ut partem saltem leniret, roganti alii Tribuno, ut plebi frumentum gratis tribueretur, acerrime in Senatus gratiam adversatus est, ut videretur non partium, sed Reipublicæ utilitatis esse propugnator. Post Tribunatum creatus fuit Ædilis, deinde Prætor: quo munere functus, forte ulteriorem Hispaniam obtinuit, quam quidem latronibus refertam repurgavit. Romam reversus adhuc in Republica versari studebat, sed is erat, cui nec eloquentiæ vis, nec facultatum

que Patriciorum, plebisque discordias, sæpe quidem veteratores subdoli que ingenii homines in medium prodibant, qui scenz servientes, his aut illis pro tempore studentes, sibi, ut dici solet, canebant, summamque rerum affectabant. Quamvis enim plebs, cui adeo cordi erat libertas, tam stulta non esset, nec Patres tam bardi, ut non viderent *tot honores uni collatos, immodicasque potestates concreditas animum cuiusque extollere atque corrumpere*; seditiones tamen illæ sæpius erumpentes Romanorum animos eo ferebant, ut essent illis *persimiles, qui tempestate jactantur: eodem enim modo uni, ac alii susque deque & in omnes partes arripiuntur, ac si quid eos vel minimum fefellerit, prorsus submerguntur* (a).

Itaque semper quidam cives infesti potentioribus, infirmioribus opem præstare assolebant. Sed eosdem deinde, postquam ad invidiæ gradum evexissent, odio prosequerantur: & quamquam factionum duces sæpe extincti jacerent, semper tamen ex iis nova monstra pullulabant, quæ iterum atque iterum quietem publicam labefactabant. Hinc incrementibus in dies turbis cædibusque, ac Civitate calamitatibus pene perditâ, ad supremum tandem excidium avertendum, necesse fuit summam dominationem uni concedi, *qui cuncta discordiis civilibus fessa sub nomine Principis accipiendo, imperium componeret*.

Cajum Marium in suburbio Arpinensi natum scripsit Plutarchus: qui quum parentes haberet admodum pauperes, non potuit sane in Urbem commigrare, ut moribus iis ab ineunte ætate institueretur, qui viro politico, & ad Rempublicam accedenti pares essent. Sed adulta tandem ætate Romam profectus, licet rusticitatem illam suam a se excutere non potuerit; subdit tamen idem Plutarchus, ex moribus suis eam nactum vitæ consuetudinem, quæ bellandi artî, & antiquæ Romanorum parsimoniæ, ac vivendi frugalitati satis conveniret. Prima is contra Celtiberos, sub Scipione Africano Namantiam expugnante, meruit stipendia: quumque hoc in bello strenue se gessisset, ejus viros Scipio in dies validiores

(a) *Dion lib. 38.*

res expertus, summopere eum amabat, occasionesque undique commendandi captabat, quo majori semper animo ad virtutem incenderetur. Hinc interrogatus Scipio, qui nam Dux post sui fata Romanos regeret, respondit, Marium fore. Quod sane Scipionis effatum, veluti vox quædam emissa cælitus, ad spem maximarum rerum Marium extulit: quapropter satius duxit ad Rempublicam accedere, quam continuis, ac non intermissis stipendiis bellis adesse. Petiit igitur, obtinuitque favente Marcello plebis Tribunatum: sed dum Tribunus erat, totus in hoc fuit, ut plebem foveret, rebusque novis sibi alliceret, quo majorem nancisceretur dominationem. Id enim tunc in more erat, ut inter turbas callidi, atque ambitiosi homines vel Senatum, vel plebem colerent, prout cujusque partes magis vigerent, ad imperium sibi conciliandum. Itaque Marius quum videret plebem tunc temporis viribus Patricios superare, illius auram sibi captare viribus omnibus adnissus est, maxime vero legibus illis perlatis, quæ Senatus magis magisque imminuerent potestatem.

Igitur ante omnia legem illam rogavit, qua comitia ex centuriatis Tributa fierent, ut scilicet Senatus, & Patriciorum auctoritatem funditus everteret, viresque novæ plebi adderentur. Sed quum per hanc immutationem plebs in rebus maximis dirimendis semper superior discederet, quippe cujus suffragia patriciorum, ac divitum numerum superaret, ea lex merito a Senatu rejecta fuit. Tum Marius Senatum ingressus, ac Consulem Cottam dissentientem in carcerem rapi jubens, tantum metum ceteris iniecit, ut voti tandem campos fieret. Quod sane audax facinus, sicuti plebis gratiam maximam, ita odium summum Patrum ei peperit: quod ut partem saltem leniret, roganti alii Tribuno, ut plebi frumentum gratis tribueretur, acerrime in Senatus gratiam adversatus est, ut videretur non partium, sed Reipublicæ utilitatis esse propugnator. Post Tribunatum creatus fuit Ædilis, deinde Prætor: quo munere functus, forte ulteriorem Hispaniam obtinuit, quam quidem latronibus refertam repurgavit. Romam reversus adhuc in Republica versari studebat, sed is erat, cui nec eloquentiæ vis, nec facultatum

copia, per quæ ad civilia munera aditus erat, præsto erant. At vero Romani antiquam ejus vivendi rationem, atque in laboribus bellicis patientiam, atque strenuitatem admirantes, & præ his miram illam morum dexteritatem, quæ plebis studia callide fovebat, auctoritate eum, atque honoribus cumularunt. Ex quo profecto factum est, ut ingentibus deinde affluens divitiis, quietem publicam modis omnibus interturbaret.

Quum Cælius Metellus jussus esset bello Jugurtham persequi, Marium sibi in Africam legatum adduxit. Marius autem occasionem nactus nomini suo gloriam parandi, omnibus in rebus præclarum sui spectaculum præbuit. Nullum eum deterruit discrimen, nullus labor, ut hostem vinceret, defatigavit: patientia, frugalitate cum militibus certavit, eosque adeo sibi devinxit, ut plaudentibus iisdem magni Imperatoris famam fuerit assequutus. His gestis, eoque nomine elatus, Romam se contulit ad petendum Consulatum; cujus per plebis favorem compos factus, Imperator adversus Jugurtham missus est. Quod sane adeo Metellum afflixit, ut is per Turpiliū exercitum traderet, graviter questus, quod post improbos a se exantlatos in eo bello labores, omnem Marius præriperet fructum. Sed haud diu perstitit querimoniæ causa, quum in Marium assequutus sit Sylla, quod Marius ipse in Metellum conatus fuerat. Jugurtha enim, fractis opibus suis, ad Boccum Mauritaniae Regem confugit; qui deinde veritus, ne Romana in se verterentur arma, eum prodidit, Syllæque, qui tunc erat Marii quæstor, honoris causa tradidit, quippe cui maxima familiaritate junctus erat, quum ab eo quamplurimis beneficiis eo in bello affectus esset. Tradito igitur Syllæ Jugurtha, ab eo deinde ad Marium perductus est, & tanto illi honori id habitum est, ut Bocchi Regis effigiem sibi Jugurtham tradentis fieri, ut gloriam rei tam præclare gestæ Mario eriperet, curaverit. Ex quo sane ea huic adversus Syllam creata est invidia, ut in partes discissis civibus, acerbæ excitata fuerint inter eosdem dissidia, quæ Rempublicam maximopere vexarunt.

Sed exorto in tempore Teutonorum, Cimbrorumque bel-



bello, aliquantulum indignatio ac studia deferbuerunt. Hæc enim Barbarorum colluvies nunquam antea visa, agrorum suorum sterilitatis, & squaloris pertæsa, atque huc illuc, ut felicius cælum suspiraret, pervagata; tandem pulcherrimam Italiam, ut ejus potiretur, furiosè invasit. Hinc Romani eo derepente metu incussi, ut Rempublicam cito interituram existimarint. Indicto itaque bello, Marium Consulem crearunt. Sed mirum profecto quantam is in hoc bello virtutem ostentavit. Ea enim animi præstantia periculis omnibus se objecit, ea prudentia aciem instruebat, sic demum sapienter cuncta moderatus est, ut hostes prostraverit, profligaveritque, adeo ut illi omni amissa spe, ab Italia tandem fugerint, atque ad pristinas sedes remeaverint. Meum non est hic singula quæquæ Marii gesta exponere, sed ea tantum cursim perstringere, quæ ad leges Romanorum intelligendas faciunt. Quare porro pergamus. Altero Consulatu victoriis elatus Marius, quo plebem magis sibi alliceret, dictitare solebat, nihil sibi jucundius, quam Senatus potentiam minuere; atque huc tantum per honores sibi collatos animum intendere. Sed Cimbrici adhuc belli perstante metu, ad quintum pervenerat Consulatum, & nihilominus sextum petebat ambiebatque, cujus ut fieret compos, omnibus illis peregrinis atque exteris, quos milites asciverat, jus Civitatis dedit, in speciem remunerationis, & officiorum in Rempublicam vicissitudinem; sed revera ut multitudo hæc suffragia sibi augeret. Hinc de Civitate hac tam large contra jus exteris donata accusatus, fertur dixisse: *Armatus ut leges cogitem?* Verum hic præter rem non est Romanorum imperitiam admirari, quos sane sæpius iterato Consulatus honore, ac nulla fere intermissione, Marium exornare pertæsum haud fuit. Fuerat quidè & Valerius Corvinus iterum Consul. Sed inter priorem, & alterum Consulatum quadraginta quinque intercefferant anni. At vero Marius, vix duobus elapsis annis, ad secundum, nec ulla deinde facta intercapedine, ad sextum Consulatum pervenit. Quod sane contra Rempublicam esse nemo non videt: nam qui diu cum potestate & imperio fuit, ad privatam vitam, atque otium ignobile haud facile remigrabit. Sed historiam prosequamur.

Dum.

Dum Marius sextum Consulatum gerebat, quo magis in diem plebis gratiam aucuparetur, per seditiosum Tribunal Saturninum, qui cæde Numii Tribunalum per vim extorserat, legem Agrariam, civilium motuum segetem focundissimam, rogandam curavit. Sed ut nova semper Senatum inter & plebem discordiarum femina jactaret, auctor ante omnia fuit Saturnino, ut cogeret Patres ad jurandum in eam legem, quam populus jusserit. Cui tamen, licet is primus fuerit, qui, dolose quamvis in Senatu obstiterit, vix tamen agraria in comitiis lata, idem præ omnibus studiosissime assensus est, scilicet eorum oblitus, quæ in Senatu paullo ante admissus fuerat, quum dolum & mendacium, dum e re sua esset, virtutem magis, quam vitium putaret. Itaque lege per vim & metum perlata, non obistente Senatu, ne civilis seditio oriretur, Metellus unus inventus est, vir satis probus, & vetustæ libertatis tenacissimus, qui in eam renuit jurare, & quamquam enixe a Patribus urgeretur, ut tempori, & loco, seu potius necessitati inserviret, numquam tamen ejus mentem a proposito dimovere potuerunt; adeo ut aqua tandem, & igni a Populo interdictus fuerit. Metellus igitur, qua pollebat prudentia, morumque honestate, ratus si obniteretur, Rempublicam periclitaturam, æquo animo in exilium profectus est, pollicitus se Romam rediturum, quum civilibus defessa malis, aliquando quiesceret; sin minus, præstare sibi abesse, quam in Urbe tot civilibus quassata motibus versari. Num autem tot inter discordiarum fluctus diu res Romana perstare poterat? Certe quidem acerrimæ istæ Senatum inter & plebem dissensiones eo rem adducebant, ut undique vexata, nusquam spes, nisi in Monarchiam, veluti tutissimum portum, paratumque perfugium, se reciperet.

## §. III.

*De Cornelio Sylla.*

**V**idimus Marium per plebis gratiam ad dignitatis auctoritatisque fastigium evehctum: videamus nunc Syllam  
fa-

favore Patriciorum honoribus omnibus cumulatum, adeo ut Marii potentiam æmulatus sit, ac tandem infregerit. Lucius Cornelius Sylla licet patricii Consularisque generis esset, quam inter ejus majores Rufus Consul fuisset, a pauperrimis tamen parentibus ortus est, unde objectum illud, nequaquam bene moratum dicendum, quando bonorum paternorum inops tot bona divitiasque coacervasset. Sed hanc hujus familiæ paupertatis causam vetusti Scriptores tradidere, quod nempe Rufus Consul ejectus a Senatu fuerit, quia lege obfistente, decem libras argenti concavi possideret, ex quo sane eo inopiæ pervenit, ut usque ad Syllam ejus progenies egentissima esset. Sed Sylla hæres deinde a pellice Nicopoli relictus, atque ab Avia materna ea sibi bona paravit, quæ satis essent, ut ad civiles honores accederet. Hinc quæstor datus Mario in bello Jugurtino tot tantisque beneficiis Boccum sibi devinxit, ut ei magis quam Mario, ut superius diximus, Jugurtham tradiderit. Sed postquam in Capitolio, dum Marius triumphum ageret, inter viginti quatuor statuas posita illa fuit, quæ Boccum præferebat Jugurtham hostem Syllæ tradentem, adeo inter eum, & Marium acerbum infestumque odium incensum est, ut ab eo usque tempore in civile bellum erupissent, nisi Cimbrica arma, de quibus dictum est, & Socialis tumultus, de quo nunc dicendum est, eos deterruisset.

Hoc bellum illud est, quod Marii nomen, tot superatis ante hostibus, imminuit, Syllæ vero mire auxit, quod sane juvat animadvertere. Marius annis laboribusque confectus nihil hoc in bello, quod virtute sua dignum esset, adniscus est. Metuens enim, ne res ante præclare gestas, partamque sibi gloriam in discrimen poneret, potius se defendendo, quam hostes feriendo pugnabat, ostenditque per id verissimum esse, Virtutem bellicam vigore pariter ac viribus indigere. Contra Sylla juvenili æstu impellente, nullum exhorrescebat periculum, labori nulli parcebat, ut hostes profligaret. Res ei feliciter cessit: hostem enim debellavit prostravitque. Ex quo profecto factum est, ut victoria hæc non Mario, qui Consul erat, sed Syllæ ejus legato vulgo referretur accepta.

Lau-

Laudibus his incensus ad petendos Magistratus accessit . Sed præturam petens voti compos minime factus plebe in Marii gratiam ex adverso obnitente ; vidit igitur se non nisi senatu favente posse in Republica dignitate crescere . Quare quid mirum , si Populi deinceps minuere potentiam , senatusque auctoritatem jam afflictam attollere pro virili conatus fuerit ? Itaque animi tunc indignationem arte dissimulans , atque apertius in tempus differens , ita se gerebat , ut secum ipse discors videretur : rapere enim multa , largiri plura , honoribus afficere indignos , violenter agere , colere quorumcumque indigeret opera , ludibrio habere supplices , levibusque ex causis aliquando mulctare , rursus acerbissimas injurias æquo animo ferre , maximis criminibus indulgentiam largiri solebat , ut dubitaveris sane contemptoris ne an assentatoris præferret ingenium : quod satis evincitur ex duobus , quæ insignia quidem in hoc sociali bello acciderunt . Saxis Albinum Prætorium virum milites in exercitu suo interemerunt , is autem tantam injuriam dissimulans caussatus alacres spiritus , quibus in bello sui mire æstuabant ; subditque veniam indulgentissime daturum , si majori deinceps strenuitate pugnarent . Deinde quum Nonius , & Servius a se Populo maxime commendati repulsam in comitiis retulissent , exclamavit se gloriari , quod Populus in ferendis suffragiis neminem timeret . Vide hominis vaferrimi calliditatem , ejusdem ingenii varietatem ad captandum per miras artes dominatum si fors arrideret . Sed cetera persequamur , quæ instituto nostro magis apta sunt .

Exorto jam bello Mitridatico , uterque Marius , & Sylla imperium anhelabant , videbant enim non solum nominis præclaram famam ex hoc bello , si res feliciter cessisset , sibi conciliaturos , sed opes potissimum ingentes inde allaturos , quibus per plebis militumque favorem ad supremam in Republica potestatem assurgerent . Attamen quia Marius majori vi pollebat per blanditias plebem perque metum senatum adegit , ut belli hujus imperium sibi mandaretur . Hac de causa Sylla maximopere indignatus Nola , ubi morabatur , discessit , militesque suos in urbem immisit . Hinc Marius urbem cædibus ,

ca-

calamitatibusque implet, Syllæ bona diripit, domum comburit, ejusque amicos prope omnes interficit. Ex adverso non minora mala Syllani milites, postquam Urbem advenire, in Marium, ejusque affectas intulerunt. Ex quo sane pestifero bello civili tot cædes undique percrebuere, tot incendia, ut extrema pati Urbs videretur. Sed a Sylla fortuna fuit: is enim Marium vicit, ejusque factionem oppressit. Itaque aqua, & igni Marius interdictus, ut mortem effugeret confestim ab Urbe discessit. Interim Syllæ in Mithridatem imperium demandatum; cujus causa quum ab Urbe proficisceretur, e re sua duxit Consulem creare, qui plebi bene esset acceptus, ut ejus in se odium aliquantulum teneret, atque ab amore Marii averteret. Cinna igitur viro maxime populari, Consule creato, eum jurejurando adegit, ne rebus suis obesset. Sed improborum hominum quam dubia fides sit, experientia rerum magistra satis perdocet. Statim enim ac Sylla ab Urbe discessit, Consul rebus magis suis, quam alienis studere visus est. Quare Marius cum eodem veluti foedus faciens, milites suos ei tradidit, unde civilis discordia denuo exarsit. Videns igitur Sylla auctoritatem suam tot laboribus partam, si diutius ab Urbe abesset, per Cinnam afflictum iri, bellum Mithridaticum, percusso foedere, componere satius duxit, quam armorum vi Regem illum profligare. Quare quam is Romam rediret, sat constat, quot cædes perpetraverit, quantoque furore civium bona diripuerit. Inventa illa crudelissima Proscriptione, nulli mortalium pepercit, neque parentibus, neque filiis, neque hospitibus, aut amicis. Quumque horum malorum haud esset finis, neque proscriptorum numerus determinaretur, cuidam roganti, ut publicæ calamitati modus imponeretur, hæc respondisse fertur: *Se proscribere quos memoria tenuisse contigit; eos vero, quos in præsentia delet oblivio, denuo proscripturnum.* Hinc quum in ipsam Urbem quotidie novo semper furore insæviret, Plebi, Senatui, omnibusque metum summum injiciens, ab iisdem Dictaturam illam extorsit, qua tamdiu sane uteretur, donec pristinam quietem repararet. His igitur de historia Marii, & Syllæ delibatis, iisque potius, quæ instituto tantum meo inserviunt, enarratis,

A a

ad

ad eorundem leges, suo cujusque regimini accomodatas, explicandas accedamus.

## §. IV.

*De legibus Marii, & Syllæ.*

**E**X descripta jam Marii, & Syllæ historia compertum arbitror, quod regimen uterque, suis quisque rebus accomodatum, statuere voluerit. Et quidem quum Marius plebe favente, auctoritatem nactus esset, illam regiminis formam in Rempubli- cam inducere studuit, quæ magis ad plebis gratiam sibi captandam apta esset, nempe Democratiam mere popularem. Hinc Senatus imminuta potestate, eas rogavit leges, quæ Aristocratiam everterent. Ex adverso Sylla, quum nulla sibi spes in plebe esset, cujus studium omne erga Marium erat, e re sua existimavit Senatum colere, ejusque per Marii conatum imminutam dignitatem reparare, ut ejus gratia hujusmodi beneficiis parva rebus consuleret suis. Itaque Aristocraticam denuo formam instaurare, adeoque leges ei respondentes condere omnes suos nervos intendit. Sed præter hæc quum omnia frustra essent, nisi tranquillitas adeo turbata restitueretur; hac de causa jura etiam illa dedit, quibus Urbis securitas deinde sacra tecta foret; de quibus omnibus singulatim agendum est.

Satis perdocuerat a prisca memoria usus, Tribunos plebis dissentiones omnes in Republica excitasse, eosque semper nova molitos. Sane Aristoteles (a) Magistratus istiusmodi, qui Romæ Tribuni, alibi vocabantur Demagogi, pestes ait fuisse Civitatum, quippe qui nil aliud pensi habebant, quam dolose plebem ad novas res adducere, *Partim quidem eos, qui bona habent privatim, calumniantes, conspirare eos faciunt (communis namque metus & inimicissimos conciliat) partim vero plebem in eos publice incitantes. . . nam alias quidem, ut gratificentur, Principes injuria afficiendo concitant, vel bonis equan-*  
dis,

(a) *Lib. V. polit. cap. V.*

*dis, vel mercede muneribus publicis instituenda in vestigalibus: alias vero ut divitum bona publicare possint calumniando.* Quæ profecto omnia mala satis experta fuit Romana Respublica; quum ii præsertim, qui ad summum imperium adspirabant, quos inter fuit Marius, per has illecebras, Tribunis faventibus, plebem in Patricios incitarent.

Consultissime igitur Sylla ad infringendam Tribunorum potestatem legem tulit, ne Tribunis jus legum ferendarum esset, neve iisdem fas esset concionari ad Populum. Insuper eorum vetuit Intercessionem, impetravitque, ne ii Tribunatu defuncti civile munus capefferent, aut Senatores essent (a). Itaque Sylla Tribuniciam potestatem ad suam originem revocavit, nempe ad arcendam a plebe injuriam, abrogatis iis omnibus, quæ a Patribus, seditionibus ingravescentibus, olim per vim extorserant. Qua de re Cicero sic Syllam commendat (b): *Vebementer se probare Syllam, qui Tribunis plebis sua lege injuriæ faciendæ potestatem ademerit, auxilii ferendi reliquerit.* En igitur Senatui auctoritatem, cum imperio jam a plebe usurpato, restitutam. Ex adverso videre est Tribuniciam potestatem omnino labefactatam: nam quum Tribunis jus ademptum esset ferendi leges, concionandi ad Populum, intercessionibus utendi, procul sane metus erat, ne concionibus suis, scitisque turbas cierent, regimenque Urbis inverterent: prohibito autem quominus Tribunus nova dignitate exornaretur, factum est, ut contemptui esset hic Magistratus, nec quis majorum gentium eum optaret. Itaque Tribuni quum neque genere, neque auctoritate pollerent, qui novas res moliri poterant?

Quin etiam ad summam illam Populi potentiam infringendam legem condidit, ne mancipiis jus Civitatis amplius esset, utque iisdem adimerentur agri, quod testatur Cicero (c). Nam, ut viris politicis visum, nil magis ad movendas seditiones, atque ad plebis augendam potestatem in sus-

A a 2

fra-

(a) *Flor. lib. 3. Appian. lib. 1. de bello civil.*

(b) *De legib. lib. 3. cap. 9.*

(c) *Pro domo sua cap. 33.*

fragiis est, quam exteris Civitatis jus dare. Et quidem quum fieri nequeat, ut leges peculiares alicujus Civitatis ceteris omnibus congruant, quæ sane moribus ingenioque cujusque gentis aptæ esse debent; hinc eædem omnibus communes in dissentionem, & tumultus profecto erumpent. Hac de causa tunc præsertim in Romana Republica increbuisse motus legimus, quum Italiæ Civitas Romana data est. Neutiquam enim Romanæ gentis leges, ejusque politia poterat moribus totius Italiæ accomodari. Hinc, ut diximus, suscitatae sunt discordiæ, perque eas audacia plebis grassata est, auctaque potentia, quæ per dissensiones sane augefcit. Hinc ii, qui dominandi cupiditate flagrabant, toti erant in exteris civitate donandis: nihil enim facilius est, quam bonorum copia suffragia novorum Civium, eorumque a Republica plerumque dissentientium captare. Itaque Sylla Civitatem a Mario municipiis datam adimendo, suffragiorum numerum plebi ademit, illiusque potentiam minuendo, pristinam Senatui auctoritatem restituit.

His accedunt binæ illæ ejusdem<sup>1</sup> leges, quibus omnino pene concidit plebis potestas. Altera quidem, qua creandorum Sacerdotum jus a Populo ad eorundem, ut olim, collegia transtulit; altera vero qua judicia ab Ordine Equestri denuo Senatui reddita sunt. Et quidem neminem præterit, quantam vim apud Romanos Religio ad regimen civile haberet. Quum enim nulla apud eos res, nisi auspicato, fieret, mirum est quantum Romæ Sacerdotes possent; quippe qui de Cælo servando facta omnia infecta ad libidinem faciebant. Hinc sane contentiones illæ acerrimæ inter plebem, & patres, ut sacrorum potestatis & ipsa particeps fieret. Neque minoris pretii erant publica Judicia, idque sane mirifice ostendit prima Prætorum institutio. Etenim quum plebs a Patribus conatibus omnibus Consulatum tandem extorsisset, nempe ut Consulum Patricius alter, alter vero plebejus esset; nihil illis ad reparandam Senatus afflictam auctoritatem præsentius visum est, quam ex Patriciorum ordine Prætorem creari, qui, quod olim Consulum munus erat, jus redderet. Hinc Sempronius Gracchus, quum plebis vellet augere auctoritatem, hoc sane ad rem



rem appositissimum existimavit, judicia scilicet a Senatu ad ordinem Equestrem transferre. Quo quidem per Grachorum seditiones constituto, adnisi deinde Patres, ut saltem ex Senatorio ordine æque, ac Equestri iudices legerentur. Quare Drusi Tribuni gratiam ineuntes, legem hanc per eundem rogari obtinuerunt, ut ex æquo judicia *penes Senatum, & Equestrem Ordinem essent; ex Equestri Ordine trecenti ad Senatorum numerum adderentur; singulique Senatores sibi quemquam Senatorem Equitem legerent, atque ex his omnibus in posterum decuriæ Judicum legerentur* (a). Igitur quum Sylla judicia restituisset Patribus, apparet profecto Populi potestati maxime detractum, Senatusque auctoritatem per eundem mire auctam.

Ex quibus omnibus ratio proditur, cur bene multæ a Sylla de iudiciorum ordine leges latæ sint; quis nempe, quaque ætate iudex esse possit; quinam vel contententium alteri infensus, vel sanguine junctus, vel beneficiis obstrictus, ut suspectus habeatur, iudicandique potestate cadat: ne scilicet judicia, quæ publicæ tantum tranquillitati inserviunt, privati commercium evadant. Palam etiam hinc fiet, qua de causâ Quæstiones perpetuas constituerit, nempe de parricidiis, de sicariis, de falso, aliisque. Quum enim, ut diximus, judicia ab Ordine Equestri Senatus restituisset, par æquumque eidem visum, illorum formam præscribere, ordinemque statuere, ut in omnibus sapienter se gessisse videretur. Sed de Quæstionibus perpetuis diligentius est inquirendum, quam ex interpretibus pernoverim neminem, qui earumdem causas vestigare curaverit, cur nempe Sylla, vetusto more abrogato, quo ad plectendum criminis reum Populus iudicem quæstionis creabat, voluerit his quæstionibus dirimendis proprios peculiareque quolibet anno Prætores constitui. Est enim vero id aliquantulum obscurum, nisi ex vetusta Romanorum iudiciorum ratione aliqua, quæ hic opus sunt, repetamus.

Reges olim de criminibus cognovisse, compertum est omnibus; iisque exactis, ad Consules ea judicia translata docet

(a) *Appian. lib. 1.*

cet Livius, qui Brutum Consulem filii perduellionem judicasse scribit. Sed sub Valerio Poplicola consuetudo alia inventa est. Quum enim is legem illam de provocatione ad populum adversus magistratus tulisset, factum deinde, ut publicis quaestionibus præessent, quos Populus præesse juberet; eosque, quia rerum capitalium causis creabantur, appellatos *Quæstores parri-cidii* Festus tradit. Hinc patrato crimine, usus fori erat, ut per Senatus decretum Tribuni de eo ad Populum referrent, hac formula a Livio nobis tradita (a): *Velitis, jubeatis, quaeratur quæ pecunia capta, ablata, coacta ab Rege Antiocho est, quique sub ejus imperio fuerunt: quod ejus in publicum relatum non est, uti de ea re Ser. Sulpicius Prætor Urbanus ad Senatum referat; quem eam rem Senatus velit quaerere de iis, qui Prætores nunc sunt?* Itaque plebe suffragante vel Dictatori, vel Consuli, vel Prætori mandabatur a Senatu, ut de crimine jus diceret. Ex quo sane patet, cur jus animadvertendi in facinorosos homines *merum imperium* appellatum sit: non enim id ex vi ordinariæ potestatis exercebatur, neque cum jurisdictione conjunctum est; quum Magistratui, cui jam ordinaria potestas concessa erat, pro tempore mandaretur. Huic Quæstor, sive Dictator, sive Consul, sive Prætor esset, Judices assidebant, qui initio ex ordine Senatorio legebantur, deinde ex Equestri lege Sempronia, postmodum vero ex tribus ordinibus, nempe Senatorio, Equestri, & Plebejo, ex lege Plautia Silvana. Porro autem Sylla quum Equestrem, ac Plebejum a judiciis submovisset, id quoque e re sua existimavit, vetustam consuetudinem de criminibus vindicandis immutare, tum ut istiusmodi judiciis soli Patricii præessent, tum etiam ne antiquæ libertatis, cujus gratia in criminibus ex Poplicolæ institutione ad Populum provocabatur, maneret vestigium. Itaque ille quum instituisset quaestiones perpetuas, certos nempe Prætores, qui de criminibus judicarent; opus amplius non erat referri ad Populum, ut Quæstores infligendæ poenæ darentur. Hæc profecto causa fuit perpetuarum quaestionum, quum uno eodemque tem-

(a) *Lib. 38. cap. 34.*

tempore, anno scilicet sexcentesimo septuagesimo secundo utraque lex perlata sit, & de judiciis, & de quæstionibus perpetuis, quæ adeo se invicem amplectuntur, ut altera sine altera coherere nequeat.

Posteaquam Sylla plebis labefactavit auctoritatem, bona etiam illius imminuere studuit. Quare leges agrarias abrogavit, invexitque pessimum illud proscriptionis exemplum, quo in vitam, ac libertatem civium debaccharetur: qua de causa exclamavit Parterculus (a): *Primus ille, & usinam ultimus exemplum proscriptionis invenit*. Sic enim plebe & potestate, & bonis exuta, minime deinceps eandem adfurgere ratus est. His peractis, animadvertit, ex nimia auctoritate in Senatum collata, facile posse quem caput attollere, & Principatum intercipere, quem ipse sibi parare studebat: pervulgatum quippe Politicorum hominum effatum est, non adeo Aristocratiam extollendam, ut ratio nulla plebis, vel medii ordinis habeatur; quum ex hoc facile fiat, ut vel plebs ob contemptum seditiones cieat, quibus Respublica ex Aristocratia in Democratiam concidat; vel Patrum quis dignitate, & superbia elatus Monarchiam affectet. Quapropter merito hæc scripsit Aristoteles (b): *Multa Oligarchiæ ab iis, qui in Republica indigne ferant, sunt eversa, ea quoque de causa, quod nimis essent beriles, ut Oligarchia Gnidia, & Chia*. Quæ sane causa fuit, quapropter & insequentibus leges Sylla condiderit.

Majestatis crimine teneri voluit, si quis injussu Populi, aut Senatus exercitum duceret, suæque sponte bellum gereret: satis enim ipse expertus erat, se potestatem nactum, quia injussu Senatus exercitum contra Marium habuerat. Cavit etiam, *Ne quis Præturam, neque Consulatum ante Præturam, neve eundem Magistratum, nisi interjecto decennio gereret* (c). Nam viderat diuturnos honores, sine intermissione uni conceditos, magnam vim habere ad supremum dominatum, ut procul dubio in Mario contigit. Demum statuit, ut ii, quibus

(a) 2. 28.

(b) *Politic. lib. V. cap. 6.*

(c) *Appian. lib. 1.*

bus post Magistratum ex S. C. imperium esset prorogatum, illud non minori jure, quam proconsulari, donec in Urbem revertissent, tenerent, etsi lex curiata non esset lata; utque Magistratibus triginta dies ad decedendum e Provincia præstituti essent (a). Atque hæ sunt Syllæ leges, ne ex Patriciis quis ad dominatum supremum in illa tam effreni Aristocratia assurgeret.

Itaque concisa Populi potentia, Senatusque reparata pristina auctoritate, reliquum erat, ut publicæ quieti tot tantisque turbis vexatæ tandem consuleret. Primum omnium, ut supra diximus, quæstiones perpetuas de maleficiis instituit, quas meum non est exponere, quum id vulgo ab interpretibus satis peractum sit, quos consule. Nolim tamen prætermittere, non ideo has quæstiones fuisse a Sylla institutas, quasi antea istiusmodi flagitia poenarum effugerent severitatem; sed quia Urbe dudum civilibus discordiis turbata, atque foro per triennium sub Cinna silente, criminum licentia eo increbuerat, ut jus prope oblitteratum videretur. En quæ de his Cicero scripsit (b): *Lex Cornelia testamentaria, nummaria, ceteræ complures, in quibus non jus aliquod novum in Populum constituitur, sed sancitur, ut quod semper malum facinus fuerit, ejus quæstio ad Prætorum pertineret ex certo tempore. Velim etiam advertas, poenam legis Corneliæ, sive Majestatis, sive de parricidiis, sive de falso, interdictionem aqua, & igni fuisse, idque attendendum, ne in errorem quem inducat Tribonianus, affirmans, hoc genus criminum esse amissionem animæ, & memoriæ damnationem. Et quidem hoc erat in more Principibus, ut in antiquis legibus instaurandis prisca poena servaretur; & si quando asperiori sententia opus esset, eam sic adjicerent, quasi ab ipsamet vetusta lege irrogatam.*

Syllanarum legum expositioni finem facere statueram: sed quoniam in facinorosorum crimina incidimus, & locus insignis de torquendis reis hic occurrit, de eo quædam brevi differere non pigebit, maxime vero, quia ab hodierno fori usu

(a) Cic. lib. 1. epis. 9.

(b) In Verrem.

usu sævities isthæc adhuc non exulat. Istiusmodi per tormenta quæstionem, ad veritatem in criminibus eruendam, a Sylla primum inventam, nos minime sinit dubitare Cicero. Hic enim quum in oratione pro C. Rabirio eam memoret, quæ sane fuit anno sexcentesimo nonagesimo habita, antequam scilicet Cæsar ad supremum potestatis fastigium attolleretur; manifeste docet, non aliunde tam immanis probationis originem, quam a Cornelio Sylla repetendam. Præ omnibus pernosse nostra refert, an torquendi reos consuetudo æquus modus sit, atque, ut jactant, compendiarius ad veritatem indagandam. Sane si nostri Pragmatici historiæ Romanæ rudimenta saltem primoribus labris degustassent, vix, aut ne vix quidem tormenta aptum vestigandæ veritatis modum credidissent, quum inde satis intelligerent, a quo illa inventa fuerint, & quorsum intenta.

Videamus, quæso, quid de iis Cicero in oratione pro Sylla sentiat (a). *Quæstiones (ait) nobis servorum, ac tormenta accusator minitatur: in quibus quamquam nil periculi suspicamur, tamen illa tormenta gubernat dolor, moderatur natura, cujusque tum animi, tum corporis, regit quæsitior, flectit libido, corrumpit spes, infirmat metus; ut in tot rerum angustiis nihil veritati loci relinquatur.* Quid quæras amplius? Sed ne putes eum sic loquutum, ut caussæ inserviret, ex his advertas, quam pessime Sylla de libertate Romana meritis sit. Veritum etenim ab usque Valerio Poplicola, ne cives verberarentur; jusque præcipuum civis erat, ut esset immunis a verberibus: quod si morte naturali, vel civili puniendus reus esset, fingeant, priusquam poena infligeretur, servum poenæ esse, ut in eum non tamquam civem, sed veluti servum poena caderet. Vide igitur hominis ingenium, qui Cives uti servos habuit; ex adverso milites, qui forte ab hostibus caperentur, quum revera servi essent, liberos finxit, perlata lege, ut eorundem testamenta rata essent, quasi si mortui Romæ fuissent, antequam in hostium manus incidissent. Sane militari opera indigebat Sylla, cujus ope in dominatione esset. Proditæ igitur

B b

ra-

(a) Cap. 28.

ratione fictionis legis Corneliæ, porro rem persequamur.

Præ omnibus rationibus ex ipsa re petitis, propemodum est iniquus æque, ac fallax veritatis inquirendæ modus Quæstio. Et quidem, quod spectat ejus iniquitatem, abhorret prorsus a naturali æquitate, quemquam cruciari antequam constet nocentem esse: quum plerumque judex torqueri reum jubeat, quando non adhuc ei exploratum est, an ille reus sit, nec ne. At vero Pragmatici ipsi uno ore fatentur omnes, *In pœnalibus probationes luce ipsa meridiana clariores esse debere*. Qui ergo hic pœna infligitur, quum adhuc, an peccatum sit, nescitur? Si autem tentamenti levitatem inspiciamus, quem later, gladiatoriam corporis firmitatem maxime inter tormenta ipsa ad mendacium prodesse, infirmitatem autem obeffe veritati? Cur ad inquirendam veritatem modus adhibetur, qui non tam in potestate Judicis, quam carnificis sit? Non ne is etiam, spectante judice, omnibus illudens omnia pervertit, & pecuniæ inserviens, eos quidem, unde nihil sperat, acerbe cruciat, cum aliis vero, a quibus lucelli aliquid expectat, mitius agit? Ad hæc postquam inter tormentorum cruciatus consistentem reum peregeris, persuasum ne tibi erit, nocentem damnassee? Anceps profecto adhuc est, an crimen patrauerit, qui verberum, & cruciamentorum metu confessus fuerit. Videas hinc quam parce prudentes Judices quæstionibus per tormenta uti debeant, quando & per se parum æquæ sunt, & eruendæ veritatis fallacissimæ censeantur rationes. Unde jure merito sic ait Cicero: *Misera est ignominia judiciorum publicorum, misera mulatio bonorum, miserum exilium: sed tamen in omni calamitate retinetur aliquod vestigium libertatis: mors denique si proponatur, in libertate moriamur: carnifex vero, & obductio capitis, & nomen ipsum crucis absit non modo a corpore civium Romanorum, sed etiam a cogitatione, oculis, auribus. Harum enim omnium rerum non solum eventus, atque perperessio, sed etiam conditio, expectatio, mensio ipsa denique indigna civis Romano, atque homine libero est.*

## §. II.

## CAPUT II.

*De progressu Romanæ Monarchiæ.*

## §. I.

*De Pompejo Crasso, & Cæsare.*

**J**ure merito Ixionis fabulam Poetæ inanis vanæque gloriæ cupidis aptarunt. Nam sicut ille Junonis inflammatus amore, dum eam amplecti putaret, vacuum nubem sub Junonis imaginem apprehendit, unde monstra Centauri orta sunt; ita & illi, qui futilem gloriam, externamque honorum speciem, quasi virtutis imaginem, persequuntur, nihil sincerum, nihil virtute dignum, nihil sibi consentiens nanciscuntur; sed affectibus variis involuti, modo has, modo illas turbas sectantes, in eundem incidunt scopulum, ad quem Sophoclis bubulci offendisse ingemebant, sic dicentes:

*Nam his servimus nos, domini sumus licet.*

*Estque auscultare necesse vel silentibus.*

Itaque in gerenda Republica, qui publico bono minus consulunt, sed sibi studentes, quo speciosam sibi dominationem pariant, ambitu, largitionibus, prehensionibusque gratiam captant, multorum fiunt servi, licet nomine tenus gloriosis titulis ornentur. Sed non ita vir probus ad rempublicam accedit: is enim non intus sibi, ut dici solet, canens, sed omnia ad communem intendens utilitatem, ex honoribus eam gloriam comparare studet, quatenus per eandem majorem fidem, & auctoritatem ad res gerendas nanciscatur. At quorsum hæc tam alto repetita principio? Scilicet ut ostendam, Duumviros illos Reipublicæ vultures, Cæsarem inquam, & Pompejum, qui tanta aviditate Rempublicam Romanam appetiverant, quum sibi magis consulissent, quam publicæ utilitati, non veram solidamque gloriam assequutos, sed ignominiam potius, ac infamiam tulisse: atque hac extorta dominatione, Republica quaque versus dilacerata, ignominiosam sibi tandem mortem comparasse. Atque id est, de quo mox dicendum.

Marianis opibus fractis, plebis potentia imminuta, Se-

natuſque auctoritate adaucta, fore ſperabat Sylla, ut procul in poſterum a Republica eſſent motus civiles. Sed contra accidit: vix enim is è vivis eſt ſublatus, quum turbæ, diſcordiæque recrudeſcere viſæ ſunt; atque adeo increbuerunt, ut publica quies non niſi ſub Auguſto tandem reſtituta fuerit. Et quidem quum Sylla Dictaturam perpetuam arripuiſſet, licet deinde ea ſe abdiçaſſet, peſſimum tamen reliquit exemplum, quo poſſe Rempublicam unius dominatui ſubjici, experientia perſpectum eſt. Hinc alii deinceps alia via graſſati, eo magis, quod per Ariſtocratiam ab eodem inſtitutam facilior ad dominationem pateret acceſſus: atque huc rem adduxere, ut ad publicam quietem comparandam, Monarchia tandem omnibus in voto eſſet. Tantum igitur abeſt ut Syllæ conſilia Reipublicæ proſpexerint, ut campum magis novis & acerbioribus diſſidiis, per formam a ſe inſtitutam, aperuerit.

Duo erant Syllæ hoſtes acerrimi, Marius junior alter, alter vero Papirius Carbo. Sed Marius poſt varias clades acceptas, fugam ex Italia arripuit, reſque ſuas videns deturbatas, quamplurimum adoleſcentium Romanorum ſanguine ad placandos patris manes crudeliter effuſo, ſeipſum tandem interemit. Papirius vero in Siciliam fugiens, atque a Pompejo victus, occiſus eſt, ejusque caput abſciſſum ad Syllam miſſum. Quod ſane adeo acceptum fuit ei, ut ampliſſimis deinde beneficiis Pompejum cumulare maxime admiſſus fuerit. Ecce tibi, unde Pompeji magni potentia exorta fuerit. Sed juvat hic videre, quas ille rationes inierit, quamque inſtiterit ſemitam, ut ad ſupremum prope dominatum aſſurgeret: quod quidem quum minime explicari poſſit, niſi rem per cauſas ſuas expendendo, det lector veniam, ut de his nonnulla differamus.

Quum Sylla triſtis exempli per Dictaturam perpetuam auctor fuerit, poſt ejus mortem non defuere, qui eundem imitari modis omnibus exoptarint. Marcus Lepidus Conſul toto conatu admiſus eſt, Marianam factionem propemodum labefactatam, in plebis gratiam denuo ſuſcitare. Sed quum ejus collega Catulus tum cauſa ſervandæ Reipublicæ, tum maxime memor, quod pater ejus Marii juſſu interfectus fue-



fuerat, strenue obstetisset, nova deinde dissidia, quæ misere infelicitèrque Urbem dilacerarunt, orta sunt. Auxerunt ea Piraticum bellum, & Sertorii defectio in Hispaniis, qui maximo studio, ac mira strenuitate partes Marianas sustinebat. Sed quum adversus eum injussu Senatus se contulisset Perpenna, deficientibus militibus se Sertorio dare coactus est: quare adjecto sibi Perpennæ exercitu, mirum quantum Sertorii vires increbuerint.

Adeo autem id-exterruit Senatum, ut a Pompejo salutem exposceret. Itaque eum Imperatorem legendum censuit, cujus ductu, atque auspiciis bellum cum contra Piratas, tum adversum Sertorium, cujus militarem peritiam, strenuumque robur sat superque pernoverat, susciperetur. Profectus igitur est ad Sertorii vires infringendas Pompejus, atque in Hispaniis tanta se animi præsentia gessit, ut inter tot fortunæ vicissitudines, modo victus, modo victor, tandem post improbos exantlatos labores, Sertorium debellarit. Hoc confecto bello, rediit Romam, ubi contra Piratas accepit imperium, & tantum quidem, ut ex Senatoribus quidam obstiterint, veriti ne tyrannidem ea auctoritate elatus appeteret. Enimvero jus ei, toto qua late patet mari, ad Herculis usque columnas, atque in terra per quadringenta stadia, datum est. Utque quotquot milites vellet, ad bellum cogeret, pecuniamque, quantam censeret opus esse, acciperet, neque ejus Senatui rationem reddere teneretur. Quod profecto amplissimum imperium Catulo merito invisum, ne via ad supremam dominationem pateret: quapropter in Senatu, *Non debere, inquit, uni alicui viro tot imperia, unum ex aliis, committi; quod & leges hoc prohibent, & experientia deprebensum est, rem eam esse periculosissimam. Neque enim Mario alia causa fuit, cur talem se se gereret, quam quod brevi admodum temporis spatio tot bellorum administratio ei credita sit, Consulatus senies intra paucissimos annos mandatus est: neque Syllæ quam quod posteaquam multis annis absque ulla intercapedine exercitiis præfuisset, Dictator postea, ac deinde Consul creatus fuit. Ea quippe est natura animorum humanorum, ut non juvenes modo, verum etiam ætate proVectiores, postquam multum temporis*

*in potestate transegerint, patriis moribus haud quaquam sibi vivendum ducant* (a). Sed incassum id querelarum, quum imperium hoc infinitum Pompejo per Populum, qui eum summo opere amabat, demandatum tandem fuerit. Ex quibus apparet ut sensim, ac veluti per quosdam gradus Romana Respublica ad Monarchiam delabatur.

Sed & alii uno prope, eodemque tempore in Rempublicam insurrexerunt, furens scilicet Catilina, & seditiosus Rullus Tribunus plebis: qui quamvis ambo eodem intenderent, alius tamen alia grassabatur via. Catilina enim aperta conjuratione se protulit, Rullus autem per transversos veluti cuniculos, per largitionum lenocinia sibi plebem ad evertendum Civitatis imperium trahebat. Itaque hic legem agrariam, seditionum omnium latissimum campum, rogavit, nempe ut egentibus ex plebe ea prædia distribuerentur, quæ in Consulatu Syllæ, & Quinti Pompeii parta fuerant Reipublicæ; atque ad id peragendum decem statuerentur Cives, quibus ob rei curam & laborem daretur pecunia ex publicis vestigalibus redacta, quæ penes publicanos adhuc existens, non dum ad Reipublicæ ærarium illata erat: ex quorum tamen numero Pompejus, uti absens, arceretur, sed revera quia metuebat, ne per hanc partitionem plebi jucundissimam, gratiam ejus sui nominis dignitate sibi captaret. Addiderat legi, ut decemviri assignandis agris, colonias etiam sine Senatus auctoritate deducere quas vellent, possent. Sed inter eos principem se constituit, quo facilius ipse ad supremum dominatum, quem adspirabat vehementer, grassaretur. Quantum autem duæ istæ Reipublicæ partes Senatum vexarint, dici vix potest. Catilina enim ingentem adolescentium nobilium catervam, tam pacis, quam belli artibus clarorum sibi illexerat; Rullus autem plebem maxime ob rerum angustias, in quas ob Syllanas proscriptiones inciderat, afflictam ad res novas induxerat. Sed Cicero summa, qua valebat, prudentia, atque eloquentia, utrumque mire evertit.

Sed quid? Dum seditio aliqua sedabatur, aliæ, atque aliæ statim, veluti monstruosa exectæ hydræ capita, in summam

(a) *Dio Cassi lib. 36.*

nam Civitatis perniciem oboriebantur; adeo turbata ac perversa cuncta erant in Repub.. Alii enim honores omnes civiles, militaresque sine intermissione, tamquam hereditario jure, sibi vindicabant; Consulatumque vicissim, ac munera bellica per Provincias sibi deferebant: alii militum gratiam largitionibus, tum disciplinæ militaris remissione & indulgentia aucupabantur: alii demum infinita pecunia sibi, vel iis, quos ad honores attollere e re sua existimabant, populi suffragia coëmebant. Ceteri vero, qui veluti derelicti carebant honoribus, huc illuc discurrebant, plebem in Magistratus, tamquam eos, qui per omne nefas honores omnes sibi abriperent, concitantes, ut hac via & ii ad imperium eveherentur. Has inter tempestates fluctuante Republ. Cives boni libertatisque studiosi, Cicero, Cato, Catulus, aliique extremum excidium videntes, querebantur in paucorum numero magistratus versari, ægreque ferebant immensas eorundem divitias, quibus exercitus sibi alliciebant; indignabantur demum, potentiores Civitatis non intermissos gerere magistratus. Sed frustra ejulatus isti: siquidem ad occasum jam vergebat Romana libertas. Redeamus igitur in viam.

Maxima Pompejus pollebat auctoritate. Quum enim Imperator, antequam prope miles esset, lectus fuerit, mirum quantam ex tot devictis hostibus gloriam sibi paraverit. Is felix semper in rebus gerendis, omnes tres terrarum partes Reipub. subjecit: Carbonem, & Cinnam, antiquos Marii socios in Italia, Sertoriumque virum strenuum in Hispania profligavit, Domitium in Africa devicit, in Asia demum Mithridatem, & Tygranem, quos per tot annos fortissimi quique Romanorum superare non poterant, brevi prostravit. Post tot igitur, tantaque feliciter confecta bella, ea gloria clarus, quæ vix Coelo capi posse videtur, in Urbem rediit. Hic autem quum tot triumphis, quot oræ terrarum erant, esset ornatus, videre est, quam vitæ consuetudinem servaverit. Perraro domo prodibat: si quando vero palam efferebatur, is erat Civium obsequentium comitatus, ut inter plaudentium turbas Principis incessus videretur. Itaque honoribus his elatus contemnebat omnes, neminemque sibi parem patiebatur. Jam vero,

vero, obsecundante licet universa fere Civitate, non paucos tamen inter Cives ipsos nactus est inimicos, quorum sane princeps ibat Julius Cæsar, quem sane, si ceteros sperneret, parem virtute renuere non debebat.

Cajus Julius Cæsar ex gente nobilissima ortum duxit. Nulli hic & civilibus rationibus, & militari strenuitate, & animi præsentia, erat secundus, adeo ut per ea maxime libertati Romanæ periculum creaverit. Syllæ, & Marii exemplum imitatus, omnia huc referebat, ut Imperium Romanum sibi uni subjiceret. Sed consilium suum iis artibus, eaque animi solertia obtegebat, ut non nisi clanculum & furtim ad Principatus dignitatem obrepserit. Sylla defuncto, ad Rempub. primum accessit, ac Ædilis factus incepit honores gerere. In hoc autem munere, quantam in spectaculorum magnificentia pecuniam profuderit, ut plebis gratiam captaret, mirabile quidem est: id enim in animum induxerat suum, plebem colere quam maxime, cujus favore ad potestatis fastigium perveniret. Hinc recte Syllam ornatissimis viris pro Cæsare deprecantibus, respondisse scripsit Tranquillus: *Vincerent, ac sibi haberent, dummodo scirent, eum, quem incolumen tantopere cuperent, quandoque optimatum partibus, quas secum simul defendissent, exitio futurum: nam Cæsari multos Marios inesse.* Neque Cæsaris in solam plebem studium fuit: unicuique enim, sive Patricius, sive plebejus esset, indulgebat, dummodo e re sua censeret: *Libertos insuper, servulosque cujusque, prout domino, patronove gratus quis esset, colebat.* Maxime vero, ut diximus, plebem sibi devincere nitebatur; utque sua dominandi cupiditas lateret, hanc offam objecit, ideo se Marianas, Cinnaasque partes jam dejectas revocare, quod necessitudo impelleret, quum Marius sibi patruus, Cinna gener fuisset. Hinc sane ut plebi illuderet, quum esset Ædilis, atque ædificia pro munere curaret, Marii simulacrum ab elegantioribus artificibus faciendum, idque publice in excelso ponendum voluit. Quare accusatus tanta se gefit dexteritate, ut fuerit tandem a Judicibus absolutus. Parta autem ex hoc non minima plebis gratia, ad alia mentem convertens, legem rogavit, qua a Sylla proscripti in Urbem

re-

redirent, avitorumque bonorum successio eisdem, nulla legum Syllanarum habita ratione, utpote a Tyranno latarum, deferretur. Quæ sane res quum benevolentiam maximam ei conciliasset, civiumque numerum, qui sibi suffragarentur, auxisset, non dici potest, quantum profuerit ad Senatus auctoritatem, quam in dies crescentem sentiebat, infirmandam. Sed ad reliqua pergamus.

Ædilis honore perfunctus, Præturam gessit, atque in Hispaniam missus; ubi quum mira celeritate hostes superasset, ingentemque pecuniæ vim cepisset, eam Romæ bene de se meritis profusissime largitus est. Verum qua solertia pollebat, prospiciens non tutum sibi præsidium plebem esse (adhuc enim erat luctuosum Gracchorum exemplum, qui ante ejusdem plebis, quam maxime colebat, oculos interfecti fuerant) & Senatus studia sibi captare tandem adnissus est. Erat autem amplissimus ordo duas in partes divisus, quarum alterius princeps erat Pompejus, qui sane auctoritate ceteros antecellebat, alterius vero Crassus, qui præ civibus omnibus divitiis affluebat. Cæsar igitur ita se gessit, ut data occasione, modo huic, modo illi blandiretur. Utriusque jam gratia inita, Consulatum obtinuit, quo in munere quomodo rebus consuluerit satis, animadvertendum est. Licet collega ejus foret Bibulus, omnia tamen ipse unus expediebat, *ut nonnulli urbanorum, quum quid per iocum testandi gratia signarent, non Cæsare, & Bibulo, sed Julio, & Cæsare Coss. actum scriberent.* Itaque quum Rempublicam pro suo arbitrio administraret, quo Populi voluntatem sibi ad futuram majestatem, quo tendebat, alliceret, *Campum Stellatæ majoribus consecratum, agrumque Campanum ad subsidia Reip. vectigalem relictum, divisit extra sortem, ac viginti millibus Civium, quibus terni, pluresque liberi essent. Publicanos remissionem petentes, tertia mercedum parte relevavit, ac ne in locatione novorum vectigalium immoderatus licerentur, propalam monuit. Cetera item, quæ cuique libuissent, dilargitus est, contradicente nullo.* Vide hominis solertiam: is enim per agrorum distributionem plebis favorem aucupatur; per mercedem publicanis remissam, eorum gratiam init; ceterisque bona profundendo, omnium

C c

be.

benevolentiam ad Principatum captandum contrahit, quum & plebs, & publicani maxime contra Senatum, si quando is votis suis non responderet, valerent.

Hinc profecto Senatus, cum Pompejum, & Crassum, tum Cæsarem ipsum ægre ferebat, quum summa rerum penes eos esset, ac pro se quisque ad communem libertatem evértendam intenderent. Sed præ aliis omnibus Cæsari infensus erat: Crassus enim potentia sua fortunarum copiam inhiabat; Pompejus hostium devictorum, Regnorumque Romanæ Reipub. sua virtute subjectorum memor, externam honorum speciem appetebat. Cæsar vero majora intentans, ad supremam consiliis suis dominationem adspirabat. Sed eo tandem perconquisitam Crassi, Pompejique amicitiam pervenit, ut eorum partes, iisdem minime advertentibus, ad se mirifice traxerit. Itaque omnibus fere Patribus Cæsari faventibus, id demum curatum est, ut Pompejus, & Crassus a Populi benevolentia averterentur, ipseque unus in ejus sinu gestaretur. Quod ut assequeretur, miro artificio usus est. Quum enim vulgo pernotum esset, quanta Senatus indignatione legem suam agrariam prosequeretur, vulgo induxit, ut crederent, Pompeji, & Crassi opera, qui Optimatum Principes erant, id accidisse. Quare quamvis deinde ii legi ferendæ assensu fuerint, uni tamen Cæsari Populus eam acceptam retulit. Illosque in posterum, ut commodis suis invidentes, averfatus est. Sed ut vulgi magis animos sibi confirmaret Cæsar, rogavit etiam, ut insequentes Consules in legem jurarent: parum enim imperium suum curaturam plebem ratus, si lex illa abrogaretur, qua adeo sibi eam devinxerat. Post Consulatum imperium Cæsari per quinquennium in Galliam, & in Illyricum datum est. Crassus vero in Syriam missus, provinciam opibus affluentem, atque a se exoptatam, & Pompejo utraque Hispania demandata: quam sane, ne a luxu Urbis, qui ejus strenuitatem maxime labefactavit, averteretur, per legatos gubernandam voluit. Ecce tibi Terrarum Orbem, totumque Romanum Imperium tres in partes, atque a tribus Reipub. pestibus misere dilaceratum. Et quamquam Cato, & Tullius leges patrias obtestando vehemen-

menter obloquuti fuerint, surdis tamen auribus cecinerunt; imo hic Cæsaris jussu per Clodium Tribunum proscriptus, ille vero in carcerem conjectus. Itaque silentibus omnibus, Consules ad Provincias sibi quisque decretas perrexere. Sed Crasso quidem in Syria infelicissime res cessit, quum ibi misere perierit; Cæsari vero summa erat in Gallia potestas, atque imperium. Immo Reges, atque Provincias per Terrarum Orbem alliciebat, aliis captivorum millia dono offerens, aliis citra Senatus, Populique auctoritatem, quo vellent, & quoties vellent, auxilia submitbens, superque Italia, Galliarumque & Hispaniarum, Asia quaque, & Græciæ potentissimas Urbes præcipuis operibus exornans: donec attonitis jam omnibus, & quorsum illa tenderent reputantibus, M. Claudius Marcellus Cos. edicto præfatus de summa se Reipub. acturum, retulit ad Senatum, ut ei succederetur ante tempus.

Sed hæc indigna quamvis sint, parcendum tamen homini inanis gloriæ cupido, atque insolentis potentiæ suæ ostentatori. At vero videamus nunc ea, quæ flagitiorum plena sunt, & sempiternam ei inflixerunt turpitudinem. Quum is præ mentis acie supremam dominationem haberet, præterea nihil, frequens illud in ore habebat, in jus humanum divinumque non peccandum, præter Regni causam: quo sane effato nihil scelestius. Haud igitur mirandum, si sceleribus omnibus, ac nefariis facinoribus eum obvolutum in historia legamus. Is bella per fas, perque nefas indicebat, foedera sanctissima violabat, bellum infestissimum Patriæ, bonis omnibus abnuentibus, faciebat, omnia venalia habebat: Provincias depulcari, sanctiora æraria diripere, templa Deorum expilare non verebatur. Quid? nullum sibi rerum discrimen, nihil prohibitum, cuncta miscebat, modo regnandi cupiditati inserviret. Frustra bonorum Civium quærelæ erant, frustra Provincialium in Senatu lacrymæ. Nam ad securitatem posteritatis in magno negotio habuit, obligare semper annuos Magistratus, & e competitoribus non alios adjuvare, aut ad bonum pati pervenire, quam qui pepigissent propugnatueros absentiam suam. Ceterum omnibus circa eum, atque etiam parte magna Senatus gratuito, aut levi scenore obstrictis, ex reliquo quo-

*que ordinum genere vel invitato, vel sponte ad se commean-  
tes uberrimo congiario prosequeretur; liberos insuper, servulos-  
que cujusque, prout domino, patronoque gratus quis esset. Tum  
reorum, aut oblatorum, aut prodigæ juventutis subsidium uni-  
cum, at promptissimum erat: nisi quos gravior criminum, vel  
inopiæ, luxuriæque vis urgeret, quam ut subveniri posset a se.  
His plane palam bello civili opus esse dicebat. Hinc tam pro-  
fusæ ejus in omnes homines largitiones rem eo adduxerunt,  
ut Plebs, Senatus, Equites, ceterique omnes Cæsaris scelera,  
ut militares virtutes extollerent, deque iis gratias Marti a-  
gerent. En qua via Cæsar ad Monarchiam grassabatur.*

Igitur quum Cæsar in Gallia versaretur, Pompejus ad-  
monitus, ut Reipublicæ consuleret, neu pateretur, ut liber-  
tas Romana pessum iret, adjuvante Senatu, apud quem  
haud parum valebat, manibus, pedibusque illius opes infrin-  
gere conatus est. Sed vires suas Cæsar superiores sentiens,  
tum ob plebis favorem, tum propter ingentem militum  
numerum, cuncta adversæ partis studia parvi pendebat. Ita-  
que bifariam discissa Civitate, adeo acerbæ exarsere discordiæ,  
ut Imperium universum ad Octavium usque misere labasce-  
ret. Sed hac furente tempestate, atque anarchia omnia tur-  
bante, quidam fuerunt, qui ad Monarchiam confugiendum  
putabant; alii Pompejum Dictatorem dicendum. Quod sane  
quum ageretur, vehementer Cato obniscus est. Nunquam enim  
Dictaturam semel sibi traditam deposuisset Pompejus, quam  
non ut remedium constituendæ Reipublicæ, sed laborum suo-  
rum præmium censuisset. Hinc res transacta est, ut præ Di-  
ctatura Pompejus Consulatum sine collega acciperet, ut ad sui  
arbitrium omnia expediret, neque jus esset contra ejus facta,  
sive ad Populum, sive ad Senatum provocare. Quæ sane ma-  
nifestæ Monarchiæ primordia.

At vero Cæsar hoc eodem tempore Consulatum petiit:  
sed per Senatum, imo potius per Pompejum uti a comitiis  
absens rejectus fuit. Sed quorsum repulsa isthæc? Solertis-  
simo cuique haud fuit obscurum, hoc agere Pompejum, ut per  
transversos cuniculos Cæsar, dimisso exercitu, inermis ad peten-  
dum Consulatum Romam properaret. Quapropter satius ille du-

xit



xit Consulatu carere, quam exercitus imperium deponere. At Pompejus obfirmatum ejus animum, consiliumque cognoscens propalam per Senatum jussit, Cæsarem legiones dimittere, hac prætentâ causâ, ut in Syriam, ubi per summum Reipublicæ dedecus Crassus fuerat interemptus, mitterentur. Nolente autem Cæsare Senatus decreto parere, censuerunt Patres, aut exercitum a Cæsare dimittendum, aut hostem Patriæ judicandum. Quamvis vero Equites, quamvis publicani, & plebs triste hoc decretum a Senatu deprecari fuerint, in cassum tamen omnia. Apertum igitur Cæsarem inter, & Pompejum bellum exortum: in quo quidem æquior Pompejus videbatur, quippe qui patriæ servandæ causâ præferebat; iniquior vero Cæsar, qui libertatem evertere conabatur: nam revera uterque ad supremam potestatem animo intendebat. Tandem vero post varios casus, ancipitesque rerum vices, Respub. infelicitè eorum ambitione dilacerata, ac Pompejus in campis Pharsalicis superatus profligatusque a Cæsare fuit, tandemque Theodoto Grammatico consulente, in Ægypto, quo veluti in asylum confugerat, interfectus. Cæsari vero tanti hostis victor, partibus adversis profligatis, Romam inter suorum plausus rediit. Hæc de Pompejo, & Cæsare, ceteris omissis, perstringere duxi, quantum scilicet instituto meo, quod in legibus explicandis versatur, inservirent.

Jam Pompejum periisse Romani vix crediderunt, antequam Syllæ annulum ei datum cernerent. Tunc vero comperitam exploratamque Pompeji necem habentes, *Aperte Pompejo conviciis exagitato, Cæsarem laudarunt; ac quæcumque excogitare ad honores ejus potuere, decreverunt. Qua in re magnum erat inter primos Urbis homines certamen, invicem se adulando Cæsare superare laborantium: magnæque a Populo suffragia contentione ferebantur. . . . Tunc igitur potestatem Cæsari dedere (non quod is eam non sibi ipsi parasset, sed ut jam nunc secundum leges agere videri posset) de Pompejanis suo arbitrio statuendi: deinde ut belli pacisque Dominus in omnes homines esset, etsi neque ad Senatum, neque ad Populum de iis retulisset. . . . Sed hoc ipsum quoque jam ante Cæsari aderat tantis copiis instructo, quique bella quidem, quæ gesserat omnia, fe-*

re

re suo iudicio confecerat. Cum vero Romani, ut adhuc Cives, sui que juris esse viderentur, hæc Cæsari decernebant, quæ vel invitis ipsis obtinere poterat: Quippe hoc etiam accepit, ut quinque continuis annis Consulatum gereret: ut Dictator non ad semestre tantum spatium, sed in integrum annum diceretur: ad hæc Tribuniciam potestatem per omnem suam vitam haberet. Hæc Dio Cassius<sup>(a)</sup>; ex quibus habes primordia Monarchiæ Romanæ firmiora quidem in Cæsare, quam in Sylla, & Mario: habes etiam causas, quapropter Respublica ad Monarchiam jam delapsa fuerit. Ceterum Cæsar de imperio jam securus exercitum ultro dimisit, renuentibus quamquam amicis, ne id sibi periculo esset, quod sane accidit: statim enim conjuratio a Bruto, & Cassio ad ejus perniciem inita fuit, quæ mortem tandem in frequenti Senatu idibus Martiis ei intulit.

## §. II.

*De legibus Pompeji.*

Quum hoc in opere eam propositi rationem mihi constituerim, ut ex historiæ penu leges depromam, æquum nunc est, ut, gestis a Pompejo, & Cæsare rebus brevi enarratis, ad eorundem leges exponendas accedam, ex forma nempe regiminis, quam e re sua instituere illi existimarunt. Verum quum leges Cæsaris propemodum eadem sint, atque illæ, quas pertulit Augustus, opportunius in præsentia omittere, ac quum de Augustalibus sermo erit, eas referre ratus sum. Itaque nunc tandem Pompeji leges tradendas puto.

Semitam, quam tenendam Pompejus ad summos honores, quos anhelabat, instituit, hanc fuisse constat, plebis scilicet potestatem summopere a Sylla imminutam reparandi. Etenim quum tunc temporis ea esset conditio Reipublicæ\*, ut qui ceteris majori vi polleret, is facile ad auctoritatis fastigium perveniret; nihil ad hoc opportunius existimavit, quam plebem colere, eamque sibi beneficiis astringere. Quum enim in Senatu & alii essent, cum ob diuturnos Magistratus clarissimi, tum bonorum copia refertissimi, difficil-

(a) *Lib. 36.*

ficillimum sane erat ab eo ordine assequi, ut, posthabitis ceteris, sibi daret imperium; id vel maxime, quod quum Equestri ordinis is esset, fieri ægre posse videbatur, ut per Senatum ad summos honores attolleretur. Quum igitur his de causis Pompejus rebus suis studendo, beneficiis maximis plebem sibi allicere incepisset, facilis erit suarum legum expositio.

Quum Sylla augendæ Aristocratiae, atque ex adverso Democratiae minuendæ operam strenuam navasset, nil validius ad plebis potentiam labefactandam existimavit, quam Tribunorum potestatem intra angustissimos cancellos arctare. Hinc tulit ne Tribuni jus haberent concionandi, leges rogandi, aliosque post Tribunatum honores habendi. Contra vero Pompejus, quum plebis potentiam instaurare niteretur, ab abrogandis Syllæ legibus exordiendum putavit. Itaque Tribunis eam restituit auctoritatem, quam olim plebs per seditiones ante Syllam a Patribus vi extorserat. Quare apposite Paternus ait (a): *Hoc Consulatu Pompejus Tribuniciam potestatem restituit, cuius imaginem Sylla sine re reliquerat*. Reparata aliquatenus Tribunicia potestate, in hoc plebs tota fuit, ut jus omne pristinum Tribuni recuperarent, quod eis Sylla abstulerat: hinc primo fuit Tribunis jus honorum restitutum, deinde etiam judicia concessa fuerunt Equitibus, flagitiosa Verris Prætura id suadente. Et quidem plebs sæpe querebatur de judiciorum nundinatione tum, quum penes solos Optimates jus esset: sed id Verris Prætura maxime comprobavit, de quo hæc Tullius (b): *Ut nemo tam rusticanus homo Romam ex uno municipio vadimonii causa venerit, quin sciret, iura omnium Prætoris Urbani, nusu, arbitrioque Cælidonis meretriculæ gubernari*. Peracto Præturæ anno, fuit quidem is accusatus, sed Judicium nequitia absolutus. Hinc plebs concitata, judicia semper venalia fore, si penes Patres essent, inclamabat, quum æque ii sceleribus involuti, sibi mutuo omni tempore parcerent. Sed tandem auctore Pompejo, iterum Equites ad jus dicendum descenderunt, ita tamen ut

par

(a) 2. 30.

(b) *La Ver.* 5. 13.

par esset Senatorum, & Equitum numerus. Sic enim Paterculus (a): *Per idem tempus Cotta judicandi munus, quod Gracchus ereptum Senatui ad Equites, Sylla ab illis ad Senatum transtulerat, æqualiter inter utrumque ordinem partitus est.* Sed quamvis judicia denuo ad Equites delapsa essent; Prætura tamen penes unos optimates manebat, quod sane non sine invidia erat. Etenim hi, quum per edicta jus, ut rebus suis videbatur accomodatius, supplerent, corrigerentque, facili negotio nobilibus assentabantur, juraque plebis intervertebant. Hinc lex a Cornelio Tribuno rogata de edicto perpetuo, nempe ut fas Prætori non esset intra annum illud immutare; de quo sic Dio (b): *Ita & hanc legem Cornelius perfecit, & alteram hujusmodi. Prætores solebant jura ea, secundum quæ judicaturi essent, scripta edere. Neque enim Prætores id jus, quod ad contractus dirigendos positum erat, observabant, neque id unquam fecerunt, neque scripto juri steterunt, sed sæpe numero ea variaverant, crebroque per gratiam, & odium certorum hominum, veluti fieri assolet, multa gerebantur. Igitur rogationem tulit, ut & statim a principio Prætores prædicerent quo jure essent usuri, & deinde nequaquam ab eo desisterent.*

Neque prætermittenda est lex theatralis, perlata ab Othone Tribuno plebis, ut Equites a reliquis secreti in quatuordecim gradibus Orchestræ proximis spectarent. Quum enim potestatem hoc tempore judicandi Equites denuo accepissent, par æquumque visum, hunc honorem eis ad dignitatis ornamentum conferri. Quæ sane lex invisa quamvis Patribus, jucunda tamen plebi fuit. Nihil enim, ut supra diximus, ad Aristocratiam temperandam præsentius, quam medium ordinem ad honores extollere. Sed quo penitus lex hæc intelligatur, operæ præsum ducæ rem ab origine sua, strictim licet, repetere. Initio Reipublicæ ad Scipionem usque Africanum nulla distinctio in Theatris, ceterisque spectaculis inter Senatores, Equites ac Populum erat: in Republica enim, ubi democraticè vivitur, tale discrimen invisum habetur. Scipio

(a) 2. 32.

(b) Lib. 36.

pio omnium primus distinctas Senatoribus Sedes concessit : Quod sane quum seditiones fuscitasset , adeo Scipionem id turbavit , ut scripserit Tullius (a) : *P. Africanus ille superior ut dicitur , non solum a sapientissimis hominibus , qui tum erant , verum etiam a seipso saepe accusatus est , quod quum Consul esset . . . passus esset tum primum a populari confesso Senatoria subsellia separari . . . quæ res avertit vulgi animum , & favorem Scipionis vehementer quassavit* (b). Itaque plebs , favente Pompejo , ad pristinam auctoritatem , honoresque restituta , Optimatum potentiam modis omnibus imminuere conata est . Ut autem adversus Patriciorum solertiam se munit , duabus id præstitit legibus , nempe Cincia de donis , & muneribus , atque illa adversus ambitum propter honores & judicia . A primordiis usque Reipublicæ receptum erat , ne quis ob causam orandam , pecuniam acciperet : jusserat enim Romulus Patricios gratuito plebem defendere , ut mutuum inter utrosque necessitudinis intercederet officium , invidiaque procul esset ; munuscula tantum quædam stas temporibus , veluti grati animi indicia permittens elargiri . At vero Patriciorum avaritia , ac cupidine quadam in plebem dominandi factum deinceps est , ut saluberrimum hoc alioquin institutum sensim exolesceret , plebsque illorum fieret stipendiaria . Nam quum nemini olim præter Patricios jus profiteri liceret , ii operam suam nonnisi multa pecunia locare inceperunt , ut & ita miseræ plebis bona tandem obligurirent . Hinc lex Cincia , a Cincio nempe Tribuno rogata , tum ad tantam Patriciorum auctoritatem contrahendam , tum ad plebis inopiam sublevandam , libertatemque sartam tectam custodiendam . En quomodo de ea loquutus sit Livius (c) : *Quid legem Cinciam de donis & muneribus , nisi quia vectigalis plebs esse Senatui cæperat ?*

Adversus ambitum lege Cornelia , sive Calpurnia Equestri ordini , plebique consultum est . Quum enim suffragia turpi-

D d

ter

(a) *Pro Cornel. I. Frag. ex Asconio lib. 1. 39. 54.*

(b) *Val. Max. 2. 4.*

(c) 34. 4.

ter coëmi coëptum esset, fiebat hinc, ut ex Patriciis ii haberent Magistratus, qui majus argenti pondus elargiri possent, Equites vero honoribus omnibus carerent. Qua de causa per hanc Tribunorum rogationem severissimæ poenæ adversus ambitus reos, Judicumque in jure reddendo avaritiam statutæ sunt; nempe ut pecunia captandis suffragiis data omnino restitueretur, utque istiusmodi criminis reus multam pecuniariam etiam solveret, & in posterum nullum jus haberet Magistratus petendi, amisso etiam honore in Senatu sedendi: quare scripsit Tullius sic (a): *Erat severissima scripta Calpurnia*. Licet deinde linita fuerit a Senatu hac abjecta causa: *Quod si supplicia essent extrema, neque accusatores reorum, neque qui eos condemnarent facile reperiri posse. Ubi vere mediocres poenæ propositæ essent, ibi & frequentes accusationes fieri, neque a damnando reo iudices deterri:* Ut ait Dio (b).

Hæ sunt Pompeji Magni leges, consiliis ejus omnino respondentes, quas si cum Syllanis comparabimus, videbimus quidem adversa fronte pugnantes, pro diversis nempe itineribus, per quæ Principatum appetebant. Et quidem Marius quum in animum induxisset suum, Populo favente, ad summam rerum pervenire, leges meditatus est summopere populares, quæque optimatibus adversarentur. Tribunorum enim potestatem, quantum potuit, extulit, Comitia ex centuriatis in curiata convertit, legemque agrariam seditionum civilium segetem ac materiam foecundissimam, non semel rogavit. Contra Sylla quum minime posset per plebem, quæ summo amore Marium prosequeretur, ad supremum dominatum pervenire, optimatum partibus sese totum mancipavit. Itaque Tribunorum potestatem imminuit, legem agrariam abrogavit; jus Civitatis Italici a Mario datum infirmavit, ac libertatem demum civilem, in vestris per tormenta Civium quaestionibus, adversus Populicolas instituta sustulit. Demum vero Pompejus, quum nihil sibi sperandum, nisi ex Populi studio videret, partes Marii jam dejectas restituere cur-

(a) *Pro Murena* 23.

(b) *Cap.* 36.

curavit, legesque modo expositas, quæ plebis genio obsequerentur, rogavit. Atque ex his, quod sæpe innuimus, inspicere licet, juris civilis scientiam imperviam prorsus esse, nisi & legislatoris ingenium introspiciamus, & Reipub. forma ex historia depromatur.

### CAPUT III. ET ULTIMUM.

*De Monarchia Romana.*

#### §. UNICUS.

*De Octaviano Augusto, Antonio, & Lepido.*

**V**idimus hucusque quantum Marius, Sylla, Cinna, Pompejus, & Cæsar, sub obtentu Reipublicæ libertatis servandæ, adlaboraverint, ut ad Imperii fastigium assurgerent. Sed non Cinna, non Syllæ longa dominatio: & Pompeji, Crassique potentia cito in Cæsarem; Lepidi, atque Antonii arma in Augustum cessere. Qui cuncta discordiis civilibus fessa, sub nomine Principis imperium accepit. Quod sane quibus studiis, quibusque artibus effectum, nunc annuentibus Superis sumus exposituri.

Interfecto Cæsare, tantum abfuit, ut ad libertatem pristinam rediret Respublica, ut motus potius civiles validius increbuerint: alii enim illius dominationem probantes, per ejusdem vestigia ad eundem principatum properabant, quos inter Principem locum tenebat Antonius, honoribus quidem, auctoritate, bonorumque copia ceteros antecellens. Is enim Cæsaris cædem simulans ulcisci, imperio potiri vafre conabatur: alii vero ex adverso insurgentes optimates libertatisque vetustæ memores, rem ad pristinum restituere conabantur. Sic discissa Civitate, turbata cuncta, confusaque erant, nec quam quisque partem sectaretur, facile dignosci poterat; sui quisque animi sententiam familiaribus ipsis, & necessariis aperire verebatur. Hinc Senatus anceps quam causam fusciperet, medium iter tenere censuit, ut scilicet Cæsaris acta firma essent,

sent, nec tamen de ejus nece ulciscenda ageretur. Sed hoc secum ipse pugnabat: nam si leges Cæsaris abrogare fas haud erat, ejus mors, utpote non tyranni, sed legitimi Principis, quando leges condendi jus fuit, ulciscenda erat.

Ad hæc de Cæsaris funere, deque ejus testamento evulgando, quod Pisoni servandum tradiderat, actum. Sed & hic dissensio oborta: timebant enim Cæsaris interfectores a plebe, ne ex aspectu cadaveris tot ictibus dilaniati adversus se facile insurgeret: at vero flagitantibus Pifone, atque Antonio, Senatus tandem funeri, supremisque laudationibus assensus est, lectæque coram Populo supremæ tabulæ, ubi Octavii adoptionem, eundemque heredem ex asse scripserat. Hic autem occasionem nactus Antonius, ut plebem in hostes Cæsaris infensam, ex confixi cadaveris conspectu, magis magisque incitaret, ejus amorem, beneficiaque Populo collata ad cælum extulit. Sed quorsum is istiusmodi verba jactaverit, Senatus satis intellexit, nimirum ut plebem in Patres, conjuratosque omnes impelleret. Quare videns jam detectam animi sui sententiam, vaferrimus, ut quantum posset, quod in sinu fovebat, occuleret, admonuit Patres, plebemque, ut Sexti Pompeji ex Hispania reditum decernerent, quo quies publica tutior esset. Obstupuit Senatus, quum videretur Antonius uno eodemque tempore Patres inter, & Plebem medio esse ingenio, nec sibi ipse concors: nam Sexti Pompeji reditum ad Urbem postulare idem erat ac Cæsaris damnare memoriam, quam alioqui præclaris laudibus exornabat. Quumque addidisset non solum Pompejum ad Urbem redire debere, sed eidem paterna bona a Cæsare ablata restituenda, suspicatus quidem Senatus fuit, Antonium forte ad effugiendam invidiam affectati Regni poenituisse; alii vero putarunt Antonium mutasse propositum Cæsaris mortem vindicandi, quum jam sensisset, odium sibi ex hoc summum obventurum, Octavium autem utilitatem omnem percepturum. Sed conjurati fati superque mores Antonii internoscentes, satius putarunt se conferre ad Provincias, ibique militaribus præfidiis se munire, quam Romæ morari fidem præstantes Antonio. Qua de re M. Brutus in Insulam Cretam profectus est,



est, Cassius se contulit in Africam, Trebonius in Asiam, & Decimus Brutus in Galliam Cisalpinam, ibique suas quisque vires, novos delectus habendo, & foedera cum Reipublicæ fociis ineundo, adeo adauxere, ut cuique hosti possent obviam ire.

Interea Octavius, qui in Cæsaris gentem adoptatus fuerat, statim Apollonia, ubi literis operam dabat, Romam perrexit; suamque a Prætore adoptionem ex vetusto more probari postulavit. Id autem admirati omnes sunt: nam Cæsaris heres quum esset, ejusdem profecto cædem ulcisci adversus Senatus decretum, atque in interfectores sævire, quod periculosa plenum opus aleæ erat, debebat. At ille qua præstabat prudentia, solertissime in omnibus se gessit. Ad hæc omnes fere amici objectabant nomine tenus se Dictatoris fore heredem: adeo enim conjurati viribus valebant, quibus, clanculum licet, Senatus favebat; ea item Antonii erat auctoritas, quippe qui Consul erat, suorumque germanorum Prætor alter, alter vero Tribunus plebis, ut ad summam rerum potestatem Octavium perventurum, vulgo desperarent. Verum contra omnium expectationem, adeo feliciter fors arrisit Octavio, ut devicto Antonio, exuto Lepido, profligatis conjuratis, Optimates, Equites, Plebemque Romanam in concordiam adduceret, omnesque sibi beneficiis obstringeret; atque adeo publicam sic tandiu, tot factionibus interturbatam tranquillitatem rebus restituit.

Atque hæc ex historia Octavii excerptisse, satis instituto nostro erit: cetera enim libens omisi, quæ ad philologos magis, quam legum interpretes spectant. Itaque ex his, quæ narrata sunt, mente percipi potest, quibus legibus uti debuit Octavius, quæ temporibus suis responderent. Et quidem jam inde a primordiis Urbis quot seditionum, discordiarumque procellis jactata fuerit Respublica, jam exposuimus: quæ profecto quamquam a Senatu sæpe consiliis suis sedarentur, statim tamen Tribunorum plebis furore recrudesce videbantur: ut Consulare imperium, Patriciorumque auctoritatem everterent, comitia Centuriata in Curiata, vel Tributa converti furiose postulaverunt: & res ex voto successit: honores

nones civiles, sacros, & militares exoptarunt; horum quoque plebs particeps facta fuit. Sed quum deinde vidissent, Magistratus, honoresque omnes elanguescere, quum ad eorum Majestatem servandam opes deessent; hinc in ditiorum bona irruentes, tot leges agrarias per eos, qui plebis deliramenta ad suum Principatum curabant, rogarunt. Quid Marius, quid Sylla, quid Pompejus fecerint, ut rerum potirentur, jam vidimus. Sed quum in Sylla ob Dictaturam perpetuam, atque in Pompejo ob imperium Consulare tam longe lateque concreditum, exorta fuit Monarchia; & ceteros iisdem rationibus communem libertatem evertendi cupido incessit; hinc Cæsar, Crassus, Antonius, & Lepidus inter se de Monarchia contententes, misere Rempublicam dilacerarunt, in eam, veluti in prædam hostilem furiose irrumpentes. Itaque ut vela colligamus, confusa, perturbataque omnia tunc erant: nam plebs effrenem optabat Democratiam, Senatus Aristocratiam incolumem efflagitabat: ex optimatibus vero, qui majori vi pollerent, ad Monarchiam adspirabant.

Sed ad morbum tam desperatum sanandum nulla profecto salubrior medicina poterat adhiberi, si a Monarchia discesseris. Ipse Cicero libertatis antiquæ tenacissimus, quum omnia ad occasum properantia circumspexisset, sæpe dixit, non posse amplius servari Rempublicam, nisi instituta Monarchia. Verum quam arduum opus hoc esset, quotque in discriminibus positum, Cæsar's interitus satis ostendebat. Nul- lum quidem remedium Civitati supererat, quam eandem regi, & gubernari ab uno: sed id erat Civium ingenium, ut nec mala sua ferre possent, nec eos, qui ex calamitatibus eripere pollicebantur. Ægrotis profecto illis simillimi videbantur, qui & morborum indignantur, & salutis remedia respuunt. Talis erat Romanæ Reipublicæ status, quum Augustus accepit Imperium. Sed tanta hic usus est in Monarchica Reipublicæ forma constituenda prudentia, ut jure merito Scriptores nobis tradiderint, tantam ei ad instaurandam Urbem fuisse sapientiam, quantam Romulus adhibuit ad condendam. Itaque ne procax illa libertas, quæ ævo suo effervescebat, partem aliquam deperire videretur, maximopere stu-

studuit, atque interim Populum aliis atque aliis deludens modis sensim Rempubicam in novam formam convertebat. Regis, aut Dictatoris nomen aufugit, quum revera, & sine provocatione esset, & cuncta sibi obedirent: invisos titulos respuens potestatem Regiam sub nomine Principis, Senatus, Pontificis M., Tribuni plebis, Proconsulisque exercebat. Quæ sane vocabula quum libertati Romanæ congruerent, simulabat profecto suam se potestatem nonnisi Populi jussu gerere, ut eo delinimento Senatum, plebemque capiens, interim divina, humanaque omnia arbitrio suo moderaretur.

Age vero quum jus civile respondere debeat regimini, & Octavius formam Monarchicam induxisset, quæ tamen in speciem popularis videretur, leges profecto ejus hujusmodi esse debebant, ut vetustam libertatem præferrent. Enimvero quum nihil ægrius homines ferant, quam legum, quibus ab incunabulis innutriti sunt, mutationem, profecto ingentes in Populo concitat motus novus Princeps, si vetusto jure immutato, Monarchicas de repente leges protulisset. Ita igitur se gessit Octavius, ut simulacris manentibus veterum legum, omnia tamen suis Constitutionibus sensim pedetentimque fierent nova. Et quidem juris Monarchici est, ut quæ Summi Imperii sunt ad unum spectent, nempe jus indicendi bellum, ferendi leges, imperandi tributa, creandi Magistratus, foedera percutiendi, denique in bona, vitamque Civium potestas.

Sed cuncta, quæ individua in Augusto esse debebant, singula in singulos dispertita inveniebantur. Nam Prætor adjuvandi, supplendi, corrigendique juris civilis gratia institutus, ad id pervenerat potestatis, ut leges civiles arbitrio suo per diversorum vocabulorum technas figeret, atque refingeret. Idem ab Ædile factitatum. Jus legum ferendarum, belli indicendi, foederis percutiendi ad Populum in comitiis spectabat. Unusquisque paterfamilias domi suæ princeps erat, & jure vitæ, & necis in omnes, qui potestati ejus subjiciebantur, utebatur. Idem in Civitate erat veluti sacrosanctus, a cujus capite & tergo leges Valeria, & Porcia virgas, atque omne supplicium amovebant. Jus indicendi Tributa

buta Senatui erat, isque Proconsulare Imperium, licet Populo suffragante, Optimatibus tamen arbitrio suo demandabat. Quibus in rebus omnibus, aliisque id genus Augustus vi auctoritatis suæ nihil unquam immutavit. Consules enim more majorum procedebant iisdem, atque olim Dignitatis suæ insignibus conspicui. Sublimes, uti antea de sella, & Tribunali jus dicebant Prætores, & Ædiles. Quæstorum etiam, Censorum, & Plebis Tribunorum audiebantur nomina, & insignia conspiciebantur: attamen hæc omnia inanes tantum species erant. *Veteris Reipublicæ, ac vestigia morientis libertatis, quum omnes exuta æqualitate iussa Principis adspectarent.* Re igitur vera horum omnium potestas ad Octavium transierat, qui & Proconsul, & Plebis Tribunus, ac Cenfor erat. Itaque ne Magistratus suam immutatam quererentur potestatem, nova, ut fucum faceret, officia excogitavit, nomine tenus præ antiquis majora, veluti curam ærarii, ludorum, spectaculorum, orationum, & epistolarum in Senatu legendarum: ut quum nova hæc cupide inhiarent, vetera negligerent, soloque vocabulo Consules, Prætores, Ædiles essent. Populum in comitiis de bello, & pace, in legibus jubendis, de imperio suffragium ferre, æquo animo patiebatur: sed omnia hæc suo nutu pendebant, quum omnium voluntates annona, & congiariis antea sibi illexisset. Si quando pro nova Reipub. forma, novas ferri leges opus esset, arcanis illis studiosisque verbis consilia sua occludebat, *ut nihil usquam prisce & integri moris videretur immutatum.* Etenim jurisperitis sibi annuentibus facultatem de jure respondendi dedit, verbo quidem, & simulatione, ut juris auctoritas major esset, re vero ipsa ut hi in forum ad res judicandas eam inducerent consuetudinem, quæ Populi mores paullatim ad Monarchiam converteret, ac sensim scriptæ leges per confictas interpretationes, subdolasque interpositas, tandem per seipsas omnino conciderent. Hinc sane data eisdem fuit ingens illa auctoritas, *ut ab eorum responsis Judices discedere minime possent*: nempe ut Judices non amplius Prætorum, Ædiliumque formulis, tamquam glebæ adscripti, parerent; atque ita legislatariam eorum potestatem everteret

teret. Sed præter hæc novo conatû contra vitia seculi , quibus Respublica , ob quotidianas præsertim seditiones erat involuta , consistendum fuit , quum nihil aliud validius sit ad vitiorum pestem adaugendam , quam bellorum civilium furor . Quotidiana enim per urbem , & Provincias erant furta , rapinæ , adulteria , stupra , & cædes ; eaque licentia increbuerat , ut corrumpere , & corrumpi tota civium vita esset : nulla jam amplius religio , nullum studium liberis educandis , sed simulatæ adoptiones , & nefanda venus promiscua ubique . Immanis erat in honoribus ambitus , suffragiorum publicæ nundinationes , & judiciaria potestas locupletiorum libidini prostabat . Morbo huic vitiorum medendo , quamnam medicinam Legislator noster adhibendam existimavit ? Anne ultore ferro usus est ? Minime . Sed opulentiores tantum deportatione in insulam plecti iussit , ut simul & clementiæ daret exemplum , & opes sceleratorum confluerent in ærarium , tot civilibus bellis exhaustum . Sed satis hæc , quæ profecto , veluti fax quædam rebus iis , quas hoc in libro fusius tractaturus sum , præfulgeant .

Itaque Reipublicæ regimen sub Octavio , qui pristinam libertatem tutari simulatus , Monarchiam pedetentim constituit , referam ; atque hic congruentes ejus leges exponam ; inter quas non pigebit censere eas , quæ sive ad matrimonii castitatem servandam , sive ad impudicitiam vetandam , sive ad honorum ambitum evertendum , sive demum ad judiciorum sanctitatem promovendum , fuerunt perlatæ . Post leges sequuntur magistratus , & quidem tales , quales civili regimini responderent : si enim lex scripta Reipublicæ formæ conveniat opus est , quanto magis Magistratus , qui viva lex Populi sunt ? Hinc de novis magistratibus , per Octavium institutis , verba faciam , deque recenti forma judiciorum , quæ sub eisdem invaluit . Itaque novata omnia in Republica Romana , sub fictam pristinæ libertatis imaginem , ex historiæ penu deprompta lectoris oculis subjiciam . Faxit Deus , ut rem , quam aggredior , feliciter absolvam .

## C A P U T I.

*De Romana Republica sub Imperio Octaviani Augusti.*

## §. I.

*De rationibus , & de forma regiminis instituta ab Augusto.*

**D**E eadem Oratorem, memoriae proditum est, versutum hominem, & callidum fuisse Athenis. Hic ut potentia & opibus cresceret, nihil e re sua satius duxit, quam Macedonum, & Antipatri gratiam sequi. Sæpe quum a se adversus Patriæ dignitatem, ejusque commoda deliberaretur, dictitare solitum tradunt, sibi parcendum, quippe qui afflictæ, ac prope perditæ Civitatis reliquias regeret: quasi dictum voluerit, calamitates publicas non pati, ut in Republica administranda secus se gereret: sed ipse revera scelestus, improbusque erat, qui pessime res publicas moderando, sibi serviebat, Civibusque parabat interitum. Quorsum autem hæc præfatus sim, quove intendantur, quivis per se intelligit. Sed minime tamen possum, quia questionem illam, tam acriter inter viros politicos agitatam, pervestigem, iisne, qui suaviter prospereque vivunt, an vero qui adversa fortuna jactantur, tutius faciliusque imperetur. Sane in utraque sententia scopuli offenduntur, quos haud facile est superare.

Nam gens illa, quæ ventis sine intermissione perflatur secundis, facile quidem prosperitate ipsa tumescit; atque hinc labores fastidians sensim virtute sua cadit, Principisque jussa contemnendo, ad interitum tandem festinat. Si vero procel-  
lis turbinibusque urgeatur, vitamque ærumnis pressam toleret, nulla medicina ad hæc mala avertenda probabitur. Ita a natura comparati sumus, ut si quando calamitatibus vexemur, omnia in nobis iracundia effervescent, nullumque æquo animo patiamur medicamentum, nisi blandimentis quibusdam, & assentationibus deliniamur. Itaque ii, qui calamitatibus obruuntur, nec mala sua, in quæ inciderunt, nec vitiorum remedia ferre possunt. Sane mel natura sua suavissimum est,

est; ulceribus tamen salubriter admotum, acerbos dolores commovere comperimus; ita & infelicem salutare quamvis hortationes exasperant magis, incenduntque, nisi lenitate quadam non sine maxima prudentia condiantur; quemadmodum jucundum definivit Homerus, *quod menti facile assensitur*.

Quid igitur viro politico, tanta rerum difficultate, ut afflicta Civitati occurrat, faciendum? Non solum mentis acie quid quassata Reipublicæ componendæ par sit, considerate circumscribere, sed qua comitate, & lenitate ad optatum finem perveniat, cura omni studere debet. Optime sibi actum erit, si quid civibus aliquando indulgeat, ut sibi devotos efficiat, nonnullaque, quibus oblectetur, ultro concedat; hac tamen de causa, ut sibi tandem hac ratione illecti, ad graviora perducantur. Atque hic sane erit, a quo, desperatis rebus, integra omnia, ac felicia expectari poterunt. Sic enim Cives adversa fortuna jactati, blandimentis istis attracti, æquius profecto dicto audientes ei erunt, cui per vim metumque vix obtemperarent. Sed quam ardua res agatur, quis non videt? Hic profecto illa extrema simul jungenda sunt, quæ difficillime possunt inter se copulari, scilicet humanitas, & comitas cum severitate, atque majestate; quæ sane si forte fortuna in unum coalescant, nil majus, nil validius, ut alacri animo Cives jura Principis facessant, ejusque ad arbitrium nutumque se fiant. Licet enim ferinum quid aliquando hominum natura sapiat, non tamen adeo feritatem induit, ut eam exuere minime possit, modo beneficiis, gratique animi judiciis impetatur. Hæc sunt in causa, quapropter Octavio tandem fors feliciter arriserit, ac perennem sibi pepererit Principatum, qui tot clades antea stragesque attulerat, Marioque, Pompejo, ac Cæsari paraverat interitum. Is enim non metus vi, non ense ultore, non truculento satellitum vultu, duxit sibi firmandum imperium, sed eos ad honores attollendo, qui ingenio, & virtute emerent, militem beneficiis, Populum annona, & congiariis, cunctos denique dulcedine otii, & publicis oblectamentis alliciens, ita sapienter se gessit, ut omnia ad pristinam libertatem restituendam, incolumemque servandam composita viderentur.

Jam vero Octavius, Bruto, & Cassio cæsis, Triumviratus honore exuto Lepido, voluntariaque morte perempto Antonio, ab omni parte tutus in Principatu erat, quum ceteris extinctis, unus is ex Julianis partibus superstes esset. Itaque quum summam rerum haberet, sibi que uni legiones omnes parerent, ut res feliciter succederet, nec ad ea mala illaberetur, in quæ Cæsar offenderat, satius dæxit potestatem hanc tantam ad Populum referre auctorem, precariumque in se imperium jactare, quam in civilium turbarum scopulos incidere, ubi tot antea naufragium fecerant. Ne igitur libertatem communem, qua nihil Romanis optatius erat, mutatam Populus sentiret, utque Ordinibus cunctis blande assentaretur, titulos omnes, a quibus maxime metuendum erat, religiose averfatus; Regiam potestatem, quam suo jure vindicabat, magistratus nomine, tamquam a Populo ipso accepisset, exercebat. Sed ejusmodi hæc erant, quibus certe imperitæ plebi facile illudebat, nequaquam vero Senatui, aliisque, quibus ingenii vis esset. Quapropter ut & his imponeret, novas technas orditus est.

Sane in conversionibus Rerumpublicarum id agendum, ut ea regiminis forma instituatur, quam diu manere in votis sit omnibus. Quum autem in omni Civitate tres vulgo ordines distinguantur, Nobilium, Plebejorum, eorumque qui hos inter medii censentur, quumque aliud aliis ingenium sit; videamus quo se pacto gesserit Octavius, ut Respublica sua cunctis sine discrimine diu superstes optaretur. Quoniam Nobilis honores appetit, præterea nihil; plebs contra de honoribus parum sollicita, de quæstu vero, & lucello diligentissima est; præter hos focii, & foederati populi sunt, qui unum anhelant, ut Reipublicæ honorum participes fiant; ita ille sapientissime rem instituit, ut voluntatibus omnium felicissime obsecundaret. Itaque Rempublicam regendam pro veteri more Senatui concredidit; optimatibus Magistratus petendos dedit, provinciasque administrandas demandavit; Equites, qui moribus & virtute ceteros anteirent, Senatores allegit; plebem vel agro colendo addixit, vel ad militiam vocavit, vel obæratam sublevavit; agricolæ nempe parans commoda; ut strenue



nue laboraret ; militi dona pollicitus , & statam mercedem persolvens , quo alacriori animo dura belli pericula subiret ; opem obæratu ferens , vel de suo , vel de ærario , inopibusque succurrens , ne a potentioribus premerentur : sociis demum civiles militaresque honores tribuens , quique dignitate , & bonorum copia præstarent , in Senatorum etiam ordinem , nedum Cives cooptans . Quinetiam ne Magistratuum Romanorum intemperantia provinciales vexarentur , legibus de peculatu , & de repetundis consuluit . Judicibus mercedem , sive salarium ex ærario solvendum statuit , ne litigatores emungerent . Ad hæc comitiorum Populi libertatem , cum in legibus rogandis , tum in Magistratibus creandis , adeo custodivit , ut quoties Magistratum comitiis interesset , tribus cum candidatis suis circumibat ; supplicabatque more solemni . Ferebat & ipse suffragium in tribu , ut unus e Populo . Testem se in judiciis & interrogari , & refelli æquissimo animo patiebatur (a) .

Itaque quum Senatus eisdem juribus , ac in veteri Republica frui videretur , Optimates ad Rempublicam regendam veluti focii adsciti essent ; Equites ad amplissimum ordinem adlegerentur , milites donis , plebs congiariis alliceretur , provinciales non amplius Magistratuum avaritiæ exposti , ad Reipublicæ adhuc honores vocarentur ; quid mirum si nova hæc Reipublicæ forma diu feliciterque persisteret , quum omnium interesset incolumem servari ? Attamen quia omnia hæc sic agebantur , ut Monarchiæ congruerent , legibusque novis tandem aptarentur ; ideo paulatim insurgere , munia Senatus , Magistratum , legum in se trahere , nullo adversante cæpit . Atque ex reliquis optimatibus , qui ex proscriptionibus superstites evaserant , illos opibus & bonore extollere , qui sibi assentientes novum regimen optabant , ut novis ex rebus aucti , tuta , & præsentia quam vetera , & periculosa mallerent . Sed quum omnia hæc diligentiori examine , longiorique sermone , ut Octaviani Cæsaris regimen penitus intueamur , ejusque leges pernoscamus , indigeant , ideo de his omnibus singulatim agendum .

## §. II.

(a) Sueton. in Octavio .

## §. II.

*De Romano Senatu .*

**N**on mihi in animo est omnia Romani Senatus jura hic expendere: longum enim esset ea enarrare: illa tantum seligam, quæ instituto meo magis inservient. De Senatu Romano hæc refert Polybius (a): *Primo quidem Senatus habet curam ararii: nam & introituum, & expensarum plenum penes eum est arbitrium: & deinde maleficia ac crimina per Italiam commissa, de quibus publicum judicium constitui oportebat, ut proditiōis, conjurationis, veneficii, cædis, atque insidiarum, ad Senatum relata. Præterea ad Senatum spectabant legationes ad exterarum gentes, vel ab iisdem Romam missæ, Provincialiumque de Præsidum sententiis appellationes. Sed hæc omnia, quæ libera Republica ad Senatum pertinebant, minime poterant cum Monarchia congruere, quum in hac nova imperii forma publicum ærarium, quo miles alitur, penes Principem esse debeat; & legationes, nec non appellationes de Præsidum sententiis uni deferri debeant, eique criminum vindicta servari. Quid Octavius? Cuncta ne una spongia delevit? Minime, sed paulatim quidem, & clanculum, veritus, ne si subito homines in alium deducere statum cuperes, res ea sibi parum esset successura.*

Itaque Imperator, ut Senatum in suam redigeret potestatem, eodemque tempore Ordinem equestrem, plebemque obnoxiam sibi faceret, utque judicia de Civium omnium moribus, gradu, opibusque ad se transferret, ad Censuram animum appulit: eamque sane non Censoris nomine, quod Romanis maxime invisum, sed Præfecti morum surripiens, non palam appetiit, sed id subdole curavit, ut ad constituendam Rempublicam, eamque ab vitiorum colluvie, quibus bellis civilibus furentibus, foede deformata esset, purgandam, tanta potestas ultro demandaretur. Itaque hujus Magistratus compos factus, Senatum legit, in quem tum bene de se

sen-

(a) *Lib. VI.*

sentientes cooptavit, tum ambiguae fidei Patres, invisosque ex eodem movit. Aucto igitur Senatorio censu, honoris specie, sed revera, ut liberius sibi arbitrium esset, plurimos ex Ordine Equestri Senatores adlegit; nec se ab fociis, foederatisque gentibus, si qui forte, vel auctoritate, vel bonorum copia apud suos valerent, abstinuit. Atque id ut a Provincialibus tutior esset, a quibus seditionum duces abessent. Quod sane consilium fuerat Mæcenatis, *Omnibus iis esse Civitatem dandam, ut hujus quoque particeps, fideles nobis socii sint, nostram quasi unicam Urbem ipsi quoque incolentes, eamque vere urbem, suas autem patrias, agros, & pagos putantes.* Quum autem Senatui singulos quosque de se meritos, quique suæ dominationi firmandæ pares viderentur, adjecisset, amplissimum Patrum consilium frequentius effecit, quemadmodum profecto Mæcenas admonuerat, cujus verba quum sint appositissima, minime omittenda sunt. Ait is: *In Senatoribus autem, Equitibusque legendis, nihil anxius de numero, omnes quotquot tibi digni visi fuerint, recipies. Quanto enim plures viri eximii tecum erunt, tanto facilius omnia, quæ facto usus erit, perficies; subditosque in hanc persuasionem adduces, quod eos non servarum, aut deterioris, quam Romani sint, conditionis hominum loco habeas; sed quum eis omnia nostra bona, ac ipsum etiam imperium communices: ut ipsi etiam majori studio in id, ad se quoque pertineans, tuendum incumbant.* Lecto Senatu, novisque Patribus aucto, jura dedit de ætate, & de censu Senatorum. Ad hæc jussit neminem eorum sine ejus vœnia ab Italia proficisci, ne scilicet a Principis oculis se avertentes, nova molirentur. Sanxit item, ut a nemine Senator, nisi a Senatore judicaretur, utque judicia de veteri more fierent, legationesque, ut antea, ad Senatum adhuc pertinerent. Ecce tibi amplissimum ordinem Octavii potestati omnino obnoxium. Nec vero solertissimus Princeps minus Patres in hoc majestatis suæ fastigio reveritus est. Nam die Senatus numquam Patres nisi in Curia salutavit, & quidem sedentes, ac nominatim singulos, nullo submonente: & discedens eo modo sedentibus singulis vale dicebat. Nec ideo libertas, aut contumacia fraudi cuiquam fuit: dicebat enim: *Contradicerem tibi, si locum haberem*

*rem . . . & licere oportere Senatcribus de Republica loqui . Sed quisnam ei contradiceret , quum omnes ejusdem censoriæ potestati perpetuo subderentur ?*

A Senatu transeamus ad Equites , quos sane non sine prudenti consilio & ipsos ingenti numero adauxit : nihil enim ad Aristocratiam deprimendam præsentius est , quam ordinem medium attollere . Præterea imperavit , ut judiciorum , quæ apud Senatum erant , participes Equites fierent , ærarii que per provincias curam gererent , additis tamen a Principe , qui rationes sedulo acciperent , atque , si quid novi fieret , referrent . Non parum ex his Senatus auctoritas imminuta : tum enim ejus judicia cum Equitibus communicata , tum etiam ærarii cura , quod est Reipublicæ robur , a Senatu avulsa , atque ordini Equestri concredita . Denique duos ex his , ut Principis satellitibus præessent , legit ; ut si quis forte eorum insidias strueret , ii explorarent , quibus potestas esset vitæ necisque , non modo in milites in Italia morantes , sed etiam in Cæsarianos , hoc est , qui in familia Principis erant , præter Centuriones , aliosque , qui Senatoriis Magistratibus subderentur . Quo facto , Ordinem Equestrem Octavius mirum est , quantum sibi obstrinxerit , ejusque fidem devinxerit . Videamus tandem , quo pacto se in hoc generali censu cum plebe gesserit . Id quidem Mæcenæ Politicorum tunc temporis facile princeps , admonere solebat , ut ex plebe cujusque ingenium inspiceret , eosque qui efferatis moribus essent , ab iis , quos moratiores videbat , fecerneret ; atque illos maxime vero , si ætate , ac viribus pollerent , bellorum studio adduceret , *ut citra ullius injuriam alerentur , & reliqua pars sine periculo degeret* . Hos vero quippe mitioris indolis homines , agriculturæ , maritimæ negotiationi , aliisque pacis artibus dederet . Sic enim in Urbe omnia tuta fore , ejectis illis , a quibus turbæ , atque injuriæ timebantur . Jam provido consilio libenter assensus Octavius , pro cujusque moribus omnes , alios aliis artibus domi militiæque addixit . Ex quo factum est , ut intentis omnibus , quo suum quemque ingenium ferebat , hilarem plebs , quietamque vitam degeret , cunctaque in tranquillo essent . Atque hoc sane illud est , quod ante occupavimus , eam  
nem-

nempe Octavium in Monarchia sua Rempubicam instituisse, quam omnium interesset diu sospitem manere. Sed ad alia pergamus.

In recensenda plebe multos vidit ære alieno misere, esse oppressos, atque eorum profecto nomina indulgentissime solvit: imo posteritati consulens legem per quam jucundam tulit, ut obæratı deinceps, ne a creditoribus vexarentur, bona sua cedendo, liberarentur; de quo infra, quum de legibus Juliis, differemus. *Tanta denique comitate adeuntium desideria excipiens, ut quemdam joco corripuerit, quod sic sibi libellum porrigere dubitaret, quasi elephantı stipem. . . Plebem promiscuis salutationibus admittebat: quum ex veteri more Consules, aliosque magistratus salutare non cuique vulgo daretur. Dominus ne a liberis quidem suis passus est appellari; ut Populum edoceret, quanto odio persequeretur dominatum. Eoque imperante, nemo aliis invidiæ erat: Nam amicos suos magnos, & potentes voluit esse in Civitate, ut tamen pari jure essent, quo ceteri, legibusque judiciariis æque tenerentur.*

Quæ igitur Monarchico regimini nihil obstabant, ultro Populo dabat. Quid vero illa, quæ a primordiis usque Urbis penes eum erant, quæque adversa fronte cum nova Reipublicæ forma pugnabant? Num æquo animo belli indicendi, foedusque ferendi jus, legum ferendarum, Magistratuumque creandorum arbitrium in populo ferre poterat? Sane Monarchia dissolvitur, si penes alios, præter Principem, hæc tanta potestas versetur. Sed in his ita se gessit prudentissimus Octavius, ut sensim a Populo cuncta auferret, nec alicujus invidia laboraret. Mansit quidem Populi potestas in Magistratibus per comitia creandis, sed non aliis profecto ab iis, quos Principes idem commendabat, qui tamen exoptare neminem sinebat, nisi meritissimum, ut propterea semper in commendatione sua adjiceret, si mereretur: ita enim Svetonius refert: *Nunquam filios suos Populo commendavit, ut non adjiceret, si merebuntur. Leges licet præter comitia non paucas pertulerit, aliaque suo arbitrio sanxerit, plura tamen etiam Populo promulgabat, ut is, si quid minus placeret, emendaret, borratus omnes, ut si quid melius haberent, consulerent in medium.*

F f

Sed

Sed non contentus suo censu Octavius, eundem iteravit, & sæpe quidem, donec Rempublicam pro sua sententia ordinasset, nempe ut Monarchiæ Civium mores congruerent. Quid enim prosunt leges novo regimini accomodatæ; si Civium mores ita comparati sint, ut novam Civitatis formam fastidiant? Quapropter jure merito Mæcenæ monuit, ut *novam magistrum crearet, qui genera, facultates, moresque Senatorum, & Equitum, adutorum juxta, ac puerilis ætatis, itemque mulierum, & familiæ totius examinet, ac procuret, eaque corrigat, quæ cum supplicio nondum digna sunt, tamen neglecta multis ac magnis malis occasionem præbent: de maioribus tamen ad te referat.* Quod profecto sapientissimum consilium fuit: nam Aristoteles inter præcepta politica & id commendavit (a) his verbis: *Quia autem propter privatas vitas res novas quarunt: instituendus est Magistratus aliquis, qui observet eos, qui Reipublicæ non vivant accomodate, in Democratia quidem ad Democratiam, in Oligarchia vero ad Oligarchiam, itemque in unaquaque Reipub. ad ministrandæ formæ.*

Quapropter in omni Republica institutus is Magistratus fuit. Sic Athenis in Civium vitam, mores, & artes in Areopago inquirebatur. Eratque etiam apud Græcos mulierum moribus præfectus certus constitutus. Hinc puerorum educatio Spartæ non cuique privato dabatur, nempe parentibus; sed eorum disciplina ad Rempublicam ipsam spectabat, ne scilicet civium vita, moresque ab ipsius regiminis forma distarent. Qua de re merito Sallustius, Livius, aliique Syllam, ac Lucillum accusant, corrupisse eos Rempublicam Asiatica luxuria, illamque evertisse.

### §. III.

*De Tribunatu plebis, Pontificatu Maximo, ac Proconsulatu.*

CONquirebat Octavius undique externas species, quibus Regiam potestatem obtegeret; imperiumque, quo utebatur.

(a) *Lib. V. cap. 8.*

tebatur , non nisi a Populo sibi demandatum præferret . Hinc quum sub Censuræ nomine Senatum in suam rede- gisset potestatem , & ceterorum Civium mores , bona , atque famam per censum sibi subjecisset , quo nempe eorum vitam novo regimini accomodaret , par erat , ut jura aliorum Magistratuum sibi arriperet , quibus partes Summi Imperii singulatim divisas sibi uni subderet . Itaque Tribunatum , Pontificatum , imperiumque Proconsulare assumpsit , ut jura Populi divina , humanaque per hæc nomina suo arbitrio moderaretur , utque potissimum per imperium Proconsulare legiones per omnes Provincias in sua manu forent . Ne autem credas , aperte eum , atque auctoritate sua hos Magistratus occupasse : immo vero sic se gessit , ut Populus ultro daret , neque uno eodemque tempore , sed singulatim quidem , & prout occasio se offerret , ad Rempublicam scilicet sub nova regiminis forma componendam : quos sane acceptos subdula arte tamdiu in sua potestate retinebat , quousque Respublica tot fessa malis quiesceret . Hinc sæpe se iis abdicaturum simulate adjiciebat , Senatum deprecatus , ut a Reipublicæ curis eum tandem exolveret . Sed istiusmodi non ex animo abdicaciones nunquam Senatus probavit . Noverant omnes , id per Octavium agi , ut technis istis , fucum Populo faceret , Magistratusque illos nonnisi precario nomine geri obtruderet . Sed alii beneficiorum memoria obstricti , spe alii , atque expectatione sustentati , abnuebant , ejusque animi moderationem prædicabant . Ita nimirum omnia ei fausta cessere , qui toto vitæ curriculo subdolis his simulationibus cuncta divina , & humana sua in potestate habuit .

Licet Tribunicia potestas a modicis profecta initiis , tantum instituta fuerit , ut præsidium plebs nancisceretur contra vim potentiorum , tamen , præter hoc jus intercedendi , procedente tempore , per civiles motus tanta auctoritate cumulata est , ut Optimates , & Tribuni de summa rerum invicem certarent : jus enim Tribuno fuit Senatum convocandi , ejusque Decreta approbandi , vel rejiciendi , plebiscita rogandi , quæ in comitiis tributis perlata , plebem tantum antea tenebant , deinde vero lege Hortensia omnes cujusque ordinis ci-

ves. Hinc ejus potestas ad id fastigium fuit evecta, ut Consules ipsos posset in carcerem conjicere: quoque omni securitate polleret, Sacrosanctus est declaratus, ut nempe qui ei injuriam intulisset, Diis cum bonis suis sacer esset, hoc est impune a quocumque interfici posset, bonaque Cereri sacrentur.

Hanc tantam potestatem sibi assumpsit Octavius, ut jus ferendi leges, habendi Senatum, ejusque decretis, quum e re sua non esset, obsistendi, nancisceretur. Sed quum Tribunus e plebe creari deberet, ac Patricius Octavius esset, hac de causa Tribuni rejecto nomine, potestatem tantum illius arripuit, ejusque securitatem accepit, qua adeo vitæ suæ, ac famæ consuluit, ut sacer esset, qui eum offendisset, quum in Tribuno Populum violasse, & Tribunum in Principe censeretur. Qua de re nil mirum si Octavius, & deinceps insequentes Principes graves animadversiones in vitam, & in bona sibi infestorum, non a Regio jure, quod tunc Romæ exulare simulabatur, sed a Tribunicia potestate promanare jactarint. Itaque Octavius, quum per hanc subdolan rationem eorum omnium fuerit potitus, in quibus cardo Majestatis inesse putabatur, apposite scripsit Tacitus, *Id summi fastigii vocabulum reperisse, ne Regis, aut Dictatoris nomen adsumeret: O tamen appellatione aliqua cetera imperia præmineret.* Immo tanti Tribuniciam potestatem Principes æstimarunt, ut annos suos a die, quo eam susceperant, enumerari voluerint. Sed non hic prætermittendum est, Octavium ceteros Magistratus ad tempus, hanc autem perpetuo gerendam suscepisse, quum per eam nemini de Regiæ potestatis ambitu suspicari daretur, quando Tribunicus Magistratus popularis erat, atque ad plebem tuendam institutus.

Urbanis his Magistratibus arreptis, Octavius Imperium quoque Proconsulare in omnes Provincias a Senatu sibi demandari studuit, non quidem quod eo careret, quum omnes jam Provinciæ suæ potestati inservirent, sed ut callide præferret, ex veteri Reipublicæ more Imperium suum referre acceptum Senatui. Nec fane parvi pendenda est hæc dignitas: is enim, cujus in imperio erant Provinciæ, vim mi-  
li-



litum in sua manu habebat, per quam facillime profecto ad summi Imperii jura pervenire poterat. Quare Trajanus ut videretur sibi designasse successorem Neratium Priscum, sic eum alloquutus est: *Commendo tibi Provincias, si quid mihi fatale contigerit.* Provinciarum scilicet nomine ipsum Imperium respiciens, quum in illarum administratione potissimum, ut dixi, verteretur Principatus: Sed advertamus opus est, Octavium, ceterosque Principes non dictos Proconsules, sed imperium Proconsulare tenere, ut intelligeretur hoc imperium sibi non in aliquas Provincias, sicut ceteris Consulibus solemne fuerat demandari, sed collatum in omnes, quotquot Reipublicæ Romanæ subderentur. Erat igitur id cum universale, tum summum, & liberum, hoc est, tam in re civili, quam militari, sine provocatione, quale Cn. Pompejus lege Gabinia in bello piratico acceperat. Sed quum ceteri Consules extra pomerium imperium hoc, sublati insignibus, postquam Consules, & Imperatores a Senatu dicti erant, expromerent; Octavius tamen ex S. C. intra ipsum pomerium idem retinuit.

Ne autem tantum Imperium, uni collatum, esset invidia; & Reipublicæ libertatem pessumdare videretur; ita Octavius scenam struebat, ut minime antiquum regimen immutatum quis sentiret, tantamque potestatem sibi extra ordinem conceditam censeret. Itaque imperium illud armorum non evertendæ, sed tuendæ Reipublicæ esse jactabat; idque in tanta dominationis magnitudine, & multitudine rerum gerendarum, quæ sæpe fines ordinariorum Magistratuum excederet, necessarium: quum adeo omnia per bella civilia mixta, ac conturbata, ut ad extraordinariam potestatem, tamquam Reipublicæ dexteram, sive ad compefcendos populorum adhuc furentium motus, sive ad improvisos ac subitos in Provinciis tumultus comprimendos, confugiendum fuerit. Ad hæc ne per hanc dignitatem clanculum videretur sibi ad Dictaturam, adeo ex Cæsariano die Populo infestam, sternere viam, imperium hoc a se non perpetuo gerendum obtrudebat, sed ad quinquennium, aut si mallent, ad decennium habiturum: unde profecto orta sunt decennalia, tam frequenter in historia

ria Principum commemorata . Quum enim facile iis esset , peracto decennio , novas Provincialium turbas , vel veteres nondum sedatas , populo objectare ; quamvis eo se Magistratu dicis causa abdicarent , quodammodo tamen inviti eundem iterum suscipere a Senatu rogabantur . Atque ita profecto , decennale quamvis Imperium Proconsulare , toto vitæ cursu Principes præter invidiam gessisse leguntur . Sed ne putes unum Octavium totius Imperii curas sustinuisse , cunctaque arbitrio suo moderatum : aderat enim Senatus , Reipublicæ mens & ratio , ut antea ; aderant Consules , Prætores , ceterique , per quos pro sua cuiusque parte , ut supra diximus , res gerebantur more majorum . Sed hi quidem ab ejus nutu pendentes sua jussa expectabant ; ille vero a Principis sui sententia discedere piaculum arbitrabatur : quare merito Tacitus , *Non Regno* , inquit , *neque Dictatura* , *sed Principis nomine constitutam Rempublicam* . Tantum quippe opus erat , ut quassatæ res ad pristinam tranquillitatem redirent .

Sed ad summam illam auctoritatem , quam intendebat , deerant adhuc non pauca , nempe Pontificatus Maximus , potestas Consularis , ac judiciaria demum dignitas , ad evertendum scilicet Prætoris , Ædiliumque Tribunal , qui sub æquitatis specie , novis vocabulis conquisitis , novisque compactis formulis , potestatem leges condendi arripuerant . Quæ sane cuncta ut sensim ad Octavium permeaverint , brevi videndum est . Jus , quod maxime jactabant Consules , id erat , nempe Senatum quoties vellent , habendi , ad eumque de quacunque re referendi . Potestatis hujus cupidus Octavius , ceterique deinceps Imperatores , sic se gesserunt , ut , dum etiam Consules non essent , tantam auctoritatem a Senatu ipso obtinerent . Qua de re legimus , tot Senatusconsulta habita per Octavium ; quæ licet reipsa leges essent , ut SC. Vellejanum , aliaque , leges tamen non appellarent , ne viderentur potestatem legislatoriam sibi arripuisse . Itaque nomine tenus Senatus Consulta dictabant , hoc est , a Senatu facta , se referentibus ex potestate a Patribus ipsis tradita .

Quod ut magis elucescat , animadvertendum est , Romulum postquam Urbem condidit , ejusque regimen Patribus , po-

populique comitiis tribuit, Senatum instituisse, tantamque ei vim dedisse, ut in Reipublicæ administratione nil ratum foret, nisi Patrum accessisset auctoritas, sicuti apud veteres vestigia quædam vetustorum Senatus Consultorum adhuc supersunt. Verum hæc erant potius decreta quædam, quæ a Patribus sua auctoritate, absente Populo edebantur, quam iussiones, aut leges: nam ut pervulgatum est, leges ferri non poterant ex Romuli instituto, nisi in comitiis per universi Populi suffragia. Erant igitur Senatus Consulta decreta, quibus Patres auctores fiebant legum, quæ in comitiis rogari debebant. Sed hæc potestas deinde, Tribunis creatis, haud parum immutata fuit. Hinc S. C. Plebiscitorum, atque legum perpetua quasi pugna. Quamquam autem explorati juris sit, Senatus Consulta legum nomine non venisse; nolim tamen omnem iis vim detrahi, quæ sane pro temporibus aliis alia fuit. Sed quo primum tempore factum sit, ut veras leges Senatus ferret, haud mihi dubium est, quin ab Augusto repetendum censeam. Nam quum res, si ad pauciores pervenerint, facilius ad potestatem unius deducantur, cui sane expeditius est paucos superare, quam plurimos; sapientissimus Princeps magis e re sua putavit, Senatum leges perferre, quam universum in Comitiorum turbis populum; maxime vero, quod Patrum auctoritatem infringere facilius, quam Populi potestatem foret. Quæ profecto causa fuit, quare Tiberius populi comitia ad Senatum omnino transtulerit; nempe quo proclivius deinde in manus suas devenirent. Itaque jure merito dicendum, regimen Romanæ Reipublicæ a vi & potestate Regis ad Populum, a Populo deinde ad Senatum, a Senatu demum ad unum, nempe Octavium devenisse.

Ne autem credas, illum per hæc Senatus Consulta omnino labefactasse comitia, ut leges nonnisi per Senatum conderentur; nam sic prudentissimus Imperator rem temperabat, ut modo suo arbitrio, modo per Senatus Consulta, modo vero per populi comitia cuncta gubernaret; ne uno eodemque tempore res omnes novaret, sed paullatim, ac veluti per gradus, populus novo regimini assuesceret. Sic enim scripsit Dio: *Comitia vero populi, etsi nibileminus ba-*  
be-

bebantur, tamen nihil præter voluntatem Augusti agebatur. Magistratus partim ipse designabat, alios Populo, plebique creandos permittebat, id modo curans, ne qui indigni per coitiones aut ambitum designarentur; & denuo non omnia suo arbitrio sanciebat, sed plura etiam populo promulgabat, ut is, si quid minus placeret, emendaret; ut ait etiam Tranquillus. Verum jam e memoria pene exciderat, quidnam illud Relationis jus de una re tantum Octavio datum præferret, quum passim apud Historiæ Augustæ Scriptores jus *tertiæ*, *quartæ*, & *quintæ* Relationis perlegamus Principibus datum. Sane jus referendi ad Senatum portio quædam Regiæ potestatis erat, quæ, Regibus ab Urbe exactis, ad Consules demigravit. Itaque Octavius, ne videretur Regiam potestatem ambire, ut, quum Consul haud esset, tamen de quibuscumque rebus, ut sibi liberet, ad Patres referret, arctam hanc sibi potestatem voluit concessam, nempe ut quum haberetur Senatus, nonnisi unam rem posset referre. En verba Dionis: *Et ei permisit de una re, quamcumque voluisset, quoties Senatus haberetur, relationem facere, quamvis Consul non esset.* Quæ sane pura puta versio est, non illa Xylandri, qui verbo *de una re* prætermisso in ejus locum substituit, *de quibuscumque rebus vellet* quod communi Historicorum traditioni adversatur. Licet enim firmata Monarchia legamus ceteris Imperatoribus datum jus *tertiæ relationis*, ut Probo, ut Pertinaci *quartæ*, & M. Antonino *quintæ*; supra vero hunc numerum non legimus. Igitur ut rem colligamns, Relationis jus, quod Octavio decretum, non liberum fuit, & vagum, sed de una tantum re, quamvis de tribus, quatuor, & quinque ceteris deinde permissum.

Sed ut a rerum civilium potestate, ad ingentem illam Sacrorum veniamus, postquam Octavius jura prope omnia humana sibi adscivit, nequaquam se ab omni parte tutum ratus est, nisi auctoritatem suam religione, qua humana cuncta mire protegentur, munivisset. Enim vero in Reipublicæ administratione quantam vim tum apud Romanos, tum apud gentes omnes Religio haberet, nemo est quem lateat. Quum enim illi res divinas politiæ subjicerent, omniaque Religionis arcano obvolverent, mirandum non est, tanti



*augur alio die dixerit? Quid magnificentius, quam posse decernere, ut Magistratu se abdicent Consules? Quid religiosius, quam cum Populo, cum plebe agendi ius, aut dare, aut non dare? Quid legem? si non jure rogata est, tollere? Vide ex his quale apud Romanos Reipublicæ arcanum fuerit religio. Quapropter quum ea apud illos, ceterasque gentes comitaretur Imperium, ac tam arcte civili regimini adhæresceret, non mirum si tam solliciti fuerint, ne quis religionem peregrinam adscisceret, neve Deos ullos quis coleret, præter eos, quos Senatus censuisset. En ejusdem Tullii verba (a): *Ad Divos adeunto caste: pietatem adhibento: opes amovento. Qui secus fanit, Deus ipse vindex erit. Separatim nemo habessit Deos: neve novos, sed ne advenas, nisi publice adscitos, privatim colunto.* Si enim, ut vidimus, civili regimini religio serviebat, eamque instituerant, quæ ipsius regiminis formæ responderet, quis Reipublicæ mutationem non metueret, si quid novi religioni receptæ jam, usitatæque adjiceretur?*

Sed videamus nunc, quo studio Octavius in re religiosa se gesserit. Vix profecto dici potest, quanta cura res sacras prosequutus sit. Ante omnia libros Sibyllinos, vetustate corruptos, denuo describi sumptibus suis jussit. Pontificum collegium recensuit: Vestales Virgines adeo veneratus est, ut palam dixerit, primam, quam haberet, filiam, Vestæ mancipaturum; quum turbata jam Republica, adeo prope elanguisset Sacerdotium hoc, ut Virgines sorte per Pontifices, & quidem invisis parentibus, legerentur. Pontificatum Maximum numquam sibi voluit arripere, nisi mortuo Lepido, quum fas non esset, vivente Pontifice Maximo, alium creari. Sacra Ægyptia prohibuit. Sed omittamus cetera, ne plus æquo longiores simus. Verum non possum, quin hic Mæcenatis præceptum exscribam. *Deos (is ait) quoque, semper & ubique ita cole, ut moribus patriæ est receptum, ad eundemque cultum alios compelle: peregrinarum vero religionum auctores odio, & suppliciis prosequere; non modo Deorum gratia, quos, qui contemnit, baud dubie nihil quoque aliud magni faciet; sed*

(a) De legibus lib. 2.

*sed propterea etiam, quod qui nova numina introducunt, multos ad usum peregrinarum legum pollicunt: inde conjurationes, coitiones, & conciliabula existunt, minime unius Principatus commoda res.*

Itaque Octavius, quum per potestatem Censoriam, & Tribuniciam res humanas pene omnes moderaretur, per Pontificatum Maximum Divina quoque suæ potestati subdit, ut eas de rebus sacris perferret leges, eamque religionem præferret, vel peregrina numina vetando, vel ea instituendo, quæ regimini suo congruerent, sibi, suæque Reipublicæ consularent. Et quidem tanti munus hoc Pontificatus fiebat, ut insequentes Imperatores, &, si superis placet, Christiani ipsi ad Gratianum usque, ad compescendos Ethnicorum, qui adhuc supererant, motus, etsi non ex animi sententia, simulate tamen susciperent. Non enim profligata omnino falsa Deorum Religione, periculum erat, ne si penes alios Pontificatus Maximus esset, per eos Civium animi averterentur. Atque hæc, meo quidem judicio, causa fuit, cur Christiani Imperatores Pontificatus maximi titulum sibi vindicarint, quamvis Tillemontius, & Jacobus Gothofredus in alia discesserint. Mitto hic de judiciaria potestate, quam & sibi assumpsit Octavius, loqui; quum de ea peculiari capite mihi edisserendum sit. Alia modo percurramus.

Præter hos populares quidem Reipub. Magistratus, quibus Princeps noster ad Regiam Majestatem, qua per se fruebatur, obtegendam, ornatus est, magnifica sibi Augusti, & Patriæ Patris nomina indidit. Patris Patriæ nomen id præferebat, ut Cives admonerentur, Octavii Imperium paternum esse, sequæ ab eo, ut filios fausta omnia speraturos. Augusti autem appellatio venerationis, & honoris, non potestatis incrementum est. Etenim quum Populus Romuleo nomine nuncupare eum averet, omnino id respuit, ut & illud Dictatoris, quippe quod fatale nimis ejus patri fuerat, ac Regum nomenclatio Reipub. Romanæ invisa. Itaque Augustum potius se appellari sivit, quum ab eo nomine nihil timeret, quod venerationem potius, & reverentiam præferret, quam ullum novæ potestatis additamentum.

Vidimus jam Augustum, Magistratum Romanæ Reipub. fere omnium potestatem exhaustisse: reliquum est, ut animum ad studium vertamus, quo omnia, licet occultissime, ad Monarchiam converterit: & quamquam occupata quædam antea a nobis sint, adhuc tamen non pauca supersunt dicenda. Quum ex Censuræ munere, quam sub nomine Præfecturæ morum exercuisse narravimus, ad eam vivendi normam rede-gisset Civium mores, ut novo regimini congrueret; Senatum etiam, ceterosque ordines eodem censorio jure potestati suæ subdidit. Ex quo factum est, ut quas voluerit leges, tulerit, obvolutas tamen religionis cujusdam arcano, ne Monarchia pateret. Sed inter ceteras hanc tulit, *ne plus quam bis in mense, legitimus Senatus ageretur, Kalendis, & Idibus* (a): quum Majestatis illius amplissimi confessus non esset, frequenter convenire, nisi statis temporibus. Quæ sane honoris causa in cute erat, quum intus regnandi cupiditas foveretur. Non enim in mutata Reipub. forma par erat, ut Senatus crebro, & assidue haberetur. Ex jure vero illo referendi id consequutus est, ut per Senatum quæcumque vellet, fanciret. Nam licet Tranquillus asserat, *Eum sententias de majori negotio, non more, atque ordine, sed prout libuisset, prærogabat: ut perinde quisque animum intenderet, ac si censendum magis, quam assentiendum esset*; quis tamen quæso Principi referenti ausit obistere? Quinimo satis docent historici, quantis plausibus relationes Principum exceptæ fuerint. Augustus per orationem, quæ vellet Senatui exponere, & secundum eam Senatus Consultum fiebat: unde invaluit, ut orationes Principum apud Senatum pro legibus forent, quum nunquam Senatus Principum voluntati oblectaretur. Refert Tranquillus, Augustum *nonnisi meditata, & composita oratione in Senatu, ad milites usque ad Populum loquutum*: ut quum Senatus a sententia sua minime discederet, Populusque assentiret, parentque milites, id non a metu potentæ oboriri, ut per Tribunos, aliosque factitatum in vetusta Reipublicæ libertate, sed a suasionis vi proficisci ostenderet.

Ve-

(a) Sueton. in Octav.



Verum ex quibus omnium maxime Senatus auctoritas afflicta fuerit, Præfectura Urbis fuit, ab Augusto instituta, & Imperium Proconsulare, per eundem acceptum. Multa quidem de illa priori dicenda habeo, quum de Magistratibus ab Augusto institutis inferius verba faciam: interim tamen non prætermittendum est, Urbi Præfectum cognitionem habuisse criminum, quæ in Urbe, atque extra eam adusque octoginta & unum passuum millia patrabantur, quorum profecto quum antea animadversio ad Senatum pertineret, per hanc Augusti institutionem imminuta non parum est Patrum potestas. Neque res huc usque stetit, sed ulterius progressa est: nam provocaciones si antea Provincialium a Præsidentum sententiis ad Senatum interponerentur, deinde vero vel ad Præfectum, vel apud ipsum Principem deferrebantur: atque hoc, ut infringere summm illud imperium, hoc est, illa potestas, qua Senatus in facinorosos antea fruebatur. Sic enim voluit Mæcenas, ut nemo *merum imperium ita obtineret, ut non ab eo provocari possit ad Principem.*

Sed si per Præfecturam Urbis Senatus majestas concidit, nequaquam vero Patriam, & Dominicam potestatem integram Augustus reliquit. Causam enim arripiens emendationis filiorum, morumque servilium, abstulit a patribus, dominisque inveteratum illud vitæ, necisque jus, voluitque, ut filiorum, servorumque criminum cognitio Præfecti esset,isque eorundem mores inspectans, ad legum præscripta exigeret. Et quidem congruebat imperium id domesticum democratæ, minime vero Monarchiæ, ubi jus hoc capitale uni tantum esse debet peculiare. Sed veniamus ad Proconsulare Imperium. Simulans Imperator eo sibi ad pacandas Provincias opus esse, factum est, ut unus is legionibus omnibus Romani Imperii imperaret. Hinc quum nulla prope Provincia esset, a qua non timerentur tumultus, omnia fere ubique versus Imperio Augusti suberant, Senatusque potestas adeo elanguit, ut paucis quibusdam, atque inopibus ei relictis Provinciis, non nisi umbra quædam veteris Senatus videretur. Sed ne forte Provinciis Senatoriis tumultuantibus, militaris potestas ad Senatum rediret, statuit, si una in iis seditio suboriretur, se

se easdem accepturum, aliasque pacatas vicissim daturum, hanc ingeniosissimam prætendens rationem, ne Senatus bellicis curis implicaretur. En de hoc præclarum Tranquilli locum: *Provincias validiores, & quas annuis Magistratuum imperiis regi, nec facile, nec tutum erat, ipse suscepit, ceteras Proconsulibus sortito permisit: & tamen nonnullas commutavit interdum: atque ex utroque genere plerasque sæpius adiit.* Sed operæ pretium est videre, quam ob rem Augustus inter Provincias Senatui traditas, Italiam adjecerit. Dion quidem enumerans Provincias inter Octavium, atque Antonium divisas, hæc de Italia habet: *Italiam autem, eximiam semper in hujusmodi rerum statu fuisse, dicere nihil attinet, quum non de ea, sed pro eius salute certare se ii præsetulerint.* Igitur si conjectare liceat, Italiam Augustus Senatui reliquit, ut Terrarum Orbis imperium tenere ille videretur, quum eam Provinciam obtineret, ubi Romani Principatus sedes erat. Sed revera simulationis hæc causa fuit, quod in ea nullæ essent legiones, nihilque ex Senatus in eandem imperio periculi timeretur, in qua omnia Principis oculis paterent.

Porro autem inter jura summi Imperii principem locum tenet jus vitæ, & necis; quod sane per judicariam potestatem exercetur. Habebat hoc Octavius in Cives Romanos, tamquam Tribunus, nempe in comitiis populi, ubi de maximis criminibus, veluti perduellione, agebatur; in Provinciis autem, uti Proconsul eodem jure profecto utebatur, sed ut id, atque alia ex suo arbitrio moderaretur; contra vero ex Senatus videretur auctoritate manare, hoc solertissimo usus est instituto. Jactavit se, senectute ingravescente, haud posse crebro Senatum adire ad ea decernenda, quæ Patribus auctoribus expediri fas erat: constituendum proinde sibi Consilium ex duobus, vel altero Consule, si quando ipse consulum gereret, & ex Magistratuum singulis, atque ex Patribus quindecim sorte datis ad sex menses: sic enim memorix prodit Tranquillus: *Sibi que instituit consilia sortiri semestria, cum quibus de negotiis ad frequentem Senatum referendis ante tractaret.* Deinde vero per decennium publicæ administrationis cura sibi delata, viginti petiit annuos Senatores ea præ-

præditos potestate, ut quæ cum eisdem decerneret, cum universo Senatu decreta viderentur. Tandem vero, ut decretis suis perpetuam firmitatem tribueret, Senatusconsulto obtinuit, ut potestas omnis judicialis, & publica Senatus universi in suum consilium translata existimaretur, adeo ut rata essent consilii hujus decreta, non secus, ac si in Curia facta essent. Atque huc revocanda sunt hæc Pomponii verba: *Constituto Principe, datum ei ius esse, ut quod constituisset, ratum esset* (a).

Ne tamen putes, hoc constituto consilio, omnem statim Senatus auctoritatem concidisse: minora enim negotia, atque ea præsertim, quæ Principis Majestatem non offendeant, Senatui, ad pristinæ dignitatis ostentationem, relicta sunt. Quantum autem Consilii hujus commentum ad firmandam Monarchiam profuerit, infra videbimus, quum de consuetudine fori Romani, sub Augusto inventa, verba faciemus, ea tantum nunc discentes, quæ lucem iis, de quibus in præsentia agimus, adspargunt. Quum Octavio Senatoria dignitas ita collata esset, ut Princeps Senatus audiret, primus omnium sententiam rogabatur: quare in suo ipso consilio sententiam ante omnes dicenti, num quis obniteretur? Cuncta igitur pro suo arbitrio regebat, omnia suæ voluntati parebant, quamvis potestatem omnibus, si liberet, contradicendi dicis causa faceret. Ita enim eum admonebat Mæcenas: *Liberam dandi tibi ex animi sui sententia consilii omnibus potestatem facies, proposita securitate. Nam & si cujus tibi sermo probabitur, multum inde utilitatis ad te; & si non placebit, nihil incommodi redibit: quorum consilium existimabis sequendum, eos collauda, atque honora: nam illorum inventis gloriam tibi paries; quorum vero rejicies, nequaquam eos, aut ignominia afficies, aut culpabis cum ad eorum tibi voluntatem, non successum ejus, sit respiciendum.*

Itaque suo in Senatu Augustus omnia divina, atque humana moderabatur: quum enim Pontifex Maximus esset, sacra curabat; quum Princeps Senatus, quæ ad Senatum spectabant, decernebat; quum Proconsul, de Provinciis statuebat;

ob

(a) §. 2. D. de orig. juris.

ob Tribuniciam demum potestatem, quæ Populi erant, exercebat. Nec sane immutata videbatur vetus illa rerum gerendarum consuetudo, qua nihil ratum firmumque in Republica erat, cui Patrum non accessisset auctoritas. Ceterum hoc in Senatu non pauci aderant Jurisperiti, quibus ille de jure respondendi tribuerat facultatem, nempe ut Judices hos consulentes, ab eorundem responsis discedere non possent. Quum autem ii multis nominibus Octavio essent obstricti, antiquas sane leges, conquisitis undique interpretationibus, ad novum regimen callide accomodabant, ut mores civium, ipso usu Monarchiæ, sensim assuescerent, eique adhærerent.

Non mirum igitur, si hoc consilium semel a Senatu Augusto concessum, Tiberius, atque insequentes Principes omni studio servare adnisi fuerint, scilicet ne, illo dimisso, judicariam potestatem amitterent; maxime vero postquam Tiberius novis, ingentioribusque juribus locupletavit. Translatis enim Populi comitiis ad Curiam, atque a Curia ad ipsius Principis Senatum; judicia omnia, quæ Populi erant, præcipue perduellionis, & majestatis; & quæcumque negotia provocationis jure ad Populi comitia deferri solebant, ad Principis Senatum deciderunt, itaut ab hoc tempore Sacræ Cognitiones institutæ sint, quæ sive per Principum rescripta, aut mandata, sive per privilegia in Consultationibus, Appellationibus, Relationibusque, quæ apud Principis concistorium fiebant, exercebantur. Quin tanti Senatum hunc fecerunt Principes, ut quocumque eum secum adduxerint, vocaverintque Concistorium sacrum, quum ubicumque Princeps esset, ibi istiusmodi adessent Magistratus, majores, & primores Patrum, quos propterea & Consistorianos Comites nuncupabant. Demum singulari honore ornatos tanto amore prosequuti sunt, ut eisdem sæpe suos amicos appellarint, speciosisque cumularint titulis. Ex hucusque dictis vide quam ingeniose Augustus sibi omnes summi Imperii partes, quæ antea in multos erant divisæ, in Senatum, & Populum, in Tribunos, Prætores, Ædiles, Consules, Censoresque, assumperit, eo nempe quæsito colore, quod sibi mandatam a Populo potestatem exerceret, ne videretur communis libertas im-

immutata . Sed præcognita nova hac regiminis forma, operæ pretium est, ad leges explicandas nos accedere.

C A P U T II.

*De Constitutionibus Caesaris Octaviani Aug.*

Quum leges civilis regiminis formam, Civium mores, temporis conditionem, Principisque ingenium sequantur, ut sæpius a nobis est inculcatum; æquum profecto fuit, ut antequam ad Jurisprudentiam Augustalem accederem, regimen Augusti depromerem, ejus ingenium investigarem, Romanæ Monarchiæ revolverem initia, civiumque mores exponerem. Quare omnibus his, qua brevitate potui, jam absolutis, ad leges interpretandas aggrediamur. Jam vero quum leges civili regimini aptæ esse debeant, ac civile regimen ab Augusto institutum Monarchicum esset, arcano quodam tamen involutum, ut pristina libertas Reipub. minime immutata videretur; procul dubio asserendum est, eam jurisprudentiam sub eodem investam, quæ cum Monarchia faceret, & vetustam libertatem integre servatam simularet. Sic sane Julius quum, jam parta Dictatura, videret non ei congruere leges antiquas, novam juris compilationem excogitaverat: quare *statuisse* Tranquillus scripsit: *Jus civile ad certum modum redigere, atque ex immensa, diffusaque legum copia optima quæque, & necessaria in paucissimos conferre libros.* Sed quod morte præventus ille efficere minime potuit, Augustus absolvit, ea dando jura, *quibus pace, & Principe uterentur.* Ceterum advertendum est, Augusti leges Monarchico licet regimini accommodatæ fuerint, eas tamen fuisse, quæ non perfectæ Monarchiæ, sed orienti responderent: aliæ enim sunt leges, quæ adulto firmatoque jam Imperio conveniunt, aliæ vero quæ ejus oris aptantur.

Colligas ex dictis, quam latum discrimen inter jus antiquum Romanæ Reipub. & novum sub Octaviano Augusto intercedat, non solum quod ad publicum Civitatis statum, sed etiam quoad rem privatam: nec secus profecto fieri potuit.

H h

tuit.

tuit. Si enim imperium olim inter Populum, & Senatum tributum erat, nunquam leges, quæ in hac forma regiminis latæ sunt, Monarchico imperio pares erant, in quo Summi Imperii partes uni tantum conceduntur: nec poterat cum Imperatoria Majestate jus illud perstare, quo Prætores, aliique Magistratus legum latores facti sunt. Etenim in Monarchia penes unum legis sanctio esse debet. Ad hæc, quum in Democratia legibus æque omnes pareant, leviores profecto poenæ primum erant; contra vero in Monarchia, ubi alter quidem leges condit, alter vero iisdem sit obnoxius. Minime igitur incolumes sub Augusto servari poterant Reipub. Romanæ leges. Si autem privatorum instituta, & mores spectemus, haud secus disputandum: in Democratia quidem nihil obstat, quo minus patriam, & dominicam potestatem, jus vitæ, necisque in filios, & servos sequatur; in Monarchia vero nihil absurdius dici potest, quum unius Principis sit in Civium capita potestas: illic vivendi licentia laxior esse solet, hic vero minime, ubi non ad suum cuiusque ingenium, sed ad inexorabilem legum præscripta mores conformandi. Ex quibus ratio intelligitur, quapropter novam Jurisprudentiam, quæ longe a veteri distaret, in rebus tum publicis, tum privatis, inveheret Augustus.

Sed quum frustra leges sint, nisi Civium mores vitis depurgentur, ex quibus sæpe Urbes, & Imperia pereunt; ea propter Augustus & ad hanc partem manum admovit, ut emendatis moribus, aptior quisque promptiorque novis legibus suscipiendis fieret. Quibus autem malis laboraret tunc Romanum Imperium, fuscè a nobis supra dictum est. Furentibus enim bellis civilibus, pudicitia labefactata, militaris disciplina collapsa, grassabatur ambitus, suffragia venditabantur, judiciorum integritas pessumdata publica pecunia rapiebatur, socii concussionibus afflicti, Civibus securitas per proscriptiones adempta. Quid? Undique vis publica, vel privata, Urbs civibus orbata, publicum ærarium exhaustum, omnia flagitiis & sceleribus foeda. Igitur Augusti leges, quas pro eo ac potero aggredior exponendas, alia sunt ad firmandam Monarchiam, alia vero ad mores for-

formandos: ubi videbimus, quid ad impudicitiam per matrimonii castitatem evertendam, quid ad suffragiorum integritatem, judiciorumque sanctitatem revocandam sanxerit: videbimus singularem ejus prudentiam in corrupta nimis militum disciplina reparanda, in Præsidibus a Provincialium vexationibus deterrendis, in potentiorum vi ab inopibus amovenda: quid demum ad Urbis ornatum, civiumque tutamen statuerit; de quibus omnibus singulatim, atque ordine agendum. Quumque vel sanctissimæ leges incassum ruant, nisi præsto sint, qui sedulam earum exequutioni operam navent; pergam deinceps ad Magistratus, quos Augustus instituit, qui novo invalescenti regimini congruerent; demum vero me ad usum fori Romani, sub Augusto recens inventum, convertam, ubi admirabimur eam in litibus dirimendis inductam consuetudinem, qua per rerum ipsarum usum Civium mores Monarchiæ sensim assuescerent.

## §. U N I C U S.

*De Constitutionibus ad Urbis ornatum, & Conservationem.*

JAM ad jurisprudentiam Augustalem, ex locupletissimo historiæ penu depromendam, oratio mea pervenit. Imperator Augustus nil videbatur adversus antiquam libertatem moliri, leges arbitrio suo condendo. Vulgo enim receptum erat, posse in Republica Magistratus, quæ vellent, edicere. Hinc frequentissima Prætorum, aliorumque Urbana edicta, quibus, veteribus abrogatis, nova prorsus obrogabantur. Quum igitur Augustus Magistratuum omnium vim, & potestatem sibi arripuisset, a more institutoque Majorum alienum non putavit, de omnibus per edicta leges ferre. Itaque veteri Magistratuum potestate usus, jurisprudentiam sibi convenientem paullatim inducere curavit. Sed ne rerum novarum nimis studiosus videretur, non minori solertia se occultans, vetera revocare legibus suis distitabat. Hinc Dio tradit sæpe Populo commendasse, ne ab antiquis legibus desciscerent. *Primum leges firmiter retinete, neque quidquam in his mutate: nam*

Hh 2

quæ

*quæ eadem semper manent, etsi sint non nihil vitiosa, utiliora tamen sunt his, quæ subinde, etiamsi in melius, innovantur.* Etenim si eadem forma regiminis perstante, ægre plerumque Cives rebus novis assuescunt; quanto difficilius erit, mutata prorsus Republica. nova instituta probari, novasque leges æquo animo accipi? Quare prudentissime se gessit Augustus, qui dum Monarchicæ Reipublicæ formam instituens, novis Constitutionibus munire nitebatur, veteres leges demortuas ad vitam revocare simulabat. Hæc igitur potissimum præ oculis, in Augustali jurisprudentia exponenda, habere debemus, nempe novata omnia esse, quamvis speciosissima larva obvoluta, *ut nihil pristini, & veteris juris immutatum videretur*: atque eas leges ab Augusto perlatas, quæ non jam adultæ, sed inolefcenti adhuc Monarchiæ convenirent. Rem igitur his luculentissimis facibus, Deo auspice, persequamur.

Qua olim arte Græci, ceterarum omnium gentium foletissimi, in Repub. vel Aristocratica, vel Democratica in Monarchicam formam convertenda, usi fuerint, viri politici ex vetustis monumentis adhuc superstitibus satis docent. Omnium primum pietatem erga Deos, Sacrorumque religionem ad suismet cupiditates detorquentes, templis sedulo instaurandis, solemnibus sacris instituendis, aliasque Deorum ceremonias præcipiendo, rerum Divinarum satagebant. Per hanc enim religiosi cultus simulationem, pietatis opinionem captabant, ab avaritiæ, sævitæque suspitione declinabant, invidiam demum, atque insidias a se avertebant. Et quidem tantam in iis Deorum venerationem ceteri omnes admirantes, ab omni vi, impetuque deterrebantur, metuentes nimirum, ne Deos ipsos, quibus cari erant, suarum injuriarum ultores haberent. Deinde se ad res humanas convertentes, singulari studio curaque Civitatis commodis prospiciebant, nempe ut procuratores magis ejus, custodesque viderentur, quam Principes: pecuniam publicam ita curabant, ut tamquam Civitatis dispensatores, populi utilitati, non sibi studerent, neve cui suspicio esset, se publico ærario ad suas cupiditates uti, & parce sobrieque vivebant, & publicarum rationum singulis quibusque inspiciendarum copiam faciebant. Hinc scripsit He-



Herodianus Antoninum sæpe hæc dicere solitum : *Siquidem in illa Urbe sita est Imperii fortuna, nobis autem dispensatio tantum, atque administratio Principatus una vobiscum posita est.* Qui inter Cives præstare videbantur, eos evehebant ad honores, ne majus quid in libero Populo, quam sub Principatu sese assequi posse sperarent: pœnas quidem per alios poscebant, præmia autem per se dabant. Divitibus præterea, & egenis æque placere nitebantur, illis quidem per conservationem divitiarum, quarum amissio numquam est sine periculo, his vero defensionem ab injuriis potentiorum, quos a pauperiorum corporibus prohibere conabantur. Hæc, atque alia istiusmodi, quamvis Rerumpublicarum omnium conservationi valde profint, quum tamen earum forma mutatur, mirum quantum novo regimini serviant. Quibus sane instructus consiliis Augustus, vix narrari potest, quam præclare omnia gesserit. Et quidem hæc Tranquillus memoriæ prodidit : *Ædes sacras vetustate collapsas, aut incendio absumptas refecit: easque, & ceteras opulentissimis donis adornavit. Sacerdotum & numerum, & dignitatem, sed & commoda auxit, præcipue Vestalium Virginum: cumque in demortuæ locum aliam capi oporteret, ambirentque multi, ne filias in sortem darent; adjuravit, si cujusquam Neptium suarum competeret ætas, oblatum se fuisse eam.* Ex divinis rebus ad humanas descendens, pulcherrimis ædificiis Civitatem exornavit; integras per Provincias, Urbes, vel vetustate collapsas, vel terræ motibus quassatas ex integro refecit, ut idem Tranquillus scripserit, *se gloriatum marmoream retinere Urbem, quam lateritiâ accepisset.* Inter hæc omnia lex Quintia numeranda est de pœnis eorum, *qui rivulos, fistulas, Castella, lacus aquarum publicarum violarint, vel corruerint*, ut legitur apud Frontinum de Aquæ ductu, & Reinesium inscript. 7. 10. quæ sane lex quo majori luce adspargatur, liceat mihi nonnulla hic præfari.

Ab Urbe condita per annos ccccli. non alius aquarum usus Romanis fuit, nisi quas aut ex Tiberi, vel ex puteis, aut ex fontibus haurirent. Verum Civium numero in dies crescente, ac laborante nimium Civitate aqua-

quarum penuria, aliunde deduci in Urbem aquam oportuit, cujus sane tanta facta est copia, ut singulæ fere domus suos fontes habuerint. Itaque ex diversis quidem locis, hujusmodi peregrinæ aquæ, per tubulos in arcuatis fornicibus, intra mœnia derivabantur. Sed hæc in castellis primum colligebantur, ut inde a castellario certa mensura distributæ, in loca destinata effluerent. Castellum erat locus, qui aquam publicam excipiebat, eamdem deinde huc, & illuc emissurus: quique eam custodiebat nomen sortitus ex ipso loco, Castellarius dictus est. Porro autem, non nisi in publicos usus olim aqua erogabatur; legeque vetitum, ne quis privatus alio eam duceret, sed usui privato illa patebat, quæ ex lacu ipso abundabat, excrescebatque, quam caducam appellabant: atque hæc non in alium usum, quam in balneorum, aut fulonicorum dabatur, cui proinde vectigal statutum, quod in publicum pendebatur. Jus dandæ, vendendæque aquæ primum Consulium, ac Censorum, postmodum Ædilium fuit. Sed Augustus curatorem instituit, abrogata in eam Censorum, Ædiliumque potestate. Aqua vendita, adeo contracta intelligebatur ejus emptio, ut neque heredem, neque alium quemvis possessorem sequeretur: balneis tantum datum fuit, ut aqua concessa, ad quemvis possessorem transiret. Familiæ, quæ aquam curabant, duæ erant, alia publica, Cæsaris alia, cujus utriusque erant vel villici, vel castellarii, vel curatores, vel silicarii, vel tectores, atque id genus opifices, qui toti erant in aquæ publicæ ministerio, quibusque certa merces statuta, nempe ex redditu vectigalium ad jus aquarum pertinentium. Ex his satis intelligas, quantæ curæ fuerit Romanis aqua publica, & quam merito e re sua putaverit Augustus eamdem severiori sanctione munire: poenæ autem, quæ in hac lege occurrunt contra aquarum corruptores, acerbæ admodum sunt, quas si pernosse cupias, videas præter laudatum Frontinum, Antonium Augustinum *de legibus*: nam ea utpote perlonga, libenter omittimus exscribere. Rectius itaque ad alia pergemus.

Inter ea, quæ sapientissimus ille Princeps, ad commodum Urbis Romanæ paravit, nihil sane utilius Civibus fuit, quam in-

sti-

Statutum illud, quo Urbem divisit in quatuordecim Regiones, sive vices, quibus singulis procuratores incendiorum constituit, iisque Tribunos plebis, & Praetores praefecit. Etenim quum saepe ignis periculum quererentur Cives, ac frequenter tecta, ac superbissima aedificia, sive casu, sive hominum negligentia conflagrasse ingemiscerent; Imperator, ut incendiorum istiusmodi malo occurreret, suos cuique Urbis regioni Magistratus instituit. At vero cur, quaeso, Curatoribus incendiorum Praetores, & Tribuni plebis praerant? Ex Augusti ingenio repetenda est ratio: nempe ut nova hac potestate veterem eorum infringeret auctoritatem. Quum enim haec cum nova Reipub. forma non bene cohaereret, ut paullatim antiqua dignitatis suae jura obliviscerentur, novum iis, atque honorificum sustinendum munus imposuit.

Quanta autem ejus cura fuerit, ut Civium inopiae occurreret, videamus. Nam *inveſta Urbi Alexandrino triumpho regia gazae, tantam copiam nummariae rei effecit, ut faenore diminuto, plurimum agrorum pretio acceſſerit. Et poſtea quoties ex damnatorum bonis pecunia ſuperflueret, uſum ejus gratuitum iis, qui cavere in duplum poſſent, ad certum tempus indulſit. Senatorum cenſum ampliavit: ac pro octigentorum millium, ſumma duodecies H. S. taxavit, ſupplevitque non habentibus. Congiaria Populo frequenter dedit. . . frumentum quoque in annonae difficultatibus ſaepe levifſimo, interdum nullo pretio viritum admeſus eſt, teſſerasque nummarias duplicavit,* Ita Tranquillus in Octav. cap. 41., quae continenter ex ſcripſiſſe non poenitet: facile enim intellectu eſt, quam fuerit ſollicitus in totius Civitatis indigentia ſublevanda: etenim & minuendo faenore, congiariisque frequentibus plebi conſuluit, & cenſu Senatorio de ſuo ſupplendo, Patribus opitulatus eſt, & frumenti annonaeque providentia omnibus ſtudit, ut omnium ex hoc parta gratia diu feliciterque regnaret.

Attamen quia plerumque fit, ut ex rerum copia otium, & luxuries, Civitatum pernicies, oboriantur, hinc ſapientiffimus ille Princeps ne tam effuſa ſua liberalitas Civium mores corrumpere, leges ſumptuarias condidit, quas nunc explicandas aggredimur. Ait laudatus Tranquillus eum  
hac

hac ratione publicas frumentationes temperasse, ut non minorem aratorum, ac negotiantium quam Populi rationem deduceret. Non minus enim hi, quam illi Civitati sunt perutiles, sed nos rem propius attingendo, videamus quemnam modum in sumptibus statuerit. Sane Gellius (a) hæc nobis memoriæ prodidit: *Postremo lex Julia ad Populum pervenit, Casare Aug. imperante, qua pro festis quidem diebus ducenti finiuntur. Kalendis, Idibus, Nonis, & aliis quibusdam festivis, trecenti: nuptiis autem & repetiis. H. S. mille esse etiam dicit Capito Atejus editum, Divi ne Augusti, an Tiberii Caesaris, non satis commemini*) quo edito per dierum varias sollemnitates a ccc. H. S. ad usque duo millia sumptus cænarum propagatus est, ut his saltem finibus luxuriæ effervescentis æstus coaceretur. Cum Gellio consentit Tranquillus ita: *Leges retractavit, & quasdam ex integro sanxit, ut sumptuariam, & de adulteriis, & de pudicitia.* Hæc illi.

Sed hi tamen Scriptores, quem vivendi modum maxime Augustus præscripserit, haud tradunt: puto autem, ego admodum severius hac in parte eum se gessisse, cujus quidem sententiæ ibidem cap. 40. auctor est ipse Tranquillus, qui refert, etiam *habitum, vestitumque pristinum reducere studuisse. Ac visa quondam pro concione pullatorum turba, indignabundum clamitasse: En Romanos rerum dominos, gentemque togatam.* Ex quibus sane facillime ut credam inducor, legem Augusti sumptuariam satis severitatis habuisse, quum & habitum pristinum reducere voluisset. Julius etiam quanto studio frugalitatem, & temperantiam curaverit patet ex illo ejusdem Svetonii in Julio cap. 43. *Legem præcipue sumptuariam exercuit, dispositis circa macellum custodibus, qui obsonia contra vetitum retinerent, deportarentque, ad se submissis non nunquam lictoribus, atque militibus: qui si custodes fefellissent, jam apposita & triclinio auferrent.*

Sed hic mihi videtur Julius non secum ipse concors: nam idem auctor hæc de eo memorat: *Tum reorum, aut obsecratorum, aut prodigæ juventutis subsidium unicum, ac promptissimum.*

(a) Lib. II. cap. 24.

*sumum erat ; nisi quos gravium criminum , vel inopiae luxuriaeque vis urgeret , quam ut subveniri possit a se ; his plane palam bello civili opus esse dicebat .* Hæc contraria inter se esse videntur , sumptibus etiam in re licita vetare , deinde vero data pecunia corruptos juvenum mores , ac effusiores luxuriam juvare . Verum si tempora leparentur , nihil erit quod dissonæ Cæsarem se gessisse fatebimur ; etenim quum nova molientibus maxime profit populi cupiditatibus indulgere , neque usquam ejus voluntati oblucri , callidus ille vir nondum rerum potitus e re sua duxit luxurianti juventuti modis omnibus assentiri : at vero ubi imperium sibi constituerat , aliter rem transigendam censuit . Si enim ex nimio vivendi luxu egestas , furta , rapinae , perjuria , aliaque sexcenta scelerum monstra , quæ publicam quietem interrumpunt , oboriri solent , optime sibi factum putavit legibus sumptuariis tanto malo occurrere . Advertit sane id Aristoteles , alique , qui de rebus publicis constituendis scripserunt , quemadmodum frugales Cives publicum otium fovant , ita eosdem intemperantes interitum Civitatibus vel opulentissimis parare . Quibus profecto intellectis , discordes Cæsaris leges amice conjurant , quum antea quidem intemperantium voluntatibus obsecundavit , deinde vero voti compos factus , eorumdem luxui , atque illecebris obstiterit .

Quum igitur constitutæ jam Reipublicæ temperantia Civium valde profit , nihil tamen ad eam proclivius , quam recta adolescentium institutio . Itaque optimi Principis munus esse dicebat Mæcenas , primam Civium ætatem disciplina potius informare , quam deinde in eosdem delinquentes animadvertere . *Id autem tu ita præstabis ( ait ) si non permittas omnia eos ex libitu agere , ac deinde delinquentes corrigas : sed si quum peccaverint quidquam , omnia eos doceas , quæ exerceantur tibi , & sibi ipsis majori sint usui : omnemque omnibus rationem propter divitias , nobilitatem , aut aliam quamcunque præstantiam , vitæ per desidiam , & moliciem , aut prava studia ducendæ præcidas .* En quo spectant leges sumptuariæ , scilicet ut nimia civium luxuries præcidatur , atque adolescentium maxime ætas ad temperantiam informetur . Quan-

to autem studio id annis fuerit Augustus, tradit Tranquillus his verbis: *Rectores quoque solitus est apponere aetate parvis, ac mente lapsis, donec adolefcerent, aut resipiscerent: ac plurimorum liberos & educavit simul cum suis, & instituit.* Quare apte quidem huic instituto legem Juliam, & Titiam iussit perferri, qua statutum ut Tutorem legitimum, vel testamentarium in Provinciis non habenti, tutor a Præsidente daretur. Sane Attilio Regulo Tribuno rogante, statutum erat, ut qui tutorem legitimum vel testamentarium non haberet, ei tutor a Prætoribus, majorique parte Tribunorum assignaretur. Verum lex hæc Romæ tantum valuit, nec nisi usu in Sicilia recepta fuerat, præterea nusquam gentium. Sed Augustus, ut univerforum se curam habere significaret, ad ceteras Provincias omnes protulit.

Vidimus hucusque leges Augusti, quibus Civitatis curam, Civiumque rectam institutionem prætulit: exponamus nunc eas, quæ Civitatis respiciunt ornatum, nominisque Romani dignitatem. Hæ autem leges sunt Fusia Caninia, & Ælia Sentia, de quibus hæc Tranquillus (a): *Servos non contentus multis difficultatibus a libertate iusta removisse, quum & de numero, & de conditione, ac differentia eorum, qui manumitterentur curiose cavisset; hoc quoque adjecit, ne vinculus unquam, tortusve quis, ullo libertatis genere Civitatem adipisceretur.* Itaque per Fusiæ Caniniam servos in testamento manumittendi coercuit libertatem: in testamento inquam, ne deneges viventibus permiffum fuisse, quos vellent, servos manumittere. Quum enim nimiam viventium liberalitatem in manu servis mittendis ipsa rei per se familiaris ratio, egestatisque periculum moderaretur, non erat cur cavendum censeret. Contra vero vulgatissimum est, quanto Romani desiderio captarentur, ut morientium pileati servi funus prosequerentur: quapropter ut profusæ huic facilitati occurreretur, lege opus fuit. Itaque quum in Romanorum pecunia ingens plerumque servorum numerus esset, sæpe vix unus, aut alter erat, qui ex domini testamento libertatem, atque adeo Civitatem Romanam non adipisceretur.

Qua

(a) In octav. cap. 40.

Qua de re offensus Augustus, ne immani libertorum multitudine servili sanguine Urbs pollueretur, manumittendi licentiam inhibendam censuit; atque imperavit, ut intra decem pars dimidia, intra triginta pars tertia, intra centum pars quarta, intra quingentos pars quinta, nempe centum libere manumitterentur, nec liceret eum numerum excedere, etsi plures quam quingenti servi possiderentur. Ex his perspicue patet id, quod scripsit Vopiscus in Tacito, quum ait: *Servos manumisit intra centum, ne Caniniam transisse videretur.*

Item lege Ælia Sentia cautum, ne servi in crimine aliquo deprehensi, deinde torti, aut ad ferrum dati, vel abjecti bestiis, aut in publicam custodiam detrusi, Civitatem, ejusque jura obrinerent, sed manumissi dedititiorum instar essent; ejusdem nempe conditionis, atque ii, qui, abjectis armis, se suaque omnia in ditionem Populi Romani dedissent: par enim dicebat Princeps ille prudentissimus esse, ut ab honestissima Civitate hominum flagitiosorum maculæ averterentur. Hac etiam ratione prohibuit, ne minor viginti annis dominus manumitteret, nisi in Urbe ad consilium quinque Senatorum, totidemque Equitum probata causa; in Provinciis vero apud consilium viginti Recuperatorum, sive Judicum: idemque jus erat, si servus triginta annorum minor manumitti a quocumque vellet. Etenim quum vasserrimi plerumque servi lascivientium adolescentium luxuriam consiliis suis foverent, eisdemque, si probi forte essent, dolose ad illecebras traherent; indignum sane erat, ut nequam isti homines Civitatem Romanam, quæ virtutis præmium esse debebat, per sua flagitia consequerentur; atque ita urbs pulcherrima nefariis Civibus foedaretur. Itaque quum maximo polere judicio deberet, qui novis Civibus Rempub. augere exoptaret, prohibitum est, quominus minor hic manumitteret, nisi causa ad consilium probata: quumque libertatis, Civitatisque donum tantum esset, ut eo majus nihil haberetur; merito etiam præscriptum, ut nemo minor annis triginta manumitti posset, nempe ut ea judicii vis in eo esset, qua tantum donum, ac beneficium sibi datum intelligeret.

Attamen quia pollicitus sum Principis hujus leges intus

I i 2

etiam,

etiam, atque in cute perscrutari, rem penitus, si fieri potest, rimeretur. Sane in coercendis manumissionibus id quidem ille præferebat, ut Romanam dignitatem servaret, ne tam ingenti barbarorum, qui in dies libertate donabantur, numero, honestissimum nomen Civitatis vilesceret: sic enim ille præfatur ad Liviam apud Tranquillum (a): *Se facilius passurum Fisco detrabi aliquid, quam Civitatis Romanæ vulgari honorem*. Sed vera ac germana ejus consilii causa fuit, quam inter præcepta Reipublicæ Tiberio concedita docuit apud Dionem: *Ne multos manumitterent, ne nimirum varia turba Urbs impleteretur: neve multos jure Civitatis donarent, quo videlicet ipsi multa haberent suis subditis potiora*. Sat enim viri politici monuere, quantum obsit regimini vel Aristocratico, vel Monarchico. inolefcenti turba Civium frequentior in principe Urbe coalescens: sive enim suffragiorum spectes numerum, sive tot capitum in diversas obeuntium sententias multitudinem, dixeris sane rem in periculo esse. Id igitur prospiciens Augustus, nimium parcus in Civitate largienda fuit, & quantum potuit, prohibuit, quominus servi libertate donarentur.

Præter hæc lex Julia occurrit de cessione bonorum, sive a Julio Cæsare sit, sive ab Augusto perlata, nempe ad caprandam plebis gratiam, quæ plerumque inopia laborat. Per eam sancitum, ut qui sine dolo malo eo egestatis pervenerit, ut ære alieno exire non posset, is bona sua cedendo liberaretur. Quod, ut luculentius intelligatur, fas mihi sit, perpauca de obæratīs præfari. Sane Patricii, ut in plebem dominarentur, duabus potissimum rationibus adnisi sunt, gravitate nempe usurarum, quibus plebis exhauriebantur bona; & potestate ob debitum non solutum in debitoris libertatem, qua in conditionem servilem redigebantur. Hinc tot rogationes legimus de usuris minuendis, demum omnimode abolendis. Lex Duodecim Tabularum hæc jussit: *Si qui unciario fœnore amplius fœnerassit, quadruplione luito*. Verum licet per id in partem plebi consultum sit, mansit tamen, immo & per Duo-

(a) *Ibid. cap. 40.*



Duodecim Tabulas comprobata dira illa consuetudo, qua creditor in debitorem, ubi non solvisset, potestatem nancisceretur. En illarum verba: *Ni cum eo pacit, sexaginta dies endo vinctulis retineto: Interibi trinis nundinis continuis in comitium procitato, arisque aestimiam iudicati prædicato. At si plures erunt rei, tertiis nundinis partis secanto: si plus minusve secuerint, se fraude esto: si volent uls Tyberim peregre venundanto.*

Fas igitur erat creditori manum injicere in debitorem confessum, vel iudicatum, eumque domum suam abducere, tamquam in carcerem privatum, ubi ne aufugeret, nervo, & compedibus vinciebatur: post autem sexaginta dies, nisi cum creditore pactus fuisset, trinundinum licebat eum venui subicere: quem si ex civibus nemo ad emendum accederet, peregrino fas erat vendere. Sed quid si plures creditores? Sane sancitum, ut totidem in partes secarentur. Sævisima certe lex. Cur enim in frustra debitor secandus, nisi ut eo facto, inaudita certe crudelitate, pasceretur creditorum avaritia? Sed num legis verba de torporis physici sectione, an vero de bonorum divisione sint intelligenda, acriter inter se se certant eruditi. Quid quid sit, meum certe haud est istiusmodi controversias pertractare, quum id tantum in animum induxerim meum, ut legum causas ex politicæ penu, quantum possem, depromerem. Hoc tantum juvat admonere, eos ipsos, qui de humani corporis sectione Duodecim Tabulas interpretati sunt, nunquam tam dirum spectaculum se in historia Romana legisse candide confiteri.

Verum quum obæratî servituti addicerentur, haud Civium libertas servabatur a Patriciorum dominatu. Hinc a Tribunis rogatum, ut malum hoc averteretur a plebe. Sane quum ob insignem L. Papirii in C. Publilium nexum crudelitatem, plebs indignitate injuriæ accensa ad curiam confluxisset, iussi Consules ad Populum ferre (a), *Ne quis, nisi qui noxam meruisset, donec pœnam lueret, in compedibus, aut in nervo teneretur: pecuniæ creditæ bona debitoris, non corpus ob-*

no-

(a) Liv. 8. 28.

noxium esset. Ita nexi soluti; cautumque in posterum, ne necterentur. Sed quamquam post hanc legem addictio obæeratorum, & deductio in nervum adempta fuerit, non tamen satis rei prospectum est. Nam bonorum possessio & famam lædebat, & a carcere non prohibebat. Hinc Julius Cæsar, ut plenius debitoribus confuleret, cavuit: *De pecuniis mutuis disjecta novarum tabularum expectatione, quæ crebro movebatur, decrevit tandem, ut debitores creditoribus satisfacerent per æstimationem possessionum, quanti quasque ante civile bellum comparassent, deducto summa æris alieni, si quid usura nomine numeratum, aut perscriptum fuisset (a).* Deinde vero per eundem Julium, sive per Octavium cessionis bonorum beneficium inductum est, ut qui forte sine dolo male solvendo non esset, bona sua creditori cedendo liberaretur. Ex hac lege velim colligas, quantam Octavius apud plebem inierit gratiam, quum eam a Patriciorum tyrannide eripuisset, quamquam callide rebus suis consuluisse. Vetito enim carcere privato, cui antea debitor tradebatur, speciem illam pristinae Reipublicæ oblitteravit, cujus regimini, quemadmodum minime adversabatur jurisdictio privata, quippe vigente Aristocratia penes singulos, sic nascenti monarchiæ, ad quam sub Augusto Respublica delapsa fuerat, maximò erat impedimento.

Verum ut omnes, nedum una plebs maxima libertate potiri opinarentur, id etiam constituit, ut qui libellos famosos conficerent, vulgarentque, testari possent, quum antea, florente quoque Republica, intestabiles essent. En Tranquilli verba ad rem appositissima (b): *Etiam sparsos de se in Curia famosos libellos nec expavit, nec magna cura redarguit. Ac ne requisitis quidem auctoribus id modo censuit, cognoscendum post hac de iis qui libellos, aut carmina ad infamiam cujuspiam sub alieno nomine ederent (c).* Joci quoque quorundam invidiosis, aut petulantibus laceffit, contradixit edicto. Et tamen de inhibenda testamentorum licentia, ne Senatus quidquam constitueret, intercessit. Locus quidem hic turbatissimus a nemine, quem sciam, adhuc intellectus, experiar ipse an aliqua luce

(a) Sueton. 42.

(b) In oct. cap. 55.

(c) Idem 56.

luce adspergi possit. Romanis profecto nulla major libertatis nota, quam testandi facultas: hinc Duodecim Tabulæ: *Pater familias uti legasset super pecunia, tutelave rei sue, ita jus esto*. At vero per famulos libellos hæc testandi facultas omnino intercidebat. Quum autem Augustus sæpe jocis, vel carminibus in testamentis carperetur, consilium Senatus fuit vel carmina hæc cum famosis libellis exæquare, ut auctores intestabiles faceret, vel saltem eadem nova poena vetare. Sed utrumque Augustus respuit, ne qua ratione, ne ex transverso quidem, videretur Romanam libertatem labefactare. Atque hæc sunt Augusti leges, quibus & Civitatem exornavit, & Cives tutatus, atque ad rectam vivendi normam redegit, & Optimatibus demum, Equitibus, plebeisque, pro cujusque genio consuluit; nempe ut omnium sibi gratiam captaret, nascentem Monarchiam foveret, neque tamen a publica utilitate discederet. Sed percurramus alia, instituto nostro propria.

## C A P U T III.

*Ad legem Juliam, & Papiam, de maritandis Ordinibus.*

## §. I.

*De legis hujus occasione, atque historia.*

N<sup>U</sup>lla quidem in toto juris corpore lex celebrior, quam Julia, & Papia de maritandis Ordinibus. Sive enim morum tunc temporis depravatorum reparationem spectes, sive firmam Monarchiæ institutionem, clanculum tamen, ac veluti per transversos cuniculos, certo certius nil aptius, nihilque præstantius hac lege tibi occurret. Etenim quum per eam præmia obtemperantibus, poenas vero repugnantibus statuendo, vaga Venus prohibita, iusta matrimonia comprobata, divortiorum licentia cohibita, patrum cum libertis, ludicramque artem exercentibus conjugia vetita sint; intemperantium Civium vitæ consultum est, impudicitia repressa, affi-

affinitatum dissidia sublata, Senatorum dignitati prospectum. Quo profecto sicuti reformandæ Civitati nihil utilius, aut aptius instaurandis adolescentium moribus; sic Optimatum honestati consonantius, Romanique demum nominis decori consultius fuit.

Dixi per legem hanc non solum publicæ utilitati, sed etiam, latenter licet, Monarchiæ firmandæ operam datam: nam pœnæ adversus cœlibes, & matrimoniorum divortia, atque in eos, qui contra præscriptum legis matrimonium iniissent, ea de causâ constitutæ fuere, ut ærarium Monarchicæ dominationis fulcrum, quod bellis civilibus penitus jam exhaustum, in immensum ditesceret. Qua enim gratia tot arduissimis limitibus matrimonia contracta, nisi ut plures dotes in Fisci commodum publicarentur? Cur tam varia bona caduca, quasi caduca, ereptitia, ac vacantia miro hoc artificio excogitata, nisi ut privatorum fortunæ proclivius ad augendum ærarium confluerent? Itaque quum lex hæc tam Civium mores, quam rem monarchicam quaqueversus spectarit, nil mirum si per universam Romanam jurisprudentiam adeo fuscæ ejus partes disseminatæ sint, ut frustra credas posse ad perfectam Romani juris assurgere notitiam, nisi legem eandem, historia duce penitissime introspecias. Et quamvis illi insequentibus Principum Constitutionibus paulatim derogatum sit per omnes suas partes, ut omnino tandem exoleverit; accidit tamen, quod sæpe querimus, ut per Triboniani incitiam, causis abrogatis, superstites illarum manserint effectus, qui profecto plane intelligi nequeunt, nisi eorum repetita origine.

Quum igitur universi prope juris lex hæc fundus esset, ejusque vestigia sparsim in jure Justiniano spectentur, licet nunc temporis nulli usui sint, apte tamen Augusti politiæ congruebant. Et quoniam discerpta ejus capita, ut modo legimus, atque a sedibus suis avulsa, obscuritatem maximam pariant; hunc propterea ordinem in hac expositione mihi præscripsi, ut ante omnia ostenderem occasionem, & causas legis, rationesque, quas Augustus per eandem inivit, sive ad publicam honestatem Senatorum, ceterorumque Civium reparandam, sive ad augendam Urbem civibus, sive ad inops

æra-

ærarium locupletandum; deinde sejuncta legis capita ad suam quodque sedem revocarem, ut nempe tenebræ illæ, quibus confusa rerum, atque inepta divisio offunditur, evanescant. Demum vero quum in his meis lucubrationibus, non lectoris tantum mentem eruditione pascere instituerim, sed vetera potissimum ad nostræ memoriæ consuetudinem expendere, subductisque illius vetusti, ac nostri civilis regiminis rationibus, docere, an consequentiæ illæ, quæ per Tribonianum ex jam abrogata lege excerptæ sunt, nostri temporis rebus, & judiciis aptandæ sint. Rem propterea ab origine sua persequamur.

Diu multumque inter civilis prudentiæ peritos disceptatum, an copiosa nimis civium multitudo obsit magis, quam profit Reipublicæ. Sane Aristoteles inter vetusti temporis politicos facile princeps, copiam Civium justo majorem Civitatis felicitati officere putavit; statuitque, eam Populi optandam multitudinem, quæ satis sit se incolumem ab externa vi servare. Ut enim probe civitas gubernetur, & civium quisque inter nosci debet, & omnes se mutuo amore, & familiaritate quadam complecti: quod quidem quemadmodum in justo numero esse potest, ita profecto ægre, si Populus in immensum excreverit. Sed hæc utcumque vera sunt, aliter tamen se res habuit apud Romanos. Quum enim Civitas bellico furore raperetur, nec nisi unis civibus ex veterum instituto legiones constarent, quo civium multitudo major, eo firmiores ejus opes censebantur. Et quidem ante bella Civilia, quamquam cum exteris gentibus sine intermissione bella gererentur, magna vis civium erat; sed civilibus motibus insurgentibus, adeo gens Romana decrevit, ut hæc scripserit Appianus (a): *Censu deinde aucto, ferme dimidio minus capitum confusa est, quam ante hujus belli civilis initium.*

Quum Urbanæ seditiones, maxime vero impium illud inter ~~Cæsarem~~ Pompejum bellum, Urbem civibus spoliasset, ærarium exhaustisset, effrenatos demum mores, impudicitiamque potissimum inter milites, civesque omnes invexisset; his sanandis malis consultissima erat, ut dixi,

K k

lex

(a) In *Cæsare* lib. 2.

lex illa, quæ Civium numerum augeret, pudicitiam repararet, ærariumque emunctum ad pristinum restitueret. Sed non sine summa difficultate, arduoque labore Imperator rem transegit: nam quum ad vagam venerem comprimendam, ad frequentissima divortia coercenda, ad omnem demum impudicitiam, quæ inclinatis Romanorum moribus adeo grassabatur, avertendam, remedia quæcumque essent acerba; lex hæc, quæ cuncta hæc monstra, uno veluti impetu, prosterneret, summo conatu ferri debuit: quare Augustus eos, qui legi huic saluberrimæ adversabantur, verbis his increpasse fertur (a): *Neque enim adeo solitudo vos ferri capit, ut absque mulieribus degatis, ac non quilibet vestrum mensæ, ac lecti sociam habeat: sed licentiam libidinis vivendi, ac lasciviæ vestre exercenda queritis. Nempe expeditam illam ac liberrimam vitam extra matrimonium, & sine sobole.* Hoc idem Horatius sensit, nempe quanti negotii esset effrenatis Civium libidinibus occurrere: quapropter quum legem Augustus in Senatu ferret, ut ejusdem auctoritate in comitiis apud Populum rogaretur, his verbis Poeta ille felicem successum apprecatus est (b):

*Divæ producas sobolem, Patrumque  
Prosperes decreta, super jugandis  
Fœminis, prolisque novæ feraci  
Lege marita.*

Itaque jubente, quamvis auctore Senatu, legem Augusto, mirum est quantas id turbas exciverit: scribit enim Tranquillus (c), *Eum legem hanc de maritandis ordinibus, quum aliquanto, quam ceteras severius emendasset, præ tumultu recusantium perferre non potuisse, nisi adempta demum, lenitaque parte poenarum & vacatione triennii data, auctisque præmiis.* Sed qui potuit fieri, ut emendasset eam legem, quam non dum pertulerat? Hinc hoc in loco mendum inesse suspicatus vir acutissimus Heineccius, ac mandasset legendum putavit pro emendasset; ita ut sensus sit, Augustum majori auctoritate severitateque legem hanc, quam ceteras, rogasse. Sed nos ex diverticulo ad viam.

Quum

(a) *Dion. lib. 56.*

(b) *Epod. XVIII.*

(c) *In Octav. cap. 34.*

Quum igitur Populo obtristente ne lex vulgaretur, omnia frustra fuissent, arrepta est a Poetis<sup>a</sup> occasio civium gaudia exponendi: quare sic Propertius (a):

*Gavisus est certe sublatam Cynthia legem,  
Qua quondam edicta flemus uterque diu  
Ne nos divideret.*

Non modo autem nuptias horrebant Romani, ut licentia abuterentur, & libidinibus fervirent, sed ut expensas etiam immodicas effugerent, quibus in matrimonii sollemnibus pro luxuriantium tunc temporis mulierum fastu opus erat. Quæ sane significare voluit Metellus censor quum inquit (b): *Si sine uxore, Quirites, possemus esse, omnes ea molestia careremus; sed quoniam ita natura tradidit, ut nec cum illis satis commode, nec sine illis ullo modo vivi possit, salutis perpetuæ potius, quam brevi voluptati consulendum.* Hæc omnia impedimento Augusto erant, quo minus legem hanc saluberrimam quidem perferret: sed tamen prudentissimus ille Princeps omnia pervicit, & auctis maritorum præmiis, poenisque in cœlibes moderatis, anno septingentesimo sexagesimo secundo M. Papio Mutilo, & Quinto Poppeo iterum Coss. suffectis, legem per Populi suffragia in comitiis vulgavit. Atque hæc est lex, quam nunc explicandam aggredior, post tamen Heineccium, qui tanta eruditionis copia, & penitioris doctrinæ varietate eam commentatus est, ut ceteris profecto omnibus, si quid novi addere ausi fuerint, palmam præripuerit.

## §. II.

### *De maritandis Ordinibus.*

**N**ULLA major in Civitate turbatio, quam matrimonia, nullo familiarum discrimine servato, inita: ex adverso omnia bene se habebunt, si earumdem dignitati, & ordini consulatur. Hinc Romanæ Urbis conditor nuptias quam-

K k 2

ma-

(a) *Lib. 2. eleg. 7.*

(b) *Gellius lib. 1. cap. 6.*

maxime curans, prohibuit ne Patres cum plebe connubia celebrarent. Eodem fane consilio Augustus, ut honestatem inter Cives quantum posset repararet, ab ordine inter familias per matrimonia orsus est, nempe ut Cives pares in conditione nuptiarum essent. En tibi primum legis caput, ut ab Heineccio concinnatum est: *Qui Senator est, quive filius, neposve ex filio, proneposve ex filio nato, cujus eorum est, erit, ne quis eorum sponsam uxoremque sciens dolo malo habeo. Libertinam, aut eam, quæ ipsa, cujusque pater, materve artem ludicram fecit, fecerit, item eam, quæ palam corpore quæstum facit, fecerit neve Senatoris filia, neptisve ex filio, proneptisve ex Nepote filio nata libertino, eive, qui ipse, cujusve Pater, materve artem ludicram facit, fecerit, sponsa, nuptave sciens dolo malo esto; neve quis eorum dolo malo sciens sponsam, uxoremque eam habeo.* Quot quantive honoribus Romanus Senatus præstaret, res est vulgata satis. Patres judicia majoris momenti exercebant, jus habebant comitorum, bellum indicebant, curabant ærarium, legationes externas excipiebant; ex quibus fane omnibus eo majestatis pervenerat, ut Cæsari vitio datum sit, quod quum Dictator perpetuus esset, Senatoribus non assurrexisset. Sane Julianus, quamvis non ea tunc Senatus polleret auctoritate, quanta sub Augusto fuerat, tamen hæc dixisse fertur (a): *Jus Senatorum, & auctoritatem ejus ordinis, in quo nos quoque ipsos numeramus, necesse est ab omni injuria defendere.* Quare si huic augusto corpori cooptari Principes ipsi non dedignabantur, fateri opus est, maximam fuisse ejus dignitatem. Quam igitur turpe, splendorem hunc per matrimonia cum libertis, vel cum iis, qui vel ipsi, aut parentes eorum artem ludicram exercuissent, foedari? Quam indignum generosum hunc sanguinem libertina cognatione pollui atque coinquinari? Sed res paullo altius repetenda est.

Vetitum erat ex majorum more Patriciis cum plebeiis connubii jus esse, illa in speciem conficta ratione, ne sua cujusque sacra perverterentur; sed revera ne per tales conjunctiones ordines in concordiam coirent. Verum procedente tempore, honoribus omnibus cum plebe communicatis, per Ca-

nu-

(a) L. 8. C. de dignitatibus.



nulejum Tribunum seditiosissimum, extortum etiam a Patribus fuit, ut fas esset Optimatibus cum plebe inire conjugia. Sed omnes tamen & Patricii, & plebei ultro, ac veluti ex compacto a libertinorum nuptiis abstinebant: nefas enim ducebant cum ea, quæ fortuna favente recens e servili conditione emerferat, connubio jungi. Hinc memoriæ prodidit Livius (a) Hispalæ Fecenniæ libertinæ indultum ex S. C.: *Uti ei ingenuo nubere liceret, neu quid ei, qui eam duxisset, ob id fraudi ignominiave esset*. Sed hæc libertinæ illæ intelligendæ sunt, quæ manumissæ essent, minime vero a manumissis prognatæ. Atque hæc ad Reipublicæ extrema tempora servata sunt, nempe ad Augustum usque, qui ut Urbem civibus exhaustam, quantum posset, repararet, hac adhibita distinctione rem moderatus est. Voluit quidem ut plebi liceret cum libertinis nubere, *quia masculi ingenui numerum ingenuarum feminarum multum anteibant*, ut scripsit Dio. Noluit vero ut Senatoribus, eorumque liberis idem fas esset, ne amplissimus ordo pari jure cum plebe censeretur, neve servilis sanguinis consortio vilesceret.

Itaque hac prohibitione non Senatoribus tantum ipsis consultum, sed & eorum liberis, ac nepotibus, pronepotibus, ceterisque ex filiis, licet longo intervallo, progenitis. Sed quamvis eodem jure urgente filios adoptivos, iidem per emancipationem lege soluti essent; tamen filii naturales, postquam etiam e patria potestate exiverint, ab Augusti sanctione non sunt immunes. Quum enim emancipatio de jure civili sit, natalium vero honestas de jure naturæ, licet per eam agnatio amittatur, quod est vinculum civile, amitti tamen non potest naturæ beneficium, quod nascendo acceptum est. Sed quæstio hinc exurgit, quæ sane interpretibus nimis contendendi occasionem dedit, cum liberis ne ante dignitatem hanc prognatis honor communicandus sit, an vero & posthumis, hoc est, natis postquam pater eorum Senator esse desiit. Fuit quidem aliquando inter Orientales consuetudo, ut filiis, ante quamcumque patris dignitatem natis, nequaquam ejus splendor tribueretur.

(a) *Lib. 38. cap. 19.*

retur, quemadmodum in Xerxe, & Arthamene Darii filiis, quorum alter sane antea, alter vero post Regnum natus est. Sed contra apud ceteras gentes fere omnes invaluit mos, ut honorati patris dignitas & filiis ante eam creatis, prodesset. Neque profecto his adversatur Valentis, & Gratiani Constitutio (a), quæ quamquam prima fronte secus præferre videatur, tamen illa cum Ulpiano concilianda est, ut licet ante dignitatem Senatoriam editus Senatoris filius quod ad onera dicendus non sit, tamen in honoribus habeatur. Et quidem oneribus quibusdam urgebantur Senatores, veluti glebæ, follisque collatione, atque auri oblato dono: a quibus sane immunes ipsi Augusti voluerunt filios, qui antequam pater Senator esset, nati forent. Quod profecto ex mente ipsius Constitutionis depromitur: cur enim affirmatur id de *Clarissimatu*, quod de Senatoria dignitate negatur? Nisi quia *Clarissimatus* honor nulla onera sibi annexa habebat, quæ Senatoria dignitas ferebat: qua de re si cum natis ante *Clarissimum* patris honor communicaretur, idem dicendum de Senatoria dignitate, si onera excipias. Et tamen vide ignorantia antiquarum dignitatum in quot ineptias Pragmaticos adduxerit, ut uno ore inclarant, ante patris dignitatem natis honorem ejus minime prodesse. Non autem vacat de Senatoribus cetera hic persequi, quæ sane legi possunt apud eundem Heineccium: dicam tantum paternum honorem posthumum etiam prodesse, dummodo is ante amissam dignitatem conceptus sit, itemque prodesse avi dignitatem, si pater amiserit, de quibus fuse apud Doctores. Percurramus nos alia.

Neque Senatoribus eorumque liberis prohibitum solum, cum libertinis nuptias contrahere, sed etiam cum illis, quæ vel ipsæ, vel parentes earum artem ludicram exercuissent. Huic enim addicti notabantur infamia: ait enim Prætor: *Infamia notatur, qui artis ludicræ, pronuntiandiue causa in scenam prodierit*. Quod ut clarius intelligatur, advertendum est, superbè nimis Romanos, quod peregrinum esset, averſatos, ut

ne

(a) Lib. II. de dignitat. Cod. Justinian.

ne ritibus quidem religiosis peregre advenientibus indulgerent. Quamquam vero ad placandam Cælestium iram, pestilentiamque, quæ tam sæve in Urbe grassabatur, avertendam, an. V. C. 340. ad scenicos ludos Etruscos acciverint; istiusmodi tamen instituta, ut peregrina, eorumque actores, mire semper adspernati sunt. Itaque cum ludicra scenica, quamvis in Urbem accepta, vilia, ac gente togata indigna visa essent, factum est, ut qui in scenam sive ultro, sive operas mercede pacta locando prodiret, infamia notarentur. Quæ profecto causa est, quapropter nuptias inter Senatores, atque eas, quæ ludicram artem professæ essent, iniri veritum fuerit.

Ceterum hac lege non consuluit tantum Senatorum dignitati Augustus, sed etiam ingenuorum omnium. Si enim Senatoribus fas non erat matrimonio cum illis, quæ vel ipsæ, vel parentes earum artem ludicram exercuissent, jungi, ceteris ingenuis licebat quidem, si pater, materve uxoris in scenam prodissent, nequaquam vero, si ipsa conjux tale quid professæ esset. Veritum etiam ingenuis omnibus fuit, uxores habere, quæ palam quæstum corpore facerent, fecerintve, vel lenæ fuissent, aut a lenone manumissæ, aut iudicio publico damnatæ, vel in adulterio deprehensæ. Ex quibus omnibus vide, quibus rationibus adlaboraverit Princeps ille sapientissimus, ut pudicitiam prostitutam per lascivientes jam Civium mores repararet ope casti & pudici matrimonii, quove consilio parem cujusque conditionem tutatus sit, quum sicuti imparis conditionis nuptiæ familias dedecorant, ita & pares cujusque honorem servant: quod quidem & vivendi honestari, & publicæ Civitatis disciplinæ mirum in modum prodest.

Sed quanta vi Augusti lex ad pudicitiam inter Cives instaurandam polleret, ex eo etiam patet, quod Constantinus Imperator, qui moribus Civium formandis maxime studuit, non solum, eam forte ab usu desciscientem restituit, sed latius etiam extendit, poenasque adauxit in illa sua Constitutione, quam anno 336. sub titulo de naturalibus liberis edidit. Nam quum Augustus matrimonium libertarum cum Senatoribus, eorumque liberis prohibuerit; hic idem & de  
Cla-

affinitatum dissidia sublata, Senatorum dignitati prospectum. Quo profecto sicuti reformandæ Civitati nihil utilius, aut aptius instaurandis adolescentium moribus; sic Optimatum honestati consonantius, Romanique demum nominis decori consultius fuit.

Dixi per legem hanc non solum publicæ utilitati, sed etiam, latenter licet, Monarchiæ firmandæ operam datam: nam pœnæ adversus cœlibes, & matrimoniorum divortia, atque in eos, qui contra præscriptum legis matrimonium iniissent, ea de causâ constitutæ fuere, ut ærarium Monarchicæ dominationis fulcrum, quod bellis civilibus penitus jam exhaustum, in immensum ditesceret. Qua enim gratia tot arctissimis limitibus matrimonia contracta, nisi ut plures dotes in Fisci commodum publicarentur? Cur tam varia bona caduca, quasi caduca, ereptitia, ac vacantia miro hoc artificio excogitata, nisi ut privatorum fortunæ proclivius ad augendum ærarium confluerent? Itaque quum lex hæc tam Civium mores, quam rem monarchicam quaqueversus spectarit, nil mirum si per universam Romanam jurisprudentiam adeo fuscæ ejus partes disseminatæ sint, ut frustra credas posse ad perfectam Romani juris assurgere notitiam, nisi legem eandem, historia duce penitissime introspectas. Et quamvis illi insequentibus Principum Constitutionibus paulatim derogatum sit per omnes suas partes, ut omnino tandem exoleverit; accidit tamen, quod sæpe querimus, ut per Triboniani inscitiam, causis abrogatis, superstites illarum manserint effectus, qui profecto plane intelligi nequeunt, nisi eorum repetita origine.

Quum igitur universi prope juris lex hæc fundus esset, ejusque vestigia sparsim in jure Justiniano spectentur, licet nunc temporis nulli usui sint, apte tamen Augusti politiæ congruebant. Et quoniam discerpta ejus capita, ut modo legimus, atque a sedibus suis avulsa, obscuritatem maximam pariant; hunc propterea ordinem in hac expositione mihi præscripsi, ut ante omnia ostenderem occasionem, & causas legis, rationesque, quas Augustus per eandem inivit, sive ad publicam honestatem Senatorum, ceterorumque Civium reparandam, sive ad augendam Urbem civibus, sive ad inops

æra-

ærarium locupletandum; deinde sejuncta legis capita ad suam quodque sedem revocarem, ut nempe tenebræ illæ, quibus confusa rerum, atque inepta divisio offunditur, evanescant. Demum vero quum in his meis lucubrationibus, non lectoris tantum mentem eruditione pascere instituerim, sed vetera potissimum ad nostræ memoriæ consuetudinem expendere, subductisque illius vetusti, ac nostri civilis regiminis rationibus, docere, an consequentiæ illæ, quæ per Tribonianum ex jam abrogata lege excerptæ sunt, nostri temporis rebus, & judiciis aptandæ sint. Rem propterea ab origine sua persequamur.

Diu multumque inter civilis prudentiæ peritos disceptatum, an copiosa nimis civium multitudo obsit magis, quam profit Reipublicæ. Sane Aristoteles inter vetusti temporis politicos facile princeps, copiam Civium justo majorem Civitatis felicitati officere putavit; statuitque, eam Populi optandam multitudinem, quæ satis sit se incolumem ab externa vi servare. Ut enim probe civitas gubernetur, & civium quisque internosci debet, & omnes se mutuo amore, & familiaritate quadam complecti: quod quidem quemadmodum in justo numero esse potest, ita profecto ægre, si Populus in immensum excreverit. Sed hæc utcumque vera sunt, aliter tamen se res habuit apud Romanos. Quum enim Civitas bellico furore raperetur, nec nisi unis civibus ex veterum instituto legiones constarent, quo civium multitudo major, eo firmiores ejus opes censebantur. Et quidem ante bella Civilia, quamquam cum exteris gentibus sine intermissione bella gererentur, magna vis civium erat; sed civilibus motibus insurgentibus, adeo gens Romana decrevit, ut hæc scripserit Appianus (a): *Censu deinde aucto, ferme dimidio minus capitum censum est, quam ante hujus belli civilis initium.*

Itaque quum Urbanæ seditiones, maxime vero impium illud inter Cæsarem, & Pompejum bellum, Urbem civibus spoliasset, ærarium exhaustisset, effrenatos demum mores, impudicitiamque potissimum inter milites, civesque omnes invexisset; his sanandis malis consultissima erat, ut dixi,

K k

lex

(a) In Cæsare lib. 2.

lex illa, quæ Civium numerum augeret, pudicitiam repararet, ærariumque emunctum ad pristinum restitueret. Sed non sine summa difficultate, arduoque labore Imperator rem transegit: nam quum ad vagam venerem comprimendam, ad frequentissima divortia coercenda, ad omnem demum impudicitiam, quæ inclinatis Romanorum moribus adeo grassabatur, avertendam, remedia quæcumque essent acerba; lex hæc, quæ cuncta hæc monstra, uno veluti impetu, prosterneret, summo conatu ferri debuit: quare Augustus eos, qui legi huic saluberrimæ adversabantur, verbis his increpasse fertur (a): *Neque enim adeo solitudo vos ferri capit, ut absque mulieribus degatis, ac non quilibet vestrum mensæ, ac lecti sociam habeat: sed licentiam libidinis vivendi, ac lasciviæ vestræ exercenda queritis. Nempe expeditam illam ac liberrimam vitam extra matrimonium, & sine sobole. Hoc idem Horatius sensit, nempe quanti negotii esset effrenatis Civium libidinibus occurrere: quapropter quum legem Augustus in Senatu ferret, ut ejusdem auctoritate in comitiis apud Populum rogaretur, his verbis Poeta ille felicem successum apprecatus est (b):*

*Divæ producas sobolem, Patrumque  
Prosperes decreta, super jugandis  
Fœminis, prolisque novæ feraci  
Lege marita.*

Itaque jubente, quamvis auctore Senatu, legem Augusto, mirum est quantas id turbas exciverit: scribit enim Tranquillus (c), *Eum legem hanc de maritandis ordinibus, quum aliquanto, quam ceteras severius emendasset, præ tumultu recusantium perferre non potuisse, nisi adempta demum, lenitaque parte poenarum & vacatione triennii data, auctisque premiis. Sed qui potuit fieri, ut emendasset eam legem, quam non dum pertulerat? Hinc hoc in loco mendum inesse suspicatus vir acutissimus Heineccius, ac mandasset legendum putavit pro emendasset; ita ut sensus sit, Augustum majori auctoritate severitateque legem hanc, quam ceteras, rogasse. Sed nos ex diverticulo ad viam.*

Quum

(a) *Dion. lib. 56.*

(b) *Epod. XVIII.*

(c) *In Octav. cap. 34.*

Quum igitur Populo obnitente ne lex vulgaretur, omnia frustra fuissent, arrepta est a Poetis<sup>a</sup> occasio civiam gaudia exponendi: quare sic Propertius (a):

*Gavisa est cerce sublatam Cynthia legem,  
Qua quondam edicta flemus uterque diu  
No nos divideret.*

Non modo autem nuptias horrebant Romani, ut licentia abuterentur, & libidinibus servirent, sed ut expensas etiam immodicas effugerent, quibus in matrimonii sollemnibus pro luxuriantium tunc temporis mulierum fastu opus erat. Quæ sane significare voluit Metellus censor quum inquit (b): *Si sine uxore, Quirites, possemus esse, omnes ea molestia careremus; sed quoniam ita natura tradidit, ut nec cum illis satis commode, nec sine illis ullo modo vivi possit, salutis perpetuæ potius, quam brevi voluptati consulendum*. Hæc omnia impedimento Augusto erant, quo minus legem hanc saluberrimam quidem perferret: sed tamen prudentissimus ille Princeps omnia pervicit, & auctis maritorum præmiis, poenisque in coelibes moderatis, anno septingentesimo sexagesimo secundo M. Papio Mutilo, & Quinto Poppeo iterum Coss. suffectis, legem per Populi suffragia in comitiis vulgavit. Atque hæc est lex, quam nunc explicandam aggredior, post tamen Heineccium, qui tanta eruditionis copia, & penitionis doctrinæ varietate eam commentatus est, ut ceteris profecto omnibus, si quid novi addere ausi fuerint, palmam præripuerit.

## §. II.

### *De maritandis Ordinibus.*

**N**ulla major in Civitate turbatio, quam matrimonia, nullo familiarum discrimine servato, inita: ex adverso omnia bene se habebunt, si earundem dignitati, & ordini consulatur. Hinc Romanæ Urbis conditor nuptias quam-

K k 2

ma-

(a) Lib. 2. eleg. 7.

(b) Gellius lib. 1. cap. 6.

maxime curans, prohibuit ne Patres cum plebe connubia celebrarent. Eodem sane consilio Augustus, ut honestatem inter Cives quantum posset repararet, ab ordine inter familias per matrimonia orsus est, nempe ut Cives pares in conditione nuptiarum essent. En tibi primum legis caput, ut ab Heineccio concinnatum est: *Qui Senator est, quive filius, neposve ex filio, proneposve ex filio nato, cujus eorum est, erit, ne quis eorum sponsam uxoremque sciens dolo malo habeo. Libertinam, aut eam, quæ ipsa, cujusque pater, materve artem ludicram fecit, fecerit, item eam, quæ palam corpore questum facit, fecerit neve Senatoris filia, neptisve ex filio, proneptisve ex Nepote filio nata libertino, eive, qui ipse, cujusve Pater, materve artem ludicram facit, fecerit, sponsa, nuptave sciens dolo malo esto; neve quis eorum dolo malo sciens sponsam, uxoremque eam habeo.* Quot quantisque honoribus Romanus Senatus præstaret, res est vulgata satis. Patres judicia majoris momenti exercebant, jus habebant comitorum, bellum indicebant, curabant ærarium, legationes externas excipiebant; ex quibus sane omnibus eo majestatis pervenerat, ut Cæsari vitio datum sit, quod quum Dictator perpetuus esset, Senatoribus non affluerisset. Sane Julianus, quamvis non ea tunc Senatus polleret auctoritate, quanta sub Augusto fuerat, tamen hæc dixisse fertur (a): *Jus Senatorum, & auctoritatem ejus ordinis, in quo nos quoque ipsos numeramus, necesse est ab omni injuria defendere.* Quare si huic augusto corpori cooptari Principes ipsi non dedignabantur, fateri opus est, maximam fuisse ejus dignitatem. Quam igitur turpe, splendorem hunc per matrimonia cum libertis, vel cum iis, qui vel ipsi, aut parentes eorum artem ludicram exercuissent, foedari? Quam indignum generosum hunc sanguinem libertina cognatione pollui atque coinquinari? Sed res paullo altius repetenda est.

Vetitum erat ex majorum more Patriciis cum plebeiis connubii jus esse, illa in speciem conficta ratione, ne sua cujusque sacra perverterentur; sed revera ne per tales conjunctiones ordines in concordiam coirent. Verum procedente tempore, honoribus omnibus cum plebe communicatis, per Ca-

nq.

(a) L. 8. C. de dignitatibus.



nulejum Tribunum seditiosissimum, extortum etiam a Patribus fuit, ut fas esset Optimatibus cum plebe inire conjugia. Sed omnes tamen & Patricii, & plebei ultro, ac veluti ex compacto a libertinorum nuptiis abstinebant: nefas enim ducebant cum ea, quæ fortuna favente recens e servili conditione emerferat, connubio jungi. Hinc memoriæ prodidit Livius (a) Hispalæ Fecenniaæ libertinæ indultum ex S. C.: *Uti ei ingenuo nubere liceret, neu quid ei, qui eam duxisset, ob id fraudi ignominiave esset*. Sed hæc libertinæ illæ intelligendæ sunt, quæ manumissæ essent, minime vero a manumissis prognatæ. Atque hæc ad Reipublicæ extrema tempora servata sunt, nempe ad Augustum usque, qui ut Urbem civibus exhaustam, quantum posset, repararet, hac adhibita distinctione rem moderatus est. Voluit quidem ut plebi liceret cum libertinis nubere, *quia masculi ingenui numerum ingenuarum feminarum multum anteibant*, ut scripsit Dio. Noluit vero ut Senatoribus, eorumque liberis idem fas esset, ne amplissimus ordo pari jure cum plebe censeretur, neve servilis sanguinis consortio vilesceret.

Itaque hac prohibitione non Senatoribus tantum ipsis consultum, sed & eorum liberis, ac nepotibus, pronepotibus, ceterisque ex filiis, licet longo intervallo, progenitis. Sed quamvis eodem jure urgente filios adoptivos, iidem per emancipationem lege soluti essent; tamen filii naturales, postquam etiam e patria potestate exiverint, ab Augusti sanctione non sunt immunes. Quum enim emancipatio de jure civili sit, natalium vero honestas de jure naturæ, licet per eam agnatio amittatur, quod est vinculum civile, amitti tamen non potest naturæ beneficium, quod nascendo acceptum est. Sed quæstio hinc exurgit, quæ sane interpretibus nimis contendendi occasionem dedit, cum liberis ne ante dignitatem hanc prognatis honor communicandus sit, an vero & posthumis, hoc est, natis postquam pater eorum Senator esse desiit. Fuit quidem aliquando inter Orientales consuetudo, ut filiis, ante quamcumque patris dignitatem natis, nequaquam ejus splendor tribueretur.

(a) *Lib. 38. cap. 19.*

retur, quemadmodum in Xerxe, & Arthamene Darii filiis, quorum alter sane antea, alter vero post Regnum natus est. Sed contra apud ceteras gentes fere omnes invaluit mos, ut honorati patris dignitas & filiis ante eam creatis, prodesset. Neque profecto his adversatur Valentis, & Gratiani Constitutio (a), quæ quamquam prima fronte secus præferre videatur, tamen illa cum Ulpiano concilianda est, ut licet ante dignitatem Senatoriam editus Senatoris filius quod ad onera dicendus non sit, tamen in honoribus habeatur. Et quidem oneribus quibusdam urgebantur Senatores, veluti glebæ, follisque collatione, atque auri oblato dono: a quibus sane immunes ipsi Augusti voluerunt filios, qui antequam pater Senator esset, nati forent. Quod profecto ex mente ipsius Constitutionis depromitur: cur enim affirmatur id de *Clarissimatu*, quod de Senatoria dignitate negatur? Nisi quia *Clarissimatus* honor nulla onera sibi annexa habebat, quæ Senatoria dignitas ferebat: qua de re si cum natis ante *Clarissimum* patris honor communicaretur, idem dicendum de Senatoria dignitate, si onera excipias. Et tamen vide ignorantia antiquarum dignitatum in quot ineptias Pragmaticos adduxerit, ut uno ore inclamarint, ante patris dignitatem natis honorem ejus minime prodesse. Non autem vacat de Senatoribus cetera hic persequi, quæ sane legi possunt apud eundem Heineccium: dicam tantum paternum honorem posthumo etiam prodesse, dummodo is ante amissam dignitatem conceptus sit, itemque prodesse avi dignitatem, si pater amiserit, de quibus fuse apud Doctores. Percurramus nos alia.

Neque Senatoribus eorumque liberis prohibitum solum, cum libertinis nuptias contrahere, sed etiam cum illis, quæ vel ipsæ, vel parentes earum artem ludicram exercuissent. Huic enim addicti notabantur infamia: ait enim Prætor: *Infamia notatur, qui artis ludicræ, pronunciandæve causa in scenam prodierit*. Quod ut clarius intelligatur, advertendum est, superbè nimis Romanos, quod peregrinum esset, averatos, ut

ne

(a) Lib. II. de dignitat. Cod. Justinian.

ne ritibus quidem religiosis peregre advenientibus indulgerent. Quamquam vero ad placandam Cælestium iram, pestilentiamque, quæ tam sæve in Urbe grassabatur, avertendam, an. V. C. 340. ad scenicos ludos Etruscos acciverint; istiusmodi tamen instituta, ut peregrina, eorumque actores, mire semper adspernati sunt. Itaque cum ludicra scenica, quamvis in Urbem accepta, vilia, ac gente togata indigna visa essent, factum est, ut qui in scenam sive ultro, sive operas mercede pacta locando prodiret, infamia notarentur. Quæ profecto causa est, quapropter nuptias inter Senatores, atque eas, quæ ludicram artem professæ essent, iniri veritum fuerit.

Ceterum hac lege non consuluit tantum Senatorum dignitati Augustus, sed etiam ingenuorum omnium. Si enim Senatoribus fas non erat matrimonio cum illis, quæ vel ipsæ, vel parentes earum artem ludicram exercuissent, jungi, ceteris ingenuis licebat quidem, si pater, materve uxoris in scenam prodissent, nequaquam vero, si ipsa conjux tale quid professa esset. Veritum etiam ingenuis omnibus fuit, uxores habere, quæ palam quæstum corpore facerent, fecerintve, vel lenæ fuissent, aut a lenone manumissæ, aut iudicio publico damnatæ, vel in adulterio deprehensæ. Ex quibus omnibus vide, quibus rationibus adlaboraverit Princeps ille sapientissimus, ut pudicitiam prostitutam per lascivientes jam Civium mores repararet ope casti & pudici matrimonii, quove consilio parem cujusque conditionem tutatus sit, quum sicuti imparis conditionis nuptiæ familias dedecorant, ita & pares cujusque honorem servant: quod quidem & vivendi honestati, & publicæ Civitatis disciplinæ mirum in modum prodest.

Sed quanta vi Augusti lex ad pudicitiam inter Cives instaurandam polleret, ex eo etiam patet, quod Constantinus Imperator, qui moribus Civium formandis maxime studuit, non solum, eam forte ab usu desciscientem restituit, sed latius etiam extendit, poenasque adauxit in illa sua Constitutione, quam anno 336. sub titulo de naturalibus liberis edidit. Nam quum Augustus matrimonium libertarum cum Senatoribus, eorumque liberis prohibuerit; hic idem & de  
Cla-

Clarissimis, aliisque Magistratibus sanxit. Deinde indecora matrimonia lege nostra inhibente, concubinatus tamen admittebatur: nam inter quos nuptiæ minime valebant, vulgatissimum erat, concubinatum esse posse; nempe matrimonium illud, quod etsi jure naturæ ratum foret, effectibus tamen civilibus careret. Sed Constantinus ne concubinatum quidem inter eos constare jussit, quos inter justæ nuptiæ fieri non poterant. Insuper poenas severiores irrogavit: nam tum istiusmodi nuptias sub poena infamiæ coercuit, tum etiam liberis, atque uxori quid relinqui vetuit; quod secus erat ex lege Papia. Demum non tantum libertinarum nuptias cum Senatoribus, Præsidibus Provinciarum, ceterisque Clarissimis averfatus est, verum etiam præter lenas, & scenicas, earum quæ tabernæ vinariæ, vel mercibus publice vendendis præessent: nam his omnibus pudicitiae periculum imminebat, quum difficillimum sit mulieribus in publica mercium nundinatione integram castitatem servare. Itaque prudentissimus Imperator a Senatorum nuptiis, aliorumque magistratuum non solum removit mulieres illas, quæ impudicæ procul dubio essent, ut sunt scenicæ, lenæ, atque aliæ hujus furfuris, sed illas etiam, in quas amissæ pudicitiae suspicio caderet.

Verum hoc legis caput a Constantino comprobatum, severiusque ab eodem perlatum, Justinus primum, Justinianus deinde abrogavit. Quum enim Justinianus a Justino adoptatus Theodora mulierem scenicam deperiret, quumque eam sibi per nuptias conjungere, Constantini edicto obistente, fas non esset; Justinum ut illud infirmaret induxit. Sic tamen se gessit Justinus, ut Senatoria cum scenicis mulieribus rata haberet connubia, modo Principis indulgentia accessisset. Sed rerum potitus Justinianus porro processit: in gratiam enim Theodoræ, quam duxerat, justas istiusmodi nuptias, vel sine Imperiali rescripto jussit, si tabulæ tantum dotales intercessissent. Quare nec mirum si alia deinde Constitutione sanxerit, ut & libertinarum nuptiæ cum Senatoribus constarent: si enim ratum est scenicarum connubium, cur non & libertinarum? Itaque velim ex his omnibus advertas, quantum profit ad Principum Constitutiones penitus intelligendas eorum religionem, atque mores exploratos habere.

§. UL.

## ULTIMUS.

*De senagenariis, quinquagenariis, ac de sponsalibus.*

**Q**UUM Augustus Imperator ea de causa connubia jussisset, ut filiis procreandis opera daretur, eorumque recta institutione Resp. honestorum Civium numero locupletaretur; par æquumque fuit, ut ad nuptias ineundas id temporis definiretur, quo sane liberi suscipi possent. Itaque quum supra de rationibus ab Augusto initis, ut pudicitiam labefactatam restitueret, differuerimus, nunc de ejusdem studio dicendum; ut matrimonium per tempus contraheretur, ne suum in re tam gravi consilium frustra esset. Sane quum apud veteres Philosophos receptum esset, generandi vim in masculis sexaginta annorum curriculo, in feminis vero quinquaginta extinguere, hinc statutum ut eo ineunte tempore, nuptiæ minime prodesse, quum legislatoris votis non responderent connubia, quæ filiis gignendis apta non essent. Sed si hujusmodi nuptiæ præmiis carerent, nullus etiam poenarum metus sexagenarios, & quinquagenarios ad nuptias ineundas urgebat: sapienter enim Augustus huic ætati poenas remisit, quum ipsa natura impediret, ne foecundæ istæ nuptiæ forent. Hinc Heineccius caput hoc sic exponit: *Omnes puberes, virique potentes matrimonium liberorum querendorum gratia inire tenentur. Senagenarii masculi, quinquagenariæ feminae a poenis hujus legis liberi sunt.* Sed num res hæc steterit, an vero per insequentis Principum Constitutiones immutata fuerit; num hujusmodi nuptiæ non tantum injustæ, sed etiam nullæ forent, non abs re hic vestigare ex historicis, & potissimum ex Tranquillo erit.

Is hæc de Claudio memoriæ prodidit (a): *Capiti Papia. Poppææ legis, a Tiberio Casare, quasi senagenarii generare non possent, addito obrogavit.* Sed quum in obscuro verba hæc maximopere lateant, videndum an aliunde luce aliqua adspergi possint. Ulpianus quidem paullo clarius loquutus est (b):

LI

Qui

(a) In Claud. cap. 23.

(b) Fragm. ex tit. 16. §. 3.

*Qui intra senagesimum, velque intra quinquagesimum annum neutri legi paruerit, licet ipsis legibus post hanc ætatem liberatus esset, perpetuis tamen pœnis tenebitur, ex S. C. Perniciano: Sed Claudiano S. C. major sexagenario, si minorem quinquagenaria duxerit, perinde habetur, ac si minor senaginta annorum duxisset uxorem. Quod si major quinquagenaria minori sexagenario nupserit, impar matrimonium appellatur & S. C. Calvisiano jubetur, non proficere ad capiendas hereditates, & legatas dotes. Itaque mortua muliere, dos caduca erit. Junctis itaque amico foedere Tranquilli, atque Ulpiani locis, tu sic habeto.*

Augustus quinquagenariis, atque sexagenariis hoc dedit, ut post hanc ætatem a pœnis liberi essent. Sed Tiberius S. C. illo Perniciano, quod a doctissimo Heineccio appellatur *Perficiendum*, quum in Fastis sub Tiberio nullus occurrat Consul Pernichus, bene vero Fabius Perficus, quod ille statuerat derogavit, voluitque perpetuo pœnis secundum hanc legem teneri, qui effocta ætate matrimonium inirent. Verum Claudius ita rem temperavit, ut si sexagenarius minorem quinquagenariam duceret, liber esset a pœnis, quum per hujusmodi nuptias adhuc possit proles procreari ad augendam Rempublicam: contra vero si minori sexagenario nuberet quinquagenaria ex S. C. Calvitiano, quum effoctas jam mulieris uterus impar sit gignendo, etiam si vir generandi vi polleat. Neque dictis adversatur Tribonianus, & Ulpianus (a), matrimonium scilicet post hanc ætatem initum nihil ex lege Pappia Poppæa ad pœnas cœlibatus effugiendas prodesse: nam sæpe S. C. leges insequentia ipsis legibus tribui solent: quare verosimile est laudatos Auctores, quod sub Tiberio Senatusconsulto conditum, legi ipsi Papiæ sub Augusto tribuisse. Et quidem certo certius est Augustum masculos sexagenarios, feminas quinquagenarias a pœnis cœlibatus immunes sanxisse: absonum enim visum ad matrimonium impellere, quos ex naturæ impedimento generare haud posse credebant, quemadmodum & spadones immunes fuisse idem Heineccius suspicatur.

Num vero istiusmodi nuptiæ sub Tiberio jure ipso nullæ,

(a) *L. 27. de nuptiis.*

hæ, an tantum injustæ? Augusto quidem imperante eas effectibus tantum civilibus destitutas, exploratum est ex Tullii nuptiis cum Publilia initis anno ætatis suæ sexagesimo secundo (a); idem fecit Apulejus cum Pudentilla, cujus matrimonium non propter ætatem effectam, sed ob carmina, & veneficium ejus adversarii accusabant (b). Sub Tiberio autem idem jus fuisse, neque hæc matrimonia rescissa, noster Heineccius evicit, præter ceteros ex Ulpiano, qui quærens (c) an mulieri, quæ spadoni nupserit, competat dotis actio; negat quidem in spadone castrato, ait vero si castratus ille non sit. Validum igitur erat cum spadone matrimonium, quando dotis actio datur: ergo non rescindebantur illæ nuptiæ, etiam post Tiberium, quamvis civilibus privilegiis carerent. Si plura de his exoptes, adeas eundem auctorem, quum nobis alia percurrenda sint.

Quum Augustus coelibatum poenis persequutus sit, nuptias autem præmiis potissimum commendaverit, id maxime intendit, ut per nuptias a venere vaga cives diverterentur, & honestissima prole locupletaretur Respublica; proinde non solum viris, sed etiam mulieribus præmia constituit, nempe ut & ex per immatura adhuc sponsalia ad nuptias festinarent. Sed quia vulgata lege, statim hominum improbitas fraudes excogitat, quibus leges infringat, Romani contractis sponsalibus, vel sponfas repudiabant post quæsitæ legis præmia, vel nuptias diutissime differebant, maritorum interim privilegiis fruenter. Hinc sane Princeps ille prudentissimus, ut fraudibus his occurreret, maxime cavit, quod quidem Svetonius innuit, Dion vero luculentius prodidit. Hæc igitur habet Svetonius (d): *Quumque etiam immaturitate sponfarum, & matrimoniorum crebra mutatione vim legis eludi sentiret, tempus sponfas habendi coarctavit, divortiiis modum imposuit.* Quæ sane Dion ita planius explicat: *At cum quidam puellas desponderent, & præmia nihilominus ferrent maritorum, rem opusque*

L I 2

ma-

(a) Quintilianus lib. VI. cap. 4. instit.

(b) Apolog. XI.

(c) L. 39. de jure dotium.

(d) In Octav. cap. 34.

*mariti non præstarent, statuit nulla sponsalia firma esse, quæ biennio exacto nuptiæ non sequerentur: hoc est ut omnino decennem despondere opus esset, si quis sponsionis ejus fructum vellet percipere. Puellis enim duodecimus annus plenus ad nuptias definita ætas censetur. Ex quibus habemus sponsalium nuptiarumque tempus definitum. Sed quid illud est, quod Svetonius subdidit, licet Dion tacuerit, divortii modum imposuit? Id quidem Ulpianus nobis aperit (a): Feminis (inquit) lex Julia a morte viri anni tribuit vacationem: a divortio, sex mensium: lex autem Papia a morte viri, biennii, a repudio, anni & sex mensium. Ecce ribi, quo Augustus consilio in sponsalibus, & matrimoniis Reip. caverit, neu legi suæ fraus fieret..*

At vero summus vir Cujacius (b), eumque sequutus Casaubonus Svetonii locum (c) de vacatione triennii Civibus data, ut legi Papiæ ab Augusto latæ parerent, ad tempus sponsis datum, ut festinarent ad nuptias, vel viduis concessum, quoad vota altera redirent, referunt, quare biennium illud in triennium vertunt. Sed hoc tam Svetonio, quam Dion omnino adversatur, qui uterque tempus aperte distinguunt quod quidem legenti patet. Sane Romani duodecimum annum in muliere, decimum & quartum in masculo ad nuptias constituere, quum eo anno feminæ potissimum menstruales fiant, ex quo generandi facultas evincitur. Sat quidem scio Græcis, aliisque Populis secus adhibuisse: Aristoteles enim (d) e Republica ratus est, si mares anno circiter trigesimo septimo, feminæ vero duodevigesimo matrimonio jungerentur. Lycurgus teste Plutarcho, quamvis certam nuptiarum diem non habuerit, robustiores tamen, & grandes natu virgines in matrimonium duci voluit. Quum enim hic Remp. suam ad bellicam virtutem pararet, provectioris ætatis mulieres ad nuptias optavit, ex quibus nempe firmiores liberi procrearentur. Sic Tacitus de Germanis scripsit: *Sera apud illos*

(a) *Fragm. tit. 14. §. 1.*

(b) *Ad l. Papiam.*

(c) *In Octav. cap. 34.*

(d) *Lib. VIII. Politic. cap. 16.*



*illos fuit juvenum venus , & hinc inexhausta pubertas .* Sed Romanis alia mens fuit : putabant enim facilius factu , ut mulier tenellæ ætatis viri moribus , domesticoque imperio assuesceret ; quumque adhuc esset furtivi amoris expers , honesta conjugia libenter sequeretur , iisque firmus adhæreret . Atque hæc , ut ego censeo , ratio est , cur Romanis potissimum visum , duodecimum annum ad nuptiarum ætatem in mulieribus definire .

Quum igitur ætas hæc legitimum matrimonii tempus foret , patent hinc quamplurimæ juris Romani consequentiæ , scilicet legata puellæ relicta , si nuberet , peti minime posse , nisi duodecimo anno expleto , etiam si ante nupisset , similiter datam dotem ante duodecimum annum , si forte repeteretur antequam mulier legitimo tempore in domum viri traderetur , non actione dotis , sed conditione indebiti agendum ; demum vitium puellæ immaturæ illatum , etsi ad viri lares deductæ , non tamquam virum , sed uti sponsam vindicare posse ex Divi Severi rescripto . His delibatis , ut lucidius semper patefcat , quanto antiquitatis notitia juris interpretibus præsidio sit , cetera videamus .

Dixi supra Augustum , ad fraudes præcidendas , duodecimum annum nuptiis , decimum vero sponsalibus ineundis definivisse . Nolim vero ex his inferas , vetitum fuisse ante hoc tempus sponsalia , vel nuptias contrahi , quum quamplurima prostant in jure jurisperitorum responsa , etiam sub Augusto secus sonantia . Hoc tantum voluit prudentissimus Princeps , ne maritorum præmiis locus esset , si præter legitimum tempus post sponsalia protraherentur nuptiæ ; nequaquam vero prohibuit , quominus ante decimum annum sponsalia contraherentur , aut sponsa ante duodecimum sponsi domum deduceretur . Ex adverso si justa legitimaque causa intercederet , ut inita sponsalia ultra præscriptum tempus protraherentur , nempe infirmitas , absentia Reipublicæ causa , aliaque ; id satis erat , ut interim vir , & sponsa maritorum privilegiis gauderent : quibus sane non excidebant , nisi quum amoto impedimento nuptias remorarentur . Quamobrem indulgebat lex mulieri , quæ mortuo viro intra tempus luctus non nuberet,

ret, quæque a viro priori per divortium dimissa, non paratam nancisceretur occasionem alteri nubendi. Accipe hinc causam, cur Augustus a morte viri biennii vacationem mulieri dederit, a repudio autem anni & sex mensium spatium, ut tamen interim a poenis cœlibatus immunis foret, maritorumque privilegiis perfrueretur. Quum autem vir mulierem defunctam lugere non deberet, aliamque sibi ducere statim a priori solutus posset; ratio proditur, quare non fuerint viris, quemadmodum mulieribus, præstituta tempora ad matrimonium iterandum. Itaque non erat, cur adeo Cujacio adlaborandum, ut discriminis rationem vestigaret, quam nunquam tamen se invenisse fatetur (a).

Dottissimus Heineccius, qui in legis hujus commentario aliorum omnium industriam longe superavit, ad hæc duo capita de sexagenariis, & de sponsalibus, concubinatam, tamquam rem ad legem nostram pertinentem, attexit. Sed nos quamquam de eo in jurisprudentia Constantini multa ediserturi simus; quædam tamen hic, nec forte poenitenda, quæ sane solertissimum illum virum fugerunt, adjiciemus. His verbis ille caput hoc confinxit: *Quas personas per hanc legem uxores habere non licet, eas concubinas habere jus esto. Ingenuam honestam in concubinato habere jus ne esto.*

Itaque concubina non vaga meretrix, sed uxor minus legitima erat, ita ut illa tantum pro concubina haberi posset, quæ per leges civiles uxor esse prohiberetur: propterea non uxor, sed convictrix, uxor gratuita, hoc est, quæ per coemptionem, lege vetante, in manum non venerat; item sodalitaria, amica appellabatur, ut in *l. Titia de auro, & argento legato, Titia Amica mea, cum qua sine mendacio vixi*, hoc est sine simulatione. Sed quum illam haberi pro concubina potuisse scripsi, quam lex civilis vetabat uxorem esse, de puro putoque jure civili intelligitur, hoc est de lege Julia, & Papia: nam si honestatis ratio nuptias impediret, concubinitus etiam prohibebatur; quale profecto erat cognationis, affinitatis, aut aliud ejusmodi vinculum: quemadmodum si qua

uxor

(a) *Lih. VI. obser. cap. 37.*

uxor erat , concubina esse non poterat , sicuti nec uni duæ concubinæ , nec duobus una concubina aderat . Itaque uni , eique qui cœlebs erat , concubina adesse poterat , tantumque una , & quæ ingenua non esset , sed vel liberta , vel ingenua quidem , quæ artem ludicram , vel quæstum corpore fecerat , aut in adulterio deprehensa , vel de eo damnata fuerat . Hæc sane , quum per leges civiles uxor esse non posset , poterat tamen esse concubina . Quum licita esset hæc conjunctio , quamvis civilibus effectibus carens , poterat pater liberis ex concubinato procreatis , quæ vellet relinquere , aut dare , licet heredes Patris ipso jure non essent : etenim non in ejus , sed in matris erant potestate , itaut maternum nomen , & patris tantum cognomen præferrent . Hinc dicti naturales , non autem spurii , quum nullam infamiam subirent , neque ullius notæ macula laborarent , quominus possent a Patre heredes institui . Post legem hanc Papiam concubinatum , sive impar atque inæquale matrimonium , ut medii ævi Scriptoribus appellatum , invaluisse laudatus Heineccius ingeniosissime more suo conjicit . Sed vellem profecto , ut causam pateficeret , cur Augustus , lege Papia vulgata , eum instituerit , quam sane ego , si quid verisimile saltem conjici possit , tentabo .

Augustus , uti passim dictitavi , per legem hanc , quantum potuit , curavit , ut lascivientes , atque impudicos civium mores castis nuptiis emendaret . Quare quum præcepisset , ne qua pellex , lena , arenaia , scenica esset uxor , id voluit , ut mulieres sub nuptiarum desiderio impediret , ne nefandas artes exercebant , si uxoris nomine , ac matronali honore præfulgere vellent . Quod si hoc libidinis ardore parvi facerent , jussit non posse corpore quæstum facere , nisi apud Ædilem impudiciam suam profiterentur , ut hoc impudentiæ injecto freno a turpi licentia desisterent : quod si per hæc remedia in cupiditatibus suis non continerentur , eas lex Papia tolerabat . Sed Augustus , ut saltem a vaga venere averteret , passus est , ut quæ uxores esse non possent , concubinæ forent , tam ut ipsæ , quam & ii , quibus per concubinatum jungebantur , vagum concubitum non appeterent . Flagret , tamen si Senator , libertæ amore ; nonne si liber a nuptiis sit , expedit

pedit libertam concubinam habere, atque hac una potius, quam scortorum varietate corpus suum fœdare? Idem dicendum de ingenuo cum lena, vel scenica, aut si quis ex priori conjugē liberos haberet, ne scilicet iis novercam induceret. Id igitur menti fuit Augusto, ut per concubinatum cives a promiscua libidine coerceret. Sed hæc per ea tempora dicta sint: nam sub Christianis Principibus alia prorsus invaluerunt, & quidem saniora.

Nam Constantinus modis omnibus annisus est, ut consuetudinem hanc jamdiu obtinentem funditus everteret, Civesque ad legitimas nuptias adigeret. Verum quum statim eam, utpote nimis inveteratam, uno impetu eradicare non posset, id egit, ut ex transverso saltem labefactaret. Itaque ante omnia prohibuit, ne quid ab istiusmodi viris concubinæ, filiisque naturalibus daretur, vel testamento relinqueretur; ut ita filiorum egestatem timentes a concubinatu detererentur: deinde vero constituit, ut si quis a concubinatu ad justas nuptias diverteret, filii naturales ante suscepti legitimi haberentur: nam & poenarum metu, & præmiorum spe ad vitæ honestatem revocandi sunt homines. Sed expressis verbis præfatus est, hujusmodi legitimationis beneficium ad eos tantum, qui ante hanc Constitutionem nati essent, pertinere. Nec sane præter rem: fraus enim legi facta esset, si & in posterum id cavisset. Num quis a concubinatu absteritus esset, si per subsequens demum matrimonium filios naturales, tam facile in legitimos converteret? Vide hinc immane quantum Tribonianus ab Constantini Constitutione aberraverit, qui Imperatoris mente non satis intellecta, ordinarium ac perpetuum legitimandi modum insequentes nuptias fecit. Poterat saltem ex lege Zenonis de naturalibus liberis Constantini sententiam internoscere. Quare dicendum vel Tribonianum cœcutiisse, vel moribus sui Principis sese accommodasse, qui concubinatum haud ægro ferebat animo. Si plura de hoc desideres, vide titulum lib. VI. de naturalibus liberis. Ceterum hic laude sua fraudanda non est doctissima dissertatio, quam hoc de argumento conscripsit Carolus Blascus Patricius Rossanensis, conterraneus noster; de cujus doctrina,

æ, morumque præstantia quæ clara extant monumenta . Etenim is quamplurima scripsit de Jure Canonico opuscula , in quibus retrufiores locos pertractavit ; nec fine maxima illius gloria videre est , quanta eruditionis suppellectili , atque rerum copia res difficiliore elucidet : omnia enim ab origine sua , atque ab historiæ Ecclesiasticæ penu repetendo sat prodit , quanta cura Jus Canonicum cum vetus , tum novum sit perscrutatus , atque in illius intimos recessus penetraverit . Par igitur æquumque est , ut tanti viri elucubrationes , tu , lector , sedulo evolvas , atque perlegas .

C A P U T VI.

*De amoris per Augustum impementis contra nuptias.*

**I**lla Constitutio modis omnibus absoluta appellanda est , quæ Civium mores præmiis , atque pœnis conformat ; atque viam pandit , qua ad ejus finem perveniatur , eaque quæ moram , vel obicem præbent , quominus Cives ei pareant , removeret . Hinc Augustus Princeps Sapientissimus , quum leges ad justas nuptias fovendas , Urbemque Civibus exhaustam honesta prole replendam , omni adhibita cura condidisset ; nihil profecto prætermisit eorum , quæ opus erant , ut voti compos fieret . Pœnas igitur , & præmia proposuit , quibus Cives obsequentiores essent , eaque repellere adnissus est , quibus vel fraus , vel impedimentum adiceretur . Itaque in præsentia nobis sermo erit de pœnis coelibatus , privilegiisque maritorum , ac de iis , quæ ille præcepit , ne nuptiæ impedirentur . Quumque nuptiæ vel per conditionem adjectam coelibatui , aut viduitati , vel per late diffusarum affinitatum vinculum , vel per absentiam diuturnam , & divortia , vel demum per verantium parentum potestatem prohibeantur ; hinc his omnibus occurrens , mirum est , quanta prudentia se gesserit , ut cuncta ex sententia succederent . De his igitur omnibus singulatim a nobis agendum erit , nempe de conditione adjecta coelibatui , vel viduitati , de adfinitate , de divortiis , de absentia , deque Parentum potestate in filios , qua nuptias

M m

im-

impediunt; demum vero de pœnis, atque præmiis cœlibatū, & maritorum, deque fraudibus in legem inventis, atque amotis.

## §. I.

*De legatis, & de libertate data sub conditione Cœlibatus.*

**S**ANE quæ usque adhuc edifferuimus, luculentissime Papi-  
nianus comprobavit. *Eam ( inquit ) legis sententiam vi-*  
*deri (a), ne quod omnino nuptiis impedimentum inferatur. Quod*  
*in fraudem legis, ad impediendas nuptias scriptum est, nullam*  
*vim habet (b).* Quum autem cœlibatus, vel viduitatis condi-  
tio nuptiis maxime adversetur, sub Augusto receptum fuit,  
ut istiusmodi conditiones a legato, vel ab heredis institutio-  
ne, utpote legibus adversæ, rejicerentur, firmo tamen ma-  
nente legato, vel hereditate. Sed quum lex quæ frequentius  
accidere solent, respiciat, juvat hic vestigare, quibus de caus-  
is Romani onus hoc heredibus suis, vel legatariis injungerent.

Florente Repub. magno in honore orbitas fuit, ac cœ-  
libatus: nemo enim ex civibus erat, maxime vero si adgnā-  
ti, cognatique essent, qui orbos, & cœlibes non coleret,  
iis non obsequeretur, eorum latus non tegeter, modis de-  
mum omnibus iis non inserviret. Immo si petitores essent,  
nemo fere eis suffragium abnuebat. Quum enim liberis carerent,  
undique Cives convolabant, ut eorum gratiam inirent, re-  
stamenta que captarent. Bene satis cœlibem quemdam sic  
loquentem induxit Platus:

*Quando habeo multos cognatos, quid opus mihi sit liberis?  
Nunc bene vivo, & fortunate, atque ut volo, atque animo,  
ut lubet.*

*Mea bona morte cognatis dicam, inter eos partiar.*

*Illi apud me edunt, me curant, visunt quid agam, ecquid  
velim.*

*Prius-*

(a) L. 72. p. 4. de conditionibus.

(b) L. 79. p. ultimo eodem.

*Præquam luceo, adsunt; rogitant noctu, ut somnum ceperim.  
Eos pro liberis habeo: quin mihi mittunt munera:  
Sacrificant, dant inde partem maiorem mihi, quam sibi.  
Adducunt ad exta: me ad se, ad prandium, ad cœnam vocant.  
Ille miserrimum se retur, minimunt qui misit mihi.  
Illi inter se certant donis; ego hoc müssito mecum.  
Bona mea inbiant, certatim mittunt dona, & munera (a).*

Quibus si addas corruptos per id tempus mulierum mores, quibus ingentis quidem molestiæ viris suis erant, minus sane miraberis a patribus, quo bene filiis suis consulerent, imperatum cœlibatum.

Immo mulieres legere est apud probatissimos scriptores, morte solutis nuptiis, quam honestum putarent in perpetua viduitate, & solitudine dies transigere, ut ita defuncti mariti cineres colerent. Et quidem de Germanis hæc scripsit Tacitus (b): *Melius quidem adhuc eæ Civitates, in quibus tantum Virgines nubunt, & cum spe votoque uxoris semel transigitur. Sic unum accipiunt maritum, quomodo unum corpus, unamque vitam, ne ulla cogitatio ultra, ne longior cupiditas, ne tamquam maritum, sed tamquam matrimonium ament.* Inter Herulos infamiæ poenam subibat mulier, quæ se ad viri sepulchrum laqueo non necaret. Denique apud ipsos Romanos viduitatis multa erant præmia: solis enim unius viri uxoribus fas erat Fortunæ muliebris, Matris Matutz, & Pudicitæ signum attingere, solæ illæ corona pudicitæ præcingebantur, illæ inter Sacerdotes Dearum allegabantur. Ex quibus factum, ut honori sibi feminæ ducerent, si nuptias non repeterent: quare Propertius cecinit (c):

*Filia, tu specimen censurae nata paternæ,  
Fac teneas unum, nos imitata, virum.*

Præter hæc viri etiam sæpe filiorum cura, atque amore ducti, uxoribus præcipiebant, ne ad alteras nuptias transirent: exploratum enim sibi erat, intempestivum secundi viri amorem.

M m 2

rem

(a) *Plaut. Mil. glor. act. 3. scena 1. ver. 92.*

(b) *De morib. Germ. c. 19.*

(c) *Lib. IV. elegia XII.*

rem primoribus liberis detrimentum maximum allaturum : atque hæ causæ fuerunt cur parentes , vel mariti cœlibatum filiis suis , & viduitatem uxoribus mandarent . Sed quum id legibus Juliis adversaretur , præcepit Augustus , ut rejecta cœlibatus , vel viduitatis conditio , firma maneret , & heredis institutio , legatique collatio , licet heres , vel legatarius non paruissent conditioni : improbantur enim conditiones , quibus student homines legi fraudem facere . Hæc eadem ratio est , cur istiusmodi conditio etiam repellatur , si non ipsi mulieri , sed iis sub quorum potestate mulier est , legatum esset , modo ea non nuberet : puta , lego Titio centum , si mulier minime nubat ; ipsumque Titium rogo , ut eandem summam mulieri restituat non nubenti . Fraus enim & hic , licet oblique , in legem committitur . Itaque tam legata , quam fideicommissa sustinentur , quamvis conditioni non stetur , quam sane leges averfantur .

Sed hic a nonnullis solet moveri quæstio , quid juris sit , quum mulieri legatur , si non nupserit , ejusdemque fidei committitur , ut Titio restituat si nubat ? Erit ne fideicommissio huic conditionali locus , quum per nuptias conditio impleatur ? Inter Jalianum , & Cajum fuit non minimum dissidium : negabat Julianus (a) inquiens : *Commode statuitur , etiam si nupseris , legatum eam petere posse , & non esse cogendam fideicommissum præstare* . Sed in diversam sententiam abiit Cæjus (b) . *Non dubium sit ( inquit ) quin si uxori legatum sit , si non nupserit , idque alii restituere rogata sit , cogenda est , si nupserit , restituere* . Vix est , ut adversa hæc Jurisconsultorum responsa in concordiam adducantur : tamen salva res erit , si dicamus , in priori specie conditionem illam per modum pœnæ fuisse adjectam , atque ideo a Juliano improbari ; in altera vero validum statutum esse legatum , quum fideicommissum in vim puræ putæque conditionis conceptum fuerit . Itaque a legato conditio rejicitur , quum per eam nuptiæ impediuntur : accepto autem legato , cogitur mulier illud ob fideicom-

(a) L. 22. de condit.

(b) L. 14. de legat. 3.



missam restituere, quum cujuslibet legatarii fidei committi possit, ut rem legatam alteri restituat; modo tamen id non poenae nomine, sed conditionis vi fiat. Hinc ortum illud apud Pragmaticos dogma: *Conditiones omnes, quae coercent libertatem, nullius esse ponderis, si ita conceptae sint, ut libertatem ipsam directe videantur infringere*; contra vero validas ratasque, si eventum tantum prospiciant, nempe quando mulier nubat, det centum Cajo.

Verum si ea esset conditio, ut nuptias non vetaret, eas tamen intra certum tempus, locum, & personas praescriberet, scilicet si non Cajo, si Titii arbitrato, si non in Africa, si postquam liberi pubertatem attigissent, nuberet; ratam legitimamque fuisse rebantur; adeo ut vel legatum repudiandum, vel conditionem implendam censerent, quum per eam nequaquam nuptiae impedirentur, sed effrenis tantum nubendi licentia iusta de causa coerceretur; contra vero, si testator ita tempori locoque haesisset, ut praeter haec nubere vetaret, quum pro non scripta conditio haec haberetur, firmo legato manente. Legem enim utilem Reipublicae, sobolis scilicet procreandae causa latam, adjuvandam interpretatione respondit (a) Terentius Clemens. Ex quibus profecto probatissimam regulam jam habes de conditionibus legato, fideicommissio, vel haereditati adjectis, quibus nuptiae impediri videntur, quando nam scilicet ratae sint, vel pro non scriptis censeantur. Ceterum quid postea sub Constantino, Religione Christiana invalescente, favore coelibatus, vel viduitatis, novum investum sit, quidve Justinianus statuerit in abroganda obscurissima illa lege, vulgo *miscella* dicta, hic dicere non libet, quum meum consilium sit Augustanam Jurisprudentiam percurrere, eamque novo respondentem regimini ostendere. Igitur ad alia potius properemus, instituto nostro propria.

Nuptiae etiam impediabantur, si Patronus libertum, libertamve jurejurando quominus connubia inirent, adegisset: hinc lex nostra sic cavit: *Si patronus iusjurandum in hoc liberto imposuerit, ne uxorem ducat, vel liberta, ne nubat: iusjurandum permittitur, nuptiasque ex hac L. contrahendi liberto libertaeque*  
jus

(a) L. 64. §. de conditionib.

*jus esto*. Cujus capitis ut ratio magis elucescat, in memoria revocandum est solitos Patronos libertis, libertabusque conditionem in manumissionibus adjicere, ne conjugia celebrarent. Lex enim duodecim tabularum sanxerat, ut liberto ab intestato, & sine liberis moriente, ejus hereditas ad patronum perveniret: quæ de re, ne patroni hoc lucro exciderent, solemne iis erat in manumissionibus pro conditione apponere, ne libertus uxorem duceret. Quum autem hoc cum lege nostra non congrueret, nil mirum si conditio hæc, improba aliquin, rejecta fuerit. Sane lex Ælia Sentia id etiam caverat; patronum enim qui conditionem hanc vel ipse per se, vel per alium adscripserat, hereditate multabat. Ceterum minime libertum jure jurando præstito solvebat, quum in promissionibus liberto- rum tantum id æstimaretur; quantum in ceteris stipulationibus, quæ obligationum omnium firmissimum vinculum erat: quare rato juramento per legem Æliam Sentiam, liberti solum hereditate patronus excidebat. Sed severius quidem lex nostra se gessit: hæc enim & ab jurejurando nuptiis adverso libertum, libertamque exemit omnino.

## §. II.

*De jure affinis.*

Quum & affinitas nuptias impediat, huic quoque modus impositus. Sed de ea affinitate sermo est, quæ nimium diffundebatur; quum illa, quæ ex publica honestate proficiscitur, integra usque manserit. Itaque quum socer, socrus, gener, nurus, privignus, privigna instar parentum, & filiorum sint, propior hæc affinitas facit, ut reverentiæ locus detur, neve nuptiæ inter hos, quippe qui in linea recta sint, consistant. Advertas hic de jure civili me verba facere, quod sub Augusto institutum, nihil vero quod ab insequentibus Imperatoribus investum attinet, quodque Conciliorum Canones, aut summorum Pontificum Decretales hac de re constituerint. Quum enim Augustalem Jurisprudentiam mihi proposuerim, turbate res ageretur, si quidquid in hoc argu-  
men-

mento Principes post Augustum jufferint, jusque Canonicum per diversa tempora præceperit, tamquam per saturam colligerem. His præmissis, ad rem veniamus. Obscurissimum sane est, quid novi Augustus in hoc affinitatis jure pertulerit: attramen solertissimus Heineccius sic eum jubere facit: *Affinitas, præter quam inter novercam, & privignum, vitricum, & privignam, nec non soceram, socrumque, & generum, nuntius morte, divortioque solvitur.*

Ut hoc legis caput pateat luculentius, advertendum est, & apud alias humanissimas gentes id statutum, ut affinitas morte perimeretur. Sic apud Hebræos legimus (a): nam, ut Philo ait (b), *Connubia familiis externis sunt pro vinculo, quo soluto, solvitur & affinitas.* Hac item ratione ducti Romani putarunt, morte, vel divortio affinitatis vinculum dissolvi: ita enim affinitatem definiebant (c): *Affines sunt viri & uxoris cognati, dicti ab eo quod duæ cognationes, quæ diversa inter se sunt, per nuptias copulantur, & altera ad alterius cognationis finem accedit. Namque conjugendæ affinitatis causa fit ex nuptiis.* Et quidem si ex nuptiis affinitas enascebatur, illam dissolvi, soluto matrimonio, inferebant. Unde sane intelligimus Constantini, Constantis, & Juliani Constitutionem, ubi refertur: *& si licitum veteres crediderunt, nuptiis fratris solutis, ducere fratrem uxorem: licitum etiam post mortem mulieris, aut divortium, contrahere cum ejusdem sorore conjugium* (d). In qua profecto Constitutione quinam esse possunt antiqui illi, nisi veteres Romani?

Sed rem hanc exemplorum vi confirmemus, quæ in Romanorum historia prostant. Sane refert Halicarnæsseus (e) Tarquinium superbum adhuc privatum Tulliam Aruntis fratris uxorem duxisse. Nemo autem filios hisce ex nuptiis procreatos injustos putaverit. Addit Plutarchus (f), Crassum defun-

cti

(a) Levitic. XVIII.

(b) Legat. ad Cajum pag. 776.

(c) L. 4. §. 3. D. de grad. & adfinit.

(d) L. 2. Cod. Theod. de incestis nuptiis

(e) Lib. IV.

(f) In Crasso

eti fratris uxorem sibi matrimonio conjuxisse; quare scriptum reliquit Cicero (a): *Divortia esse affinitatum dissidia*: quum divortio sequuto, abrumperetur affinitatis vinculum. Immo & ipse Tullius (b) memorat nuptias socrum inter, & generum, hoc est inter Sassiā, & Aurium Melinum, quas licet uti inhonestas, & nefarias execratus sit, non tamen irritas, quum per divortium affinitas soluta esset, dixit, neque Sassiā dote multatam, quod sane minime prætermisisset. Hæc fuit affinitatis disciplina ad Augustum usque: sed quia sapientissimus ille Princeps per eandem legem Papiam non solum curavit, ut Civitas prole augetur, sed Civium etiam mores pudici, honestique essent, statuit ut quamvis affinitas, nuptiis solutis, excideret in linea transversa, in linea tamen recta permaneret. Qua de re inter privignum & novercam, vitricum & privignam, focerum & nurum, generum & socrum nuptiæ numquam iniri poterant. Tantæ enim hos inter intercedebat necessitudinis vinculum, ut quemadmodum sibi invicem parentum, liberorumque loco essent, ita reverentiæ causâ nuptiæ inter eosdem impedirentur. Hoc est quod dictum voluerit Diocletianus, & Maximilianus scribentes (c): *Itemque ex affinibus privigna, noverca, socru, nuru, ceterisque, quæ antiquo jure prohibentur, a quibus cunctos volumus abstinere*. Hæc item causâ est, cur post Augustum, privigni, & privignæ nomine non solum intelligerentur mariti, vel uxoris liberi, sed nepotes etiam, & neptes, pronepotes, & proneptes, & focerum, focrusque, nomenclatione tam uxoris, vel mariti parentes, quam avus, & avia, proavus, & proavia, sicuti & mariti, uxorisque, vitricus, & noverca, immo generi, & nurus, appellatione filii etiam eorum nepotes, neptesque, pronepotes, proneptesque, horumque conjuges veniebant. Atque inter hos omnes nuptiæ vetabantur reverentiæ causâ, haud secus ac si essent in linea recta cognationis, ubi matrimonium ratum non est, quamvis per mortem,

vel

(a) *Pro Cluentio cap. 67.*(b) *Ibidem cap. 66.*(c) *Collation. L. Mos. & Roman. tit. 7. §. 4.*

vel divortium soluta apud antiquos videretur affinitas. Sed in linea transversa aliter se res habuit: existimatum enim est defuncti fratris uxorem, & sororem defunctæ uxoris, solutis nuptiis, posse fratrem per nuptias sibi copulare. Procedente vero tempore subsequuntur sunt Constantini, Constantis, & Juliani Constitutiones (a), quæ id severissime prohibere: quæ Constitutiones quum ad Volusianum Urbis Vicarium directæ fuissent, equidem credo in Oriente jus antiquum usque ad Theodosium Magnum stetisse, qui sanxit, *Ne quis fratris uxorem duceret, vel duabus sororibus conjungeretur, ne dissoluto quidem quocumque modo conjugio* (b). Hæc Principes religione Christiana invalescente. At vero Conciliorum Canones quum tres affinitatis gradus decrevissent, secundum tamen, & tertium sequioris ævi Pontifices sustulerunt, quod innuisse tantum satis sit, quum Augustalem jurisprudentiam, ut supra diximus, hic exponendam aggressus sim. Ex his velim certo tibi persuadeas, omnem movisse lapidem Augustum, ut quaque versus impedimenta a nuptiis amoverentur, locupletandi gratia secunda prole Civitatem, tunc gente exhaustam ob bella civilia.

## §. III.

*De absentia Reipub. causa, & indulgentia Senatus propter nuptias.*

**P**orro nuptiæ apud Veteres Romanos per absentiam etiam diuturnam ab Urbe impediabantur. Quam autem frequentes iis essent peregrinationes, nemo est, quem lateat. Alii enim officiis præerant in Provinciis, alii procul ab Urbe stipendia merebant, vel inter præsidiarias legiones in eisdem Provinciis consenescebant, quidam demum vectigalia exercentes Roma proficiscebantur, & quidem in sola Asiæ Provincia centum quinquaginta civium millia versabantur, quos u-

N n

na

(a) L. 2. Cod. Teod. de incestis nuptiis

(b) L. V. eodem.

na internicione Mithridates iussit necari (a). Hæc autem tor Civium absentia mirum quantum nuptias impediret: nam licet vir etiam absens sibi quæreret uxorem, eamque posset per nuncium ducere, vix tamen mulier inventa esset, quæ maritum absentem concupisceret. Hinc Cæsar, qui nihilominus, quam Augustus Urbem Civibus orbatam replere modis omnibus curabat, eodem intendit, ne scilicet frequens Civium absentia impedimento connubiis esset, voluitque, *Ne quis Civis, major annis viginti, minorve quadraginta, qui sacramento non teneretur, plus triennio continuo Italia abesset; ne quis Senatoris filius, nisi contubernalis, aut comes Magistratus, peregre proficisceretur* (b). Itaque Augustus huic malo prospiciens, cavet, ne quis propter absentiam excusaretur a nuptiis, nisi Reipublicæ causa abesset.

Ex his vero intelligis, cur veteres Jurisperiti tam studiose definiverint, quæ absentia a nuptiis excusaret, quæque esset absentia Reipublicæ causa: intererat enim id permagni tum ad maritorum præmia, tum ad coelibatus poenas, quæ in eos, qui sui commodi gratia, non vero Reipublicæ abessent ab Urbe, inferebantur. Ex quo sane illud Caji pulchrum responsum explicandi mihi paratur occasio, ubi profecto quam misere antiquas leges dilaniaverit Tribonianus, ut intelligi omnino nequeant, si procul ab antiquarum rerum notitia exponantur, cernere licet. Ait Cæjus (c): *Si mulier cum filio impubere naufragio periit, priorem filium necatum esse intelligitur*. Sed cui bono hæc fictio, qua filius cum ipsa matre periens intelligitur prius illa mari subversus? Sane quum lex hæc ad augendam prole Urbem condita sit, ac proinde Reipub. saluberrima censeretur, ad eam modis omnibus fovendam conspirarunt Jurisconsulti. Itaque ut planiori via procedam, exemplum dabo. Titius pater solitarius sui commodi gratia ab Urbe profectus est: interim uxor filium impuberem, ex alio susceptum matrimonio, heredem instituit,

eum-

(a) *Plutarch. in Sulla*

(b) *Sueton. in Julio*

(c) *L. 23. de rebus dubiis*

eumque rogavit, ut moriens hereditatem restitueret Titio vitrico. Dum autem mare navigant, ambo naufragio pereunt, mater scilicet, & filius. Hinc Titius hereditatem petit, sed a Jureconsulto repellitur, quia præsimitur filius ante matrem periisse. Quod sane hac tendit, ne filius hæres sit: nam quum non abesset Reipublicæ causa, & filios non haberet, institutus ab uxore heres minime poterat solidum accipere, sed tantum decimam, matrimonii jam initi gratia: quumque fingatur, non posse esse hæredem filii instituti, quippe mortui ante matrem, reliquum erat, ut uxoris esset heres, a qua tamen non poterat accipere solidum. Itaque hæc hereditas, dempta decima, ad fiscum perveniebat; cujus quidem gratia solerter præsumptionem hanc Cajus excogitavit, ut Respub. Civibus abundaret.

Hæc sunt remedia ab Augusto parata, ne nuptiæ impedirentur, atque ut omnia sibi obsecundarent; id etiam indulgit, ut lege sua solveret aliquando Senatus. Itaque quum Senator conjugium cum liberta inire non posset, neque miles uxorem habere præter focariam; Senatus tamen beneficio fieri poterat, ut hæc tandem legitima essent matrimonia, unde justa uxor, legitimique filii haberentur. De quo sane vide Heineccium, qui plura quidem, non Augusto tantum Imperatore, sed & insequentibus Principibus imperantibus, exempla ex historia collegit.

### §. III.

*De prohibito divortio Libertæ, de divortii modo, & pœna, deque parentibus cogendis, ut liberos elocent.*

**N**emo inficias ire poterit, divortiorum licentiam nuptiis quam maxime officere. Quæ enim mulier nubere non deterreretur, quam levissimas ob causas suas sibi res habere juberet maritus? Maximo igitur jure Princeps ille sapientissimus curam omnem adhibuit, ut, quantum posset, divortiorum libertatem cohiberet. Quod sane nunc aggredior explicandum. Quamquam ex Romuli instituto vir posset a

Nn 2

mu-

muliere divertere, eique repudium remittere, modo tamen magna urgeret causa; nequaquam id vero mulieri concessum est. Labentibus autem annis, quum in deterius morum disciplina prolapsa fuisset, adeo invaluit licentia, ut levissimis ex causis & viri, & mulieres invicem a se diverterent. Cui sane mulierum libertati illud maxime ansam præbuit, quod perraro matrimonium iniretur per coemptionem in manum, potestatemque viri. Quam altas vero radices malum hoc egerit, ex Seneca præter ceteros potest colligi. Ait enim is (a): *Numquid jam ulla repudio erubescit, postquam illustres quædam ac nobiles, femina non Consulum numero, sed maritorum annos suos computant, & exeunt matrimonii causa nubunt repudii.* Igitur effrenis hæc repudii libertas adeo tunc debacchabatur, ut septa omnia honestatis perumperet, quod & impudicæ favebat veneri, & familias vexabat, atque a contrahendis nuptiis maxime deterrebat. Hæc sane in causa sunt, quare Augustus modis omnibus adnissus fuerit, ne tam frequentia saltem divortia essent. Itaque cavit ante omnia, ne liberta patrono nupta posset ab eo divertere; deinde vero eos, qui repudii causam dedissent, poena duxit multandos, ut ejus saltem metu divortiorum occasio præcideretur; de quibus singulatim differendum est.

Quum maximum sit libertatis beneficium, ingrati animi crimen esset, si liberta patrono suo nupta ab eodem diverteret. Ut autem prohibitioni huic locus esset, duo quidem concurrere debent, & ut patronus e manu sua miserit libertam, ut sibi nuberet, & ut sponte sua, non vero ab altero rogatus, miserit. Et quidem quanta quanta esset libertæ in patronum reverentia, non tamen eo pertinebat, ut invita cum illo individuum vitæ consuetudinem inire cogeretur. Poserat ergo manumissa, etiamsi nupsisset, repudium patrono remittere, si tamen non ea lege ab eo manumissa esset, ut eidem nuberet. Opus etiam erat, ut non jure fideicommissi libertatem consequuta esset. Libertas enim juris necessitate data, non illud maximum beneficium est, quod ex spontanea liberalitate proficiscitur.

Sed

(a) *Lib. III. de beneficiis cap. XVI.*



Sed ut & alios a divortii licentia prohiberet, quam viam ingressus sit, differendum. Ante omnia quidem repetenda sunt Svetonii verba *in octav. cap. 39.*: *Quumque etiam immaturitate sponſarum, & matrimoniorum crebra mutatione, vim legis etudi ſentiret: tempus ſponſas habendi coarctavit, divortiis modum impoſuit.* Sunt qui hoc loco ducti, Augustum omnino divortia interdixiſſe autument; ſed longe quiſem a vero illorum opinio abit. Nequaquam enim dictum voluit auctor, vetita prorſus ab Augusto fuiſſe divortia; ſed modum potius præſcriptum, nete mere fiant; quemadmodum modus per legem Falcidiam legatis impoſitus, non præfert, legem hanc prohibuiſſe legata, quin potius ad certam rationem legandi licentiam redegiſſe. Itaque impoſitus divortiis modus id facit, ut intelligamus nuptiarum favore fuiſſe ab Augusto divortii licentiam, aliquo veluti injecto freno, coercitam. Sed quænam fuerit hæc poena, nunc exponamus.

Verſatur hæc in reddenda dote mulieri, ſi vir cauſſam divortio præbuiſſet; & in eadem viciffim a viro retinenda, ſi mulier moribus ſuis inviſa in culpa fuiſſet. Sed & ante legem noſtram habemus de hoc exempla a jurisperitis, atque rethoribus memorata, maritum nempe dotem ſibi ob prævos mulieris mores retinuiſſe, quod actio malæ tractationis appellabatur, ut ex Quintiliano (a), & ex Cicerone (b) patet. Verum Auguſtus rem hanc ſeverius ſanxit. Quum enim levis poena putaretur, dotem reddi, reſtitutionem hanc durioribus conditionibus in eum, qui diſcidio cauſſam dediffet, munivit, quod quidem ex ſequenti capite ab Heineccio concinnato patet: *Soluta citra culpam uxoris matrimonio, ſi mulier ob mores viri diverſit, vir eam dotem, quæ annua, bima, trima die reddi debet, ob majores mores præſentem, propter minores ſenum menſium die reddito. Quod ad dotem, quæ præſens reddi ſolet, & dotale prædium Italicum, & quidquid ex uxoris, vel libertorum ejus bonis ad eum pervenerit, nec non, ſi dolo malo factum ſit, quo minus perveniret: quanta pecunia erit,*

(a) Declam. 8.

(b) Topicor. cap. IV.

*erit, tantam pecuniam ipse ejusque heredes dato, & vir simul fructum quadriennii præstato. Sin mulieris culpa discidium factum, morum nomine maritus, graviorum quidem sextam, leviorum octavam dotis partem retineto.*

Verum ut majori luce legis hoc fructum superfundatur, quædam ex præfco more circa dotes constituendas, restituendasque arcessere licet. Sane dos vel in mobilibus, vel in prædiis Romæ, Italiæ, vel Provinciæ sitis versabatur. Solemne erat Romanis res mobiles ad dotem promissas, non statim, sed *annua, bima, trima die solvere*. Quumque par æquumque sit, ut res quemadmodum data, sic restituatur; hinc accepta tribus pensionibus, si quando soluto matrimonio restituenda foret, tribus eandem vicibus reddebatur. Ex adverso prædium quum nulla intercedente mora daretur, illud debebat Patri, vel mulieri confestim etiam reddi. Porro videamus poenam ab Augusto in eos, qui nuptias per divortium solverent, irrogatam. Siquidem pravi mariti mores in culpa fuissent, mobilia is in dotem accepta statim restituere, pecuniamque numerare tenebatur, usurarum compendia amittens, quas sane percepisset, si eam interjecta ~~nota~~ *annua, bima, trima die soluturus fuisset*. Quod si dos ~~Italicus~~ *Italicus* esset, non solum statim is restituendus, sed & quadriennii ~~fructus~~ *fructus* poenæ nomine præstandi; ita ut tanta pecunia repræsentaretur, quanta quatuor annorum fructibus responderet. Sunt qui pro quatuor annis substituunt tres, ad instar nempe dotis per pecuniam repræsentatæ: sed quum usuræ pecuniæ certæ essent, fructus vero vel naturales plerumque incerti, nil mirum, si in pecunia dotali prompta restitutione plecteretur maritus; in fundo vero dotali quadriennii fructibus. Dicitur autem prædium Italicum in dotem in specie restituendum esse, quum id, invita uxore, alienari non potest, nec consentiente adhuc ea obligari. Quare sive a viro, sive ab alio quocumque possideretur, ab uxore vindicabatur; quod profecto secus erat in Prædio provinciali. Ex quo tibi ratio proditur, cur antiqui Jurisperiti tanta cura jus Italicum a Provinciali distinxerint. Sed unde nam discrimen Italici fundi, & Provincialis? Ex eo scilicet, quod quum prædia Ita-

Italica vel ibi sita, ubi jus Italicum esset, optimo jure, si-  
ve Quiritario possiderentur, ea emancipari poterant: contra  
vero Provincialia, quippe quæ in Populi Romani dominio,  
nequaquam nexu abalienari fas erat.

Hæc poena maritum sequebatur, si ejus culpa divor-  
tium fieret. Quid vero, si ex improbis mulieris moribus? Sex-  
tam, vel octavam rerum dotalium sibi vir retinebat; illam  
nempe, si graviores mores in causa essent, hanc vero si le-  
viores fuissent. Sed quid si mulier capta esset ab hostibus?  
Statim quidem solvebatur matrimonium; attamen vero tene-  
batur, si alteri non nupsisset, a captivitate erepta ad virum  
redire, novoque consensu matrimonium reintegrare: quod si  
facere noller, neque essent improbi mariti mores, poena ea-  
dem plectebatur. En præclarum Pauli responsum (a): *Non ut  
a patre filius, ita uxor a marito jure postliminii recuperari  
potest: sed tunc, quum & voluerit mulier, & adhuc alii post  
constitutum tempus nupta non est. Quod si noluerit, nulla caus-  
sa probabili interveniente, poenis discidii tenebitur.* In quo ta-  
men animadversione digna sunt verba illa, *post constitutum  
tempus*, quum lacinia sit Triboniani propter Constitutionem  
Constantini, & Justiniani, quibus conjugum ut absentem con-  
jugem per quadriennium, vel quinquennium expectet præ-  
cipitur; quod sane Pauli ævo non consonat. Hæc divortio-  
rum poena fuit sub Augusto. Sed a Christianis Principibus  
antiquo jure deinde abrogato, aliis rationibus matrimonio-  
rum constantiæ prospectum est. Videsis Theodosii, Valenti-  
niani, ac Justiniani Constitutiones, ubi certæ quædam, ac  
speciales causæ percensentur, quibus vir a muliere, mulier-  
que a viro vicissim possint divertere.

Sed quum pervulgatum satis sit, nullas injustasque si-  
ne parentum consensu nuptias fuisse; sæpe fiebat, ut ii vel  
ob rei familiaris angustias, vel uxorum suasionibus ducti a  
filiis, filiarumque matrimoniis dissentientes, ea impedirent.  
Augustus vero, cui maxima cura erat obices omnes, quan-  
tum posset, matrimoniorum amovendi, & huic parentum  
per-

(a). L. 8. de captivis.

pervicaciæ pro viribus restitit, cavitque, ut per Præto-rem Urbanum filiorum nuptiis assentiri cogerentur. Cur autem per Præto-rem? Quia brevi judicio disquiri adhuc debebat iuste ne, an injuste parentes dissentirent. Sed quum Prætoris tantum Urbani mentio fiat, credendum censeo statutum id primo, ut Urbs civibus locupletaretur; quod deinde & ad Provincias, ubi cognitio Præsidum erat, prolatum. Neque tantum Parentes assentiri, nisi forte iusta obsumeret causa, jubetur, sed ut ipsimet filiis suis conditionem quærent, præcipitur. Dissentire quippe a filiorum nuptiis videtur Pater, qui conditionem iisdem quærere detrectat, pro moribus scilicet illorum temporum, quibus filii, filiaque uxorem, aut maritum de manu patris accipiebant.

At vero cur in hac lege, nihil de dote? Immo stultum est id objicere: quem enim latet tunc temporis potuisse parentes impune filios occidere, nedum exheredare, ac præterire? Qui igitur cogi poterat pater dotem filia dicere? Ex quo deinde jure quum parentes excidissent, merito Antoninus, & Severus A. A. jusserunt cogendos esse eos, ut dotem filiabus tum Romæ, tum in Provinciis constituerent. Atque hæc sunt, quibus sapientissimus Augustus cavit, ne matrimonia adeo tunc temporis Reipub. necessaria, impedirentur. Sed posteaquam conditiones cœlibatus, & viduitatis a legatis semovit, libertarum a dominorum conjugii discessionem vetuit, absentia excusationes, ne in cœlibatus poenam inciderent, sustulit, parentum assensum in filiorum connubiis imperavit, laxioris affinitatis necessitudinem intra angustos fines compressit; postquam demum parentes ad conditionem filiis quærendam adegit; ad nuptiarum præmia, cœlibatusque poenas constituendas animum appulit, de quibus & nos disserturi.

CA-

*De privilegiis maritorum, & parentum in gerendis, petendisque honoribus, & in hereditate acquirenda; deque cælibatus.*  
• pœnis.

**I**D est humanæ naturæ primi parentis vitio affectæ ingenium, ut ad leges vel saluberrimas non nisi præmiorum spe allecta, aut pœnarum metu coacta observandas inducatur. Qua de re non immerito viri civiles affirmant præmia, & pœnas ad legis fere intimam naturam pertinere. Itaque, quum quid lege Papia Poppæa statutum sit, viderimus, par est, ut ejusdem præmia, & pœnas percurramus. Et in pœnis vitandis, & in præmiis appetendis alia aliis cura est inter homines: inops enim, & plebejus fortunarum bona, quibus egestatem sublevet, inhiat; dives autem, & Patricius gloriam vulgo, & honores exoptat. Ea vero modis omnibus absoluta lex est, quæ obtemperantibus pro cujusque ingenio præmiorum spem injicit. Etenim & vitæ commoda, & honores in medium ponit, tum etiam infimæ fortis homines, ac nobiles, & opulentos sibi allicit, quorum scilicet omnium desideria simul pascit. Hoc sane artificio condita lex nostra est, ut honores, & fortunas parentibus præferat, & eorundem amissione refragantes deterreat. Hæc igitur sunt, quæ in præsentī dicenda habeo, de honoribus scilicet primo, deinde vero de fortunarum commodis, prout in lege statuta sunt.

## §. I.

*De ornamentis Consularibus.*

**I**Nter Consularia ornamenta, parta per Brutum libertate, secures potissimum duodecim, & fasces sunt, quas profecto singuli Consules præferebant. Sed quum animadvertissent deinde duplicatam tyrannidem, ut invidia cessaret, Consulū insignia deminuta sunt. Itaque instituerunt, ut *alterum Con-*  
O o *su-*

*fulcem duodecim secures præcederent , alterum duodecim lictores cum solis fascibus , atque etiam cum coronis , ut a quibusdam est proditum ; Collegæque secures singulis mensibus sibi invicem traderent* (a). Postea vero Valerius Poplicola prudentissimus ille Consul , ut Populo magis blandiretur , non solum fascium numerum ad dimidiam partem detraxit , sed & secures prorsus exemit , instituitque ut eæ tantum extra portam Urbis ferrentur . Hinc invaluit , ut fasces alternis mensibus Consules sibi invicem traderent , vocareturque Consul major , qui eos gestaret . Tanti autem honoris , potestatisque istiusmodi erant fasces , ut singulis deinde diebus inter se mutandos censuerint .

Sed juvat hic inspicere , quis Consulum prior fasces assumeret . Sane ante legem nostram ætatis rationem habitam exploratissimum est ; deinde vero ab Augusto , cujus omnis prope cura in augenda Civibus Repub. , inductum , ut is in fascibus gestandis præferretur , qui plures haberet liberos ; quos inter numerabantur etiam in acie amissi , quum qui pugnantes decessissent pro publica salute , adhuc vivere censerentur . *Sed si par utrique numerus liberorum esset , tunc subdit lex , maritus , aut qui in numero maritorum erit præfertur* . Erant autem in numero maritorum vel sponsi , non elapso biennio ab initis sponsalibus , vel ii , qui etsi mariti non essent , jura tamen maritorum assequuti fuerant a Principe , ut milites , qui quum ex lege uxores habere non possent , obtinere a Claudio , ut maritorum jure fruerentur . Itaque maritorum jus , & liberorum idem prope erat , quo scilicet indulgebatur , ut qui liberos , vel uxorem non haberet , liberorum , & mariti commoda adipisceretur . Quid si uterque Consulum parem liberorum numerum haberet ? Maritus uterque esset , vel cælebs ? Tunc ad jus antiquum reditum , nempe ut qui ætate grandior esset , in fascibus præferretur .

Sed præter fascium decus , quos præcipiebat qui liberorum numero collegam superaret , instituit etiam ut liberi prodesse , si quis citius ad honores festinaret . *Qui candidatorum plures liberos , secundum hanc legem , habebit , præfertor*.

pe-

(a) *Halicar. lib. V.*

*petentibus honores singuli anni per singulos liberos demittuntor: eisque honores citius, quam per leges annarias licet, petere, sine fraude sua licero.* Itaque multitudo liberorum adeo peritoribus favebat, ut, si cui ætas a legibus annalibus ad honores præscripta deesset, per filios suppleretur, totque is annos solveretur lege, quot liberi essent. Quot vero anni cuique Magistratui essent præstituti, fane a nemine, si à Cicerone discefferis, licet intelligere. Is enim quum Magistratus omnes, anno quemque suo, gessisse scripsisset, ex ejus vitæ historia rem facile comperimus. Et quidem legimus anno ætatis suæ trigésimo septimo Ædilem, quadragesimo Prætorem, & quadragesimo tertio Consulem creatum. Quos profecto annos suos ex legibus annariis; quicumque magistratus peterent, censuisse putandum est. Sed ut ad rem nostram redeamus, ex iis inspicere licet, præmia ab Augusto non propter nuptias solum, sed etiam ob liberorum numerum proposita, ut pro se quisque prolis fœcunditate Urbem replere civium numero certaret.

## §. II.

*De immunitate ob liberorum numerum, deque jure Quiritium ob eosdem consequendo.*

**S**ED & alia excogitavit Augustus, quibus omnes ad operam liberis dandam, illicerentur, de quibus hic, atque in proximo Paragrapho differemus. *Qui secundum hanc legem (Heineccium concinnatorem sequor) liberos, tres Romanos, incolumes, qui quatuor in Italia, quinque in Provinciis habebit, omnium munerum personalium immunitatem habeto.*

Quid discriminis honores inter, & munera apud veteres fuerit, res est omnibus satis perspecta. Honores enim gerebant, qui cum dignitate Rempub. administrabant, atque id sive impendio opus esset, sive a sumtibus omnibus abstererent: munera autem, quæ necessario obeunda cum sumtu quidem plerumque, & sine dignitatis titulo; erantque vel patrimonialia, vel personalia, vel mixta. A patrimonialibus,

minum fraus, condita lege, paratissima sit ad eam evendendam, duplici hinc ratione liberorum numerus affectatus est, & simulatis adoptionibus, & filiis alienis sibi subrogandis. Sed Senatusconsultum sub Nerone id cavit, ne cui filii adoptivi ad personalium munerum vacationem in posterum prodesse, & censualis professio instituta est, quo uniuscujusque filii sine fraude agnoscerentur. His jam expositis alia percurramus.

Quum ingens profecto beneficium esset, ob filiorum numerum a muneribus excusari, quippe quæ ingentis erant molestiæ, ingentisque impendii, non minus etiam illud censendum est, quo Latini matrimonia ineuntes, testantesque se liberorum gratia id facere, jus Quiritium obtinebant. En legis verba:

*Latinus, cui filius, filiave natus*

*Natave, & anniculus, anniculave factus*

*Factave erit, & latina si ter enina fuerit, jura Quiritium consequitor.*

Sed ut id penitus intelligamus, quinam fuerint istiusmodi Latini, ante omnia tradendum est. Etenim ii non erant quidem incolæ Latii, vel focii Latini nominis, quibus multo ante Augustum, lege Julia, & Plotia jura Civitatis data fuerant, neque item Latini Juniani, quorum conditio nonnisi sub Tiberio ortâ est; sed ii potius, qui extra degentes, & bene de Populo Romano meriti jus Latii obtinuerant, eorum exemplo, quibus extra Italiam morantibus jus Italicum dabatur. Porro Latinorum si quis anniculum filium ex uxore Latina haberet, Quiritium jus consequebatur. Ex latina inquam: nam cum Romana conjungi matrimonio non poterat, quum peregrinus censeretur, cui Romana mulier nubere præter Principis indulgentiam prohibebatur. Quum autem maximi pretii esset Civitas Romana, mirandum non est, quod Jurisconsulti, atque omnium maxime Paullus studiose perquisiverit, quandonam filius dicatur anniculus. En Paulli verba (a): *Non statim ut natus est, sed trecentesimo sexagesimo quinto die dicitur, incipiente plane, non exacto die: quia an-*

(a) L. 134. de verbor. signific.



*annum civiliter non ad momenta temporum, sed ad dies numeramus.* Et quidem agitur hic de rebus gratiosis, in quibus quem latet diem coeptum haberi pro completo?

Sed cur non nuptiis, non filiorum nativitati, sed anniculæ ætati tantum privilegium? Facile intellectu id est, si in memoriam revocemus, Augustum non hoc tantum per nuptias cavisse, ut cives a vaga venere diverterent, sed & Civitas numero augeretur. Quod quum frustra fieret, nisi parentes filios educarent; hinc profecto nil mirum si intra eorum anniculam ætatem privilegium circumscriptum sit. Atque hæc causa est, quapropter parentes in marmoribus sæpe scribant (a) *Infantes anniculos, vel Pleno anno natos; de se bene meritos.*

Sed non erit abs re investigare, cur Latini Civitatem Romanam consequeretur per unum tantum filium, qui anniculus foret; Latinæ vero ut ejusdem participes fierent, ter eniti opus esset. Nonne antea filius hic & patri, & matri ad Civitatem Romanam præderat? Sed visa deinde est viri conditio mulieri præferri: siquidem in universo jure masculinum genus magis, quam sequior sexus habetur. Sed quum in lege nostra jus Quiritium, non vero illud Civitatis memoretur, nolim hoc sic anguste accipias, ut credas parentibus hisce id datum, quod tantum rem privatam, non vero publicam spectaret. Etenim ut ab immortali viro Ezech. Spanhemio (b) animadversum est, jus Quiritium, & Civitatis longe inter se distabant: nam hoc ad jura publica respiciebat, censum nempe, militiam, tributa, honores, suffragia, sacra; illud vero connubia, testamenti factionem, usucapionem, ceteraque, quæ ad rem privatam referebantur, complectebatur. Quare Plinius jura Quiritium, & Civitatis discernens, aliis quidem jura Quiritium, aliis vero jura Civitatis a Trajano petit (c). Itaque juris Quiritium nomine & illud Civitatis intellexit Augustus, quum id concessum fuerit, quod utrumque complectitur.

### §. III.

(a) *Grut. inscrip. pag. 673. Reins. Inscript. class. 20. num. 128.*

(b) *Orb. Rom. exercit. I. §. 11.*

(c) *Lib. X. epist. 4. v. 32.*

## §. III.

*De libertorum operis, mulierumque tutela, quibus ob numerum liberorum solvebantur.*

Quum ex Augusto gratificarentur nuptiæ, quæ secundæ forent; propterea maritorum, quæ instituerat, privilegia, nonnisi numero liberorum tribuit. Superius quidem de Latino Civitatem Romanam acquirente ob filium anniculum differuimus; nunc autem de solutione ab operis, a liberto promissis, deque muliebris tutelæ fine ob liberorum numerum agendum. *Qui libertinus, lex ait, duo, pluresque a se genitos natusque in sua potestate habebit. . . . vel unum quinquennem, operarum obligatione liberator.* Sed quum lex verba faciat de libertino filios in sua potestate habente, colligas hinc non Latinos Junianos, neque dedititios intellexisse; quippe qui, si Civitatis Romanæ participes non essent, haud profecto poterant filios in sua potestate gignere. Ad hæc, quum in libertæ potestate non essent filii, neque eam respexisse legem fatendum est, sed per nuptias potius a promissis operis liberari.

Verum ut id præmii pro sua dignitate æstimetur, necesse est, ut carptim istiusmodi libertorum operas perstringamus. Erant igitur hæc dona, & munera, quæ patronus a liberto jure exigebat. Sed propius rem ipsam attingendo, operæ patrono a liberto debitæ, aliæ sunt officiales, fabriles aliæ. Illæ in officio personæ; hæc in artificio versabantur: illas ipso jure, has vero nonnisi promissas libertus præstabat. Quum enim Romulus civium mores martiali furore formandos instituisset; fabrilia omnia, quippe quæ militari strenuitati parum congruunt, civibus prohibuit, atque ad servos amandavit, dictæ hinc propterea illiberales artes, tamquam indignæ homine ingenuo. Itaque quum penes servos tantum essent, maximum erat lucrum, quod dominus ex ministerio servorum percipiebat. Præter hæc litteris servisæpe imbebantur; unde servi grammatici, philosophi, medici, atque hinc non parum etiam in rem domini vertebatur.

Ne

Ne autem domini servos manumittendo tantis commodis exciderent, coeptum est in ipsa manumissione operas eorum excipere: quumque servus juris civilis expertus esset, hinc mos invaluit, ut libertus, postquam libertatem a domino accepisset, jurejurando, quod ante pollicitus erat, firmaret. Atque hæ sunt operæ, quibus etiam juratis libertus solvebatur, modo duos saltem procreasset filios, idque ex lege nostra: quod privilegium quanti esset, facile ab eo intelligitur, cui notum sit, qua sanctitate Romani fidem juratam servarent.

Sed veniamus ad tutelam, a qua mulier ter enixa, si ingenua esset, quater vero, si liberta, liberabatur. Id sane luculentissime scripsit Ulpianus (a). Sed quamquam hæc mulierum tutela cum moribus nostris minime congruat, immo longe ante Justinianum ab usu excesserit, non inutilis tamen navabitur opera, si ad vetusti juris intelligentiam pauca saltem ex antiquorum moribus hic depromam. Certum quidem est apud doctissimos Græcos in more positum, ut in perpetua tutela mulieres essent: si enim pupillis ob infirmum judicium tutor ad certam ætatem præstituitur, cur non perpetuo mulieribus, quarum ratio ob sexum ipsum semper infirmior? Quum vero quamplurima Græcorum instituta Romanam immigrassent, factum inde est, ut & Romani mulieres perpetuæ tutelæ subjicerent.

Itaque duplex Romæ erat mulierum tutela, pupillaris, & perpetua: illa duodecimo expleto anno finem habebat; hæc vero perpetuo perstabat. Perpetua igitur mulierum tutela penes adgnatos erat, & quidem donec nuberent: nam si mulier per nuptias farre, usu, vel coemptione initas, in viri transfiret manum, isthæc adgnatorum tutela solvebatur. Et quidem quum tutela in caput liberum sit, non in eum, qui alienæ subditur potestati, itaut filio sub patris, vel avi manu existenti tutor non detur; mulier, per solemne matrimonium in potestatem viri cadens, tutela solvebatur. Quod si matrimonium solemne non esset, illud nempe per quod mulier dominio, potestatique viri non subderetur, salva tunc erat

P p

tute-

(a) *Fragmen. tit. 28. §. 2. & 3.*

tutela legitima, vel dativa, sub qua mulier reperiēbatur. Atque ita intelligendum est marmor apud Grutterum (a); ubi Furfannia L. F. Saturnina monumentum se fecisse proficitur *sibi, conjugī, & tutori suo*. Quod ut plane intelligatur, advertendum est, per solemnes nuptias, sic mulierem transiisse in potestatem ac dominium viri, ut hic jus vitæ, & necis in eam, quasi filia esset, nancisceretur, cunctaque ejus bona dotis nomine acquireret; vicissim vero hæc mortuo viro cum ceteris filiis succederet. Quum autem Pater posset de tutela filiorum arbitrio suo disponere, hinc & uxori suæ quem vellet tutorem testamento relinquebat. Quæ sane erat tutela testamentaria mulierum.

Sed hic mihi paratur occasio illud obscurissimum Tullii dictum interpretari. Ait enim (b): *Quum permulta præclare legibus essent constituta, ea jurisconsultorum ingeniis pleraque corrupta, ac depravata sunt. Mulieres omnes propter infirmitatem consilii majores in tutorum potestate esse voluerunt; hi invenerunt genera tutorum, quæ potestate mulierum contineantur*. Qui autem sunt Tutores isti, qui tantum abest, ut mulieres in potestate habeant, ut iidem magis mulierum potestate contineantur? Ecce tibi Jurisconsulti Romani, ut uxoribus assentarentur, & fraudem legi facerent, id statuerunt, posse virum mulieri suæ plures tutores testamento relinquare, eique optionem dare, quem sibi ad tutelam vellet eligere. Quo posito, nonne eum tutorem legebat, qui omnia sibi indulgeret, quique a suo nutu penderet? Itaque tutor hic potius in mulieris quam mulier in tutoris potestate erat. Porro hanc Tutoris optionem memorat & Livius (c), qui hæc de Hispala Fecenia scripsit: *Uti Fecenia Hispala datio, diminutio, gentis enuprio, Tutoris optio item esset, quasi ei vir testamento dedisset*. Sicque ex rerum gestarum monumentis traditum puto, quod Tullius oratorie, atque obscurius dixerat. Sed nos rem persequamur. Erant igitur mulieres sub perpetua

(a) *Inscrip. pag. 552. nu. 2.*

(b) *Pro Muræna cap. 12.*

(c) *Lib. XXXVIII. cap. XIX.*

tua tutela, donec per nuptias in mariti manum venirent : quumque nihil prorsus agerent, nisi tutore auctore, hinc sine illius auctoritate neque nuptias inire, neque testamentum condere poterant. Ex quo profecto habemus quid voluerit Papinianus (a) referens patris consilium, ne filia testaretur antequam liberos tolleret. *Mando ( ait ) filia mea, pro salute sollicitus ipse, ut quoad liberos tollat, testamentum non faciat. Ita enim poteris sine periculo vivere.* Quum enim mulier ante nuptias non posset sine Tutoris auctoritate testari, hinc fiebat, ut testamentum, sive scriberet, sive nuncuparet statim evulgaretur, heredisque nomen per Urbem volitaret, ac periculum vitæ ejus crearetur. Sive enim adgnatos misso tutore institueret, sive Tutorem adgnatis præteritis, erat semper cur sibi timeret. Secus vero filiis procreatis: nam quum tutela finem accepisset, instituto quem vellet herede, tuta ab adgnatorum insidiis erat, quum arcanum, seu in scriptis condendo testamentum, fururus heres ignoraretur.

Hæc est germana legis hujus interpretatio, non vero illa a Merillio conficta (b), quod mulieres nonnisi per nuncupationem testari possent. Hæc enim Plinius de quadam Aurelia scripsit (c): *Aurelia signatura testamentum sumpserat pulcherrimas tunicas, Regulus quum venisset ad signandum: Rogo, inquit, has mihi leges. Aurelia ludere hominem putabat, ille serio instabat. Nec multa: coegit mulierem, aperire tabulas, & sibi tunicas, quas erat induta, legare. Observavit scribentem, inspexit, an scripserit.* Præter hæc ex l. 19. D. de inofficioso testamento, illud idem loculentissime evincitur, in qua laudata lege fit mentio filia a matre scriptæ heredis. Ex omnibus his huc usque enarratis colligas velim, quanta fuerit Augusti prudentia in hac lege condenda. Ut enim Urbem lascivientibus moribus purgaret, eamque desertam prope Civibus ingenue institutis oppleret, & poenarum metu, & spe præmiorum, manibus, ut ita dicam, pedibusque anni-

P p 2

sus

(a) L. 77. §. 24. de legatis 2.

(b) Observat. lib. 11. cap. 1. &amp; lib. IV. cap. XXIX.

(c) Lib. 11. Epist. XX.

sus est. Quod quidem quantum ad Monarchiam, quam maxime præ mentis oculis habebat, faceret, tum ex iis, quæ ante dicta sunt, tum per ea, quæ mox differturi, planissime patebit. Porro igitur pergamus.

## §. IV.

*De decimis, & de solidi capacitate.*

Quæcumque homines appetunt, summoque studio persequi curant, vel honores sunt, vel fortunæ. Sed quum varium sit hominum ingenium, ad omnia hæc cum simul omnes feruntur, tum alii alia exoptant. Patricius vir, quippe qui dominationem in plebem anhelat, ad honores adspirat; præterea nihil: plebejus vero, honoribus neglectis, vitæ commodis, quibus eget, avidissime inservit. Hinc Augustus noster, ut omnes omnium ordines Cives legi suæ ultro obsequerentur, sapientissime, ut supra dictum est, & honores, & fortunas parentibus proposuit; amissionem vero horum omnium refragantibus comminatus. Postquam igitur de honorum præmio legi Augustæ obtemperantibus statuto fuisse differuimus, ad alterum illud fortunarum contento cursu nunc properemus. Erat autem id decima, & solidum quod parentes inter se capiebant nomine matrimonii. Sed ut hoc clarius pateat, advertendum præ omnibus est, virum, & uxorem mortis causa inter se capere præter decimam non posse: par enim visum fuit effusam inter conjuges liberalitatem tempore potissimum mortis, quo homines liberaliores esse solent, prohiberi: facile enim fiebat, ut maritus, vel uxor conjugali amore capti, bona omnia sibi invicem relinquerent, atque ita avitis hereditatibus adgnatos privarent. Itaque prudentissime statutum, ut de defuncti conjugis bonis superstes conjux nihil, præter decimam, caperet; filiorum vero superstitum favore solidum, ut Respublica Civium numero augeretur.

Quum igitur nuptiæ secundum leges contractæ essent, decima vicissim a conjugibus in matrimonii præmium relinqui

qui potest; & si quid amplius relictum foret, poenae nomine in Fiscum cadebat, quum in legem id vetantem peccatum esset. Quoniam autem universim in lege nostra dictum est, capi nempe ultra decimam a conjuge superstite non posse; res & ad hereditatem, & ad legatum, & ad fideicommissum, & ad mortis demum causa donationem referenda est. Porro ne legi fraus fieret, neve Fiscus dulci caduco excideret, quum vulgo legitimam hujus decimae quantitatem inturbarent, receptum fuit ut bona conjugis, qui conjugi superstiti decimam reliquerat, aestimarentur. Hinc sparsim in jure rerum pretia, hoc est bonorum aestimandorum ratio, quae, abrogatis deinde legibus decimarum, a Triboniano ad legem Falcidiam commode applicata fuit.

Igitur nuptiarum praemium decima haec erat. Sed quia Augustus non nuptias tantum, sed liberos etiam ex nuptiis exoptabat; hinc & alias decimas filiorum nomine alter superstes capiebat, tot scilicet, quot essent filii. Immo id discriminis servabatur, ut si ex prioribus nuptiis filii superstes essent, totidem decimas adjicerent parentibus. Si vero ex secundo matrimonio divortio non dirempto vel unus filius esset, solidum inter se caperent. Quamvis enim lex nostra filios plurali numero meminerit, ut parentes invicem ex aequo heredes esse possent, per Prudentes tamen receptum fuit, ut unus adhuc superstes ad id satis esset. Quum enim odiosa ea sit, quae conjugum libertatem minuit, benigniori interpretatione uti censuerunt, & plurativum numerum singulariter exposuerunt. Atque ex hoc deinde factum est, ut si ne liberis defunctus non censeatur, cui filius unus superstes sit.

Quid si parentes liberos amisissent? Proderant & mortui parentibus invicem heredibus? Ita lex nostra sanxit: *Item communis filius, filiaeve post nominum diem amissus, amissave, decimam adjicito*. Duas itaque decimas Parentes in hac specie accipere inter se poterant; alteram nempe matrimonii gratia, alteram vero ob filium, modo post nominum diem defunctus sit. Ex quo sane mihi illud Dionis obscurissimum dictum explicandum occurrit. Ait is, Augustum a Senatu petiisse,

tiisse, ut tantum sibi liceret Liviæ præter legem relinquere. Anxie nimis scrutari conati sunt interpretes, quænam esset lex hæc, qua per Senatum Augustus optabat Liviam solutam. Arbitrati quidam eam legem Voconiam fuisse, quæ profecto verabat conjugem quid ex defuncti conjugis hereditate accipere. Sed quum hoc fuisset per legem Papiam abrogatum, per quam decima saltem poterat capi, inania prorsus jactitant. At salva res est, si ad legem nostram Dionem referas. Quum enim Livia ex priori matrimonio Tiberium peperisset, alterasque nuptias cum Augusto inivisset, nonnisi binas decimas lege capere ex hujus hereditate poterat. Quamquam autem ex secundo viro prolem etiam suscepisset, hæc tamen, quum ante nominum diem e vita excessisset, nihil profecto ad reliquam hereditatem proderat. Itaque ut uberiore Augusti liberalitate frueretur, nonnisi solvi antea lege a Senatu debebat.

Sed quinam dies hic nominum, sive lustricus? Is profecto, quo infanti nomen imponebatur, quod deinde in acta publica referendum erat. Qui sane dies Græcis quintus, vel decimus fuit, octavus tamen erat Romanis in puella, in puero autem nonus, atque hoc accepto nomine lustrabantur. Hinc Tranquillus scripsit in Caligula (a): *Infantem autem Juliam Drusillam appellatam per omnium Dearum templa circumferens, Minervæ gremio imposuit, alendamque, & instituendam commendavit*. Ex quo sane tibi patet quænam lustratio hæc fuerit. Sed velim, ne promiscue habeas nominum impositionem, & professionem censualem, quod quidam profecto faciunt Capitolini locum male interpretantes (b): professio enim apud acta, nonnisi imposito infanti nomine, fieri poterat, & ad trigesimum usque diem proferri licebat; illa autem nono omnino die, ut diximus. Igitur ut ad rem redeamus, infans post diem lustricum amissus decimam unam parentibus adjiciebat, & binas, si bini fuerint. Quod si tres essent, solidum tunc Parentes capiebant. Sed præter has decimas

(a) Cap. XXV.

(b) In Marco cap. IX.



timas usufructum etiam tertiæ partis bonorum consequi poterant. Ex quibus internoscas, cur in jure frequentissima illa species sit, ut maritus uxori in tempus liberorum tertiæ partis usufructum relinquat, nempe ut solidum capere præter decimas possit, si alios liberos post mortem ejus procrearit, vel ut occupet tertiam usufructus suorum bonorum, quam sane lex indulgebat etiam unius filii gratia l. 25., & 62. D. de conditionib. & l. 10. de præscriptis verbis.

Ceterum quum lex ad relicta mortis causa referretur, ut eam eluderent conjuges, excogitarunt donationes, vel sub dotis nomine confectas, vel inter vivos; cui sane fraudi legibus posterioribus occursum est. Immo & fideicommissis legis præscripto se eximere conati sunt: heredem enim quemcumque instituebant, eumque ut conjugi hereditatem restitueret, rogabant; vel si mavis, parentes ipsos, sub quorum potestate mulier esset, heredes scribebant, ut deinde tacita fide, quod relictum foret, conjugi redderent. Huc pertinet præclarum illud Papiniani responsum (a): *Si gener socerum heredem reliquerit, taciti fideicommissi suspicionem sola ratio paternæ affectionis non admittit*. Verum hic non omittendus est insignis Tertulliani locus; exhortatur enim is uxorem, ut sanctam viduitatem servet, aitque (b): *Tu modo, ut solidum capere possis, hoc meæ admonitionis fideicommissum Deus faciat*. Siquidem in animo habuit ille Patrum jurisconsultissimus leges decimarias: quemadmodum enim lex Papia præmia multa conjugibus pollicebatur, ita & contra Tertullianus ingentia bona uxori viduitatem servanti, & ad præsentem, & ad vitam futuram promittit, quæ, ut uxor solide capiat tacita, veluti fide, idest precibus Deo comittit, quemadmodum mariti heredum fideicommittere solebant, ut uxoribus hereditatem suam darent, quod leges decimaræ vetabant.

Jam de legibus decimariis, quædam adhuc supersunt de solidido

(a) L. 25. D. de his quæ ut indignis

(b) Ad uxorem lib. 1. cap. 1.

tiisse, ut tantum sibi liceret Liviæ præter legem relinquere. Anxie nimis scrutari conati sunt interpretes, quænam esset lex hæc, qua per Senatum Augustus optabat Liviam solutam. Arbitrati quidam eam legem Voconiam fuisse, quæ profecto verabat conjugem quid ex defuncti conjugis hereditate accipere. Sed quum hoc fuisset per legem Papiam abrogatum, per quam decima saltem poterat capi, inania prorsus jactitant. At salva res est, si ad legem nostram Dionem referas. Quum enim Livia ex priori matrimonio Tiberium peperisset, alterasque nuptias cum Augusto inivisset, nonnisi binas decimas lege capere ex hujus hereditate poterat. Quamquam autem ex secundo viro prolem etiam suscepisset, hæc tamen, quum ante nominum diem e vita excessisset, nihil profecto ad reliquam hereditatem proderat. Itaque ut uberiore Augusti liberalitate frueretur, nonnisi solvi antea lege a Senatu debebat.

Sed quinam dies hic nominum, sive lustricus? Is profecto, quo infanti nomen imponebatur, quod deinde in acta publica referendum erat. Qui sane dies Græcis quintus, vel decimus fuit, octavus tamen erat Romanis in puella, in puero autem nonus, atque hoc accepto nomine lustrabantur. Hinc Tranquillus scripsit in Caligula (a): *Infantem autem Juliam Drusillam appellatam per omnium Dearum templa circumferens, Minervæ gremio imposuit, alendamque, & instituendam commendavit.* Ex quo sane tibi patet quænam lustratio hæc fuerit. Sed velim, ne promiscue habeas nominum impositionem, & professionem censualem, quod quidam profecto faciunt Capitolini locum male interpretantes (b): professio enim apud acta, nonnisi imposito infanti nomine, fieri poterat, & ad trigesium usque diem proferri licebat; illa autem nono omnino die, ut diximus. Igitur ut ad rem redeamus, infans post diem lustricum amissus decimam unam parentibus adjiciebat, & binas, si bini fuerint. Quod si tres essent, solidum tunc Parentes capiebant. Sed præter has decimas

(a) Cap. XXV.

(b) In Marco cap. IX.

cimas usufructum etiam tertiæ partis bonorum consequi poterant. Ex quibus internoscas, cur in jure frequentissima illa species sit, ut maritus uxori in tempus liberorum tertiæ partis usufructum relinquat, nempe ut solidum capere præter decimas possit, si alios liberos post mortem ejus procrearit, vel ut occupet tertiam usufructus suorum bonorum, quam sane lex indulgebat etiam unius filii gratia *l. 25. § 62. D. de conditionib. & l. 10. de præscriptis verbis.*

Ceterum quum lex ad relicta mortis causa referretur, ut eam eluderent conjuges, excogitarunt donationes, vel sub dotis nomine confectas, vel inter vivos; cui sane fraudi legibus posterioribus occursum est. Immo & fideicommissis legis præscripto se eximere conati sunt: heredem enim quemcumque instituebant, eumque ut conjugi hereditatem restitueret, rogabant; vel si mavis, parentes ipsos, sub quorum potestate mulier esset, heredes scribebant, ut deinde tacita fide, quod relictum foret, conjugi redderent. Huc pertinet præclarum illud Papiniani responsum (a): *Si gener socerum heredem reliquerit, taciti fideicommissi suspicionem sola ratio paternæ affectionis non admittit.* Verum hic non omittendus est insignis Tertulliani locus; exhortatur enim is uxorem, ut sanctam viduitatem servet, aitque (b): *Tu modo, ut solidum capere possis, hoc meæ admonitionis fideicommissum Deus faciat.* Siquidem in animo habuit ille Patrum jurisconsultissimus leges decimarias: quemadmodum enim lex Papia præmia multa conjugibus pollicebatur, ita & contra Tertullianus ingentia bona uxori viduitatem servanti, & ad præsentem, & ad vitam futuram promittit, quæ, ut uxor solide capiat tacita, veluti fide, idest precibus Deo comittit, quemadmodum mariti heredum fideicommittere solebant, ut uxoris hereditatem suam darent, quod leges decimaræ vetabant.

Jam de legibus decimariis, quædam adhuc supersunt de solido

(a) *L. 25. D. de his quæ ut indignis*

(b) *Ad uxorem lib. 1. cap. 1.*

lido dicenda. Et quidem si conjuges ejus ætatis essent, qua liberos lex Papia minime exigeret, solidum vicissim capere poterant. En legis verba. *Viro, & uxori solidum inter se capiendi jus esto, si uterque, vel alteruter nondum ejus ætatis sit, qua liberi ex hac lege exiguntur.* Sed quodnam tempus hoc esset, difficillimum vestigatu est. Qui omnium industriam vicit, Heineccius conjicit legem Papiam, uti matrimonium inire jussérat omnes puberes; & viri potentes, ita liberos flagitasse a maribus anno ætatis duodevigesimo, a feminis vero forte decimo & sexto. Veteribus enim annum illum in maribus idoneum visum fuisse ad liberos procreandos ex hoc patet, quod adoptantem annos octodecim adoptatum superasse oportuerit. Jam vero sicuti filiorum orbitas minime impediébat quominus conjuges solidum caperent, modo ejus essent ætatis, ex qua liberos lex non exigebat, ita etiam si liberos in matrimonio diuturno non procreassent, pœnis solvabantur, nempe si masculus sexaginta annos natus esset, mulier vero quinquaginta. Quum enim diu fuissent in matrimonio, neque filios impediénte natura procreassent, acerbum profecto fuisset orbitatis pœna eosdem plecti, per quos minime steterat, quin liberos susciperent.

Solidum etiam vir uxoris testamento capiebat, si Reipub. causa abesset, atque postquam revertisset infra annum se matrimonio copulasset; non enim pœna in eos infligitur, qui quum non possint, legibus non parent. Et quidem id sanctiori disciplina institutum erat, ut qui ob Rempublicam proficiscerentur, secum uxorem ducere indignum censeretur, ne scilicet ea virum forte corrumpere in officio, aut ipsa delinqueret munera a Provincialibus extorquendo. Sic enim Ulpianus scripsit l. 4. §. 2. *D. de officio Proconsulis: Proficisci autem Proconsulem melius est sine uxore, sed & cum uxore potest: dummodo sciat, Senatum Cotta, & Messala Consul. censuisse futurum, ut si quid uxores eorum, qui ad officia proficiscuntur, deliquerint, ab ipsis ratio, & vindicta exigatur.* Etenim sub Tiberio, quo imperante S. C. hoc factum ab usu jam desciverat, vetitum illud, ne uxor maritum in Provincias proficiscentem sequeretur, quum Pilati uxor secum

mo-

moraretur, atque id tantum vigeat, ut de uxoris delicto vir teneretur; sed non ita sub Augusto fuerat: nam de eo hæc scripsit Svetonius (a): *Disciplinam severissime rexit. Ne legatorum cuiquam, nisi gravate, bibernisque demum mensibus, permisit uxorem interficere. Ex quibus omnibus facile intellectum est, cur lex nostra sanxerit, ut qui Reipub. causa abesset, solidum capere posset.*

Demum solidum capiebant conjuges, si filium, filiamque, quos susceperant, amisissent, ita enim Ulpianus: *Item, si filium filiamve communem habeant, aut quatuordecim annorum filium, vel filiam duodecim amiserint, vel si duos trimos, vel si tres post nominum diem amiserint, aut si intra annum & sex menses etiam unum cujuscumque ætatis impuberem amiserint, solidum inter se capiendi jus est.* Itaque si Parentes amiserint filium, qui esset puber, vel feminam nubilem, solidi privilegio perfruebantur: quum enim Parentes filios huc usque ætatis educassent, ut possent prole locupletare Rempub., æquum visum est Principi prudentissimo, ut hoc privilegio donarentur. Idem indultum est, si duos trimos, aut unum intra annum, & sex menses, vel tres post lustricos dies amisissent. Sed hic advertas discrimen virum inter, & uxorem: nam ut vir ex aliorum testamento solidum caperet unus satis erat filius, & dicebatur *pater solitarius*; secus vero in muliere est, quæ ter enixa esse debebat, si ingenua, quater vero, si libertina. Ad patres igitur pertinet illud Caji in l. 148. *D. de verbor. signific. Non est sine liberis, cui vel unus filius, unave filia est.* Hæc enim enunciatio, *habet liberos*, non *habet liberos* semper plurali numero profertur, sicut & *pugillares*, & *Codicilli*. Sed quum ad rem hanc illustrandam potissimum faciat Juvenalis locus, non est profecto prætermittendus: sic enim adulteram facit loquentem (b):

*Nullum ergo meritum est, ingrata, & perfide, nullum,  
Quod tibi filiulus, vel filiola nascitur ex me?  
Tollis enim, & libris actorum spargere gaudes  
Argumenta viri: foribus suspende coronas.*

Qq

Jam

(a) In oclav. c. 24.

(b) Sat. VIII. ver. 86.

*Jam pater es: dedimus, quod famæ opponere posses,  
Jura parentis habes, propter me scriberis heres,  
Legatum omne capis, nec non & dulce caducum.*

Hæc sunt ab Augusto instituta, ut conjuges inter se, vel ab aliis solidum caperent. Sed si quando hujusmodi conditiones conjugibus deficerent, essetque ideo inter eosdem vetita solidi acquisitio, ut legi fraudem struerent, ad substitutionis ambages confugiebant: instituebant enim filium heredem, eique conjugem superstitem substituebant, ut per has technas atque intermediam personam, solidum caperent. Nam testatori succedere prohibito nequaquam vetitum erat, ut ejus heredi succederet. Quo sane spectat responsum illud Tarentii Clementis, & Juliani in *l. 6. D. de vulgari* de matre substituta per virum filio pupillo, an succedere eidem posset. Julianus quidem distinguebat, quæ a patre ad filium pervenerant, ab iis, quæ pupillo præterea acquisita erant; atque in his indulgebat matri, ab illis vero omnino prohibebat. Contra, vero Clemens nullo habito discrimine ad solidum vocabat quum per hereditatis aditionem desinant bona esse defuncti, fiantque patrimonium heredis, ut substitutus non Testatori, sed instituto succedere videatur.

Verum quia hoc controversi juris erat, & passim Fiscus bona ultra decimam relictâ occupabat, ne tam frequens caducum esset, cautionem certam Jurisconsulti excogitarunt, quam Cajus nobis tradidit in *l. si in testamento §. D. de vulgari*; nempe ut si mulier substituta heres minime foret, *quisquis sibi heres esset* (nempe testatori) *is in parte quoque deficientis esset heres*. His enim conceptis verbis partem deficientem non Fiscus sibi adimebat, sed qua quisque parte heres erat, ad illam, quæ ad Fiscum spectasset, etiam vocabatur. Itaque vulgo mulierem unicum alio substituebant, isque volebant, ut ex asse heres foret, si mulier portione sua excideret. Atque hæc sunt præmia, & privilegia data parentibus ab Augusto. Videamus nunc cœlibatus, & orbitatis poenas.

## §. V.

§. V. & U L T I M U S .

*De pœnis cœlibatus, & orbitatis.*

**Q**Uum solemnes nuptias, parentisque prole felices ingentibus honoribus, bonorumque affluentia remuneratus adeo fuerit Augustus, æquum erat, ut ex iisdem fontibus pœnas in cœlibes orbosque, ne qua parte lex deficeret, hauriret. Ut autem nos, quo ordine incepimus, eodem pergamus, ante omnia ejus verba, qualia eximius Heineccius in ordinem digessit, recitemus. *Cœlibes, nisi intra centum dies legi paruerint, neque hereditatem, neque legatum ex testamento, nisi proximorum genere, capiunto. Si quis conjugum masculus, ultra XXV. annum, femina ultra XX., orbi erunt: semissem relictorum tantum capiunto. Qui genere proximi erunt, usque ad gradum sextum, quod relictum est, jure antiquo capiunto.*

Plectebat igitur lex nostra cœlibes, atque orbos bonorum amissione, nempe ut hereditate, legatisque, nisi ab iis relictæ essent, qui intra sextum gradum conjuncti essent, exciderent. Hoc tamen injectum est discrimen, ut alteri solidum, alteri vero semissem tantum amitterent. Quum enim magis cœlibes, quam orbi in legem peccassent, par visum, ut hi semisse, illi rebus omnibus relictis privarentur. At enim iniqua lex censenda, quæ & eos pœna afficit, qui legi parere non potuerunt: siquidem voluntatem peccare, non vero necessitatem, in ore omnium versatur. Sed secus profecto dicendum est, si quis sponte sua ad hanc se necessitatem adegerit, ut sanè erant orbi, qui licet naturæ vitium obstarer, quò minus liberos procrearent, experta tamen conjugis sterilitate, secundum tunc temporis mores, ad feliciores nuptias, missò repudio, migrare poterant, imò & debebant. Sunt autem hic orbi, qui vel nunquam filios procreassent, vel procreatos amisissent. Quamquam enim, ut superius diximus, amissi proderant; id tamen beneficii inter ipsos tantum conjugum erat, nequaquam vero, si quid ex aliorum testamentis capere vellent; ex quibus patri uni solitario, atque uxori ter

enixæ capere licebat. Porro cœlibes orbosque hac pœna multatos ad annum usque sexagesimum in masculo, quinquagesimum vero in femina intelligas, quum post id ætatis, licet vellent, non possent matrimonium inire, ut liberis darent operam, legisque imperio parerent.

Sed quum pœnalibus his sanctionibus Imperator noster non tam cœlibum, atque orborum perviciam puniret, quam eosdem ad nuptias fœcundas induceret; hinc statutum est, ut cœlibes orbique non statim hereditatis lucro exciderent, sed temporis intercapedo esset, qua, si vellent, possent hereditatem, nuptias feraces ineundo, capeffere. Itaque datum iis est centum dierum spatium, ex quo hereditas delata esset, ut connubio jûngerentur, & quod relictum erat, acquirerent. Quod quum sæpe Romani facitarent, enatum dicitur illud apud exteras gentes, *Romanorum plerique uxores ducunt, & liberos procreant, non ut heredes habeant, sed ut heredes ipsi esse possint* (1); nempe non ut filios fusciperent, quibus superstitibus secundum communem votum bona relinquerent, sed ut ipsamet aliorum hereditates compararent.

Vetat igitur lex nostra cœlibem solidum capere ex alterius testamento, sive id institutione testamentaria relictum sit, sive legati nomine. Quum vero id pœnale præscriptum sit, ne ad similes quidem species proferendum leges omnes jubent. Et tamen, quod profecto mirandum, prohibitio hæc, quæ verbis expressis hereditatem, vel legatum complectitur, ad bonorum possessionem, quæ in eo distat ab hereditate, ut Prætor, qui heredem facere non poterat, bonorum tamen possessionem daret, ad donationem causæ mortis, & ad fideicommissa est referenda, quæ tam longe absunt a legatis, ut quibus jus legatum accipiendi non esset, fideicommissum tamen possent accipere. Me non latet, id ideo factum, ut ne fraus legi fieret: siquidem iis, quos scribi heredes fas non erat, cuncta bona vel per donationem mortis causæ, vel per fideicommissum, relinqui facile poterant. Sed ea forte conjectura a vero non abhorret, pœnalem hanc legem ab hereditatibus, le-

ga-

(a) *Plutarchus, de amore prof.*



gatisque ad ceteras largitiones ex jurisperitorum ingenio pro-  
 latam , ut Fisci jura adaugerentur , ærariumque locupletare-  
 tur . Qua enim communitate juncta sunt viventium beneficia  
 cum morientium dispositionibus ? Et tamen cœlibi , quem  
 lex hereditates tantum , & legata capere vetabat , ne inter  
 vivos quidem licebat donare , ut Plinius lib. V. epist. 1. scrip-  
 sit : *Non esse satis honestum aliquid & locupletari , & orbo  
 dare in summa non profuturum ei , si donassem , profuturum , si  
 cessissem : esse autem me paratum , cedere , si inique exheredatum  
 mihi liqueret .* Non ne id ad Fisci gratiam , atque ærarii o-  
 pulentiam ? Verum si ex jurisperitis alii interpretationibus suis  
 Fisci commodis studuerunt ; alii tamen fuerunt , qui rationem  
 excogitarunt , qua fiscalia vota eluderent . Suadebant hi testa-  
 toribus , ut cœlibi , atque orbo ad tempus liberorum relinque-  
 rent . Hinc per totum , qua late jus patet , illa relinquendi  
 formula sparsa , *si liberos heres habuerit , vel ad tempus libe-  
 rorum .* Nullus hic metus erat , ne heres , vel legatarius e relictis  
 exciderent , eaque caderent in Fisci beneficium , quum quod  
 sub conditione relictum erat , legibus caducariis minime esset  
 obnoxium . Haud absimilis modus ille legandi fuit : *Quantum  
 plurimum per legem accipere potest , dari volo , vel quammaxi-  
 mam partem dare possum , damnas esto heres meus ei dare (a) .*  
 Nam ita legatarius tantum accipiebat , quantum jure capere  
 poterat , reliquo pœnes heredem manente , excluso Fisco , in  
 cujus commodum res cecidisset , si ita legatum non esset .

## C A P U T VIII.

*De legibus , quibus Monarchia inolevit .*

## §. I.

*De ærario Principis .*

**F**Rustra imperium paratur , ubi civium mores improbi  
 sunt , atque ad flagitia proni : dissolvitur enim civilis  
 fo-

(a) L. si ita quis 53. D. de legat. & fideicom. 2.

societas, si non virtus, sed vitia grassantur. Igitur postquam legem Juliam, & Papiam de maritandis ordinibus explicavi, per quam Octavius utcumque conatus est Romanorum mores a vitiis purgare, eosque a vaga venere averfos ad matrimonii castitatem ducere, ut ita deinde probiores facti novo regimini assuescerent, leges ipsas exponendas aggredior, quibus Monarchicæ Majestatis fundamenta facta sunt. Sed quum Principatus cardo in militari imperio vertatur, milesque nullus præsto sit sine stipendio; pro certo adfirmandum est, Monarchicum regimen ab Ærario maxime pendere: quare haud mirum, si a Principis Ærario commentarium nostrum exordiamur. Ex tributis, & vectigalibus constat Ærarium, de quibus quædam ante omnia ex viris politicis desumenda sunt. Licet quidem vectigalia nervi sint Reipublicæ, atque ad ipsorum civium utilitatem redeant, invisæ tamen vulgo sunt, vixque perferuntur, quasi uni Principi cedant: quod sane prudentissimus ille Romanorum, ducto exemplo membrorum a ventre dissidentium, falsum ostendit (a). Ita propterea vectigalia ad minuendam invidiam temperanda sunt, ut & Principi profint, & civibus minus onerosa evadant.

Septem autem conficiendæ publicæ pecuniæ rationes docentur: primo ex agris publicis; deinde ex hostium spoliis; tertio ex amicorum largitionibus; quarto ex sociorum tributis; quinto ex mercatura; sexto ex earum rerum vectigalibus, quæ aut evehuntur, aut invehuntur; septimo demum ex subditorum tributis. Sed inter hæc nullum certius, aut minus invisum videtur, quam primum. Et quidem ab usque rerum incunabulis sive Principi, sive Populo, qui novas Urbes condere, vel colonias deducere constituerint, solemne fuit, agrum omnem, qua late pateret, sic partiri, ut præter terras urbi ponendæ, templis, theatrisque construendis, easque, quæ a civibus sibi colerentur, communiaque omnibus pascua, possessiones quasdam tuendæ & conservandæ Reipublicæ causa secernerent, quæ profecto privatis locarentur, ut ex earum mercede pecunia in ærarium conflueret.

Ita

(a) *Liv. lib. 2.*

Ita Romulum se gessisse vulgatum satis est, quum tres in partes divisisset Romanum agrum, quarum una sacris faciendis, altera Reipublicæ oneribus sublevandis, tertia demum civibus cederet, imitatus quidem sapientissimorum Ægyptiorum morem, qui campos ita tribuebant, ut pars sacris, & Sacerdotibus alendis devoveretur, pars Reipublicæ oneribus sustinendis, quod reliquum erat, *Calasyris*, hoc est, iis assignarentur, qui pro tuendis civibus arma caperent: nam ceteri cives aut coloni erant, aut servi. Jam vero hæc pro Reipublicæ oneribus prædia inter majora regalia accensentur, neque alienationum jacturæ obnoxia; & quamquam longo annorum fluxu a privatis possideantur, præscribi nequaquam possunt, idque in iis redimendis pactum tacitum inest, ut semper possint a Principe vindicari. Sane tritum non tam Romanorum, quam Græcorum sermone apophthegma fuit, *Nec mortales contra Deum; nec privatos contra Rempublicam præscribere*. Sed animadvertendum hic est, discrimen esse inter Rempublicam Popularem, Aristocraticamque, atque inter Monarchicam: nam in Monarchia ager dominicus a publico, & Fiscus ab Ærario longe differt. Siquidem Princeps publicos agros alienare non valet, dominicos, sive sibi privatos, valet: quæ profecto distinctio in Aristocratia, & Democrazia locum non habet, quum quidquid ad Civitatem pertinet, publicum sit, neque ullo modo cuiquam peculiare existimari possit.

Alter pecuniæ conficiendæ modus ab hostium spoliis petitur: par enim æquumque est, ut quæ bello exhauriuntur, ex bello sufficiantur. Qua de re quamvis apud Romanos receptum esset, urbes vi captas militi diripiendas tradere; pecunia tamen publica in ærarium inferebatur: Sed nolim idem credas, si quando Urbes sponsione inita, pactoque facto, in Populi Romani ditionem sese darent. Nam cum his sic transigebatur, ut tertia agri parte multarentur, coloniarumque Civium egentium, quibus ager ille assignaretur, deducerentur. Ex quo quidem ingens Romæ utilitas oriebatur: tum enim seditionum auctores ab urbe ejiciebantur, cujus quies plerumque ab istiusmodi proletariis, & capite census intervertitur, tum etiam pauperioribus civibus, unde viverent, dabatur, quum  
suum

sum ibi quisque agrum coleret, nec vitam inertem transigeret. Sed quod maximum in hoc existimabatur, id erat, quod victi populi sensim Imperio Romano legibus, moribusque assuescerent. Connubiis enim, atque affinitatibus paulatim ad Romanorum mores formabantur, privataque utilitate urgente, a rebus novis abstinebantur. Quin si quando insurgerent, & in rem Romanam molirentur, coloni statim inter ipsos versantes, occurrebant, qui veluti in specula stantes, hostium conatus occupare, exercitusque saltem Romanorum arcessere poterant. Idque eo sane aptius ad devictarum gentium impetus refrenandos, quam præsidia illa perpetua, quibus Provinciæ muniuntur; quo sane nil intolerabilius: tantum enim abest, ut victi victoris imperio assuescant, ut nova in diem ira exardescantes, infestiores potius fiant, nec unquam quiescant, donec cæde, & incendio omnia vastarint.

Tertia publicæ pecuniæ cogendæ ratio in amicorum, & sociorum largitionibus versabatur. Sed hic latum discrimen nos inter, & antiquos intercedit: etenim nos rebus lætis, ut animorum nostrorum gaudium significemus, gratulari Principibus muneribus solemus, quum illi nonnisi rebus afflictis occurrerent. Prostat exemplum Ægypti Regis, qui viginti millia argenti, & mille pondo auri Romanis dono dedit Annibalis furore oppressis: qui tamen gratias agentes omnia hæc recusarunt, quum turpe sibi putassent alienis opibus hostem debellare. Sæpe vero factum est, ut ea quæ ab initio potentioribus sponte dantur, in tributa deinde necessaria conversa fuerint. Sane in Perside ante Darium tributa nulla exigebantur, sed quæ subditi vellent, ultro elargebantur. Sed Darius Histaspes is fuit, qui has voluntarias largitiones in necessaria stipendia vertit, quæstoresque ad ea per Provincias creavit. Effet & quartus augendi ærarii modus, hoc est annua pensio, quæ a sociis Civitatibus ex foedere percipitur; & si qua gens armis devicta fuerit, tributum potius, aut stipendium, si quod imponebatur, appellatur, ut, victo Annibale, stipendium Carthaginensibus impositum est singulis annis.

Reliqua sunt tria, quæ ad publicum auctandum ærarium spe-

spectant, nempe mercatura, portorium, ac demum capitatio, quod extraordinarium tributum appellatur, quum ad id non nisi trepidis atque afflictis rebus deveniendum sit, si cetera reparandæ Reipublicæ non sufficiant. Mercatura quidem minus honesta ratio publicæ pecuniæ conficiendæ Romanis, ceterisque Populis visa est. Etenim lege Claudia Senatori Romano prohibitum navem onerariam habere. *Quæstus omnis* (inquit Livius) *Pompejo indecorus visus est*. Apud Britannos, & Germanos inter ærarios, & plebejos accensebatur, qui mercator esset. Sed inter ipsos Romanos id aliquando licuit, modo honeste fieret. Et quidem Augustus scœnori locabat pecuniam, & quamquam gratis quidem, si debitor veniente die solveret, in duplum tamen, si secus, Maximum certe scœnus hoc erat, sed ejus acerbiteratem hac arte more suo leniebat, dictitans eos qui constituta die sibi creditum non exolverent, publicam pecuniam surripuisse, ideoque peculatus poena obstringi. Non ita se gessit Alexander Severus, qui pecuniam mutuam, remotis istis ambagibus, ad trientem usuram dabat.

Sed hæc delibasse contentus ad portorium devenio, quod sane ex gentium omnium more frequentius est. Jam vero licet vectigalis nomine apud veteres tria potissimum præferrentur, *Decuma* ex agri publici cultura, *Scriptura* ex publicis silvis, & pascuis, & *Portorium* ex rerum venalium importatione, & exportatione; postremum tamen hoc illud est, de quo maxime nunc differendum. Par quidem ut ex mercibus evehendis, vel invehendis quid pensetur, quum Reipublicæ, vel Principis sit vias reficere, securitatemque viatoribus præstare. Sed quia, ut diximus, tributa ea imponi debent, quæ a civium utilitate aliena non sint, & quam minime potest populo invisa; monent hinc viri politici, & inter hos numquam satis laudandus Joannes Bodinus in suo immortali opere de Republica, ne Princeps vectigal imponat rebus, quæ minutatim, quæque victui sunt necessariæ. Quum enim per hoc egeni adhuc, & pauperes onerentur, id plerumque seditiones atque tumultus permovisse experientia compertum est; qua de re quum Livius fali vectigal imponere ausus

R r

esset,

esset, Salinatoris nomen convicii ergo a Populo accepit.

Itaque ut videamus quodnam portorium sit Civibus utile, minimeque quantum potest invidiosum, rem ipsis Bodini verbis, dignis sane quæ exciſcantur, tradam. *Si quis est, qui scire de me velit* (inquit) *quodnam genus vectigalium immortali Deo gratissimum, civitatibus pulcherrimum, Principibus honestissimum, plebi utilissimum videatur, illud est, quod iis rebus imponitur, quæ ad corrumpendos civium mores, quæ ad delicias, quæ ad luxum, quæ ad libidinem spectant; aurea inquam, & argentea suppellex, odores, pigmenta, innumerabilia vestium ornamenta, colores pretiosissimi, gemmae, margaritæ, ceteraque generis ejusdem, quæ prohibenda non sunt, neque si velis possis, quum ea sit hominibus insita vis ac natura, ut nihil avidius expetant, quam quæ sanctissime vetantur* (a). Præclara quidem imponendi tributa disciplina: nam qui in effrenem rerum luxuriam effusior est, ratio postulat, ut prodigus ejus animus aliquo injecto freno coerceatur. Quod si nec tributorum metus satis sit, ut ad bonam frugem se recipiat, sibi tribuat, quod eo onere gravetur, quo facile liberari possit, sobriam vitam honestamque traducens. Ultro igitur hæc tributa persolvuntur, quum facili negotio iis cives possint extricari, a luxuria vivendi abstinere. Prudenter quidem fecit Lycurgus, pecuniam nonnisi ferream concedens civibus, quæ quum exteris nulli usui esset, exoticarum rerum venditores ab urbe expulit, ne scilicet peregrinis mercibus frugalissimos civium mores ad rerum luxuriam allicerent.

Itaque sicut justum est, immo & commendabile tributum, quod rebus investitis, quæ potius luxuriæ, quam vitæ usui inserviunt, imponitur; ita contra æquum erit vel non institui, vel saltém minui vectigal rerum, quibus cives commode carere non possunt. Sed utile maxime est fabricæ, lanificæ, sericæ artis rebus, aliisque hujusmodi, quæ peregre adveniunt, vectigal imperare: nam quamvis talia hæc ad Civium usum cultumque opus sint, onus tamen illud impositum non parum proderit; nempe, ut cives ipsi eadem fa-

cere

(a) *De Ærario lib. 6. c. 2.*

care condiscant, & consueſcant. Quod proſecto quem præteris, quantum juvet tum ad expellendam egeſtatem a civitate, tum ne proletarii inertem tranſigendo vitam, res novas moliantur? Etenim Reges Ægypti tot Pyramides, aliaque ingentis molis ædificia eo conſilio a civibus conſtruenda curabant, ut per hos non intermiſſos labores infimæ poſſimum ſortis homines a pravis maleferiatorum cogitationibus averterent. Quod ipſum quidem & imitatus fuit Auguſtus, qui adeo plebem operibus publicis exercuit, ut dictitaret, *Urbem ſe marmoream relinquere, quam lateritiâ accipiſſat*. Atque huc ſpectant tot illa privilegia Collegiis, Corporiſque Artificum data, ut iis cives illeſti artes excolerent, ne rebus novis per otium ſtuderent.

Sed quæ hucusque diſſeruiſimus, de Ærario univerſe intelliguntur: ad ea nunc vectigalia decurramus, quæ propius ad inſtitutum noſtrum accedunt, quæ ſcilicet cum Monarchia, maxime vero ſi recens orta ſit, congruunt. Si enim hæc in Republica populari, ubi de communi Imperio ſervando agitur, inviſa ſunt civibus, quid in Monarchia, ubi ad unius Regnum tutandum videntur ſpectare? Id quidem illud eſt, ex quo Agrippa Octavium maxime monebat, ut imperium abdicaret, difficultas nempe publicæ pecuniæ conſiciendæ. *Jam eſſi nulla Reſpublica ſine ſumptibus conſtare poteſt, tamen in ea, ubi penes populum eſt imperium, multi multam pecuniam lubentiſſime conferunt, eſiam liberalitatis opinionem ut conſequantur, ac pro iis honores meritos adipiſcantur. Quod ſi etiam univerſo Populo penſionem imperare neceſſitas poſtulat, tamen id eo perferunt, quod ſibi ipſis ſe obtemperare, ac in ſuum ipſorum uſum conferre pecuniam arbitrantur. At contra ubi unus dominatur omnium, eum ut divitiis abundantem, ſolum impenſas facere æquum eſſe cuncti judicant, ſtudioſius redditus, quam ſumptus, quos is faciendos habet, indagantes. Ac neque privatim libenter ultroque aliquid pendunt, neque ſua ſponte publicas penſiones offerunt: quorum illud quidem nemo facere animum induxerit (neque enim facilem divitem ſe eſſe conſitebitur huiſquam) neque ex uſu Principis eſſet hoc fieri: ſtatim enim is, qui ultro pecuniam obtuliſſet, a vulgo Civitatis ſtudioſus judi-*

catus, animo elatus concutere præsentem statum Reipublicæ institueret. Hoc autem posterius omnino molestum plerisque est, idque eo magis, quod damnum esse suum emolumentum ad alios redire vident. Nam ubi popularis est Reipublicæ gerendæ ratio, per multi quoque eorum, qui pecuniam pendunt, stipendia merere solent, atque ita quodam pacto eam recipiunt: sub unius dominio fere alii sunt, qui agros colunt, navigant, ac civilia munia obeunt, quibus præsertim pensiones incumbunt: alii vero arma ferunt, & mercedem militiæ accipiunt. Atque hæc una rerum earum est, quæ tibi molestiam exhibebunt (a).

Hæc quidem in medium allata sunt, ut evinceret ille, quantis difficultatibus unius dominatio esset involuta, in ære potissimum ad publicos usus cogendo. Contra vero summus vir Mæcenæ rationes plurimas protulit, per quas Ærarium adhuc in Monarchia bonis artibus ditesceret, multas inquiens esse Reipublicæ auri, argentique fodinas, quas excolendo ingentem pecuniæ vim in Fisci commodum cogere Princeps possit. Subdidit facile rerum possessoribus ex æquo tributa imperari, ut qui fortunarum suarum securitate fruerentur, tributorum onera, per quæ civium bona ab hostium incursionibus tuta servantur, subeant. Et postquam monuit, ut fideles exactores instituerentur, saluberrimo quodam consilio orationem absolvit. . . . Idque (ait) eo magis fiet, si te frugaliter, & continenter vivere, ac nihil prodigere videant. Quis enim, quum videat te in re familiari summa parsimonia uti, in publica liberatissimum esse, non ultro velit aliquid conferre, quum tuas divitias suam securitatem ac copiam esse iudicet? Itaque pecuniæ etiam plurimæ tibi suppetent.

Sane potissima ratio, cur subditi odio persequantur tributa, illa est, quod ea ad unius saturandam avaritiam, ejusque luxuriam pascendam imperata opinentur: quam quidem opinionem ut Principes prudentissimi averterent, multifariam adnisi sunt. Alii enim frumentum ipsum, quo alerentur milites, imponebant, ut oculis testibus, provinciales pernoctent, cui usus esset id, quod imperabatur, nempe ad eos enutriendos,

(a) Dio lib. 52.



dos, qui sibi, libertati, bonorumque securitati adversus externam vim præsto essent. Quæ profecto laudabilis consuetudo diu permansit, ut ex Codice Theod. proclive est intelligere. Alii vero sic se gesserunt, ut sponte sua potius, quam necessitate adacti auctare ærarium viderentur; per bonorum publicationes, quas facillime potuissent effugere honeste vivendo: sat enim hoc modo vestigalium odium lenitur, quum nemo sit, cui persuasum non est, æquius fore, ut scelestorum hominum bona ad publicum Ærarium confluant, quam alendæ libidini inserviant. Demum sapientissimi Principes adeo res suas composuerunt, ut in re domestica frugales viderentur, liberales vero in publica, quo Populus intelligeret, Ærarium a Principe ad communem magis, quam ad privatam sui unius utilitatem institutum. His pro majori perspicuitate præmissis, non ab re erit videre, quas rationes Augustus inierit, ut exhaustum ærarium, & prope bellis civilibus emunctum repararet. Enimvero præ ceteris leges caducarias excogitavit, vigesimamque hereditatum instituit; in hac ut videretur satis tolerabile tributum, quod ex insperato lucro excutiebatur; in illis vero sponte solutum, quod facillime quis potuisset effugere, vitam ad legum normam componendo.

Deinde, quod rem domesticam spectat, adeo a luxu alienus visus est, ut scripserit Tranquillus (a): *Instrumenti ejus & suppellectilis parsimonia apparet etiam nunc, ex residuis lectis, atque mensis, quorum pleraque vix privatae elegantiae sunt. Nec toro quidem cubuisse ajunt, nisi humili, & modice instrato. Veste non temere alia, quam domestica usus est, ab uxore, & sorore & filia nepotibus confecta. . . Cœnam trinis ferculis, aut, cum abundantissime, senis præbebat, ut non nimio sumptu, ita summa comitate.* Hæc fuerat vivendi ejus consuetudo. Porro a cupidine cogendæ in rem privatam pecuniæ adeo procul fuit, *Ut qui nunquam (ait idem (b)) ex ignoti testamento capere quidquam sustinuerit. . . Legata, vel partes hereditatum, & a quibuscumque parentibus relicta sibi, aut statim liberis eorum concedere, aut,*

(a) Cap. 73.

(b) Id. cap. 66.

*si pupillari ætate essent, die virilis togæ, vel nuptiarum cum incremento restituere consueverat. Sed de publica liberalitate, Tranquillus idem ait: Liberalitatem omnibus ordinibus per occasiones frequenter exhibuit. Occasiones inquam, ne si præter causam daret, videretur ejus liberalitas captandæ gratiæ ad firmandam suam dominationem inservire. Et quoties eni damnatorum bonis pecunia superflueret, usum ejus gratuitum iis, qui cavere in duplum possent, ad certum tempus indulgebat. Neminem igitur tributa conferre tanto Principi tædebat, qui ab omni luxu alienus intra domesticos lares tam frugalis erat, publice vero adeo magnificus, atque erga omnes ordines munificentissimus: atque adeo vectigalium compendia in Populi ejusdem utilitatem redire videbantur unde advenerant. Sed his præmissis, rem ipsam tandem aggrediamur.*

## §. II.

*De Vigesima hereditatum.*

**D**iximus supra tributa illa recenti Monarchiæ congruere, quæ tolerabiliora videntur. Ecquidnam autem tolerabilius, quam quid ex inopinato lucro decerpi? Tale profecto id est, quod Vigesima hereditatum dicitur, cujus originem sic nobis prodit Dio: *Verum quum hac pecunia sumptuum magnitudinem minima parte attingeret, ac perenni copia esset opus, Senatoribus negotium dedit, ut pro se quisque aliquam rationem inveniret, eamque in libello conscriptam ipsi traderet expendendam: id non eo fiebat, quod ipse nihil reperiret, sed ut eis persuaderet, quo hanc maxime viam, quam ipse probabat, sequendam ducerent. Certe multis varie propositis, nulla earum probata: instituit, ut vigesima pars hereditatum, ac legatorum, exceptis illis, quæ proxime genere junctis, ac pauperibus morte aliorum relinquebantur, in ærarium militare inferrentur, quasi scriptum in Casaris commentariis id pensionis genus reperisset. Dignum sane ingenioso Principe consilium, quum uno ore moneant politici viri, ut Principes per se benignitate utantur, onera autem, & poenas per alios inferant. Addit Octavius*

vius id tributi genus se in Cæsaris commentariis reperisse , hac enim arte opus est Principi , ut onerum invidiam leniat , illorum scilicet non sese sed decessores arguendo . Sed hoc tributi genus quum patres minime probarent , Augustus ea , qua pollebat ingenii solertia , objecit , se pensionem ex cujusque possessionibus instituturum . Quo sane metu percussi vicesimam omnes simul repente comprobarunt . Atque hæc est origo vicesimæ . Verum quum tributum hoc ab insequentibus Principibus pro cujusque ingenio fuerit auctum , vel diminutum , de ejus progressu differere abs re profecto non erit . Nam adeo per totum , qua late jus patet , disseminatum id est , ut leges bene multæ tenebris offundantur , nisi lucida , & distincta ejus intelligentia exponatur . Et , quod mireris , eo abrogato , ejusdem veluti reliquæ adeo in Triboniani compilatione dispersæ , & sæpe alio transfusæ spectantur , ut non exigua juris Justinianæ pars lateat in obscuro , si res a primordiis non repetatur .

Sed præ omnibus videndum est , quibus rebus , quibusque hominibus vicesima isthæc imposita fuerit : Dio scripsit : *Instituit , ut vicesima pars hereditatum , ac legatorum , exceptis illis , quæ proxime genere junctis , ac pauperibus , morte aliorum relinquebantur .* Ex his luculenter intelligimus vestigal hoc ob hereditates , atque legata pensitatum , atque ab heredibus omnibus , ac legatariis , præter proxime genere junctos . Sed quinam sunt οἱ πρὸς συγγενῶν proxime genere juncti ? Filiine , iique in patris potestate constituti ; an vero agnati proximiores ? Res anceps est , neque habes quid certi , ubi figas pedem . Diu quidem hoc meditatus sum , nec datum adhuc , fateor ingenue , difficultate extricari . Quare satius rem in medio relinquere duxi , idque asserere unum , tempore Nervæ , ac Trajani tantum filios , eosque non emancipatos fuisse immunes . Sed haud ineptum hic erit , brevi internoscere , quid novi Augustus , hujus vestigalis gratia in jus civile induxerit . Olim sane latebat me omnino , quænam causa Imperatoris mentem moverit ; ut Quartam Falcidiam priscis inauditam institueret , legata , & fideicommissa per epistolas etiam , quas sequior ætas codicillos nuncupavit , relinqui indulserit , ut ipsis demum fi-

dei-

deicommissis , quæ prius a sola heredum fide pendebant , actionem daret , Consulibusque mandaret , ut fiduciarios cogerent . Sed jam tandem reperi , quod nemo forsan usque adhuc advertit .

Et quidem , instituta vicesima , Fisci intererat , ne testamenta , legata , vel fideicommissa in irritum caderent : quod profecto sæpe fiebat , herede non adeunte , ne negotiis hereditariis sine ullo lucro implicaretur . Atque hoc est , cui per legem Falcidiam occurrere Augustus censuit . Quare sic Dio de Falcidiæ origine sub Octaviano , anno septingentesimo decimo & quinto instituta scripsit : *Lex Falcidia a P. Falcidio Tribuno Plebis lata est , quæ nunc quoque plurimum valet in hereditatibus adeundis : ea autem permittit , ut heres , si adire hereditatem graveretur , quadrante accepto reliquum dimittat . Hæc eo biennio acta .* Igitur hæc lex sub Octavio a P. Falcidio , a quo nomen accepit , rogata est . Sed utinam sicut Dio ejus originem prodit , sic & ejusdem causam attulisset : ita enim nos ingenti labori pepercissimus , nec juris interpretes in tam turpi rerum gravissimarum ignorance jacuissent . Itaque in tanto scriptorum silentio , si mihi mens læva non est , sic veritatem vestigasse puto . Vehementer Fisci intererat ne vicesima , si nemo hereditates ex testamento delatas adiret deperiret , nec legata , & fideicommissa fierent irrita : si enim scriptus heres hereditatem non adiisset , ea profecto proximis delata esset , inter quos forte fuissent , qui vicesima soluti erant . Quare Fiscus & vicesimam hanc amittebat , & eam quoque , quam legatarii , si hereditas adita esset , pensitassent , quum repudiata hereditate , legata etiam , & fideicommissa caderent .

Solertissimus igitur Princeps , ærario suo consulturus , legem hanc tulit , qua heres quadrante illectus hereditatem adiret , & legata , fideique commissa sustinerentur , unde vicesimæ ad Fiscum affluerent . Quare faceffant hinc omnes , qui nescio quem testamentorum favorem in Falcidia absurde nobis obtrudunt : faceffant , qui testantium libertati hoc remedio prospexisse Octavianum jactitant : licet enim simulationes istiusmodi callidus Imperator more suo objecerit , re tamen vera omnia comparata sunt , ut ærarium ditesceret . Hæc eadem

dem causa fuit, quapropter Vespasianus Imperator legem Falcidiam ad fideicommissa universalia per S. C. Pegasianum protulerit, ne scilicet fideicommissa hæc irrita fierent, & cum his vicesimæ Fiscales. Et quidem ad Principis hujus ingenium id maxime quadrat, cujus tanta fuit avaritia, ut & urinae vestigal induxerit, sive, ut quibusdam visum, amphoras quasdam ad urinam excipiendam locandas instituerit. Quod quidem filio ægre ferenti nummos inde redeuntis olendos præbuisse fertur, dicens, ex re quacumque bonum elici odorem posse, pecuniamque, licet ex foetido vestigali coactam, suaviter tamen inolere. Sed ut redeamus, unde discessimus, ex iis, quæ dicta sunt, facile intelligitur, cur ante Justinianum Falcidia prohiberi minime potuerit, secus vero eo imperante; nempe ne Fiscus vicesimis caderet, quæ quum sub Justiniano exolevisent, quid mirum, si Imperator hic jussit posse a testatore prohiberi, quominus falcidia ab herede detraheretur?

Sed & vicesimæ gratia, ut ego puto, factum est, ut Augustus fideicommissis, quæ primum a sola fiduciariorum voluntate pendebant, actionem dederit, ne ea interciderent. Quamvis enim alia prætexuerit, id scilicet se facere in gratiam Lentuli, sive illorum beneficio, quibus Lentulus fideicommissum reliquerat, cui tamen non patet Principem illum mira simulandi arte polluisse. Eadem profecto de causa inductum arbitror, ut codicilli, sive scripturæ minus solemnes satis essent, si quis legaret, vel fideicommitteret. Quum enim in Provinciis non semper civium Romanorum copia esset, ac proinde septenarius testium numerus ad testamentum condendum deesset; hinc hereditate ab intestato delata, vicesimis destituebatur Fiscus, quas ex legatis, & fideicommissis sperare poterat. Itaque Augustus statuit, ut si quis justo testium numero carens, testamentum facere non posset, Codicillos tamen, ubi pauciores desiderantur testes, conficere posset.

Confirmat hanc meam sententiam l. 7. D. qui testamenta facere possunt. Si mutus, aut surdus, ut liceret sibi testamentum facere a Principe impetraverit, valet testamentum. Sed animum, quæso, ad ejus inscriptionem adverte: *Æmilius Macer*

S s

lib.

*li b. 1. ad legem vicesimam hereditatum.* Satis ex hac intelligimus datum a Principe furdo, & muto, ut testarentur ad vicesimæ lucrum, quo forte Fiscus excidebat, si mortuus intestato fuisset, lege ipsa proximioribus agnatis, quibus vicesima oneri non erat, hereditatem integram addicente. Quum igitur Augustum, ærario civilibus bellis exhausto locupletando, quo potissimum in Monarchiæ oris opus erat, sollicitum videamus; quumque Codicillos ad hereditatem sive testantium, sive intestatorum per legata, & fideicommissa minuendam, onerandamque, in vicesimarum gratiam concessisset, atque hoc adversus jus vetus; haud sane mirabimur, mutis etiam, & furdis in Fisci commodum testandi facultatem indultam. Sed ad vicesimæ deminutionem accedamus.

Diximus supra, incertum esse, quinam proximiorum nomine apud Dionem veniant, qui immunes ab hoc vestigali intelligantur, unine filii, an vero ceteri agnati proximiores. Sed quidquid sit, certissimum sane est, quod & ante monuimus, Nervæ, & Trajani ævo solos filios non emancipatos ab hoc onere fuisse exceptos. En quæ Plinius in suo Panegyri. scripsit (a) de Imper. Nerva: *Sanus, ut quod ex matris ad liberos, ex liberorum bonis pervenisset ad matrem, etiam si cognationum jura non recepissent, quum Civitatem adipiscerentur, ejus vicesimam ne darent.* Et deinde: *Eandem immunitatem in paternis bonis filio tribuit, si modo reductus esset in patris potestatem.* De Trajano autem hæc tradidit (a): *Vultis, ut quemadmodum in patris filius, sic in hereditate filii pater esset immunis; nec eodem momento, quo pater esse desisset, hoc quoque amitteret, quod fuisset.* Ægrægie Cæsar, quod lacrimas parentum vestigales esse non pateris. Deinde vero docens, Trajanum objecisse exceptionem Nervæ, qua filius vestigal hoc solvere tenebatur, si fuisset emancipatus, subdidit: *Tu quidem Cæsar, illam exceptionem removisti. Si modo filius in potestate patris fuisset, intuitus opinor vim legemque naturæ, quæ semper in ditione parentum esse liberos iussit: Tam hujus beneficii ad alios extensionem memorans, ait (b): Cœvinqve, ut*

(a) Cap. 38.

(b) Cap. 39.

*in sororis bonis frater, & contra in fratris soror, utque Avus, Avia in neptis nepotisque; & invicem illi servarentur immunes.*

Demum ad præterita tempora se vertens, quum filii tantum immunes essent a vicesima, hæc ait (a): *Vicesima reperta est, tributum tolerabile, & facile heredibus dumtaxat extraneis, domesticis grave. Itaque illis irrogatum est, his remissum: videlicet quod manifestum erat, quanto cum dolore laturi seu potius non laturi homines essent, destringi aliquid, & abradi bonis, quæ sanguine, gentilitate, sacrorum denique societate meruissent, quæque nunquam ut aliena, & speranda, sed ut sua, semperque possessa, ac deinceps proximo cuique transmittenda cepissent.*

Ex quibus duo velim colligas, & vicesimam sub optimis illis Principibus Nerva, ac Trajano contractam non parum fuisse, & antea unos filios non emancipatos immunes fuisse. Ecquid aliud verba illa innuunt, *Domesticus heres, & extraneus?* Quid illud quod sequitur, *Quæque nunquam ut aliena, & speranda, sed ut sua, semperque possessa*, nisi parentum bona, quæ lex ipsa filiis deferebat? Quæ sane Plinii verba apprimè consona sunt Jurisperitis, & inter hos Paullo. Hic enim tradens filium a vicesima solutum, hac ratione nititur, quia quum patri succedat, non censetur hereditatem adquirere, quum vivo adhuc patre heres minor appelletur, eodem vero mortuo, dominium ejus perdurare dicatur. En Paulli verba obscurissima quidem, nisi ad vicesimæ hujus primam originem referantur: *In suis* (ait (b)) *heredibus evidentius apparet, continuationem dominii eo rem perducere, ut nulla videatur hereditas fuisse, quasi olim hi domini essent, qui etiam vivo patre quodammodo domini existimabantur. Unde etiam filius familias appellatur, sicut pater familias: sola nota hac adjecta, per quam distinguitur genitor ab eo, qui genitus sit. Itaque post mortem patris non hereditatem percipere videntur, sed magis liberam bonorum administrationem consequi. Hac ex causa licet non sint heredes instituti, domini*

SS 2

(a) Cap. 37.

(b) L. 11. de liber. & posthum. heredib. instit.

*min; tamen sunt; nec obstat, quod licet eos exheredare, quos & occidere licebat.* Quorsum hæc, nisi ut doceret Jurisconsultus vice-  
 cesimæ immunitatem ad filios spectare? Si enim vice-  
 cesima solvitur ex hereditate, & bona parentum filiis delata here-  
 ditatis nomine non veniunt, quum in eis dominium illorum  
 jugiter permanere potius, quam deferri videatur, quippe qui-  
 bus nulum discrimen intercedit, nisi quod geniti & genito-  
 res sint, a vicecima solvenda profecto filii immunes erunt,  
 quæ veræ hereditati, hoc est, aliunde quæsitæ imposita est.  
 Demum per postrema illa verba, *Hac ex causa licet non sint*  
*heredes instituti, domini sunt, nec obstat quod licet eos ex-*  
*heredare, quos & occidere licebat.* Quorundam forte ora in  
 Filci gratiam obgannientium occludit, qui verba legis cavil-  
 lantes, filius etiam institutis heredibus vicecimam solvendam  
 effutiebant, quum veram hereditatem crederent in iis, qui  
 exheredes scribi poterant. Has igitur delatorum calumnias,  
 inquam, removisse videtur Paullus, quum dixerit, quamvis  
 heredes instituti sint, dominos tamen esse: Videtis quam pla-  
 na sit legum intelligentia, si rerum origo solerter detegatur.  
 Porro nos rem persequamur.

Quamvis autem vectigal hoc satis a Nerva, & Traja-  
 no diminutum fuerit; mirum tamen quantum excreverit, ac  
 longe lateque pervagatum sit, condita Constitutione illa, quam  
 Ulpianus meminit in lege XVIII. *de statu hominum: Ut qui*  
*in Orbe Romano essent, Cives Romani efficerentur.* Quod qui-  
 dem satis exponi nequaquam potest, nisi huc referantur, quæ  
 Ezechiel Spanhemius in eximio opere de Orbe Romano scrip-  
 sit. Et quidem vicecimam uni tantum Cives Romani pen-  
 debant, præterea nemo. Quum enim Provincialibus jus Qui-  
 ritium non esset, ii neque ex Civis Romani testamento ad-  
 quirere poterant, neque illi vicissim per testamentum relin-  
 quere, ipsa quippe natura lege proximioribus morientium  
 bona deferente. Itaque istiusmodi homines, qui tum activa,  
 tum passiva testamenti factione destituti erant, vicecima sol-  
 vebantur. Atque id in causa fuit, cur Antoninus Civitate  
 incolas Imperii Romani omnes donaverit, nempe ut ex æ-  
 quo cuncti vicecimæ onus subirent. En præclarissimum Dio-  
 nis



nis locum in excerp̃tis, unde res lucidissime exponitur: hic enim de Antonino Constitutionis hujus auctore scribens, hæc ait: *Cujus rei causa etiam omnibus, qui in Orbe Romano erant, Civitatem dedit, specie quidem ipsa eis bonorem tribuens, sed revera, ut Fiscum suum auget: quippe quum peregrini pleraque horum vectigalium non penderent. Et tamen, ut in suo Panegyrico scripsit Plinius (a), Inveniebantur, quibus tantus amor nostri nominis inesset, ut Romanam Civitatem, non vicesima modo, verum etiam ad finitatum damno bene compensari putarent.* Quid autem postrema hæc verba sibi velint, a nemine, quem vidi, docemur. Ne autem & nos rem silentio prætereamus, conjecturam saltem aliquam in medium adducemus. Peregrini Civitate donati, nulla agnationis, vel cognationis ratione habita, indiscriminatim ad vicesimam solvendam cogebantur: quare jus affinitatum videbatur amissum. Ut autem ab ea immunes forent, necesse erat, ut cum Civitate cognationum jura consequerentur. Hinc laudatus Plinius hæc scripsit de vicesima (b): *His quoque, quibus per Latium Civitas Romana patuisset, idem indulgit; omnibusque inter se cognationum jura commisit simul & pariter, & more naturæ.* Atque huc pertinent singulæ illa verba Ulpiani apud Collation. Leg. Mos. & Rom. tit. 16. §. 9. *In hereditatibus, quæ ab intestato deferuntur, eas solas personas voluit admitti, quibus decima immunitatem ipse tribuit.* Sermo hic est de Constitutionis auctore, cui non satis fuit omnibus dare Civitatem Romanam, ut vicesimarum numerum in immensum auget, sed & vicesimæ vectigal in decimam substituendum placuit; immo ne quis a tanto onere immunis esset, cognationum jura, quæ Nerva, & Trajanus concesserant, atque ampliaverant, adeo coercuit, ut unos filios exceperit. Ita sane Imperator hic se gessit: tum enim Civitate quoqueversus in Orbe Romano diffusa, tum cognationum juribus contrahendis, mirum quantum ærarium locupletaverit.

Ex quo profecto arduum haud erit, quinam ex Antonino.

(a) Cap. 37.

(b) Cap. 39.

minis auctor fuerit Constitutionis, divinare: apage enim stultam eorum sententiam, qui vel Antoninum Pium, vel alterum illum Philosophum conditorem fecerunt, quando optimos eos Principes, in Cives liberalissimos, atque ab omni avaritiæ suspitione alienos venerata est antiquitas. Certo quidem certius eam edidit Antoninus Caracalla, qui luxuria, sævitia, atque avaritia, præter alia vitia improbos ferre omnes facile superavit. Sed, quod mirandum est, condita hac Constitutione, qua immane vectigal imperatum est, Jurisperiti tunc temporis, quibus Principum solertia & calliditas satis erat perspecta, Magni, Optimique Imperatoris nomen indiderunt. Sic Papinianus in *l. 17. D. de quæstion. & in l. 8. D. de vacatione munerum §. ultim. Tryphon. l. 39. D. de penis*, alique; adeout centenas Principis genio eos respondisse, atque imperii arcana more suo populo obtegere studuisse. Sed ea est Principum conditio, ut, *ipsis florentibus, res eorum ob metum plerumque falsæ sint; postquam vero occiderint recentibus odiis componantur*. Sed jam de origine, causa, diminutione, atque incremento vicesimæ multa disseruimus: videamus modo, quando vectigal hoc desierit. Sunt sane, qui putant a Gratiano fuisse abrogatum; estque hujus opinionis ratio Panegyricus Ausonii huic Imperatori dictus, ubi gratiæ quidem de remissione vectigalium aguntur. Sed quum de vicesima ne verbum quidem, aut vestigium, jure merito cordatiores viri in medio rem relinquunt. Id tantum conicere licet, paullo ante Justinianum vectigal hoc remissum, quum in *l. ultima C. de edicto D. Hadriani tollendo* scripserit: *Vicesima hereditatis ex nostra recessit Republica*: Quod satis esse poterit in re tam ancipiti.

### §. III.

*De abrogatæ vicesimæ reliquiis in jure Justiniano.*

Satis superque monuimus, eatenus venerandæ antiquitatis monumenta evolvenda, quatenus inde eruantur, quæ nostræ memoriæ rebus deserviant. *Quamdiu enim, Græcorum ille*

le sapientissimus dicebat, *paciens fueris, ut addiscas, qua tibi nunquam usui erunt?* Ea propter optimum factu ducō, quæ usque adhuc dicta, atque a vetustatis fonte petita, quamvis exoleta, ad juris novi, quod viget, intelligentiam referre. Sane id Triboniani crimen in compilatione juris Justinianeus fuit maximum, veteris scilicet juris oscitanter plerumque vestigia reliquisse; quæ novis legibus insita, iisque sæpe dissona omnia miscere, turbantque. Rebus profecto omnibus id accidit, ut quum a suis principiis avulsæ, atque sejunctæ, aliis, atque aliis aptantur, absurdæ, discordantesque evadant. Vicecima hæc per totum jus antiquum fuit diffusa, intentis maxime Jurisperitis, ne quid ex Fiscalibus commodis excideret. Quare haud facile fuit Triboniano omnes ejus reliquias in jure novo attexendo advertere, atque aufugere. Quum igitur nonnulla quædam, quæ ad vicecimam spectabant, ab invito Triboniano in novo jure disseminata fuerint, hinc sexcentarum litium seges suborta est, apud interpretes potissimum antiquitatis ignaros, qui errores erroribus cumulando tenebrososum jus Justinianeum, tricisque involutum nobis tandem tradiderunt.

In Codicis titulo *de usuris rei judicatæ* prostat lex 1. cum hac epigraphe: *Imp. Antoninus A. Procuratoribus hereditatum. Is, qui bona secundum dictam sententiam prosequitur: eas quoque rationes habiturus est, ut qui post legitimum tempus placitis non obtemperavit, usuram centesimam temporis, quod postea fluxerit, solvat.* Vulgo hinc interpretes hanc juris regulam confecerunt, quæ in foro maxime invaluit, nempe usuras rei judicatæ centesimas esse, hoc est, duodenas pro centenariis. Non hic miror Bartholum, Baldum, Accursium, aliosque, qui increbescente barbarie, scripserunt, sed ita præter hos sensisse Gothofredum, qui ita tradit: *Morator judicati faciendi post quadrimestre tempus præstat usuras centesimas.* Si neminem alium, Gothofredum saltem legis inscriptio monere debebat, quid rei esset, de qua ageretur, nempe de vicecimariis exactionibus, quæ Justiniani ævo usu abiverant: neque enim alii sunt Procuratores hereditatum a vicecimæ exactionibus. Lex igitur quum ad Fiscus debitores spectet, e singula-

lari specie generale axioma elici non potest, maxime verò quum neminem lateat, ingentioribus usuris urgeri Fiscales debitorum, quando vectigalia ad communem utilitatem comparata nervi sint rerum publicarum. Sat scio. Tribonianum in l. 2. ejusdem tit. generaliter scripsisse, moratorem judicati ad usuras centesimas teneri. Sed quis necum non conjuret, hanc sibi regulam ex eadem lege 1. confixisse, ac Justiniano Codici oscitanter inferuisse? Intelligas hinc, quod & a libi advertimus, quanti sit veterum Magistratum, eorumque omnium, qui ministerium aliquod exhibebant, notitia, ut ad intimam legitimam scientiam adita accessus pateat. Nos interim alia percurramus.

In tit. D. de transactionibus lex 13. occurrit sic: *Æmilius Macer lib. 1. ad vicesimam hereditatem. Nulli procuratorum Principis, inconsulto Principe, transigere licet.* Hæc lex, ceteris sane dilucidior, mirum quam ineptis laciniis per pragmaticos ex ignorantia vicesimæ fuerit inquinata, atque ad diversa prorsus contorta. Dixerunt quidem neque Principis, neque cujuscumque privati procuratori fas esse transigere sine speciali mandato, quum procuratori jus non sit rem minuere, sed tantum administrare; quique transigit, rem, de qua agitur, minuat. Hæc omnia vera quidem sunt: Sed exceptio, quam excogitarunt, falsa omnino: somniarunt enim posse præter speciale mandatum transigi, si ita fiat, ut res soli, sive immobilis maneat penes Fiscum, pecunia adversario data. Utque id adstruant, exemplum afferunt in Tutore, cui jus est etiam sine Prætoris auctoritate transigere, modo res immobilis in ejusdem minoris dominio maneat, & adversario pecuniæ quid exolvatur. Absurda sane omnia: nam Principis Procuratori, imo & alterius privati transigere nequaquam licuit, præter speciale mandatum. Si enim *transigere est donare*, quum nulla transactio sit, nisi quid detur, vel retineatur; nemini ex procuratoribus, præter Domini voluntatem, dare permissum est. Sed quid? Stulti prorsus sunt, qui ex hac lege ad res omnino alienas dilabuntur. Agitur quippe de vicesima, ut ex epigraphe patet, quæque pecuniariter pendebatur, Itaque falsa distinctio, quæ cum laudata legis verbis

bis congruere non potest. Neque minus dissonum est minoris exemplum: nam Tutor major profecto potestas est, quam alteri cuicumque procuratori, quum Tutor res pupilli non valentis agere curans, veluti Dominus existimetur, quod in Procuratore sive Fisci, sive alterius privati secus est.

Præterea in *tit. XV. D. de jure Fisci l. 31. & 32.*, hæc habentur: *D. Commodus rescripsit, obsidum bona, sicut captivorum, omnimodo in Fiscum esse cogenda. Sed si accepto usu togæ Romanæ, ut cives Romani semper egerint, Divi Fratres Procuratoribus hereditatum rescripserunt, sine dubitatione jus eorum ab obsidium conditione separatim esse beneficio principali; ideoque idem jus eis servandum esse, quod haberent, si a legitimis civibus Romanis heredes instituti fuissent.* Ad prioris legis intelligentiam hæc addit Gothofredus: *Obsidum bona, hoc est, eorum, qui nobis dati sunt, obsides Fisco cedunt: ut & captivorum, ut hic, ideoque de his apud nos testari non possunt.* Neque profecto magnus Cujacius in alia discessit. Scripsit enim apud Romanos bona obsidum Fisco cecidisse, quum hi, utpote peregrini minime de bonis suis testari possent. Quæ quidem omnia a vero immane quantum recedunt. Neque vero, quod obsides testari non possent, eorum bona ad Fiscum pertinebant. Profecto Provincialium, ceterorumque omnium, qui jure Quiritum carebant, fortunæ, licet testamentum condere non possent, eos sequebantur, ad quos lege naturæ ab intestato pertinebant. Præclarius sane actum esset, si unquam ad hereditatum Procuratores, quibus Commodus rescripsit, animum advertissent: sed alio fortasse intenti id non viderunt. Nos igitur a vicesimarum exactorum historia germanam interpretationem arcessemus.

Vulgo notum est, non potuisse peregrinum capere ex testamento Civis Romani: qua de re supra diximus ante constitutionem Caracallæ Provinciales, & peregrinos omnes vicesimam nullam dependisse, quum ea illos urgeret, qui bona ex testamento capiebant. Itaque bona, Provinciali, vel peregrino a cive Romano relicta, utpote incapaci, legata, in Fiscum cadebant. Hac luculentissima facie præmissa, intelligitur quænam obsidum bona Fisco deferrentur, nequaquam

T t

pro-

lari specie generale axioma elici non potest, maxime verò quum neminem lateat, ingentioribus usuris urgeri Fiscales debitorum, quando vestigalia ad communem utilitatem comparata nervi sint rerum publicarum. Sat scio. Tribonianum in l. 2. ejusdem tit. generaliter scripsisse, moratorem judicati ad usuras centesimas teneri. Sed quis necum non conjuret, hanc sibi regulam ex eadem lege 1. confixisse, ac Justiniano Codici oscitanter inseruisse? Intelligas hinc, quod & a libi advertimus, quanti sit veterum Magistratum, eorumque omnium, qui ministerium aliquod exhibebant, notitia, ut ad intimam legitimam scientiam adita accessus pateat. Nos interim alia percurramus.

In tit. D. de transactionibus l. 13. occurrit sic: *Æmilius Macer lib. 1. ad. vicesimam hereditatem. Nulli procuratorum Principis, inconsulto Principe, transigere licet.* Hæc lex, ceteris sane dilucidior, mirum quam ineptis laciniis per pragmaticos ex ignorantia vicesimæ fuerit inquinata, atque ad diversa prorsus contorta. Dixerunt quidem neque Principis, neque cujuscumque privati procuratori fas esse transigere sine speciali mandato, quum procuratori jus non sit rem minuere, sed tantum administrare; quique transigit, rem, de qua agitur, minuat. Hæc omnia vera quidem sunt: Sed exceptio, quam excogitarunt, falsa omnino: somniarunt enim posse præter speciale mandatum transigi, si ita fiat, ut res soli, sive immobilis maneat penes Fiscum, pecunia adversario data. Utque id adstruant, exemplum afferunt in Tutore, cui jus est etiam sine Prætoris auctoritate transigere, modo res immobilis in ejusdem minoris dominio maneat, & adversario pecuniæ quid exolvatur. Absurda sane omnia: nam Principis Procuratori, imo & alterius privati transigere nequaquam licuit, præter speciale mandatum. Si enim *transigere est donare*, quum nulla transactio sit, nisi quid detur, vel retineatur; nemini ex procuratoribus, præter Domini voluntatem, dare permissum est. Sed quid? Stulti prorsus sunt, qui ex hac lege ad res omnino alienas dilabuntur. Agitur quippe de vicesima, ut ex epigraphe patet, quæque pecuniariter pendebatur. Itaque falsa distinctio, quæ cum laudata legis verbis

bis congruere non potest. Neque minus dissonum est minoris exemplum: nam Tutori major profecto potestas est, quam alteri cuicumque procuratori, quum Tutor res pupilli non valentis agere curans, veluti Dominus existimetur, quod in Procuratore sive Fisci, sive alterius privati secus est.

Præterea in *tit. XV. D. de jure Fisci l. 31. & 32.*, hæc habentur: *D. Commodus rescripsit, obsidum bona, sicut captivorum, omnimodo in Fiscum esse cogenda. Sed si accepto usu togæ Romanæ, ut cives Romani semper egerint, Divi Fratres Procuratoribus hereditatum rescripserunt, sine dubitatione jus eorum ab obsidium conditione separatum esse beneficio principali; ideoque idem jus eis servandum esse, quod haberent, si a legitimis civibus Romanis heredes instituti fuissent.* Ad prioris legis intelligentiam hæc addituit Gothofredus: *Obsidum bona, hoc est, eorum, qui nobis dati sunt, obsides Fisco cedunt: ut & captivorum, ut hic, ideoque de his apud nos testari non possunt.* Neque profecto magnus Cujacius in alia discessit. Scripsit enim apud Romanos bona obsidum Fisco cessisse, quum hi, utpote peregrini minime de bonis suis testari possent. Quæ quidem omnia a vero immane quantum recedunt. Neque vero, quod obsides testari non possent, eorum bona ad Fiscum pertinebant. Profecto Provincialium, ceterorumque omnium, qui jure Quiritum carebant, fortunæ, licet testamentum condere non possent, eos sequebantur, ad quos lege naturæ ab intestato pertinebant. Præclarius sane actum esset, si unquam ad hereditatum Procuratores, quibus Commodus rescripsit, animum advertissent: sed alio fortasse intenti id non viderunt. Nos igitur a vicissimarum exactorum historia germanam interpretationem arcessemus.

Vulgo notum est, non potuisse peregrinum capere ex testamento Civis Romani: qua de re supra diximus ante constitutionem Caracallæ Provinciales, & peregrinos omnes vicissimam nullam dependisse, quum ea illos urgeret, qui bona ex testamento capiebant. Itaque bona, Provinciali, vel peregrino a cive Romano relicta, utpote incapaci, legata, in Fiscum cadebant. Hac luculentissima facie præmissa, intelligitur quænam obsidum bona Fisco deferrentur, nequaquam

T t

pro-

profecto suamet ipsorum , sed quæ forte ex civis alicujus Romani testamento sibi obvenirent . Verum si obfides usum togæ a Principe impetrassent , quum ita cives fuerint facti , ideoque heredes institui possent , par tunc æquumque erat , ut vicestimam persolverent , uti ceteri cives . Hoc enim innuunt postrema laudatæ legis verba : *Ideoque idem jus eis servandum esse , quod haberent , si a legitimis civibus Romanis heredes instituti fuissent* . Nempe ut persolvant vicestimam , sicuti ceteri cives solvebant . En tandem vera legis hujus expositio , itemque prodita ratio , cur hæc procuratoribus hereditatum rescripta sit , nempe ut ii ab obfidibus , qui usum togæ consequuti fuerant , si heredes instituerentur , vel quid aliquid ex testamento civis Romani caperent , vicestimam excuterent .

Nimis longum esset , omnia extantia adhuc in jure novo vestigia hujus vestigialis persequi . Quare satis sint , quæ diximus ; cetera vero ipsemet advertet lector . Reliquum tamen est , ut antequam a vicimarum argumento discedamus , paramper de Constitutione illa Justiniani *de edicto Divi Hadriani tollendo* edisseramus . Statuerat quidem Hadrianus , ne solvendis vicestimis , quæ Nervæ , & Trajani constitutionibus reductæ satis erant , ulla mora neceretur , statim heredem , aperto testamento , in possessionem rerum hereditariarum mittendum ; neque per aliquam exceptionem impediendum , modo testamentum cancellatum non esset , abolitum , aut ex quacumque suæ formæ parte vitiatum . Quod si quid contra illud , vel falsitatis nomine , vel amentię testatoris , vel præteritionis filiorum , aliussve vitii objiceretur , quod tamen sub oculos statim non caderet , id heredi impedimento non esse , quominus in possessionem , etiamsi appellatio intercesserit , ut in l. 7. *de appellatione* , mitteretur . Sane Augustus etiam , ne vicestimæ mora fieret , jusserat statim tabulas testamenti aperiendas . En Paulli verba IV. *sentent. tit. 6. §. 3. de vicesima* : *Testamentum lex voluit statim post mortem testatoris aperiri , & ideo quamvis sit rescriptis variatum , tamen aperienda sunt tabula a presentibus intra triduum , vel quinque dies , ab absentibus quoque intra eosdem dies , quum supervenerint* . Nec enim oportet testamentum heredibus , aut legatariis , aut libertatibus ,  
quam



*quam necessario vestigali moram fieri.*

Ex quibus omnibus licet advertere, vim testamentorum, quam pragmaticorum turba *executivam* appellavit, non aliunde ortam, quam ut citius, atque expeditius vicesima persolveretur. Sicuti enim Augustus post triduum, vel quinque dies testamentum aperiendum jasserat, ita & Hadrianus id confirmans voluit præterea, ut summoti cujuscumque vitii, quod statim ipsis oculis non occurreret, exceptione, heres in possessionem mitteretur. Contra vero Justinianus quum vicesima ævo suo jam recessisset, sanxit ut testamentum heres, quando melius sibi visum, aperiret, & in possessionem rerum hereditariarum mitteretur, modo *in prima figura sine omni vituperatione appareat, & depositionibus testium legitimi numeri vallatum sit*. Itaque exoleta vicesima, retenta est *via*, quam vocant, *executiva* testamentorum. Sed si ea ob promptam vicesimæ solutionem in jus civile inducta est, cur eadem vicesima abrogata? Ita severus est fori usus, ut filio adhuc præterito, ad ejus intentionem probandam terminus detur ordinarius, misso interim herede extraneo in possessionem bonorum. Nonne hoc iniquitatem sapit? Consuetudo profecto isthæc inducta minime esset, si rem ab origine sua, nempe ab historiz fonte, repetissent, quæ adeo veritatis nuncia est, ut eruditæ jurisprudentiæ inscitia obsit plurimum, & sæpe absurda, atque intolerabilia in forum invehat, ut ad fastidium usque a nobis inculcatum, probatumque est.

## C A P U T IX.

*Ad legem Papiam de caducis.*

## §. I.

*De actione hereditatis, & quando dies legatorum cedat.*

**L** Ex Papia duas in partes dispescitur: altera quidem per præmia, & poenas id agit, ut Urbs, civili furore prope deserta, nova prole, hominumque frequentia expleatur; per

T t 2

al-

alteram vero ærario, publicis ærumnis jam inani, caducis bonis occurritur. Sed quoniam de priori supra differuimus, consulto sane postremam hanc tunc missam fecimus, ut eandem hic, ubi de ærario sermo est, tamquam in sua sede aptius ea pertractetur. Quemadmodum autem vicesimæ vectigal, abrogatum quamvis, quaque versus in jure civili inspersum videtur; ita profecto & caducariæ legi usu venit, ut abs re non sit quædam antea ad perfectam ejus intelligentiam præfari. Quamvis vectigalia, quæ nervi sunt Reipublicæ cujuscunque, gravia vulgo censeantur; maxime tamen invisa sunt in forma Monarchica, ubi quæ in commune consuluntur, ad unius commodum excogitata facile creduntur. Propterea Augustus sapientissimus Princeps, ut, quantum posset, tributorum suorum invidiam deliniret, id imperandum statuit, quod vel ex insperato lucro penderetur, vel sponte sua, suaque Civium voluntate solvi posset. Memini id a me & antea dictum, sed crambem hanc recoctam hic apposuisse juvabit forte, ut quam viam optimi Principes in vectigalibus imponendis tenuerint, ne intolerabilia fiant, viri politici calleant. Itaque ut per vicesimæ institutionem id factum est, ut hereditatibus, legatise præter spem locupletati aliquid in Fiscum conferrent, ita per caducorum legem effectum ut ultro cives, non secus ac cœlibes, pensitare viderentur: quia enim si nolent, facile effugissent. Ecquis hoc tributorum genus criminaretur, quod refractariorum hominum fortunas in Populi ærarium vertit? Non ne ab iis liberi fuissent, si vitam suam ad legum præcepta formassent?

Caducorum igitur vectigal voluntarium est, ac proinde tolerabilius. Sed quid Tacitus, inter viros civiles facile princeps? Is enim sub Tiberio scripsit, tributorum onere cives maxime oppressos esse, exterritosque: *Quia multitudo periclitantium gliscebatur, quum omnis domus delatorum interpretationibus subverteretur, ut, multorum exciso statu, terror omnibus intentaretur.* Nonne, licet voluntaria, tributa inculat? Sed si temporum, civiumque morum ratio habeatur, perspecta satis nobis erit Taciti sententiæ: adeo enim bellis civilibus corrupta fuerat disciplina, moresque civium in turpitudinem omnem

omnem observauerant, ut quacumque inflicta poena difficillime a vaga venire, a divitiis, a repudiis, atque adulteriis sese continerent. Hinc sane factum, ut volentes, nolentes ad id vestigialis cogerentur. Atque adeo tunc temporis mulierum perversi erant mores, ut vulgo deterritæ nuptias horrescerent. Neque tamen ii omnes a legis poena liberi. Lex generaliter defini-  
*verat, ut omnino si a privilegiis parentum cessaretur, veluti pa-*  
*rens omnium populus vacantia teneret.* Quid si ineantur nuptiæ, sed filii, impediende natura, non creentur? Num vir poena immunis? Ergo nec voluntarium omnium tributum hoc, quando indiscriminatim persolvebant, & qui nollent per legitimas nuptias, & qui non possent filios progignere. Demum caducaria lex adeo diffusa erat, effectis scilicet, præter caduca, *quasi caducis, ereptitiis, pro non scriptis*, aliisque nominibus, ut vix quisquis elabi posset, quin in legis laqueum incideret. Sane maxima tunc necessitas urgebat pecuniæ cogendæ. Quum enim militum delectus ab usu descivisset, & mercenaria esset militia inuenta, quæque, effervescentibus adhuc, o recentem libertatis memoriam, Civibus, numquam arma deponeret; una stipendii dulcedo, spesque præmiorum milites ad vexilla alliciebat, eosque Principi periculosissimis temporibus devincire putabatur. Atque hæc sunt in causa, cur adeo prolata esset caducorum ratio, eaque inique, quamvis voluntaria, tulerit Tacitus. Sed jam rem ipsam persequamur.

Ulpianus (a), & Isidorus (b) bona nuncupari caduca scripserunt, quod ab heredibus, & legatariis cadant. Sed mea quidem sententia sanius dixissent sic appellata, quia in cassum excidunt, atque alia de causa non capiuntur, ut est caduca glans, oliva, & aqua caduca, quæ ex castello, vel fistula cadit, de quibus passim in jure. Sed videamus caducorum caput, quemadmodum Heineccius concinnavit. *Si quis testamento facto se decedit, isque liberos suos, parentesve usque ad tertium gradum heredes habebit, sive alios quoscunque, qui li-*  
be-

(a) *Fragment. tit. 18. §. 1.*

(b) *Etymol. lib. 5. cap. 25.*

*bonis habebunt, heredes instituet, bi caduca jure antiquo capimur.* Caduca autem hereditates erant, & legata, si heredes forte, vel legatarius ante apertas tabulas defecisset. Quod sane ipsum Ulpianus voluit quum scripsit (a) ita: *Legatorum, quæ pure, vel in diem certum relicta sunt, dies cedit, antiquo quidem jure, & mortis testatoris tempore, per legem autem Papiam Poppaam en apertis tabulis testamenti.* Quapropter sic inquit Justinianus (b): *Materiam, atque exordium caducorum len Papia ab aditionibus, quæ circa defunctorum hereditates procedant, sumpsit: & ideo non a morte testatoris, sed ab apertura tabularum dies cedere legatorum S. C. quæ circa legem Papiam introducta sunt, censuerunt, ut quod in medio deficiat, hoc caducum fiat.*

Itaque certi juris est, legem nostram caducorum materiam ab aditionibus hereditatum ex testamento accepisse, omnesque hereditates, & legata fieri caduca, si antequam testamenti tabulæ aperirentur, heres, vel legatarius defecisset: idque profecto antiquo juri adversatur, per quod hereditates, & legata statim a die mortis testatoris deferbantur. Quod si hereditas legitima foret, pluresque essent heredes, horum altero deficiente, ejus pars ceteris accrescebat, nec sane Fiscum sequebatur. Quare juvat hic vestigare, cur Augustus in hereditatibus, quæ ex testamento deferuntur, sustulerit jus accrescendi, vel saltem multum minuerit, caducorum materiam induxerit, integris manentibus illis, quæ lege ipsa obveniunt. Nodum profecto hunc nemine, quem sciam, ne Heineccio quidem, qui præclarissime in hoc argumento se gessit, solvente, videamus nos, an conjecturis locus dari possit. Compertum satis est, quale fuerit Augusti ingenium in hac nova Reipublicæ forma instituenda. Solertissimus Princeps, ubi quid novi imperandum, specioso quodam foco id illinire, ne sibi invidia crearetur, curabat: vel enim subdola antiquæ libertatis specie utebatur, vel æquitatis cujusdam causam objiciebat. Sic vicefimam hereditatum im-

po-

(a) *Fragment. XXIII. 2. 31.*(b) *L. unica Cod. de caducis tollend.*

ponens, proximiores, & pauperes exceptit, æquum dictitans ut ditiores ceteri ex insperato lucro partem aliquam in publicam utilitatem conferrent. Haud secus profecto se res habuit in hac caducorum institutione. Etenim quum acerbum nimis esset a legitimis successoribus hereditates, ad quas æquitas ipsa vocat, ad Fiscum referre, satius duxit eos a lege caducaria immunes relinquere, quam per spem hujus lucelli odium Civium in se concitare; quum ex adverso nulli invidiæ subessent caduca ex testamentis, ex quibus præter spem hereditas defertur. Atque id est, quod in hac quaestione coniciendum putavi.

Quum autem caduca sit hereditas, & legatum, si heres, & legatarius ante apertas tabulas defecerint, cur eadem a caducis excepta, si post tabulas apertas deficiant? Nonne ei magis, qui hereditatem creverit, accrescent, quam Fisco cedent? In hoc quoque altum silentium: quapropter sic mecum statuo. Augustus, ne qua mora solvendæ vicesimæ injiceretur, id quammaxime volebat, ut testamenta cito aperirentur: quod sane solemniter apud Prætorem fiebat, qui coactis signatoribus, agnitis signis, rupto lino, tabulas aperiri, easque recitari curabat. Verum quo studiosius Cives tributorum solutionem aufugiunt, eo Principes, per metum majoris lucri amittendi, impentius ad ea pensitanda urgere debent. Hinc Imperator statuit ut hereditas adiri non posset, nisi aperto testamento; neque legatorum dies cederet, nisi ab illius apertura; adeo ut omnia Fisco caderent, si ante apertas testamenti tabulas, heres, vel legatarius deficerent: ut hoc timore adacti, & heres testamentum aperire festinaret, & eo moram faciente legatarius saltem instaret, ne ante apertas tabulas forte deficiens legatum amitteret. Ecce tibi verba Paulli (a), ex quibus nostra conjectura lucis plurimum accipit: *Testamentum lex statim post mortem testatoris aperiri voluit: & ideo, quamvis sit rescriptis variatum, tamen a presentibus intra triduum, vel quinque dies aperiendæ sunt tabulæ, ab absentibus quoque intra eisdem dies, quum su-*

(a) *Sentent. IV. tit. VI.*

*supervenerint. Nec enim oportet testamentum heredibus, aut legatariis, aut libertatibus quam necessario vectigali moram fieri. Legatariis autem, aut libertatibus moram nullam fieri nihil aliud est, nisi ut festinetur ad testamentum aperiendum, ne legatum, aut libertas caduca fieret. Cur vero cadebant, si ante tabulas deficerent? Quia necessarium vectigal, hoc est, vicesima non inde solvebatur. Perspicua igitur mea argumentatio est, propterea heredes per metum amittendæ hereditatis, si forte deficerent, ad aperiendas tabulas coactos, legatariosque ne legata sua amitterent, ad instandum heredibus, ut confestim, & sine cunctatione vicesimæ Fisco solverentur. Quare quum filius exciperetur a vicesima, statim a morte testatoris erat heres; unde per omnium jurisperitorum ora volitat illud filium etiam clausis tabulis esse heredem.*

Sed ut redeamus ad ea, quæ supra præfari sumus, quum Imperator Augustus ea imponeret tributa, quæ sponte sua a civibus persolverentur, nulla profecto bona caduca fiebant, si heredes mortuo testatore, statim testamentum aperirent, hereditatemque cernerent. Sed hæc omnia meræ nugæ, nam quid si intra triduum, vel quinque dies, intra quos testamentum aperiri poterat, heres vel legatarius vivere desisset? Nonne caduca bona, ac Fisco deferrebantur? Nonne apertis etiam tabulis bona vacantia dicebantur, & Fisco cadebant, si heredes ante cretionem defecissent. Quod si heredum quis hereditatem adisset, tunc non dabatur Fisco locus, & deficientium portiones coheredi vel collegatario accrescebant quemadmodum Cajus scripsit (a). *Qui semel aliqua ex parte heres extitit, deficientium partes etiam in vivo excipit, idest tacite in deficientium partes etiam in vivo accrescunt.* At inquires per raro fieri, ut hereditatis partes ad ærarium deferrentur, quando ad filium reponendum satis erat unius ex heredibus cretio, immo passim: licet enim apertis tabulis possent heredes hereditatem adire, non tamen id statim fiebat scilicet ne oneribus hereditariis per festinationem imprudenter implicarentur & quamvis tempus ad deliberandum sexaginta dierum daretur

(a) L. 53. §. 1. D. de acquiren. vel omitten. hered.

tur, non dum lato inventarii beneficio, ne hoc quidem spatium plerumque sat existimabant, quo rebus suis consulere. Itaque has inter moras usu sæpe veniebat, ut hereditatis partes caderent, antequam heredum alter partem suam crevisset. Atque hoc voluntarium illud est vectigal, quod sive vellent, sive nollent, necesse prope erat civibus ut penderent.

Num vero quæ dicta sunt, locum habent & in herede ex asse instituto? An vero is quoque, non nisi apertis tabulis, heres esse poterit, ita ut, eo deficiente, antequam adeat, hereditas fisco devolvatur potius, quam legitimis? Nodum solvit Paulus (a) ubi scripsit: *Idem dicemus, si ex asse heres institutus non putet se bonorum possessionem petere posse ante apertas tabulas. Quod si nesciat esse tabulas: in facto errat. Patet igitur hinc in unico herede locum minime habuisse legem caducariam, quum potuisset is etiam, ante apertas tabulas, hereditatem adire. At pugnat hoc cum iis, quæ supra diximus: affirmavimus enim heredem extraneum non potuisse, ante apertas testamenti tabulas, hereditatem adire, ut vicesima citius penderetur, neque ulla in ea fraus fieret: atque adeo eandem pendere institutus ex asse debet. Cur autem ante apertum testamentum hereditatem adibit? Hinc doctissimus Heineccius scribit, legem Papiam ideo cretionem ante apertas tabulas vetuisse, ut quod ante apertas tabulas deficeret, non accresceret coheredibus, sed ab ærario occuparetur: quod quum in unico herede accidere nequeat, nulla opus erat apertura testamenti ad cernendam hereditatem. Sed hoc est, quod inquirebamus, cur Augusto adlibuerit inter coheredes leges caducarias statuere, ac proinde ante apertas tabulas hereditatem non inire, in unico vero herede minime. Sane, si conjecturis locus dari possit, dicam ex illius subdola arte causam petendam, nempe ne videretur nimium studere testamentis in Fisci gratiam infirmandis: quæ sane suspicio, pluribus institutis heredibus, nulla suberat, quum facile inter eos unus aliquis præsto esset, qui tabulas crederet, testamentumque tueretur, portiones nempe coheredum, qui forte an-*

V. v

te.

(a) L. I. §. ult. D. de jur. & facti ignor.

requam adirent, defecissent, sibi acquirendo. Itaque videri voluit non per id, quod facilius, sed quod perraro accidit, Fisci commodis consuluisse, ut ita tributum odium quam maxime levaret. Porro quum solemnitas illa testamenti aperiendi, non nisi ad testamentum scriptum pertineret, in testamento nuncupativo heres, quam sibi liberet, semper hereditatem adire poterat. Sed si apertura testamenti opus erat, ne fraus in vicesima fieret, cur hoc in testamento tantum scripto, nequaquam verò in nuncupativo, quum & hinc fraus Fisci creari posset? Vereor sane, ne eorum conjecturis lectori stomachum moveam, præsertim quum fieri possit, ut quod mihi verosimilius, lectori improbabilius videatur. Sed quæque fuerit rei fortuna, animi mei sensus libens exponam. Quum ubique urbis delatores ad Fisci commodum volitarent, fieri vix poterat, ut heres palam nuncupatus fraudem vicestimæ faceret: quod secus erat in testamento scripto: atque hæc varietatis causam fuisse opinor. Et quidem habemus in jure legatum, vel fideicommissum in Fisci commodum intercidere, quod tacite relinqueretur incapaci: palam vero relictum, quamvis sua vi caderet, minime tamen Fiscum sequi, quum in ipsa hereditate maneat, sive apud eum, a quo relictum fuerat; atque hoc propterea quod delatorum industriam effugere non posset. Haud sane aliter in causa nostrâ factum puto, quum in testamento nuncupativo vix, aut ne vix quidem Fiscum frustrari heres possit.

Sed satis quæ dicta sunt, licet per verosimiles conjecturas, ad caducariz legis rationem vestigandam. Quum autem Augustus duo maxime curaret, & ut ærarium expleretur, & Respub. civibus viduata prole augetur, hinc quamquam caduca Fiscu cederent, quosdam tamen in vitæ conjugalis gratiam excepit, quos Fiscu ipsi præferendos statuit. Ita quippe sanxit: *Si quis testamento facto decedit, isque liberos suos, parentesque, usque ad tertium gradum, heredes habebit, sive alios quoscunque, qui liberi habebunt, benedictus instituet, ii caduca jure antiquo capiunt.* Quum autem lex liberorum nomine utatur, merito receptum est eo vocabulo, non tantum filios, sed & descendentes omnes intelligi tum naturales, tum adoptivos.

Si



Si enim lex Papia durissima est, quid mirum, si vulgo prudentes, ubi daretur occasio, benigne eam interpretarentur?

Quid si filius esset emancipatus? Sane eodem privilegio frui videtur; quum nuptiarum beneficium id sit, non autem patriæ potestatis: vel enim prælatio hæc nuptiarum erat præmium, vel filiorum procreatorum: nihil ergo referebat, filius esset suus, nec ne. Præter hæc si parentes ad tertium usque gradum, a filiis heredes instituti, Fisco in caducis anteferebantur, licet in filiorum potestate non essent, nec ipsi filios in potestate sua haberent; plane hinc evincitur beneficium hoc filiorum non a patria potestate, sed ab ipsa parentum qualitate oriri. Quum igitur emancipatio filiationis jura non dissolvat, prælationis privilegio emancipatus filius carere non debet. Sed contra respondit Cajus (a) ad legem ipsam Juliam: *Nulla femina aut habet suos heredes, aut desinere habere potest, propter capitis deminutionem*. Si enim excidebat filius a prælatione caducorum in hereditate matris, quia in ejus non erat potestate, eadem de causa emancipatus filius in hereditate paterna privilegio prælationis destituebatur. Cur autem hoc, nisi ex assentatorum licentia, nempe ne fiscus a caducis excideret?

Parentes etiam, ut diximus, Fisco anteferebantur, si heredes a liberis suis scriberentur, & quidem usque ad tertium gradum. Itaque si quis patri, matri, avo, aviæ, proavo, vel proaviæ instituto, institutæque, coheredem dedisset, hujusque portio caduca fieret, ea adcrefcebat adscendentibus institutis, iique æque ac liberi Fisco anteibant. Demum potiebantur eodem beneficio quicumque liberos habentes, si forte heredes essent instituti: deficiente enim coherede, vel collegatario horum pars consortem sequebatur. Quum autem maximum esset hoc beneficium, usus invaluit, ut jus filiorum, si forte non essent, a Principe impetraretur. Qua in re egregium mihi Celsi responsum explicandi datur occasio (b). Ait is: *Neratius consultus, an quod beneficium dare se quasi*

V V 1 vi-

(a) l. 13. D. de suis & legitimis hered.

(b) L. 152. de regulis juris

viventi Cæsar rescripserat, jam defuncto dedisse existimaretur. Respondit, non videri sibi Principem, quod ei, quem vivere existimabat, concessisset, defuncto concessisse: quem tamen modum esse beneficii sui veller, ipsius æstimationem esse. Mirum quantum locus hic, salebrosissimus quidem, Doctorum torserit ingenia. Sed quidquid ceteri scripserint, unus præ omnibus nodum solvit felicissime Heineccius vir clarissimus, qui ita speciem fingit (a). Titius aditurus opimam hereditatem, videbat eam pro dimidia occupatum iri a Fisco, quam is esset orbis: petiit proinde, exoravitque sane jus liberorum a Principe, Trajano scilicet, quo imperante Neratius vixit, quique indulgentissimus profecto Princeps erat. Porrectis igitur Principi precibus, hereditatem adiit, qua vix adita vita defungitur. Eo tandem mortuo, questiq. hinc prodiit, an beneficium id & mortuo datum censeretur, ita ut pars caduca, quam Titius si viveret, jure antiquo cepisset, ad ejus heredes transmissa esset, an vero ab ærario vindicaretur. Sed quum id negotii ex ipsius Principis explicandum foret voluntate, an nempe privilegium, quod viventi se dare putabat, & mortuo prodesse vellet, recte respondit Neratius, *Ipsius nempe Principis æstimationem esse, quem modum esse vellet beneficii sui*. En patefactum responsum hoc obscurissimum, quod sane præter legis expolitæ historiam, in lucem prodire non potuisset.

## §. II.

*De his, quæ pro non scriptis habentur, quæque sunt in causa caduci.*

**H**Aud mirum est Augustum tot bonorum species, eorumque divisiones in successionibus excogitasse, quum eo consilio omnia hæc conquesta sint, ut ærarium suum diretceret: vix enim fieri poterat, ut in tanta rerum distributione nulla pars in Fiscum caderet. Id igitur est, quod

(a) *Ad L. Juliam, & Pap. lib. 3. cap. 3.*

quod nunc explicandum aggredior. Primum legis caput sic se habet: *Quæ ab initio deficiunt, vel in quibus testator postea mutaverit voluntatem, ea pro non scriptis habentur, eaque ii, a quibus relicta sunt, jure antiquo capiunt.* Itaque pro non scriptis ea sunt, quæ ab initio non consistunt. Hæc autem quamplurima sunt, scilicet legata, quæ sibi ipsi quis adscripserit, vel ei, quem habet in potestate; institutiones captatoriarum, legata adeo obscura, atque implicata, ut quid senserit testator intelligi prorsus nequeat; legata item, vel coheredis institutio in eum, qui tempore conditi testamenti e vita discesserit; demum legata omnia, in quibus testator voluntatem mutaverit, vel ab uno in alium transtulerit, vel rem ipsam legatam peremerit. Cuncta hæc, & similia erant pro non scriptis, quæ quidem haud ærario deferebantur, sed heredi ipsi hærebant, quia, ut scripsit Julianus (a), *proinde hærentur, ac si inserta testamento non fuissent.* Itaque par æquumque existimatum, ut heredi cederent, neque hereditatem minuerent. Quare de istiusmodi legatis scribens Plinius sic inquit lib. 11. epist. 16.: *Præsertim quum delatori locus non sit. Nam si verendum esset, ne quod ego dedissem, Populus eriperet, cunctatior forte, & cautior esse deberem. Quum vero liceat heredi donare quod in hereditate subsedit, nihil est, quod obset illi meæ legi, cui publicæ leges non repugnant.*

Sed ad ea descendamus, quæ erant in *caussa caduci*, seu dicere mavis *quasi caduca*. Sunt hæc relicta omnia, quæ vivo testatore, post conditum ejus testamentum deficiunt, de quibus sic lex nostra: *Si quicumque hominum hæres, legatariusque, vivo testatore, post testamentum conditum decedat, conditioque deficiat, relictum in caussa caduci esto, & Populo quasi caducum defertor.* Lex ait. *Si quicumque homo*, ut doceamur legibus his caducariis non tantum viros, sed & feminas teneri. Quum enim in legibus poenalibus mulierum sexus, utpote imbecillior, mitius puniatur, facile quis suspicari poterat, legi nostræ viros unos debere. Unde sane scriptum legimus illud Caji (b): *Hominis appellatione tam fe-*  
*mi-*

(a) L. 1. de his qua pro scriptis.

(b) L. 152. D. de verborum signific.

*minam, quam masculum contineri non dubitatur. Quod responsum risu dignum videretur, nisi ex ejus epigraphe legis Juliae, & Papiae admoneremur.*

Quando autem omnes lex hæc complectitur, num & Augustos, Augustasque? Sane de Principe insignem locum habemus apud Ulpianum (a): *Princeps legibus solutus est. Quod quidem, quum ad legem nostram scriptum sit, exploratissimum est eum de capitibus caducariis intellexisse. Sed ut res clarius illustretur, memoria recolendum recenti adhuc Monarchia id Principes curasse maxime, ut, quamvis essent a legibus civilibus liberi, ne tamen viderentur tales, atque odium Civium subirent, Senatus sibi præberet immunitatem. Factum igitur Senatusconsultum fuit, ut eodem, quo ceteri, Principes jure tenerentur. Sed additum in eisdem legibus: Ne D. Augustus, Tiberiusque, aut Claudius tenerentur, iis legibus, & successores soluti essent: ut scriptum reliquit Dio lib. 58. Sed abs re non erit exponere, quid voluit dictum Ulpianus scribens: Princeps legibus solutus est. Augusta autem, licet legibus soluta non est: Principes tamen eadem illi privilegia tribuunt, quæ & ipsi habent. Nascente quidem Monarchia vidimus a Senatu Principes immunitate donatos: maxime vero in Augustas id factum credimus, ut de Livia a Dione Cæsio memoriae proditum est: atque hoc ut genti pristinae libertatis cupida fucus fieret. Sed invalescente deinde Principatu, minime id a Senatu petendum existimatum est, quum Princeps ipse, cui Populus omne jus suum lege Regia detulerat, privilegia, quæ ipse haberet, per se Augustæ impertiri posset.*

Sed operæ pretium est videre, quod nam fuerit privilegium hoc Principis, vel Augustæ in bonis quasi caducis. Sane quidem id non fuit, si Augusta diem suum ante testatoris mortem obiisset. Nam quis putet hereditatem, vel legatum, nondum sibi delatum, ad heredes suos eam transmississe? Dicamus potius, si mortuo testatore ante apertas tabulas coheres, vel collegatarius decessisset, ejus portionem non Fisco, sed Prin-

(a) L. 31. de legib. S. C.

Principi, vel Augustæ accrescere, quod quidem adhuc dicitur quasi caducum. Quid vero Junius Mauricianus? Hic enim in l. 57. *D. de legatis* 2. sic tradidit: Si *Augusta legaveris*, & ea inter homines esse desierit, deficit quod ei relictum est; sicuti *D. Hadrianus in Plotina*, & proximæ Imper. Antoninus in *Faustina Augusta* persona constituit, quum ea ante inter homines esse desit, quam testator decederet. Hoc sane responsum quamvis eleganter satis Heineccius interpretatus sit, juvabit tamen, ut res ex causis suis depromatur, quædam & nos adjicere. Jam ante monuimus per se Augustam non fuisse legibus caducariis solutam, nisi quod cum ea Princeps privilegium suum communicasset. Communicato autem hoc jure, si qui forte coheredes, vel collegatarii Augustæ essent, per hanc societatem & ii eodem privilegio sese potiri posse existimabant. Sic collegatarii Faustinz, & Plotinz se legibus caducariis, tamquam illarum focios, quæ immunes erant, solutos jactabant. Contra vero Fiscus, quum Augustæ ante testatoris mortem decessissent, quod iis relictum erat, occupavit, Augustæ privilegium earum collegatariis denegans. Quid si vixissent? Ne eadem quidem immunitate Augustali collegatarii uti potuissent. Quum enim privilegium hoc sit singulare, atque ad unas Augustas pertinens, cum aliis profecto communicari non poterat. Sed ut ad rem redeamus, legatario vivo, testatore decedente, vel conditione deficiente, legatum quasi caducum fiebat. Quid vero si legatarius incapax factus esset? Num caducum legatum, non secus ac si defecisset? Hæc adhibita distinctione, Ulpianus censuit rem transigendam (a): Vel in poenam servitutis incidit, & legatum extinguitur, quum æque ac mortuus censeatur; vel deportatus est, & secus judicandum, quum hic magis pendeat conditio quando spes est restitutionis, quam deficiat. Hæc quamvis plana sint, nolim tamen insigne Junii Mauritiani responsum omittere, quod ex dictis tantum poterit prorsus intelligi. Sic enim is (b). *Licet testatori repetere legatum ususfructus, ut etiam post*

ca-

(a) *L. intercidit* 58. *D. de conditionibus*.(b) *L. 23. D. de usu*, & *usufr. legato*

*capitis diminutionem deberetur. Et hoc nuper Imper. Antoninus ad libellum rescripsit, tunc tantum esse huic Comstitutioni locum, quum in annos singulos relegaretur. Sane legatum rei relictum, quoad vixerit legatarius, non unum legatum est, sed tot legata, quot vitæ ejus anni sunt, nec secus est in ususfructus legato. Quum igitur in hac specie tot sint legata, quot anni, sane videbatur non peremptum legatum, si forte legatario capite deminuto restituta esset libertas. Sed hoc tantum tacite fieri poterat, legando nempe ususfructum, quoad legatarius viveret, quum ita videretur legatum ex sui natura reviviscere, minime vero expressa testatoris voluntate quam legibus fraudem facere Principes non sinebant. Itaque excidebat omnino legatum ususfructus, si expresse testator adjecisset, repetitum intelligi, capitis minutione ademta.*

Satis superque de bonis non scriptis, & quasi caducis edisseruimus. Reliquum est ut disquiramus, cur Princeps noster bona non scripta Fisco abnegaverit, & venientibus potius ab intestato, vel coheredi scripto sine onere dederit. Sic, scripto herede, qui testamenti tempore incapax erat, institutio pro non scripta dicitur, & proximo cuique hereditas defertur: item relictio legato ei, qui capere non poterat, apud heredem id manebat, & sine onere. Contra vero si coheres, vel legatarius incapaces post testamentum facti fuissent, arario pars deficiens, ut legatum, deferebatur. Quid hæ nugæ in Principe solertissimo, qui omnia conquirebat, ut rebus suis per transversos cuniculos consulere? Ego quidem diu hujus rei rationem apud doctissimos quosque interpretes quaesivi; neminem tamen vidi, qui sibi difficultatem hanc, & quidem impeditissimam opposuerit. Sed ne & ipse in idem incidam vitium, conjecturam qualem potero in medium ponere, quam alte silere, fatius duxi. In comperto quidem apud omnes est, Augustum id præcipue curasse, ne legibus videretur adversari, quippe qui tantum precario jure Imperium tenere, nempe quoad Populo adluberet, simulabat. Porro si non scripta caderent ad Fiscum, directe profecto legitimæ successiones viderentur everti, quum quæ haberentur tamquam testamentis non inserta, proximiores sequi deberent, vel heredem scriptum. Verum res non ita sese habebat, si tempore testa-

men-

menti, jus heredi, vel legatario capiendi fuisset: nam hic color quidam quaesitus erat, quod non legitimo heredi, sed heredi scripto incapaci bona auferrentur, nec propterea ararium discescere in proximorum perniciem, sed ex facto potius ipsius testatoris, qui legitimas hereditates testando evertebat. Itaque quum tempore testamenti legatum, vel coheredis institutio staret, postea autem id fieret irritum; hoc erat veluti ex aliquo inopinato casu, unde heredes legitimi, vel testamentarii capere sperassent, quum ab initio jus eorumdem jam cecidisset. Speciose igitur efferebat grave non futurum, se heredibus legitimis, vel testamentariis lucrum illud auferre, quod ex mero eventu, & fortuna penderet, si scilicet non restitueret jus, quod tandem iisdem fuerat ablatum per testamentum. Sed hæc, quæ diximus, difficultate non carent, quum testamentum non nisi mortuo testatore, & adita hereditate vires suas exerat. Præter hanc, quæcunque ea sit, conjecturam, nil aliud habeo, quod viris doctis aliqua ratione probari possit. Sed porro progrediamur.

## §. III.

*De caducis, ereptitiis, & vacantibus bonis.*

**D**Iximus de bonis non scriptis, & quasi caducis; reliquum est demum, ut de bonis, quæ proprie caduca audiunt, deque vacantibus, & ereptitiis differamus. De caducis caput ita concinnavit Heineccius: *Si heres pro parte, legatariusve, quibus pure, vel in certum diem hereditas, legatumve relictum erit, post mortem testatoris, ante apertas tabulas testamenti decedat, vel pereger fier, ea hereditatis pars, legatumve caduca sunt, populoque deferuntur. Sive cælibi, vel alteri cuiusvis plus, quam ex H. L. licebit, relictum erit, & id caducum esto, populoque vindicator. Sive heres, legatariusve post mortem testatoris ante eventum conditionis deficiat, hereditas, legatumve caduca sunt Populoque deferuntur.*

Quæ igitur post mortem testatoris, ante apertas tabulas deficiebant, caduca erant, dicebanturque. Hinc si heres pro

X x

par-

parte post testatoris mortem deficeret, vel incapax fieret, aut conditio, sub qua scriptus erat, evanisset, pars hæc caduca erat, neque coheredi, neque venienti ab intestato accrescebat, sed Fisco deferebatur. Pro parte inquam heres: nam si esset ex asse, isque vel tempore testamenti incapax, vel post testamentum, aut post testatoris mortem, ante apertas tamen tabulas, defecisset, hereditas non ærario, sed legitimis acquirebatur, quod & supra diximus. Verum hic disquirendi locus, cur id in herede ex asse, minime vero in herede ex parte. Ego sane, quod in hisce legibus caducariis difficillimum, curavi, ut earundem rationem pro virili rimarer. An vero voti compos factus sim, lectoris erit judicium: conatus certe sum. Tamen qui ex proposito eas exponendas susceperunt, quos inter eruditissimus Heineccius, politicas omnino causas omiserunt. Age igitur, atque ex arcana Reipub. gerendæ arte nonnulla ad conjecturas nostras firmandas desumamus. Princeps ille solertissimus quum in omnibus se legum custodem, in speciem saltem præferret, id maxime curabat, ne vel transversum unguem a successionum tum legitimarum, tum testamentariarum legibus videretur recedere. Jam vero jure caducario in herede tantum pro parte, minime autem in illo ex asse locum tenente, res salva erat. Est enim quum, deficiente herede ex asse, res ad legitimos heredes rediret, legitimarum successionum juri nihil profecto derogatum: at vero heredis parte coheredi non accrescente, testamentorum jus haud evertebatur, quum per coheredis additionem integrum maneret. Itaque ea addicta Fisco, videbatur veluti adventitium quoddam lucrum, ex quo coheres in Fisci gratiam excideret. En fucum tanto oneri quæsitum: nam licet in speciem videretur incolume testamentum, re tamen vera inturbabatur maxime: nam qui plures scribit heredes, vel legatarios de eadem re, id sane vult, ut deficiente altero, alter in universum succedat: omnium enim sermone tritum: *Jus accrescendi ex ipsa testatoris voluntate prodire*. En traditam rationem, cur leges caducariz in herede ex asse locum non haberent.

Dixi illud fuisse caducum, quod post mortem testatoris  
ante



ante apertas testamenti tabulas deficeret: sed quum hoc luce indigeat, par est ut parumper in eo immoremur. Id sane studuit potissimum Augustus, ut hereditates testamentarias, quantum posset, & legata exciperet. Hinc jus accrescendi sustulit, novumque jus condidit, quo hereditates nonnisi apertis tabulis adirentur, nec legatorum dies cederet, nisi post earundem aperturam. Et quidem quum legatorum caducitati non minus jus accrescendi, quam alterum illud ad heredes transmittendi obster, quid mirum, si, sublato accrescendi jure, jus etiam transmittendi intra arctissimos cancellos coarctaverit? Id enim est non cedere legatorum diem, nisi tabulis apertis, nempe ut ita difficilior, rariusque posset legatarius legatum adquirere, acquisitumve ad heredes transmitti: quod enim acquisitum non est, ad alium transmitti non poterit. Quo posito, quem latet quot sæpe suborirentur impedimenta, quominus tabulæ aperirentur? Quum igitur tanti interesset tabulas aperiri, quanti caducam hereditatem, legatumve non fieri, nil mirum, si cum tanto apparatu veteres ad hunc titulum de tabulis aperiendis scripserint, totque quæstiones agitarint, quæ vetustatis ignavis risu quidem perdignæ videbuntur. Jam tandem intelligo, penitusque pernosco religiosissimum illud Ulpiani responsum (a): *Si sua natura tabulæ patefactæ sunt, apertum videri testamentum non dubitatur: non enim quæremus, a quo aperiantur. Si tabulæ non compareant, quia perditæ sint, vel exustæ, futurum est ut subveniri legatariis debeat. Idem est si suppressæ, vel occultatæ sint.* Memoria recolenda quæ supra diximus de tabulis aperiendis, sic enim statim totum Ulpiani responsum palam erit nempe testamentum scriptum, non vero nuncupativum aperiendum fuisse, quum heres noncupatus statim mortuo testatore, hereditatem adire posset, atque ita dies legati ab ipso mortis tempore cederet. Quid enim necesse erat testamentum illud aperire, quod utpote nuncupatum, sua natura apertum erat? Hinc idem Jureconsultus (b) scripsit: *Si quis fecerit testamen-*

X x 2

tuni,

(a) *L. si in duobus D. quemadmodum testam. aperian.*(b) *L. 12. D. eodem.*

tum, & exemplum, exemplo ejus quidem aperto, nondum apertum est testamentum, quod si authenticum patefactum est, totum apertum est. Quum igitur legatorum adeptio tota penderet ab apertura tabularum, perspicue proditur ratio, cur tabulis exustis, vel deperditis, scripserit Ulpianus noster æquitate duce, legatio alio modo consulendum.

Diximus Fiscum in coheredis, vel legatarii deficientis locum successisse. Num vero quemadmodum in omne jus deficientium succedebat, ita etiam eorum incomoda subibat? Dilucidius sane quæstio solvetur, exposita lege *mortuo bove D. de legatis* 2. quæ sic habet: *Mortuo bove, qui legatus est, neque corium, neque caro debetur*. Responsum hoc Pauli est ad *legem Juliam & Papiam*, quod quidem ridendum, nisi a causis suis repetatur. Quid enim ad legem nostram; *Mortuo bove, qui legatus est, neque corium, neque caro debetur*? Sane quum Fiscus in omne jus legatarii succederet, nempe ad commoda, & incomoda; ita eum in locum legatarii substitui tradiderunt Jurisperiti, ut quidquid legatarius acquireret, si vixisset, idem & Fisco petendi jus esset. Itaque quum aliquando, perempta re legata, legatarius quod ex ea superesset, consequeretur, idem pariter & Fiscus ei subrogatus habere poterat. Quo posito, quæsitum, an bove mortuo, caro, & corium Fisco deberetur. Et Paullus negans respondit, quum principali extincto ne accessorium quidem deberetur, quod est caro, & corium interempto bove, qui fuerat legatus. Hoc autem intellige, si antequam dies legati cederet, res legata sine heredis culpa perimeretur: legato enim postquam dies cederet, ac proinde post dominii adeptionem pereunte, quod reliquum est, legatarium ipsum sequitur: quia quod ex re mea superest, meum est. Sed quum insequens §. majori obscuritate laboret, par est ut ad lucem suam & is revocetur, nempe ut lex nostra clarius patefcat. Subdit Jurisconsultus: *Si Titio tessera frumentaria legata sit, & is decesserit, quidam putant extinguere legatum: sed hoc non est verum; nam cui tessera, vel militia legatur, æstimatio videtur legata*. Bartholus rem sic brevi expedit: *Legatum, cujus æstimatio debetur, ita ad heredem transmittitur, sicut quan-*

*quando res legata debetur*. Quamvis autem effatum hoc verum esse possit, non tamen ad rem est appositum: satis enim epigraphæ monet ad legem nostram id omne spectare. Verum quid ad legem Juliam, & Papiam disquisitio hæc? Num æstimatio legatario, ejusque heredi debetur, si res ipsa legata non valeat? Nimirum quum locum legatarii subiret Fiscus, eodemque modo, eo deficiente, hic succederet, quo heres, vel collegatarius; maxime intererat pernosse, an æstimatio legatario, si in vivis adhuc esset, deberetur, quum forte res ipsa legata ad eum non pertineret. Videamus autem quid sit legatum hoc tessera frumentariæ, quidque eo deficiente cadat in Fiscum. Tessera frumentariæ symbola quædam erant ex Principis liberalitate profecta, atque in vulgus jacta, quæ quantum frumenti ei, cujus in manum venissent, præstandum esset, præferret. Non ipsa tamen tessera legari poterat: beneficium enim Principis, uti illa erat, quum sit personale, alteri cedi, legarive nequit. Sed si forte legaretur, pecunia ad eam emendam legata intelligebatur, unde profecto legatarius æstimationem consequeretur. Ex quo fit, ut quum is capere eam non posset, Fiscus, qui locum ejusdem subibat, cuique jus erat id ipsum habendi, quod legatarius, si vixisset, habuisset, in æstimationem illam succederet. En tibi responsum Pauli undique patefactum, re ab origine sua repetita. Præter hæc addit Paullus in §. 3. heredem jussu fundum dare, cujus commercium is non habeat, in ejusdem æstimationem obligatum esse. Quod etiam ad Fiscum commodum redit, si ab hoc legato legatarius cadat. Quæ omnia huc recidunt, nempe ut doceamur, commoda omnia, & incommoda legatarii deficientis Fiscum subire.

Quæ huc usque de caducis diximus, illam caducorum speciem spectant, quæ herede, vel legatario ante apertas tabulas, vel antequam conditio impleretur, moriente, vel conditione eadem non confirmata, deficerent: reliquum modo est, ut pauca saltem de iis loquamur, a quibus & cœlebs cadebat. Cœlebs quidem solidum ex testamento alieno minime capere poterat; & orbus non nisi semissem. Verum facillime poenam hanc effugere poterant, si intra centum dies ab aper-

pertis tabulis, legi paruisſent. Hinc ſolebant ſæpe heredes inſtitui, modo mortuo teſtatore uxorem acciperent; liberosque haberent. Quod ſane paſſim in jure occurrit. Immo ut teſtatores legatariis ſuis magis caverent, formulas quaſdam excogitarunt Jurifconſulti, quibus adigerentur heredes ad iis amplius dandum, quanto minus per legem capi liceret. Ea præclarum hac de re reſponſum Ulpiani, quod miſere a Triboniano ad Falcidiam detractum (a): *Si in teſtamento ita ſcriptum ſit, heres meus Lucio Titio decem dare damnas eſto: & quanto quidem minus per legem (dele falcidiam a Triboniano intruſam) capere poterit, tanto amplius ei dare damnas eſto, ſententia teſtatoris ſtandum eſt.* Huc autem redit reſponſum hoc. Quidam quantum vellet, cœlibi, vel orbo relicturus, ne legatarius relicto deſtitueretur, adjecit, ut quantum Fiſcus per legem noſtram auferret, tantum heres eidem rependeret. Quæſtio hinc enata, an caduco a Fiſco erepto, heres ad tantumdem teneretur, & rurfus an Fiſcus id idem quod ſuppletum, ſibi repeteret. Ajebant ſane quidam in Fiſci gratiam. Sed contra reſpondit Ulpianus, voluntati teſtatoris ſtandum. Neque enim quis duplici poena puniendus: nec ſtatuta poena Fiſcus contentus, fortunas civium debet inhiare. Poterat etiam impune cœlibi legari, ſi tantumdem & is heredi daret. Quum enim hic nihil lucri legatario eſſet, nullus Fiſco locus proſecto dabatur. Sed non ne legatum hoc nullum, utpote utilitate omni carens? Minime vero, reſpondit ad legem noſtram Terentius Clemens (b): *Immo uberrimum (ait) videtur eſſe legatum: nam alias intereſt legatarii fundum potius habere, quam centum: ſæpe enim confines fundos etiam ſupra juſtam æſtimationem intereſt noſtra acquirere.* Hæc ad caducorum intelligentiam ſatis: videamus modo vacantia, & ereptitia, quibus etiam ærarium mire auſtabatur.

Bona ereptitia ſunt, quæ ab herede, vel legatariis, tamquam indignis, eripiuntur; atque hæc Fiſco acquirebantur, ſi a quibuſdam perſonis diſceſſeris, in quarum commodum eadem

(a) L. 64. D. ad l. Falcid.

(b) L. ſi cui fundus 54. de legat. 2.

dem cederent . Hæc autem in duplici differentia sunt: alia enim ab herede, vel legatario auferuntur ob contemptam testatoris voluntatem; alia vero ob delictum, quæ omnia quum palam omnibus, supervacaneum est in iis immorari . Quæ autem fuerint bona vacantia, satis ex lege nostra intelligimus. *Si ante aditam hereditatem, agnitumque legatum per damnationem, sinendi modo, vel per præceptionem relictum, heres, legatariusve jus suum omittat, repudietve; hereditas, legatumve, seu bona vacantia Populo vindicantur, neque heredibus deferuntur .* Itaque si ante apertas tabulas heres, vel legatarius decessisset, quæ bona testamento ad eos pertinuissent, caduca appellabantur . Sin vero ante aditam hereditatem, legatumve agnitum, vacantia . Sane hereditas non adita nec etiam transmittitur; si enim ubi nullum jus, ibi nulla transmissio est, heres quum ante aditionem nihil adquisiverit, quid est quod ad alios transmittere possit? Secus vero est in filio sub patria potestate existente: quum enim hic ipso jure, mortuo patre, heres sit, nulla aditione opus est, qua hereditatem adquirat . Hinc in toto corpore juris vulgatissimum illud: *In suis heredibus aditio non est necessaria, quia statim ipso jure heredes sunt .*

Igitur, ut ad rem redeam, vacantia bona illa erant, quæ, deficiente herede, ante aditam hereditatem, vel legatario ante legatum agnitum, Fisco cadebant . Sed vacantia existimabantur, si post mortem testatoris conditio, sub qua legatum erat, defecisset . Hinc advertas velim cur in jure Romano, maxime vero in titulo *de conditionibus, & demonstrationibus*, tam acriter disputatum, num legatum, vel institutio sit condicionalis, & conditio uni adjecta in altero repetita censeatur . Et quidem factum hoc ad ærarii potissimum commodum, nempe ut legata, hereditatesque facilius interciderent, quum stante conditione sæpe multa acciderent, quibus heres, legatariusve vel deficeret, vel incapax fieret . Qua de re commoda nunc mihi paratur differendi occasio, cur ad legatum adquirendum necesse fuerit ejusdem agnitio . Nolim autem id intelligas de legato per vindicationem concesso: hoc enim si purum esset, statim dies ab apertis tabulis cedebat. Quapropter

pter acquisita jam re legata, ad ipsius legatarii heredem actio eam consequendi transmittabatur. Sed non ita res se habebat ceteris in legatis, quod ut clarius pateat, res est ab origine sua arcessenda.

Lex duodecim tabularum quamvis amplissimam patri cuique familias potestatem legandi dedisset; attamen si testator rei dominium quiritarium non haberet, disponendi potestate excidebat: sic enim lex edixerat: *Pater familias uti legasset super familiae, pecuniae, tutela suae rei ita ius esto*. Ut autem res etiam eas, quæ vel nulla ratione in suo dominio, vel tantum in bonis, sive in dominio bonitatio erant, legare posset, quasdam legatorum peculiares formulas ex ingenio suo Jurisconsulti excogitarunt, quæ usu diuturno adeo religiose invaluerunt, ut, si testator vel minimum aberasset, legatum corrueret. Atque hæc sunt formulæ illæ legatorum omnibus quidem pernotæ, nempe per damnationem, sinendi modum, ac per præceptionem. Itaque per damnationem res etiam aliena legabatur, scilicet ut heres cogeretur eam a domino emere, vel ejusdem pretium nolente domino rem vendere legatario persolvere. Erant quippe hæc omnia Augusti ævo usu recepta. Sed jurisperiti, qui undique rationes conquirebant, quibus ærarium diceret, legata hujusmodi quamvis pure relicta, tacitæ tamen conditioni subiciebant, ut ita spes Fisco esset etiam apertis tabulis ea tamquam vacantia occupandi, si forte tacita conditio illiusmodi deficeret. Sic igitur rem ex ingenio suo adstruxerunt. Legato per damnationem relicto, legatarius actionem tantum personalem in heredem habet: quum vero actionem hanc non ante oriri affirmarent, quam legatarius declararet, se legatum agnoscere; nulla proinde agnitione facta, nulla actio exsurgebat, quæ ad heredes posset transmitti. Deficiente igitur ante legati agnitionem legatario, illud veluti vacans Fisco cedebat. Ex hoc sane lucem maximam feneratur illud Pauli affirmantis (a) *post diem legati cedentem, actio quæ inchoata non*

(a) *Lib. 3. recep. sentent. tit. 6. §. 3.*

*non est, ad heredem non transmittitur.* Idem fatum erat legati finendi modo relictī, quum utrique, heredi nempe, & legatario factum iungatur, illi ut finat, huic ut sumat: & quidem deficiente legatario, legatum corruebat. Etenim quum factum personale esset, adeo hoc personæ cohærere censebatur, ut ab ejus herede exerceri non posset. Demum quum præceptionis legatum coheredi relinqueretur, ab ipsa hereditatis aditione pendebat: quare hereditate non adita, legati dies cessisse non videbatur. Quid de legato per optionem? Licet & hoc per vindicationem relinqui posset, conditionem adhuc in eo intellexerunt, nempe si legatarius ipse optasset. Ex his vide, quanta fuerit Jurisconsultis cura, ut Fiscus modis omnibus adaugeretur. Nam his subtilitatibus inductis, multifariam legatarius deficere videbatur: sæpe enim alibi degens legatum ignorabat; plerumque ei potestas cum herede agendi non erat: atque ita legato non agnito, tamquam vacans Fisco cedebat.

#### §. IV. & U L T I M U S .

*De jure accrescendi, transmittendi, & de tacitis fideicommissis.*

**P**Luribus caducorum speciebus ad ærarii opulentiam effectis, non modo ea agi opus erat, quæ ad illos facerent, sed ea etiam intercidere, quæ iisdem adversabantur. Tale profecto erat jus accrescendi, transmittendique hereditatem, legatumve: quo sane nihil legibus caducariis infestius. Itaque ne Fiscus dulci caduco destitueretur, sic Augustus sanxit, ut concinnator Heineccius docet: *Ante apertas tabulas, aditamque hereditatem, inter conjunctos heredes, legatariosque jus accrescendi in iis, quæ caduca, vel in causa caduci sunt, excepto usufructu legato, ne esto?* Lex sane duodecim tabularum jusserat: *Si intestatus moriatur, cui suus heres nec escis, agnatus proximus familiam habeto.* Quibus ex verbis prudentes collegerunt, nullum prorsus legitimæ successionis locum fore, si quis testamentum condidisset: adversatur enim legitimo suc-

Y y

cef-

cessori expressa defuncti voluntas: quum ideo testetur, ut agnatis auferat bona illa, quæ lege ad eos redirent. Hinc orta est regula illa juris: *Neminem posse pro parte testatum, pro parte intestatum decedere: earumque rerum, testati puta, & intestati, naturaliter inter se pugnam esse.* Atque hæc ratio pura puta est, quapropter jus accrescendi inuictum, receptumque sit, ut invito adhuc pars vacans accresceret, ne scilicet testator pro parte testatus, pro parte vero intestatus decessisset videretur. Quod vero legata spectat, aliunde profecto idem jus derivarunt, nempe ex ipsa testatoris voluntate: quum qui duobus eamdem rem legat, id velit, ut nequaquam ea penes heredem maneat, sed ut, uno deficiente, totum alter consequatur. De his plura hic tradere supervacaneum existimo: fusc enim differendum mihi est, quum ad *legem unicam de caducis tollendis* oratio perrexerit. His prælibatis ad legem nostram accedamus.

Ait lex: *Si quis ante apertas tabulas, aditamque hereditatem decederet*, eam fore caducam. Locus ergo non erat juri accrescendi, si quis ex coheredibus ante apertas tabulas, aditamque hereditatem decessisset: quumque in jure regula ex oppositis deprompta, recepta sit, hinc evinci videtur, juri huic locum fore, si quis decesserit, quando alter ex coheredibus hereditatem jam crevit. Atque hic nodus est ille, qui adeo doctissimum Cujacium implicuit, ut ab eo se extricare prorsus nequiverit. Verum ut nos, quantum datum fuerit, rem intelligamus, tantum memoria recolendum, quod supra præmisimus, nempe tunc fuisse bona per legem nostram caduca, quum plures essent heredes: si enim unus, isque ante apertas tabulas, vel aditam hereditatem decessisset, nequaquam bona ad Fiscum cecidissent, sed ad legitimos potius rediissent. Cujus rei ratio, ut diximus, erat, tum ne Princeps legitimas hereditates appetere videretur, tum etiam ut vestigal hoc voluntarium haberetur: nam si illud coheres voluisset effugere, facile id sibi fuisset hereditatem cernendo. Quum igitur inter coheredes locum tantum teneat, patet ratio cur leges caducariæ, in herede ex asse vim suam amittentes, inter coheredes tantum vigeant, qui, postquam alter defecisset, he-  
re-



reditatem adibant: sibi enim tribuendum erat, quum confestim adeundo caduca eludere potuissent.

Integrum igitur, post leges caducarias, servatum est jus accrescendi, modo tamen pars hereditatis, vel legati vacaret, postquam alter adisset, vel agnovisset. En aperta Jurisperitorum responsa, quæ totum hoc dilucidius evincunt. Cælius sic scripsit (a): *Qui semel aliqua ex parte heres extiterit, is deficientium partes etiam invito excipit, id est tacite et deficientium partes, etiam invito, accrescunt.* Et Julianus (b): *Quum eadem res alteri pure, alteri sub conditione legatur, aut quum alter pure, alter sub conditione heres scriptus est, pars legati, vel hereditatis, deficiente conditione, accrescit etiam heredi ejus, cui pure legatum, vel hereditas data est, si tamen hereditas ejus adita fuerit.* Quamvis autem jus accrescendi omnino sublatum non sit, relictum tamen quam maxime est, atque inter arctissimos cancellos cohibitum, ut facillime caduca omnia fierent, Fiscique jura augerentur.

Sed quum legibus caducariis non minus jus accrescendi, quam illud transmittendi adversaretur, more suo Augustus, per subdolas quasdam ratiunculas, id etiam imminuere curavit. Itaque statutum est, ut legatorum dies non a tempore mortis testatoris ex veteri consuetudine, sed ab apertis tabulis cederet, si tamen legatum esset per vindicationem: nam si quid per damnationem, sinendique modum relinqueretur, agnitionis adhuc tempus expectandum erat, ne caducum diceretur, atque ad heredes transmitteretur. Recolas igitur quæ de his supra diximus, ut tibi præsto sit ratio, cur in ceteris legatis, excepto legato per vindicationem, id statuerit Augustus. Sed hic commoda mihi paratur occasio egregium illud Cæli responsum exponendi, in quod, tamquam in scopulum quemdam offendere visi sunt juris interpretes. *Quod Principi (ait ille (c)) relictum est, qui antequam dies legati cedat, ab hominibus ceptus est, ex constitutione D. Antonini successor ejus debetur.*

Y y 2

Sa-

(a) L. 53. §. 1. de acquir. vel omitten. hereditate.

(b) L. 26. §. 1. de condit.

(c) L. 56. D. de legatis 2.

Sane mireris optimum Principem se in hereditatibus, atque legatis acquirendis, a jure communi exemisse. Sed velim advertas Caji mentem minime fuisse, ut Princeps acquireret legatum, idque transmitteret, cujus dies non cessisset a morte testatoris, se vivo; quum nusquam id Principi, per totum, qua late patet juris corpus, concessum reperiatur. Verba enim illa *antequam dies legati cedat*, intelligenda sunt de jure novo per legem nostram inducto, hoc est legati diem non nisi apertis tabulis cedere. Ab hoc igitur jure Princeps liber declaratus fuit: quod sane invisum minime videri poterat: nam si liberis parentibus, aliisque, quibus liberorum jus datum erat, jus accrescendi ex antiquo more, remoto Fisco, salvum erat, cur idem Principi negandum? Acerbum igitur videri non debet, si, qua ceteri inter cives fruebantur, immunitas a legibus caducariis data fuerit, ex jure vetusto, Principibus.

Jam satis de legibus caducariis. Sed antequam finem imponamus, quædam insuper advertenda sunt, ut magis magisque Augusti solertiam pernoscamus. Quum vulgata lege paratæ sint fraudes ad eam evitandam, atque undequaque homines conjurent, ut per transversos saltem cuniculos illudant; hinc omnium primo tacita fideicommissa inventa sunt, ut bona deferrentur iis, qui jure capere non poterant. Sed cur per tacitum fideicommissum, quum non minus tacite, quam aperte fidei sic committendo in legem peccaretur? nempe quod si quis palam rogatus promississet, se restitutum incapaci, fideicommissum quidem concideret, & quamvis ærario non cederet, in hereditate tamen subsidebat, vel apud eum, a quo relictum fuerat, permanebat.

Mos etiam inductus incapacibus causa mortis dandi ea, quæ jure capere per heredis institutionem, legatum, vel fideicommissum non poterant. Qua sane de causa istiusmodi donationes passim legatis comparatas legimus, ut intelligeremus iis, quibus legari non poterat, ne donandi quidem causa mortis jus esse. Solemne etiam fuit, ut per interpositas personas legi fraus crearetur, scilicet non ipsi incapaci, sed alius ejus potestati subjectis relinquendo, nempe filiis, nepotibus, aliis.

aliisque. Quapropter Paullus Fisci commodis cum ceteris studens, clamavit regulam juris esse (a). *Cepisse quis intelligitur, quamvis alii acquisivis*. Sed præ his subtilissima erat ars illa, qua testatores servos incapacium instituebant, sub conditione libertatis. Quamvis enim dominum incapacem nec per servum capere posse, haud ignorarent; sic tamen rem componebant, ut dominus servum heredem ante aditionem hereditatis manumitteret, atque ab eo hereditatem illam sibi, tamquam pretium manumissionis, clam stipularetur. Ita enim duo se consequuturos sperabant, & ne Fisco locus esset, quum manumissus hereditatem capere videretur, & ut dominus id lucri assequeretur, tamquam pretium manumissionis. Sed nihil actum censebatur, si fraus ista, subdola licet, excogitata pelluceret. Nam Terentius Clemens respondit, *Servum ad hereditatem admitti, si nihil in fraudem legis factum esset*, l. 82. de acquirenda hereditate. Ceterum nolim inter has fraudes enumerare cautiones illas, quas jurisperiti per substitutiones, aliasque vias excogitarunt, ut incapax capere posset, neu bona tamquam caduca, vel vacantia Fiscus occuparet: odiosa quippe lex caducaria habebatur, nec proinde interpretatione juvanda, de quo sane insigne prostat exemplum apud Paullum in l. 29. de liberatione legata.

Verum ingeniose Augustus, technis his omnibus occurrens, sanctione generali cavit, *ne quis in fraudem harum legum, quo magis caduca, & ereptitia is, qui capere non potest, capiat, quidquam admittere velit*. Qua profecto verborum comprehensione omnis fraus prohibetur, ne Fiscus callidis machinationibus eludatur. Ut autem cuncta in aperto essent, neve silentio caduca delitescerent, ingentium præmiorum spe allecti sunt delatores, qui quoquo versus discurrentes omnia conquirerent, latentisque hominum fraudes scrutarentur. Atque adeo sedulo res gesta est, ut nullius domus ab horum interpretationibus libera fuerit, quin in laqueum legis incideret. *Sane omnem domum* (scripsit Tacitus) *delatorum interpretationibus subversam*. . . . & acriora ex eo vincula indivi custodes,

⊕

(a) L. 140. de verb. signif.

¶ *lege Papia Poppæ præmiis induciti, ut si a privilegiis parentum cessaretur, veluti parens omnium Populus vacantia teneret.* Verum quam ex caducis partem delatores sibi caperent, adhuc sub iudice lis est. Sub Nerone quartam accepisse Tranquillus prodit, antea vero mediam tanquam verosimile viris doctis probatur. Quum enim in jure partis nomen passim mediam rei partem complectatur, compertumque sit eos ante Neronem partem accepisse, evinci hinc facile potest, media caduca delatoribus cecisse.

Quum igitur delatorum turba præmiorum spe ad bona Fisco quæsitâ nuncianda inducerentur, mirum quot quantasque calumnias sine discrimine omnibus inferrent. Adeo sane delationis malum percrebuit, ut istiusmodi homines quasi grassatores, & latrones non solitudinem, non iter, sed templa omnia, & fora impeterent, nullaue jam testamenta secura, nullius status certus, non orbitas, non liberi prodesse. Sed quemadmodum sub malis Principibus perniciēs hæc publica misere grassatur, sic sub bono Principe modis omnibus impeditur, ne in intemperiem suam erumpat. Quapropter ad frenum delationibus injiciendum multa quidem sub optimis Principibus statuta sunt. Et vero ad coercendum delatorum numerum imperatum est, ut deferre minime posset, cui & accusandi jus non esset; deinde ne delatores præmium acciperent, nisi delationes suas probassent; immo si iudicio non vicissent, tanta poena afficerentur, quanto Principis ingenio delationes forent magis minusve invisæ. Sane sub Nerva, Tito, Trajano severissime in illos sævitum est, ut poenarum metu deterrita pessima hæc hominum colluvies calumniis abstineret. Sed omnium pulcherrimum Trajani fuit consilium, ut quivis scilicet seipse posset deferre, sibiue in delationis præmium caducorum medietatem acciperet. His omnibus puto unum adjiciendum, Fiscum bona hæc caduca, atque vacantia cum suis oneribus occupasse. Quum enim in locum coheredis, vel legatarii succederet, eorundem commoda præripiendo, par æquumque erat, ut & onera subigeret. Atque hæc satis ad absolutam præclarissimæ legis intelligentiam: in qua tamen plus æquo immorati sumus, certe equidem, lector hu-

humanissime, proflixa interpretatio uberrima rerum utilitate compensabitur. Nam vestigia legis hujus, quamvis per Justinianum abrogata, adeo per totum jus impressa adhuc manent, licet ad alienas sæpe res detorta, ut jus nostrum in maximam partem in obscuro lateat, nisi ad hæc principia maxime referatur.

## C A P U T X.

*Ad legem Juliam Majestatis.*

JAM ad leges poenales, earumque rationes, Octaviano Augusto imperante, inspiciendas oratio mea pervenit. Quum enim hætenus leges explanaverim, quibus præcepta bene vivendi tradidit, rerum ordo postulat, ut leges nunc poenales referam, quarum metu homines deterriti in officio continerentur. Et vero id est corrupti hominis ingenium, ut bonum plerumque minime sequatur, vel a malo abhorreat, nisi si alterius boni spe erigatur, vel metu majoris mali deterreatur. Infirmæ profecto, imperfectæque leges, quæ præmiis, poenisque suis destituuntur, quum utraque hæc, veluti firma propugnacula, jura omnia fulciant. Sed quum de ratione poenarum secundum jus naturæ, & gentium superiori libro multa quidem scitu perdigna, nec fortasse pervulgata congesserimus, optimum nunc factu duximus, de iisdem ex rationibus a jure civili arcessitis, differere, simulque exponere, qua de causa in unum crimen aliæ ab aliis gentibus poenæ, & sæpe variæ ab eodem Populo inflictæ sint, quum ceteroqui gentes omnes bene institutæ crimina punienda fateantur.

Sane in ratione poenarum id ipsum usuvenit, quod in reliquo civili jure contigit. Quemadmodum enim legislatores omnes, licet id unum in communi velint, ut naturalis justitiæ facta recta sit, in mediis tamen deligendis, per quæ illam cives assequantur, passim differunt: nam ex civium more, ex loco, atque ex tempore, ex forma publici regiminis, ex variis philosophorum sententiis rem ita moderantur, ut juri naturæ non sine maxima prudentia modo detrahant, modo

do addant : unde profecto jus civile efficit ait Ulpianus ; ita in criminibus puniendis eo modo sese gerunt , ut poenarum civium moribus , formae regiminis , tempori , loci naturae , philosophorum rationibus respondentes in id unum conveniant , ut universalis justitia humana malitia depravata reparetur . Hæc igitur sunt in causa , quapropter poenarum sanctio alia , atque alia sit , quum diversis ex rationibus a jure civili infligantur ; omnes tamen ut universali justitiae locus detur , quæ undique clamat maleficia punienda : quod quidem ut magis in propatulo sit , rem exemplo aperiamus .

Quæ crimina vel minuunt , vel augent , sunt persona , res , locus , tempus , modus , & qualitas : adjuncta enim hæc sunt , quæ hominum dolum , & malitiam magis , minusve produnt ; atque ita poenarum etiam rationem vel adaugent , vel remittunt . Idem sæpe adjunctum gravius , levius pro varia populorum ratiocinatione censetur . Sane furta domestica inter Romanos leviora existimabantur , ut morte naturali digna numquam putarent . Nunquam enim , aiebant , domo efferes , quæ intra domesticos parietes possis coercere . Quænam isthæc inhumanitas hominem eodem tecto , eademque mensa utentem , a foco tuo , tamquam ab ara abstractum , crudelissime morti obiicere ? Qui paullo ante iisdem , ac tu , sacris utebatur , eosdem lares colebat , eum nunc cernes in infelici arbore suspensum , vulturum , atque corvorum prædam ? Contra vero alii in domestica istiusmodi maleficia adeo invehebantur , ut morte ipsa fontes plecterent . Non ne majori poena dignus , qui arctiori juris vinculo nobis obstringitur ? Fur de trivio nullo nobis jure , nisi illo communi , per quod suum cuique tribuendum , obligatur : at eum , quem tecti , focique consortione dignati sumus , profecto sanctius devincit conturbenii hæc necessitudo , per quam in omnibus eum nobiscum conjurare quis neget ? Ad hæc qui nobis confisus se suæque bona concredit , nonne æquum est , ut summi officii rationes expectet ? Nonne per domesticum furtum sancta hospitii jura offenduntur , quæ religiose servari mortalium omnium maxime opere interest ? Nonne ea crimina majori poena plectenda , a quibus difficilius cavemus ? Alienis quippe cautius occurrimus

mus infidiis, domesticas vero quis vel solertissimus eludet, nisi leges poenarum magnitudine impiorum cupiditates frenent? Demum quo major delinquendi copia, eo severius crimina coercenda. Ecceinam magis obvia sunt furta, quam domestico homini, qui penitiora domus novit, cujusque fide res nostrae commendantur? Videtis hinc qui fiat, ut certum scelus aliter alibi puniatur.

Sed plerumque mitior, vel acerbior poena est ex ipso Populorum ingenio, quod aliter in alia vitia vehementius, vel placatius effertur. In quo sane quem praeterit, quanta sit coeli, regionisque vis & potestas? Hinc profecto aliae aliis proniores sunt ad virtutem aliquam, vitiumque gentes. Ita Legatus ille Rhodius in Senatu Romano apud Livium (a): *Gentes aliae iracundae, aliae audaces, quaedam timidae, in vinum, in venerem proniores aliae sunt: Atheniensium Populum fama est celerem, & supra vires audacem ad conandum, Lacedaemoniorum cunctatorem: non negaverim totam Asiae regionem inaniora parere ingenia, & nostrorum tumidiorem sermonem esse. Et Cicero de Carthaginensibus: Carthaginenses fraudulentis, & mendaces non genere, sed natura loci, quod propter portus suos multis mercatorum sermonibus ad studium fallendi studio quaestus vocabantur. Ligures montani, duri, & agrestes: docuit ager ipse nihil ferendo, nisi multa cultura, & magno labore quaesitum. Campani superbi bonitate agrorum, & fructuum magnitudine, Urbis salubritate, descriptione, pulchritudine.*

Ex quibus videas quantum loci indoles in hominum mores influat. Non ne experientia cernimus ventosa loca effratiores, ac mobiliiores homines parere; quieta vero humaniores, & constantiores? Cujus quidem ratio est, quod tranquilla mens ibi esse non potest, ubi nimia est corporis agitatio. Sic compertum est, Thraciam, Galliam, Britanniam, aliasque regiones, quae ventorum impetu magis agitari dicuntur, ferociores alere gentes, quam ubi coelum quietius est, ut de Assyria scribunt, Asia minori, atque Italia. Quid?

Z z

non

(a) Lib. 45.

non ne ipsa regionis sterilitas ; aut fertilitas animorum in eodem Cæli , ac terrarum tractu dissimilitudinem progignit? Etenim Livius scripsit (a) nationes in uberrimo solo molles, & effeminatas esse . Contra loci sterilitas homines solertiores, atque temperatiores in lucem edere solet : nam duros exantlare labores , diu , noctuque anniti , atque omnium artium genere victum sibi querere ipsa loci sterilitas cogit , ut de Atheniensibus memoriæ proditum est , quos labori deditos , temperantes , acutioris ingenii fuisse ob soli infelicitatem , novimus .

Ex quibus omnibus docemur , undenam passim tanta apud gentes varietas sit de eodem crimine poenarum . Quum enim alii ad alia vitia procliviores sint , poenæ quoque , quæ ab iis infliguntur , differre aliquantulum debent . Nolim tamen hinc putes hanc soli indolem , vel cæli temperiem ea vi in vitium pollere , ut aliquam necessitatem injiciat : in tantum enim liberum hominis arbitrium , Divina tamen ope adjutum , atque reparatum est , ut labem omnem , si velit , effugere possit , virtutisque studere : nam secus neque poenæ , neque proemio locus esset . Siquidem cur eum infesteris , qui male agit , non quod velit , sed quia loci ingenium , cæli temperies , vel aliud impediatur , quominus bene faciat , & malum , etiamsi velit , vitet? Demum poenæ etiam formæ civilis regiminis aptantur . Patet enim omnibus has in Democratia esse leviores , quam in Monarchia : quum enim , ubi democraticè vivitur , ab ipsis civibus in communi leges perferantur , ne mireris mitius animadverti , si qui poenis obnoxii sunt , iidem sint , ac qui leges poenales condiderunt .

Hactenus de poenis universim : sed quoniam de regimine Monarchico mihi instituitur sermo , in iis potius immorari , quæ huic Reipublicæ formæ conveniunt , puto . Quum Augustus in vetustatis simulatione mire delitesceret , nec aliquid novè in Monarchia sua præferret ; in poenis etiam faciendis ita se gessit , ut in speciem leviores , quales antea fuerant , viderentur , quamvis revera graviores essent : graviores inquam , quum ut morum disciplina tunc temporis jam

col.

(a) *Lib. 45.*



collapsa restitueretur, tum etiam ut ab recenti Monarchiæ invidia sibi caveret. Sed operæ pretium est videre, quam viam ad punienda crimina sapientissimi illi viri, Mæcnas nempe, & Agrippa proposuerint sectandam. Quamobrem quum plerumque a male feriatis hominibus, quique recta institutione destituti sunt, peccetur, consultius sane est liberalem educationem ante omnia curare, & desidiam molliemque prohibere, quam peccantes deinde poenis corrigere. Hoc profecto salubre fuit consilium, quod Agrippa Principi nostro tradidit. *Optimi ac egregii Principis est, non modo ipse ut omnia ex officio agat, verum ut qua ratione etiam reliqui omnes quam optimi fiant, prospiciet. Id autem tu ita præstabis, si non permittas omnia eos ex libito agere, ac deinde delinquentes corrigas; sed si priusquam peccaverint quicquam, omnia eos doceas, quæ exercentes & tibi, & sibi ipsis majori sint usui; omnemque omnibus occasionem propter divitias, nobilitatem, aut aliam quamcumque præstantiam, vitæ per desidiam, molliem, aut prava studia ducendæ præcidas.*

Quo sane monito quid præstantius, aut utilius? Hoc enim interest inter optimum Principem, & tyrannum, quod ille id maxime curet, ne cives in vitia dilabantur, vel recta institutione eos formando, vel poenarum metu continendo; contra vero tyranni peccata etiam graviora, sub intempestivæ lenitatis fuculo ultro dissimulent, immo & consulto foveant, si qui forte deinde in invidiam incidant, perdendi causam in promptu habeant, submissis accusatoribus, qui crimen in oblivione jacens opportune suscitent. Quamobrem non insulse vulgo traditum, tyranni leges utiles non esse, nisi quum violantur, & negliguntur: ut non mirum sit, si eas non educatione in pectoribus hominum, sed tantum in voluminibus atramento curent imprimendas, quo seminarium fiant poenarum legislatorum libidini servientium.

Verum quum adeo sit mortalium natura depravata, ut vel liberalis aliquando institutio ad amolienda scelera satis non sit; tunc sane ad poenarum vim deveniendum est, ut malo suo experiantur improbi homines, quam miserum sit peccare. Sed poenæ modus statuendus est, ut neque gravior,

neque levior sit patrato crimine: debet enim adeo temperari, ut per quoddam veluti æquilibrium, medicina salubris fiat, qua animi vitia curentur. Si enim plus æquo rigidior, potius improbus ad insperatæ salutis periculum abducitur; si vero levior; satius ducit legem offendere, quam metu poenæ a vitiorum illecebris averti. Humanitas autem, & æquitas in plectendis criminibus potissimum spectari debet, ut homines facilius ad frugem revocentur. Sic profecto sapientissimus ille monebat Augustum: *Nam natura multos homines eo rapit, ut contra leges delinquant: quæ si quis accurate persequi omnia velit, aut neminem, aut per paucos impunitos relinquat: sin humanior æquitatem iuri misceat, forassis eos emendet. Len enim quamquam necessario pœnas graves statuit, tamen naturam coercere non semper potest. Ceterum homines quidam quum occulta esse sua peccata putent, aut saltem mediocriter verbis castigantur, vitam emendant; partim quod metuunt, ne manifesti delictorum fiant, partim denuo peccare veriti: iidem palam factis vitiis suis, pudore projecto, aut immodice puniri omnia iura confundunt, ac conculcant, solisque natura impetibus serviunt? Quamobrem neque facile est omnes peccantes punire, neque decorum eos, qui aperte libidine mala feruntur, negligere. His prælibatis ad rem veniamus.*

## §. I.

*Quibus, & adversus quos, & ob quas res iudicium  
Majestatis competat.*

**H**Æc, quæ hucusque, carptim licet, de poenis infligendis edisseruimus, faculæ veluti quædam erunt, quæ rebus dicendis prælucebunt: descendamus nunc ad crimina ipsa, quorum factus est ultor Augustus. Quoniam autem illud, quo Principis, vel Reipublicæ majestas læditur, longe ceteris magnitudine præcedit, de eo primum sermonem instituere constitui. Sed hic quum Pragmatici nostri sive quodam intempestivæ lenitatis fuco, sive historiæ, rerumque publicarum ignorance multa quidem a vero aliena nobis obtruserunt, falsa

sa ante omnia a veris secernere curæ mihi erit, quibusque de causis lapsi sint, aperire. Majestas igitur, auctore Festo, a magnitudine dicta, nihil aliud est, quam cujusque rei dignitas atque amplitudo. Tribuitur ea non solum Principi, sed Senatui, & Magistratibus; unde intelligimus illud Auctoris ad *Herennium lib. 2. Majestatem minuit, qui ea tollit, ex quibus rebus Civitatis amplitudo constat; velut suffragia Populi, & Magistratus consilium.*

Itaque Majestas est summa in subditos, legibusque soluta potestas. Quare imperandi conditionem eam dixit esse Tacitus, *ut non aliter ratio constet, quam si uni reddatur.* Quumque potestas hæc non solum Principis esse possit, sed & Optimatum, & Populi, prout penes hos, vel illos summa Reipublicæ sit, inde fit, ut is in Majestatem offendat, qui dignitatem eorum læserit, vel minuerit, penes quos summa rerum est. Caveas autem credas hac tantum dignitate potiri, qui late imperant, eademque carere eos, quorum imperium angustius sit: non enim ex imperii latitudine, sed ex ipsa vi imperandi dignitatem hanc metimur, ita ut in illo ea infideat, qui ita imperat, ut superiorem nullum, præter Deum ipsum rerum omnium moderatorem, & arbitrum, agnoscat. Sed quæstio hinc exurgit, nec fane futilis, an foederati, & qui alterius majestatem venerari tenentur, dignitate hac præfulgeant. Hac quidem in re certa ab incertis separanda sunt: etenim vel foedus iniquum est, ut alterius quis ditioni subdatur, quemadmodum erant Populi dedititii apud Romanos, sive ii, quibus imperandi quid jus esset; & quidem hi quum integra potestate careant, Majestatis jure destituuntur: vel foedus est æquum, ut inter eos, qui summo imperio pollent, absolutaque in legibus suis potestate fruuntur, sed quibus unum impositum est, ut alterius Majestatem venerentur, ut de Carthaginensibus proditum est, de quibus scripsit Polybius: *Patres concessisse libertatem (a), leges suas, & agrum insuper omnem, & omnium aliorum bonorum possessionem, quæ ad Rempublicam, aut ad privatos pertinerent.*

Et

(a) *Fragment. 142.*

Et hic digladiantur inter se viri eruditi . Sed quam vis præclaro viro , & nunquam satis laudando Antonio de Mattheis visum horum majestatem minui , quum alterius imperio aliqua saltem ratione subjiciantur ; puto tamen ego , & his præcellam hanc amplitudinem denegandam non esse . Si enim eorum leges , & constitutiones tales sunt , ut infirmari a nemine possint , neque ab his alteri provocatio ulla datur , non est profecto cur Majestatis jura imminuta censeamus .

Sed videamus modo quinam ii sint , quibus Majestatis crimen moveri possit . Sane si Majestas est absoluta imperandi potestas , evincitur , eos Majestatis reos agi , qui summam illius amplitudinem offendunt , cui subiiciuntur . Quumque duplici quis ratione alteri subdi possit , natura nempe , & jure , utrumque profecto poena Majestatis teneri affirmandum est . Natura subditi sunt , qui ut tales nascuntur , jure , qui Civitatis communione gaudent . Sed inter istos allectos Cives minime eos enumerem , quibus honoris causa Civitas communicata : absurdum enim est , hos poena hac teneri , si in amplitudinem Civitatis deliquerint . Quibus Civitas ad honorem datur , hi ejus imperio non subjiciuntur . Itaque ubi subjectio abest , & Majestatis poena abesse debet . Verum inter subditos recensendi etiam sunt , qui intra Civitatis fines domicilium contulerint , eoque , tamquam in sedem suam , sese receperint . Hoc enim ipso , quo domicilium , & sedem suam alibi collocaverint , ejus etiam Civitatis imperio se subjecisse intelliguntur . Quod quum advenæ non fecerint ; non ut Majestatis rei , sed tamquam hostes , si quid tale commiserint , puniendi sunt . Sed quid de Vassallis , sive feuda tenentibus ? Poterunt ne , si quid in dominum peccaverint , ut rei majestatis peragi ? Distinctione quadam & hic opus est : si enim domino feudi subjecti eum offenderint , in Majestatis poenam incident ; secus vero , minime . Explorati enim juris est , feudum utroque modo dari , concedique posse . Atque hæc de personis , quibus , & contra quas Majestatis judicium competat . Quibus autem modis Majestas lædatur nunc inspiciendum . *Majestatis crimen* ( inquit Ulpianus (a) ) *illud est , quod ad-*

ver-

(a) L. 1. ad l. Juliam Majest.

*versus Populum Romanum, vel adversus securitatem ejus committitur: quo tenetur is, cujus opera, dolo malo, consilium initum erit, quo obsides injussu Principis interciderent; quo armati homines cum telis, lapidibusque in Urbe sint; convenient-ve adversus Rempublicam; locave occupentur, vel templa; quo-ve cætus conventusque fiat, hominesve ad seditionem convocentur; cujusve opera, consilio, dolo malo consilium initum erit, quo quis Magistratus Populi Romani, quive imperium, potestatemque habet, occidatur; quo-ve quis contra Rempublicam arma ferat; quive hostibus Populi Romani nuncium, litterasque miserit, signumve dederit, feceritque dolo malo, quo hostes Populi Romani consilio juventur adversus Rempublicam; quive milites sollicitaverit, concitaveritve quo seditio, tumultusve adversus Rempub. fiat.*

Hæ sunt læsæ Majestatis species graviores quidem, quum adhuc, leviores licet, supersint; veluti si quis Imperatori maledixerit, vel ejus statuas jam consecratas conflaverit, aliudve hujusmodi admiserit. Ceterum Civitatis imperio translato ad Principem, si quis, quæ de Civitate dicta sunt, in Principes commiserit, reus majestatis erit. Itaque, ut uno verbo rem absolvam, qui Principis Majestatem ausus fuerit evertere, vel minuere, partem eorum usurpando, quæ ad Majestatem pertinent, criminis hujus reus agetur. Sed hic nescio qua mente Hotomannus scripserit, legis Juliæ Majestatis reos esse, qui partem Reipublicæ turbare conati fuerint, quum qui totam labefactare tentaverint, ii perduelles sint: etenim respuitur id discriminis ab ipso Ulpiano, qui haud secus scripsit lege Julia Majestatis teneri eos, qui Reipublicæ partem, ac qui integram evertere ausi fuerint. Risu vero dignum, quod docet Bartolus, per securitatem Populi Romani intelligendam fidem publicam, sive salvum conductum; quum hæc securitas nihil aliud sit, quam Reipublicæ tranquillitas. Quam quidem securitatem ille obturbat, qui hostili animo adversus Rempublicam, vel Principes animatus est, qui nefariam iniit cum hostibus societatem, qui hostium duces, accepto pretio, aut dimisit, aut occultavit, quum id ipsum hostile sit, & abominandum; qui exercitum contra Reipublicæ, vel

vel Principis jussa retinet, neque successori tradit; qui Imperii secretum hosti prodit; quique demum consilio, vel ope hostes juvat, perduellis erit, ac læsæ Majestatis nomine tenebitur. Ecce tibi enumeratas fere omnes criminis hujus species: reliquum tamen est, ut aliquantulum in earum expositione immoremur. Sed initium a seditione, per quam periculosius quies publica turbatur, faciemus.

Est seditio Civium dissentio, quod seorsim cum aliis ad alios, sive coetus, & turba Civium, ut publicam tranquillitatem intervertant. Sed coetus istiusmodi, ut turba dici possit, decem saltem, vel quindecim hominibus constare debet. Jam vero si in unum conveniant vel quindecim, & telis lapidibusque sese adversus Rempublicam, vel Principem instruant, rei quidem Majestatis erunt. Sed quum Ulpianus subdat in Urbe sint, hinc data quibusdam imperitis cavillandi occasio, ut effutierint seditionem eam legis nostræ poena puniri, quæ in Urbē fiat, minime vero si in Provincia. Sed absit hæc importunæ lenitatis interpretatio. Non ne pariter in Provincia, atque in Urbe Principis Majestas, Populique securitas invadi poterit? Itaque ubivis seditio excitatur, poena legis Juliæ plectetur. Erit tamen sediciosus homo perduellis, modo Principem offendat: si enim in privatos irruat, vim intulisse censebitur. Num autem una erit perduellium omnium poena? Sane quidem quum in maleficiis dolus maxime peccantium spectetur, quo profecto alio alii homines delinquant, non in eandem omnes poenam ineidisse putandum est. Certe auctores seditionum ceteris acerbius plecti debent, quum tantus non censeatur dolus in his, quantus eorum est, a quibus incitantur. *Multitudo* (dicebat Scipio) (a) *omnis, sicut natura maris, per se immobilis est: ut venti, & aura ciant, aut tranquilli, aut procellosi: & causa in vobis, atque origo omnis furoris penes auctores est, vos contagione insanistis. Quin mihi ne hodie quidem scire videmini, quo amentia progressi sitis. Quid facinoris in me, quid in Patriam, parentesque, ac liberos vestros, quid in Deos sacramenti testes, quid adversus*

au-

(a) Livius lib. 28. cap. 27.

*auspicia, sub quibus militastis, quid adversus morem militia, disciplinamque majorum, quid adversus summi Imperii Majestatem ausi sitis. Æquum igitur est, ut in seditionibus aliter auctor, aliter ii, qui ab eo incitati sunt, puniantur, quando Populus mare est sua natura tranquillum, & tunc intumescit, quum a pravis concitatoribus, tamquam furiosis turbinibus, sollicitatur.*

Secunda hujus criminis species est, si quis dolo malo consilium ineat Populi Romani Magistratus occidendi, qui imperium, potestatemque habet, ut docet Ulpianus. Ex quo falsa evincitur eorum opinio, qui eum perduellem tantum esse, qui in Principem irruit, nequaquam vero si aggressus fuerit Magistratum, autumant. Sane si perduellis est, qui securitatem Reipublicæ interturbat, eodem nomine notandus est, qui ejusdem magistratus interemerit; quum & ad publicam securitatem faciat administrorum vitam ab insidiis tutam servari. Sed nolim intelligas hoc & de quocumque gregario milite: recte enim tradit Jurisconsultus perduellem esse, qui eum magistratum occiderit, cui imperium sit, potestasque. Qua de causa Seneca *controvers. v.* scripsit: *Non ages mecum Reipub. laesa, si Atheniensem Senatorem occidero, sed cadis.* Hinc merito ridendi sunt ex Pragmaticorum face illi, qui jactarunt ex Constitut. Arcadii solum perduelles esse, qui manus Imperatori impias intulerint; numquam vero si ceteros Principes occiderint, quum de uno Imperatore Romano Arcadius loquutus sit. Num enim huic divinare licuit, Orbem Romanum tot in dynastias discerpsum iri? Ceterum si Constitutio Arcadii illos etiam perduellionis incusat, qui Principis consiliarios occideret, cur & alios non censeret eadem poena plectendos, qui Reges suos offenderent? Sed his nugis omissis, utiliora percurramus.

Perduellis etiam est, qui arma contra Rempub. fert, amicosque Reipub. sollicitat, ut hostes Populi Romani fiant. Quid enim tam hostile, quam Patriæ hostem armis, telisque instruere, aut qui amicus erat, impellere, ut hostis Romani nominis fiat? Neque ab hoc crimine alienus est, qui Reipublicæ arcana prodidit, ut inde hostes juventur, sive nuntium,

litterasque misit, signumque dedit, ut hostibus ferret opem. Sed quum Ulpian. hic generali loquutione usus fuerit, ut innueret perduellem esse, quisquis Reipublicæ arcana hostili animo vulgasset; nescio cur Pragmaticis quibusdam arriserit inanis illa distinctio inter Principis Consiliarios, ac ceteros, hosque lege Julia majestatis teneri, illos vero perduelles esse: quum discrimen hoc longe ab hujus Jurisconsulti mente abhorreat: non est enim lenitas obtrudenda, ubi lex manifesto resistit, aut publica salus, quæ suprema lex est, aliud postulat. Nonne qui secreta Principis prodit, id facit, ut vel hostes, vel cives ad res novas excitentur? Hinc sane Mathematici, atque ii, qui illos de morte Principis consulebant, capite puniebantur: nam istis confectis vaticinationibus cives, aliique impellebantur ad res novas, ac ad quietem publicam pessime interturbandam. Apte ad id quadrat illud Tertulliani, sic scribentis adversus gentes: *Cui opus est perscrutari super Caesaris salute, nisi a quo aliquid adversus illam cogitatur, vel optatur, aut post illam speratur, & suscinetur? Non enim ea mente de earis consulitur, quam de dominis. Aliter curiosa est sollicitudo sanguinis, aliter servitus.*

Sed quum etiam pertineat ad securitatem Reipublicæ, exercitum non esse sine Duce, neque Ducem sine exercitu; merito adjicitur lege Majestatis teneri, *qui exercitum deseruit, vel privatus ad hostes perfugit*. Quod respondit Ulpianus de privato, idem profecto & de milite gregario sentiendum: non enim satis ad perduellionis crimen videtur, militis desertio, nisi idem ad hostes quoque perfugerit: secus autem, vel morte multatur, vel militiam tantum mutare jubetur l. 3. 4. & 5. *de re militari*, quemadmodum æquitas Judici suadebit, qui gravius, vel mitius ad coercenda crimina debet affurgere, prout magis minusque publica salus periclitata sit. Quid vero dicendum, si *quis in bello cesserit, aut arcem non tenuerit, aut castra concesserit*? Eum profecto Marcianus l. 3. *eadem* respondit perduellem esse. Sed hæc sententia non sine æquitate temperanda est: sicuti enim lenitas minime probanda in legibus poenalibus, & forte a mente, & a verbis ipsius legis aliena sit; ita earundem severitas ultra naturalem ratio-



tionem in publicæ utilitatis speciem exasperanda non est . Expedi enim nocentem potius absolvere , quam innocentem damnare . Itaque si dolo quis in bello cedat , aut castra concedat , perduellem audire haud abnuo : sed si ignavia id , & formidine fiat , dignus nimirum non est , ut tam turpis nota ei inuratur , quum lex ipsa perduellem definiat , *qui hostili animo adversus Rempublicam animatus sit* . Et licet ignavia , metusque doli omnis expers non videatur , quum meticulosum hominem adhuc non lateat , mortem potius pro patria appetendam , quam ejus periculo vitam servandam ; ea tamen est hominis imbecillitas , quæ sæpe nulla virtute sustineri possit . Superfunt & aliæ bene multæ perduellionis species , quas quum interpretatione nostra minus egeant , libenter mittimus , ad illos tantum properantes , qui opem hostibus præbentes , eos armis , pecunia , commeatu , aliisque rebus juvant . Sat enim prodit animum in nos infestum , qui hostibus nostris indulgendo , iisdem fert suppetias .

Sed quum hac in re non secus , ac in ceteris criminibus dolus potissimum spectandus sit , qui profecto pro adjunctorum ratione dijudicandus est ; res propterea , quæ subvehuntur , personæ , quæ suppeditant , quibus subvenitur , causa demum , quapropter opes hostibus feruntur , ad trutinam expendenda sunt . Hæc enim maxime faciunt , ut an fuerit dolus , qualisve dolus , aperte dignoscatur . Nemo autem neget perduellem esse , qui pecuniam , arma , tela , equos sciens dolo malo hosti præbeat . Contra vero parcendum ei est , qui vi , metuque coactus , ut incendia , & agrorum populationem redimeret , hæc eadem fecerit . Quid si mercator , majoris fœnoris spe , pecuniam hosti præbuerit ? Artis ne suæ professio , quum directe Rempublicam offendere noluerit , criminis pœna eximet ? Minime gentium . Nam quamquam in ceteris omnibus scrutari liceat , quo animo quid patratum sit , nullus tamen distinctioni locus , si quæ per se ad Reipub. perniciem tendant . Præterea a rationis sensu quam maxime abhorret , vel præ grandi lucro Populi salutem posthabere . Sed quod attinet ad res , quæ hosti præbentur , earum quidem usus dolum , si qui fuerit , evincet . Et quidem trifariam earum

dispersi possunt. Aliæ bello destinatae sunt, ut arma, tela; aliae tam belli, quam pacis usui communes, veluti equi, na-  
ves, commeatus, pecuniae; aliae demum nullius in bello u-  
sus censentur, tantumque voluptati inserviunt, ut ea, quae  
sunt ad delicias comparata, & ad luxuriam, molliemque  
impellunt. Nemo dubitat quin ea, quae sunt primae classis  
perduellionis reos agant praebitores: quod idem & de illis,  
quae domi, militiaeque usui sunt, affirmandum. Nam licet  
ad bella comparata proprie non sint, in bellis tamen maxi-  
me. juvant, quum quibus victui necessaria desunt, bel-  
lum diu protrahere. ii nequeant. Sed tertii generis res, si  
hostibus praebentur, tantum abest, ut in perduellionis cri-  
men incidatur, ut laude potius dignus, qui eas obtulerit,  
putetur. Quid enim aptius ad emolliendos, enervandosque  
militum animos, quam quae luxuriae inserviunt, profusa libe-  
ralitate elargiri? Quid Cyro magis profuit ad fundendos,  
profligandosque Scythas, quam vinum illud, & edulia, quae  
reliquerat in castris suis, fugam simulans? In quae quum illi  
inconsulto se ingurgitassent, victi extemplo, atque profligati  
cecidere. Appositissima ad id sunt Senecae verba (a): *Pecuniam,*  
*qua mollem stipendio teneat, non subministro: si marmo-*  
*ra, vestes desiderabit, nihil oberit cuiquam id, quo luxu-*  
*ria ejus instruitur: nilitem, & arma non suggeram. Si pro*  
*magno petet munere artifices, scena, & scorta, & quae fe-*  
*ritatem ejus emolliant, libens offeram. Cui triremes, & aratas*  
*non mitterem, lusorias, & cubicularas, & alia ludibria Regum*  
*in mari lascivientium mittam.* Itaque quum per harum rerum  
usum perimatur magis hostis, quam juvetur, perduellionis  
crimine liberabitur is, qui adeo profuse in eum se gessit:  
dolo enim caret, sine quo nullum committitur crimen, qui  
sic indulget hosti, ut tandem perdat. Quod si ita est, eccut  
in l. i. C. *qua res exportari non debeant*, prohibetur vinum,  
& oleum, & liquamen, vel aliud gustus causa ad barbaros  
exportari? Nempe ne ii rerum suavitate illecti, Orbem Ro-  
manum invaderent; quemadmodum Longobardos a Narsete  
in

(a) 7. de benef. 20.

in Italiam pellectos legimus pretiosis nonnullis frugibus, quas ea terra fert; muneri missis: dolus enim, & quidem ingens hic subest, unde Majestatis crimen oritur.

Verum subit animum & illud disquirere, an prohibitio isthæc juvandi hostes omnes teneat, ut ne pater quidem filiis, liberi parenti, cognati cognatis, atque affinibus affines opem ferre, perduellionis poena, possint. Salebrosa quidem est hæc quæstio, ut mire se torqueant, qui in eam incidunt. Ex vero pugnant hic inter se humanitas, quæ inter sanguine junctos intercedit, & publica utilitas, quæ anteferri omnibus debet. *Cari enim*, dicebat Cicero (a) *liberi, propinqui, familiares: sed omnes omnium caritates patria complexa est*. Etenim res domestica stare nec poterit, si patria evertatur. Sane sapienter Valerius dixit (b): *Everfa domo, intemtatus Reipub. status manere potest. Urbis ruina penates omnium trahat secum necesse est*.

Quum igitur paria utriusque sententiæ videantur esse momenta, ecquid aliud in medium afferemus, ut quæstio hæc dirimatur? Sane quum crimina omnia par sit ex ipso dolo metiri, animus perduellem adjuvantis excutiendus omnino est, nempe qua mente, quove consilio opem reo attulerit, ut perduellione, an ut homini humanitatis officia præstet. Receperit, esto, domum dumtaxat uxor maritum, sequuta sit, instruxerit egentem viatico: sunt profecto hæc pietatis officia, nec crimini tribuenda. Contra vero si virum male in patriam animatum receperit, armis instruxerit, commeatu, ingenti pecunia, præter necessitatem locupletarit, quo majori vi nocere possit, nihil sane ex hoc conjugali vinculo proderit, ut debitam poenam effugiat: quum hæc omnia non humanitatis, sed doli causa facta censeantur, quo is ad struendas insidias paratior sit. Quæ sane advertenda sedulo sunt, ut intercefferit ne dolus, nec ne, pernoscatur, & num quis in legis laqueum inciderit, dijudicetur.

Sunt

(a) *Officior. lib. 1.*

(b) *Lib. 5. cap. 6.*

Sunt qui credunt, perduellem etiam esse illum, qui reum ex carcere emisit. Quum enim solius Principis sit, reum poena liberare, videtur quidem ipsa Principis Majestas impeti, si reus eximatur a vinculis. Atque est opinionis hujus fundus lex ipsa nostra: *Qui confessum in judicio reum, & propter hoc in vincula coniectum, emisit*. Sed vereor ne nimium lex exacerbetur: quid enim ad primum caput legis nostræ facit, si quis vilem hominem, latrunculum forte, qui- que nihil Reipublicæ nocere possit, e vinculis detraxerit? Secus vero reputandum, si is periculo sit Patriæ. Quo sane discrimine habito, nullum in prima specie perduellionis crimen censebimus; secus vero in secunda. Nec desunt, qui legem sic emendant, ut *in judicio confessum* addant voculam *boc*, nempe eum perduellem esse, qui criminis hujus reum in judicio confessum emisit. Sed salva res est, nec præter Codicum omnium fidem lacinia isthac foedari lex debet, quum verba hæc, *confessum in judicio reum*, ipsi rei, de qua in tota hac lege agitur, scilicet perduellionis crimini congruant, ita ut hæc ostendatur sententia, si quis ob perduellionem, in vincula fuerit coniectus, atque ab eis emissus. Itaque supervacua est adjectio, quum ex legis ejusdem mente, & ex re ipsa sensus ejus patere possit.

Ea, quæ huc usque scripsimus, ad primum caput legis nostræ pertinent: nunc vero de iis pauca dicenda, quæ in altero capite continentur. Ea autem sunt, quæ adversus splendorem, dignitatem, atque existimationem Principis committuntur; ut si quis Principis statuas consecratas violaverit, nummos vultu Principis signatos adulteraverit, si purpura usus fuerit, vel veste *bolosærica*: decet enim Principis vestes a privatis distare. Item si quis privatum carcerem habuerit, vexandi tamen inimici potius, quam invadendi Imperii causa, alioquin in primum caput incideret. Tenetur etiam secundo capite, qui improbo petulantique maledicto nomen Principis laceggerit; aut temulentia turbulentus obrectator temporum ejus extiterit. Hæc sunt, quæ ad secundum caput legis nostræ pertinent: atque de iis ad Principem referendum est, ut is demum, pensata re, prætermittine, an ex-

exquiri crimen hoc in se commissum censeat. Sunt qui credunt, maledicta in Principem ex lege nostra minime puniendi, quum per legem unicam *Cod. si quis Imperatori maledixerit*, a Theodosio, Arcadio, & Honorio, lex Julia ut superior videatur abrogata. Sed falsa omnino est hæc eorum sententia: non enim in laudata Constitutione cavetur, ut istiusmodi convicia ad Principem referantur, abrogandæ Juliæ legis causa, sed ut is potius statuatur, dignus ne sit miseratione an non, qui Imperatorum nomen maledicto laceffiverit. Sæpe enim Principis Majestati par non est in crimen hoc animadvertere, ne ex metu, & poenarum severitate nomini suo reverentiam quaerere videatur. De Domitiano enim scriptum, eum Majestatis crimina in arena colligere consuevisse? Sed advertendum ante Augustum convicia isthæc nulli punitioni obnoxia fuisse: in omnium enim ore tritum illud erat, *facta arguenda, dicta impune esse debere*. Omnium igitur primus Augustus cognitionem de famosis libellis, per legis Majestatis speciem haberi voluit, quod sane in sequentibus deterioris ingenii Principibus inserviit ad alienam innocentiam evertendam, atque ærarium locupletandum. *Et Fiscum & ærarium locupletabant* (scripsit Plinius) *non tam Voconia, & Julia leges, quam Majestatis singulare crimen eorum, qui crimine vacarent*. Verum sub Principibus Christianis ad meliorem formam jurisprudentia Romana redacta, hæc statuere Theodosio adlubuit: *Si quis modestia nescius, & pudoris ignarus, improbo petulantique maledicto nomina nostra crediderit laceffenda, ac temulentia turbulentus obrectator temporum nostrorum fuerit; eum pœnæ nolumus subjugari: neque durum aliquid, nec asperum volumus sustinere: quoniam si id ex levitate processerit, contemnendum est; si ex insania miseratione dignissimum; si ab injuria, remittendum. Unde integris omnibus, hoc ad nostram scientiam referatur, ut ex personis hominum dicta pensemus, & utrum prætermitti, an exquiri debeant, censeamus.*

## §. II.

## §. II.

*De pœna legis Juliae.*

**J**AM de personis vidimus; & de causis, ob quas in crimen hoc incidatur: reliquum est ut de pœna inferenda sermonem instituamus. Sed hic temporum vices distinguenda sunt, & quidem sedulo, quum pro Imperatorum ingenio, alia aliis temporibus pœna inflictâ fuerit, modo savior, modo remissior, prout Princeps vel formidini, vel savitiae, aut lenitati magis erat propensior. Et quamquam ceteris in rebus sequioris ævi politiam missam facere ut plurimum studuerim, quum ea tantum quæ in manu erant, quæque ad tempus præsens spectabant, exponere animus fuerit; aliter vero in hujus legis interpretatione me gerere debere puto: nec tantum ut res sub Augusto se habuerit, sed & insequentium Principum mutationes enarrabo. Atque id profecto, ut ostendam, perversa Pragmaticorum in Legis Juliae expositione effata non aliunde obvenisse, nisi ex historiarum ignorance, atque confusa rerum notitia. Et quidem, ut ad rem veniamus, nullum videtur acerbiori pœna plectendum facinus, quam in vitam Principis insidiæ paratæ, tum ob fractam fidem, quam intemeratam cives debent Regi servare, *non solum propter iram, sed etiam propter conscientiam, quum nulla sit potestas, nisi a Deo*; tum ob mala, quæ morte Principis oboriuntur, quibusque publica tranquillitas labefactatur; tum demum quod vix est, ut ex occultis istiusmodi proditiombus Princeps sospes evadat. *Nam hostem adversum opprimere, homini strenuo baud difficile est; occulta pericula neque facere, neque vitare bonis in promptu est: Nonne arma aperta palam vites, fraudes & dolus occulta, eoque inevitabilia. Nonne fluxam militum fidem, & periculum ex singulis (a). Sunt cohortes ad latus Principis regendum: Sed quid proderunt cohortes, atque si unus, alterque præsenti facinore paratum ex diverso premium petant? Nonne Regum exitus, si reputaverimus,*

(a) Tacit. II.

*mus, plures a suis, quam ab hostibus interemptos reperiemus (a). Propter hæc omnia, inquam, dixeris fane nullam satis eo scelere dignam poenam videri, potissimum vero, quia non creditur, nisi perpetratum facinus sit (b). Unde miserrima Principum conditio, quibus de conjuratione comperta non creditur, nisi occisis (c). Ægerrime enim vulgus credit, quod quispiam inermis insidias armato struat, & militibus cincto (d).*

Igitur quum tanti facinus hoc reputandum sit, quid de ejusdem poena statuendum? Num inexorabiles leges ferendæ? Nullane spes veniæ? An omnes pari poena afficiendi? Ita in hoc formidolosus sollicitusque Princeps erit, ut Majestatis crimina in arena colligat, atque ex omni re minus obsequenti crimen conficiat? Minime gentium: *quia non oportet omnibus, quæ ab his talibus dicuntur, fidem adhibere, sed acriter ea examinare & discutere (e). Quis enim innocens esse poterit si accusasse sufficeret (f)?* Itaque studiose illud Modestini dictum perpendendum, quo Judices potissimum docet (a). *Hoc tamen (inquit) crimen a iudicibus non in occasione ob Principalis Majestatis venerationem habendum est, sed in veritate. Nam eo persona spectanda est, an potuerit facere, & an ante quid fecerit, & an cogitaverit, & an sanæ mentis fuerit; nec lubricum. linguæ ad pœnam facile trahendum est. Quamquam enim temerarii digni pœna sint, ut insanis tamen illis parcendum est, si non tale sit delictum, quod vel ex scriptura legis descendit, vel ad exemplum legis vindicandum est.*

Verum hisce adhibitis cautionibus, si tamen crimen hoc plane probatum sit, neque de eo ambigatur, quæritur an Princeps adeo erit inexorabilis, ut numquam reo indulgeat. Sane quum nullum clementia ex omnibus magis, quam Regem aut Principem deceat.... quia magnam fortunam magnus animus decet.... & magni animi proprium est placidum esse, tran-

B b b

quil-

(a) Livius 40.

(b) Sueton. in Domit. 21.

(c) Dion 52.

(d) Dion 52.

(e) Ammian. XVIII.

(f) L. 7. ad l. Juliam Majes.

quillumque, & injurias atque offensiones superne despicere (a); hinc Principis est, aliquando sceleris hujus poenam prætermittere, vel saltem temperare. *Pœnam, si tuto poteris, dabis; sin minus, temperabis* (b). Hujusmodi enim clementiæ exemplum ad civium amorem in Principem conciliandum maxime proderit. *Quum Clementia non tantum honestiores, sed rutiliores præstet, ornamentumque Imperiorum sit, simul & certissima salus . . . nihil enim gloriosius est Principe impune læso* (c).

Sed moderatio hic potissimum adhibenda est, ne beneficium in perniciem vertatur, quum ejus, cui confertur, merita, atque vita, & temporum conditio solerter sint expendenda. *Quoniam quidem conditione temporum incidunt quedam, quæ possint laudata puniri . . . . Non itaque semper & vulgo ignoscere decet: nam ubi discrimen inter malos, bonosque sublatum est, confusio sequitur, & vitiorum eruptio. Adhibenda est igitur moderatio, quæ sanabilia ingenia distinguere a deploratis sciat. Nec promiscuam habere, ac vulgarem clementiam oportet, nec obsecissam: nam tam omnibus ignoscere crudelitas est, quam nulli* (d). Igitur si in pœnis quibuscumque remittendis, aut temperandis rationes has omnes Princeps optimus debet expendere, maxime vero in Majestatis crimine, quum per hoc totius Reipublicæ salus periclitetur; quæ tunc stare poterit si salva sit Majestas Principis. *Quia illius cautio nostra cautio est . . . . ne dum paucis sceleratis parcit, bonos omnes perditum eat* (e).

His præmissis, quæ non parum Principibus, æque ac Judicibus prodesse in pœnis sive inferendis, sive temperandis poterunt, ratio postulat, ut ad rem nostram propius accedamus. Sane concors est eruditorum opinio, pœnam læsæ Majestatis sub Augusto interdictionem aquæ, & ignis fuisse, quæ quum Civitatis jus perimeret, vocata fuit pœna capitis: sat enim

(a) Seneca de Clemen.

(b) Idem loc. cit.

(c) Sallust. Catilin.

(d) Seneca ad Clemen.

(e) Sallust. Catilin.



enim frequens est in jure poena capitis pro amissione Civitatis, aut libertatis; quum verbum hoc *caput* non tantum naturalem vitam præferat, sed etiam civilem, quæ est civitatis, vel libertatis status. Ecce tibi, quæ scripsit Paulus de hac poena (a): *Legæ Julia Majestatis tenetur is, cuius ope, consilio adversus Imperatorem, vel Rempub. arma mota sunt, exercitusque ejus in insidias deductus est; quive injussu Imperatoris bellum gesserit, delectumque habuerit, exercitum comparaverit, sollicitaverit, deseruerit Imperatorem. His antea in perpetuum aqua & igni interdicebatur: nunc vero humiliores bestiis objiciuntur, vel vivi exuruntur; honestiores capite puniuntur. Quod crimen non solum facto, sed & verbis impiis maxime exarcebat.*

Ex his patet, ante Paullam poenam Julæ legis Majestatis aliam ab interdictione aquæ, & ignis non fuisse. Sed multa hic expendenda sunt, & ab aliis fortasse minime animadversa; nempe an Augustus ipse poenam hanc invenit; quibusque ex causis fuerit ab eodem vel recepta, vel instituta; num clementiæ spe, quam ille simulabat; demum an illius regimini congrueret. Sane occasionem illius poenæ luculentissime refert Dio (b). Quum enim Octavius Cn. Cornelii Cinnae insidias comperisset, anceps diu animus ejus cædem inter illius, & veniam fluctuare videbatur. *Ac neque dies, neque noctes sine cura, ac cum quiete agentem, Livia aliquando percontata est, quidnam rei eum a somno detineret. Patefacta tunc animi sui sententia, quod scilicet incertus esset, utrum in Cinnam animadverteret, an vero indulgentia uteretur; prudentissima mulier, æque ac solertissima multis de causis ad veniam hortata est; eumque ne Majestatis reos in posterum morte naturali afficeret, persuasit. Quid enim mali (inquit) tibi inferat in Insulam quamdam deportatus, aut in villa, vel oppido non modo absque pecuniæ, vel servitiorum copia, sed etiam in custodia positus, sicubi res id requirat?...* *Hominibus enim, non belluis imperas: eaque est unica benevo-*

Bbb 2

len-

(a) *Lib. V. sentent. tit. 29.*(b) *Lib. 55.*

*lentiæ ipsorum vere consequendæ ratio, si hoc ipsum persuasum efficias, neque a volente, neque ab invito te quemquam eorum lædi. Cogi quidem ad metuendum aliquem homo potest; ad amandum autem persuasione opus est: ea beneficiis in eum collocatis, quæque aliis videant tribui paratur (a). Nonne crebro vulgi rumore laceraberis tamquam viros insontes ob invidiam, aut merum extrinxis (b)?*

Quod sapientissimum mulieris consilium Augustus sequutus, Cinnam non solum poena solvit, beneficiisque adeo sibi devinxit, ut impofterum ex hoste acerrimo amicissimus factus sit; sed etiam in Majestatis reos deportationem statuit, publicatis tamen, in Fisci gratiam, eorum bonis. Sed quum bonorum hæc publicatio crimina omnia sub Augusto comitaretur, videndum hic est num Reipublicæ præstet bona proscriptorum propinquis magis, quam Fisco adjudicari. Doctissimus Bodinus (c) rem sic definiendam putavit, ut bona a vita posteritati servanda, cetera vero in Fiscum redigantur, neque legitimarum hereditatum spes aliena culpa præcidenda. *Nonne iniquum videtur parentum culpam in liberos derivari?* Verum præterquamquod poena hæc ipsi æquitati adversatur, utilitati ipsius Reipublicæ non parum officit. Etenim egestate adacti homines, sæpe ad furta, latrocinia, cædes impelluntur; maxime vero ii, quos ad otium, & inertiam affluentia rerum omnium educarat. Neque sperandum, ut homines in deliciis, atque voluptatibus innutriti, sellularias artes cõdiscant, ne inertem transigant vitam, habeantque unde sine scelere vivant. Contra putant alii, nullam poenam præsentiozem ad deterrendos homines a flagitiis esse, quam metum ne liberi egestate laborent. Cupiditas enim posteritati consulendi adeo in omnium pectoribus sedit, ut hujus rei caussa nullum vel arduum facinus sit, quod audacter non aggrediantur? Itaque sic affirmant, proscriptorum bona Fisco addicenda non filiorum odio, sed ut parentes posteritati suæ

ma-

(a) *Idem loco cit.*

(b) *Tacit. XV. Ann.*

(c) *de Repub. cap. III. lib. V.*

maxime studentes, abstineant sceleribus, ne liberos egenos relinquant. Sed quidquid sit, meum non est in his amplius immorari, quum ad ea, quæ instituto meo magis inserviunt, potius redeundum sit.

Si Romanorum tunc temporis mores, regimen Augusti, atque ærarii inopiam attente perpendamus, nulla profecto pœna ad avertendos homines a flagitiis præsentior videbitur, quam ut proscripti, amissis bonis, in insulam deportarentur. Unde mirandum non est, si Princeps ille callidissimus hanc non in solo Majestatis crimine, sed & in ceteris statuerit. An res ita se habeat, videamus. Quum Augusti tempore non adhuc diversarum partium studia composita essent, & civilium seditionum reliquæ adhuc per varias factiones alerentur; plures sane ad supplicium producendi fuissent, si Majestatis crimen morte plecteretur. Quin nec ea quidem publica securitas comparata esset, sed novum potius odium incurrisset Princeps, *tamquam viros insontes ob invidiam, aut metum extinxerit* (a). Itaque satius duxit clementiæ speciem simulare, reos in insulam deportando, eisque vitam incolumem servando; quam occidere: ut si ad meliorem frugem rediissent, veniam, ac nonnunquam beneficia consequerentur, quod Cinnæ exemplo satis sibi probatum fuit. Nec erat, quod periculum ex his metueret: quippe insulæ addicti, bonis omnibus exuti, atque ab Urbe diffiti, militari præsidio circumsepti, novas ciere turbas non poterant. Et quidem quum per id tempus ii civiles motus erumperent, qui bonorum copia ad comparandos sibi milites valerent; nullum certe majus Principi præsidium, quam bonis rerum novarum cupidos multare, quæ deinde ad ærarium confluerent. Atque hoc procul profecto ab invidia, quum in ore omnium frequens illud sit, expedire magis ut sceleratorum bona cadant in Fiscum, quam libidini alendæ inserviant. Itaque fortunis suis Princeps expolians reum, ex omni parte securus erit; *quum ex adverso parentes, liberique eorum, qui interfecti sunt, & propinqui & amici in locum singulorum succedant.*

Sa-

(a) Tacit. XV.

Satis profecto hæc omnia Julius Cæsar pernovit : quare omnium primus in delictis puniendis bonorum publicationem inexit. En Tranquillum ita de eo loquentem : *Pœnas facinorum auxit : Quum locupletes eo facilius scelere se obligarent , quod integris patrimoniis emulabant , parricidas , ut Cicero scripsit , bonis omnibus , reliquos dimidia parte multavit .* Recte Tranquillus scripsit , Cæsarem in facinorosos pœnam auxisse , siquidem bonorum publicationem adjecit . Etenim ante eum incognita illa erat . Nam , damnato reo , ejus bona heredem sequebantur . Per legem Corneliam de sicariis pars quædam ex bonis damnati excerpebatur , neque ea in Fiscum cadebat , sed heredibus potius defuncti dabatur , ut damna ejusdem , morte illata , ratione aliqua compensarentur .

Verum Augustus secus se gessit : non enim bonorum dimidium , uti Cæsar , sed cuncta ea publicabat ad locupletandum ærarium . Quumque insequentibus Principibus tutissimum Monarchiæ fulcrum pœna hæc visa fuerit , mirum non est , si adeo ea crimina sequeretur , ut etiamsi Judices in sententia non exprimerent , tacite tamen intelligeretur . Itaque bonorum publicatio sententiæ cujusque capitalis sequela effecta fuit , ut in *l. 1 , Quæ 2. de bonis damnatorum* . Quum autem rursus durum visum esset Justiniano , excludi a Fisco liberos , & parentes , novissima lege is ita cavit , ut , quocumque crimine reo damnato , excepto crimine Majestatis , in quo veteres leges servandas voluit , nulla publicarentur bona , si liberi essent , vel ascendentes ad tertium usque gradum ; his vero deficientibus , Fisco caderent .

Vidimus quantum pœna hæc deportationis , cum bonorum omnium publicatione , Monarchiæ oris congrueret , quum inde Principis securitas sequeretur , locupletaretur ærarium præter invidiam , atque omnia in clementiæ speciem simularentur . Videamus modo , quam acerba fuerit , atque ideo opportuna , ne quies publica motibus civilibus impeteretur . Etenim si Romanorum per id tempus mores perpendamus , facile quidem intelligemus , quam severa iis fuerit patria abesse , in insulam abigi , bonis spoliari , jure demum Civitatis carere . Et quidem quum sub Augusto rerum omnium copia

Urbs

Urbs afflueret, moresque civium in luxum, voluptatesque omnes pessumdati essent, non poterat non acerba nimis videri poena illa, per quam Romani Civitate orbat, fortunisque omnibus destituti, ad omnium rerum egestatem redigerentur; & Senatorum filii, aliique summo loco nati, propter bonorum inopiam, honoribus avitis, summo quidem labore partis, exciderent, atque in turpissimam miseriam prolaberentur. *Quid*, dicebat Juvenalis, *salvis, infamia, nummis?* Hoc est reum infamiae poena afficere nil est, si procul bonorum publicatio sit. Ex his omnibus videtis poenae hujus acerbissimam, spectatis Romanorum moribus, Asiana luxuria adeo innutritis, magnam vim ad cives continendos habuisse.

Verum non in hisce tantum poena haec consistebat: erant quippe & alia, quae peculiaria sunt Majestatis crimini, nec cum ceteris criminibus communia. Etenim sceleris hujus convictus, cujuscumque dignitatis esset, torquebatur *l. 1. C. de quaestionibus*; immo & cujuscumque aetatis homines, si ad testimonium provocantur, in Majestatis crimine torquentur *l. 10. §. 1. D. de quaestionib.* Si accusatores manifestis indiciis non convicerint reos, ut & ii, quorum opera, vel consilio alii ad accusationem profuerint, tormentis etiam subjiciuntur. Statutum item ut famosi, hoc est, qui jus accusandi non habent, mulieres, milites, hoc crimen deferre possint *l. 7. D. ad l. Juliam Majestatis*; audirentur item servi contra Dominos, & liberti contra patronos: quae omnia quum univeree, jure reclamante, in solo Majestatis crimine recepta sint, dixeris sane hanc poenam praeter ceteris esse acerbissimam. Quare ad rem appositissima sunt Plinii in suo Paneg. ad Trajanum verba, & mihi non omittenda. *Reddita* (inquit) *amicis fides, liberis pietas, obsequium servis. Verentur, & parent, & Dominos habent. Non enim jam servi Principis nostri amici, sed nos sumus; nec Pater Patriae alienis se mancipiis cariorem, quam Civibus suis credit. Omnes accusatore domestico liberaisti, unoque salutis publicae signo, illud, ut sic dixerim, servile bellum sustulisti. In quo non minus servis, quam dominis praestitisti: hos enim securos, illos bonos fecisti. Non vis interea laudari, nec fortasse laudanda sint; grata sunt tamen*

*recordantibus Principem illum in capita dominorum servos subornantem, moſtrantemque crimina, quæ tamquam delata puniret. Magnum, & inevitabile, ac toties cuique experiundum malum, quoties quisque ſimiles Principi ſervos haberet.*

Verum jam e memoria exciderat illud veſtigare, quod nonnullis errandi occaſio fuit, utrum, lata lege Julia, diſtinctio illa exoleverit inter perduellem, & Majeſtatis reum; an vero perſtiterit adhuc, ut perduellis morte naturali afficeretur, interdictum vero aqua & igni Majeſtatis reo fuerit. Sane Paulli locus ſupra laudatus dubitationem omnem perimit: ait enim lege Julia, *Majeſtatis teneri eum, cujus ope, conſilio adverſus Imperatorem, vel Rempublicam arma mota ſunt*; & ſubdit, *huic antea aqua, & igni fuiſſe interdictum*. Vide igitur indiſtincte crimen hoc, ſive in Rempub. ſive in Principem admiſſum, una eademque pœna punitum fuiſſe, nempe interdictione aquæ & ignis. Quod quum ita ſit, mirum proſecto, ex interpretibus neminem adhuc rationem mutationis perſcrutaviſſe. Immo, quod magis eſt, ſæviffimus etiam ille Sylla, ſi vera eſt lex Cornelia Majeſtatis apud Sigonium (a), Majeſtatis crimen, & perduellionem una eademque pœna perſequutus eſt, hoc eſt, interdictione aquæ & ignis. Si conjicere liceat, dicam Majeſtatis crimen ſub Cornelio, Julio, atque Octavio proſus incognitum fuiſſe. Etenim quum antea nemo ex optimatibus jure proprio Majeſtatem vindicaret, ſed tamquam Reipublicæ Magiſtratus cenſeretur, factum eſt, ut in eorum perſona ipſa Reſpublica videretur offenſa, atque ideo reus uti perduellis puniendus. Quum vero ii, ſimulato hoc Magiſtratus nomine, Majeſtatem, ejuſque jura proprie exercerent, ideo demum inveſtam novam ſpeciem hujus criminis puto: quam proſecto horrerebant Romani, quibus Regia poteſtas, & quidquid eam comitabatur, uti eſt pœna legis Juliæ, maximopere erat inviſa. Satiſ duxerunt illi Reipublicæ vultures, per clementiæ ſpeciem, perduellionem pœna interdictionis aquæ & ignis punire; quam de uſurpata Majeſtate Civium obſtrepentium querelas audire. Itaque

(a) *De judiciis lib. 2. cap. 29.*

que ad minuendam invidiam factum, ut Cives eorum tyrannide pressi, minime libertatem amissam sentirent, & adhuc beneficio legis Porciæ, quæ Civem occidere vetabat, gaudere putarentur, maxime vero in perduellionis crimine, quod jura morte naturali plectendum sanxerant.

Enarravimus hucusque peculiaria quæque huic legi, ad Principis securitatem firmandam. Videamus nunc Pragmaticorum quorundam figmenta, ex ipsa legis sævitate enata, quibus licet Modestinus reclamet, rem pro rei veritate transigendam, non autem ob Principalis Majestatis venerationem sæviendum, tamen mire Principibus blandiri consueverunt. Jactant quidem posse in hoc judicio procedi summarie, & de plano, sine libello, sine strepitu; & figura judicii: quum enim crimen singulare sit, poterit & a regulis juris recedi (a). Sed grave licet sit facinus, omnique flagitio flagitiosius, cur a regulis ceterorum criminum, quæ probationes exposcunt luce ipsa clariores, excipiendum? Nonne Tiberius, & Domitianus, ut rem exemplis firmemus, acerrimi hujus legis exactores, immisissis antea accusatoribus, dataque reo defensione, judicia Majestatis nulla juris solemnitate omissa exercuerunt? Eo magis quod gravissimum crimen quum id sit, ejusque naturæ, ut vim pati videantur, etiam quibus probatur, ut Div. Marcus dictitare solebat, pleniorē profecto causæ cognitionem desiderat. Quid igitur summarie procedendum, & sine figura judicii, prætermisissis probationibus omnibus, quibus ad veritatem detegendam opus est? Quod si manifesta rebellio sit, irruatque civis armatus ad Patriam delendam, non abnuo confestim in eum sæviendum. Nec Prætoris edicta expectanda, ubi periculum imminens est, quando salus Populi suprema lex est.

Scripserunt alii (b), probari posse hoc crimen per testes non idoneos, seu, ut ipsi loquuntur, *inhabiles*, inimico tantum excepto, quem ne in hoc judicio quidem admittunt. Verum generatim traditum, in capitalibus causis testibus,

Ccc

atque

(a) *Decian. 7. capit. 27. nu. 13.*(b) *Gomefius 3. cap. 12. n. 14.*

atque apertissimis documentis opus esse. *l. ultima C. de probation.* At enim ad id criminis deferendum illi etiam probantur, quibus accusare fas non est; sed non quemadmodum in testis fide, atque manu, ita etiam in manu accusatoris salus rei est. Putarunt alii reum istiusmodi damnatum ab appellatione rejiciendum (a). Sed id, ut cetera, æque falsum: nam jus nostrum his dumtaxat appellandi facultatem denegat, qui manifestam violentiam commiserint, quique simul & convicti, & confessi fuerint *l. 2. C. quorum appellari. non recipiuntur*. Itaque tunc non admittitur appellatio, quum seditio prærupta, factio cruenta, aliave justa causa moram haud patiuntur rei perimendi. Demum existimarunt (a) perduellem, ejusque filios nunquam præscriptione tutos esse. Sed verum id est, si de præscriptione quinquennii, ceteris criminibus communi, intelligatur; minime vero si præscriptionem viginti quoque annorum rejicias: quum nominatim crimina hoc ab ea exceptum non sit, extetque regula, omne crimen viginti annorum præscriptione perimi. Dilucide enim Marcianus scripsit in *l. 3. D. de req. reis* *Quancumque enim quæstionem apud Fiscum, si non alia sit propria præscriptio, viginti annorum silentio præscribi D. Principes voluerunt*. Itaque has aliasque falso confictas interpretationes aversemur, Modestinum potius sequentes, quum crimen hoc a Judicibus non in occasionem sævitæ habendum sit, ob Principalis Majestatis venerationem, sed ad rei veritatem pernoscendam.

## §. III.

*De poena legis Julæ Majestatis, in Arcadii Constitutione.*

**E**A, quæ huc usque de poena legis hujus edisseruimus, spectant quidem tempora, quæ Arcadium Imperatorem antecunt. At vero ab eo poena hæc adeo adaucta est per ejus Constitutionem in *l. quisquis ad l. Juliam Majest.* ut a prio-

(a) *Decian. 7. cap. 48. n. 8.*

(b) *Farinas. quæstione X. n. 29.*



priori illa longe nimis distet. Sane alienum videretur ab instituto meo, quod in Augustali jurisprudentia versatur, ad illa, quæ insequentibus temporibus invaluerint, excurrere. Sed quia, uti ante dictum est, Constitutio hæc a Pragmaticis, prout cujusque ingenium vel ad fucatam clementiam, vel ad intempestivam sævitatem proclivius fuit, pessime detorta est; ideo operæ pretium duxi, eam, quamvis extra metam provehar, hic exponere, a suis, purisque principiis rem arcessendo. Ait igitur Imper.: *Quisquis scelestam inierit factionem*. Quum vox illa prior infinitæ significationis sit, tam mares, quam feminas comprehendere, in confesso omnibus est; neque abest ratio ex ipsius legis mente petita: nam si & mulieres hostilia possint moliri, quænam ratio suppetit, qua a poena excipiantur? Etenim in historia proditum est, Fulviam Antonii uxorem, Cleopatram auctore eodem Antonio, Zenobiam, Agrippinam Neronis matrem Imperium Orbis adfectasse. Rarum quippe hoc est, sed non adeo infrequens, ut dici possit ad legem non pertinere, quæ casus inopinatos minime respicit. Imo in diem experimur mulieres, quæ propter sexus infirmitatem in crimina vix insurgunt, si tamen audeant, præ ceteris esse promptiores: quapropter Comicus dixit, *Muliere nihil esse audacius*. Mulier honesta, esto, difficillime in adulterii crimen offendit; sed si semel adultera sit, cuncta honestatis septa prærumpit, atque furore maximo debacchatur. Falsa igitur omnino illorum opinio est, qui clementiæ fuco putant mulierem legis nostræ poena procul esse, ne scilicet publicatis tantum bonis, ipsaque perempta, ejus memoria damnetur, ejusdemque filii infamia, egestateque laborent. Incassum hæc omnia, quia ubi expresse verba legis, & mens renuunt, ad poenam temperandam ratio nulla suppetit. Verbum enim *quisquis*, ut diximus, infinitam vim habet, & ipsius legis ratio etiam mulieres complectitur. Porro pergamus.

Subditur in laudata lege: *Eadem severitate voluntatem sceleris, qua effectum puniri*. Num igitur conatus hujus criminis, toto jure clamante non conatum, sed effectum cujuscumque criminis poena plectendum, hic puniendus erit? Minime

gentium, si absolute verba hæc intelligantur: quis enim excogitata peccata punit, *nisi solus Deus scrutator renum*? Itaque facta distinctione, temperandum id est, ut dicamus conatui istiusmodi aliquam ipsius sceleris inchoationem adjiciendam, qua malus animus in actum externum prorupisse videatur, aliquid nempe in necem Principis parando.

Sequitur poena hujus criminis, qua tam reus, quam ejus filii afficiuntur: ille enim, publicatis bonis *gladio feritur*, ejusdemque memoria damnatur; filios vero non solum infamia sequitur, adeo ut egestate laborent, sed etiam indigni censentur, quibus bona aliqua, si jure legitimo, si testamentario, vel etiam ad alimenta ex quacumque parte accedant, & *mors sit solatium, vita supplicium*, quæ tantum Principis lenitate incolumis relinquitur. Quæ omnia quum longiori indigeant disquisitione, paullo latius tractanda sunt. Et quod attinet ad poenam hanc in filios, qua licet criminis paterni participes non sint, infames tamen decernuntur, tantamque in egestatem adiguntur, ut indigni etiam habeantur, qui alieno beneficio levantur; certe quidem videtur sævissima, a qua summopere humanitas ipsa abhorreat. Si enim ibi poena esse debet, ubi scelus est, sævities plusquam ferina erit, si poenam contra innocentem exasperes; quum poenales leges nocentibus terrori, innocentibus vero præsidio esse, communi omnium sermone dicantur: Quod quum ita sit, rationem videamus, quæ Imperatoris mentem ad id impulerit. Sane crimen hoc gravissimum quum sit, & tantæ perniciæ, ut malis omnibus universam Rempublicam opprimat, quid mirum si rationes omnes excogitatæ sint, quibus deterreantur homines ab hoc scelere? Quid si metus etiam adjectus est, ne eorum filii in eam egestatem incidant, eamque miseriam, ut mors sit solatium, vita supplicium? *Hoc commune est* (inquit Tullius ad Brutum) *liberos puniri, quo liberorum caritas amiciores Reipublicæ parentes reddat*. Neque alienum est, si dixeris, quod in laudata lege subjicitur, ideo puniendos filios, *quia metuenda sunt in eis paterni, id est hereditarii criminis exempla*. Neque dixeris evanidum id esse, levisque momenti, quippe quod ab incerto eventu, exituque rerum de-

su-

sumatur: *Plerumque enim parentes, liberique eorum, qui interfecti sunt, in locum singulorum succedunt.* Quæ sane ratio, quum filiabus non satis congruat, quæ suamet natura, & infirmitate minus audeant, jure merito sanxit Imper. ut eæ Falcidiam ex maternis bonis saltem percipiant. *Mitior* ( inquit ) *circa eas debet esse sententia, quas, pro infirmitate senus, minus ausuras esse confidimus.*

Sed quum filios Constitutio nostra exprimat, videndum nunc quoniam filiorum nomine hic intelligantur, emancipati ne etiam, nepotes, adoptivi, legitimated, naturales, qui omnes filiorum nomine veniunt; an vero strictius quidem soli filii, ut in poenis genus ad sui speciem coerceatur. Sane emancipati hic filiorum nomine minime continentur, dummodo tamen ante crimen e patria manu exierint, & fraus procul absit. Si enim in hac lege expresse habemus valere emancipationes, quæ ante legem factæ sint, sequitur inde, ut ad emancipatos ante crimen commissum, vel excogitatum poena hæc non pertineat. Idem de adoptivis affirmandum est, si nulla fuerit fraus, saltem ex mente legis nostræ, quum iis haud quadræt ratio ab Imper. allata, quod sint in liberis metuenda exempla paterni criminis: non enim tantus adoptantium amor est, ut adoptivorum studio deterreantur a committendo crimine. Sed quid si ascendens in locum nepotis, vel filii adoptaverit? Non succedet quidem avo adoptanti nepos, quum ejus bona omnia occupaverit Fiscus; verum infamis minime erit: nam ceterorum bona sive jure legitimo, sive testamentario capere poterit. Quod si in locum filii adscitus sit, atque in ejus potestatem, uti descendens, transierit, nec infamis erit: nam quum odiosa lex sit, ejus quod ad filios poena ita accipienda est, ut non commentum juris civilis, uti est adoptio vel in locum filii facta ab ascendente, sed naturam ipsam inspicere debeamus. Quum igitur filii legitimi in lege nostra, quæ utpote poenalis in sua primogenia significatione intelligenda est, non contineantur, eo profecto minus & filii naturales, quibus & verba, & mens legis opponitur; quum filii non sint, ubi injustæ nuptiæ, atque ii utpote dignitate, atque opibus carentes, insurgere nequeant

ad

ad patris mortem ulciscendam . Præterquam quod si Constitutio avita bona , & proximorum hereditates filiis aufert , illi profecto intelligendi , qui proximioribus succedere possunt , quales non sunt naturales . Sed quid si naturalis filius sit legitimatus ? Certe videtur pertinere ad Constitutionem , quum particeps fiat dignitatis paternæ , divitiarumque , quarum ope mortem patris persequi facile audebit : qua quidem de causa par est , ut egestate laboret , ne , ut diximus , nova molitur in Principem . Anne demum nepotes hic filiorum nomine veniunt ? Licet receptum sit Nepotes filiorum appellatione contineri ; verum tamen id erit , si de eorum favore agatur , nequaquam autem si de poena , & quidem maxima : nam in poenalibus nulla ratio suppetit , qua proferamus verbi significationem , neque amor avi in nepotes , aut horum in illum tantus est , ut ille eorum studio a crimine perpetrando deterreatur , vel hi ad mortem illius vindicandam insurgant . His accedit , quod in eorum animis non tam recens indignatio est , neque tam acerba recordatio aviti supplicii , ut periculum sit , ne quid per hos audeatur . Sed quum filius perduellis bona cum patris , tum propinquorum capere non possit , quidnam de iis fiet ? Patris quidem Fiscus occupabit , cetera vero per successorium edictum , proximiori , vel substitutis deferentur : quum quod ad bona paterna , sit indignus ; quod ad cetera vero , incapax , & bona ad indignos pertinentia Fiscus sibi auferat , cetera incapaci relicta pro non scriptis habeantur . Hæc de Constitutione hac dicenda putavi ; reliqua ad eam pertinentia lubenter omittenda censeui , quum abunde in libro primo pertractata sint .

## §. IV.

*Ad legem Juliam de vi publica , & privata .*

**P**roxime ad Majestatis crimen accedit vis publica , vel privata : siquidem tunc Princeps tutus est , quum omnia quæta sunt , & tranquilla : atque illius Majestati injuriam infert ; qui publicam pacem inter cives perturbare ,  
atque

atque intervertere audet. Propterea quum de lege Majestatis hucusque plura differuerimus, ratio postulat, ut & de vi publica, privataque nonnulla saltem nunc disputemus. Itaque, ut ad rem veniamus, per bellorum civilium furorem potissimum vis exurgit: quare non mirum si Augustus tantum studii adhibuerit ad illam poenarum metu reprimendam, quum sub eodem reliquarum civilium turbarum adhuc perstarent. Tranquillus hac de re ita scripsit (a): *Pleraque pessimi exempli correxit, quae in perniciem publicam, aut ex consuetudine, licentiaque bellorum civilium duraverant, aut per pacem etiam extiterant. Nam & grassatorum plurimi palam se ferebant succincti ferro, quasi tuendi sui causa: & rapti per agros viatores sine discrimine liberi, servique ergastulis possessorum suppressantur: & plurimae factiones, titulo collegii novi, ad nullius non facinoris societatem coibant. Igitur grassatores, dispositis per opportuna loca stationibus, inhibuit; ergastula recognovit. Collegia, praeter antiqua, & legitima, dissolvit; tabulas veterum gravium debitorum, vel praecipuam calumniandi materiam exussit. Loca in Urbe publica juris ambigui possessoribus adjudicavit. Diuturnorum reorum, & ex quorum sordibus nihil aliud, quam voluptas inimicis quaereretur, nomina abolevit: conditione proposita, ut, si quem quis repetere vellet, par periculum poena subiret. Hac Tranquillus, quae quum multam legi nostrae lucem adferant, integra exscribenda duxi. Nunc legem expendamus.*

Ajunt Jurisconsulti: *Lege Julia de vi publica tenetur, qui arma, tela domi suae, agrove in villa, praeter usum venationis, vel itineris, vel navigationis, coegerit. In eadem causa sunt, qui turba, seditionisque faciunda consilium inierint, servosque, aut liberos homines in armis habuerint: eadem lege tenentur, qui pubes cum telo in publico fuerit. In eadem causa sunt, qui pessimo exemplo, convocata seditione villas expugnaverint, & cum telis, & armis bona rapuerint. Eadem lege tenetur, qui hominibus armatis possessorem domo, agrove suo, aut navi sua deiecerit, concusseritque, expugnaverit. Item hac lege tenetur, qui quum imperium, potestatemve haberet, civem Romanum adversus*

*pro-*

(a) Cap. 32. in Oñan.

*provocationem necaverit, verberaverit, jusseritque quid fieri, aut quid in collum injecerit, ut torqueatur. Item Julia de vi publica cavetur, ne quis reum vinciat, impediatque, quo minus Romæ intra certum tempus adsit. Atque etiam qui dolo malo fecerit, quo minus judicia tuto emercentur, aut Iudices, ut oportet, judicent, vel is, qui potestatem, imperiumve habebit, quam ejus jus erit decernat, imperet, faciat. Ac qui nova vetustigalia exercent, lege Julia de vi publica tenentur. Hæc omnia jurisconsultorum fragmenta ex tit. ad legem Juliam de vi publica excerpta, in unum colligere duxi, quo commodius mihi esset legem Augusti expendere, unaque simul demonstrare quantam lucem leges accipiant, si earumdem ratio ab historia depromatur.*

Jam vero quum ad vim faciendam proni homines, ex corrupta natura, atque adeo efferata, sint, maxime vero ad eam inferendam impelluntur, si quando insurgunt, qui tyrannidem appetunt. Hinc enim & scelestorum undique homines cogunt coetus, quorum viribus adjuti, novas res moliantur. Quin homines de trivio turbarum cupidos inter hos misceri, passim legimus, ut divitum domos expilent, ipsique infontium fortunis ditescant, impunitatem in tanta rerum perturbatione sibi pollicentes. Hac sane de causa, compositis vix rebus, restitutaque pristina pace, protinus judicia de vi institui solent, sive ad res ablatas restituendas, sive ad novam vim metu poenarum præcavendam: nam seditione compressa, non statim earumdem reliquæ evanescunt, a quibus adhuc timetur. Lex igitur nostra maxime Augusti regimini congruebat, quum per id tempus perstarent adhuc quædam veterum factionum dissidia, quæ furentibus bellis civilibus inoleverant. His accedebat novum Augusti regimen, idque invisum: & quem latet quantæ turbæ, factiones, & seditiones novo sub regimine oboriri soleant? Quapropter appositissima fuit lex nostra, quæ per singulos quosque casus distincte cavit, ne vis quæcumque inferretur. Verum quia res omnes majori luce adsparguntur, si ab sua repetantur origine, propterea hæc omnia altius arcessenda sunt.

Ante legem Juliam de vi, Plautiam invenimus, qua  
ani-

animadvertetur in eum, qui vim intulisset, sive Senatui insidias struendo, Magistratibus vim inferendo, cum telo in publico ambulando; sive quis seditionis causa superiora loca occupasset, sive possessorem fundo cum hominibus armatis deiecisset. Eratque horum omnium poena interdictio aquae, & ignis. Legis occasio seditio illa fuit post mortem Syllae. Quum enim Lepidus Marianarum partium assertor, cum Catulo Syllano de actis Syllae contendere coepisset, ingens Civium discordia concitata est, victorque, pulso ab Urbe, atque in Sardinia interfecto Lepido, Catulus hanc legem tulit cum P. Plautio Tribuno Plebis, unde ejus nomen. De qua Cicero sic (a): *De vi quaeritis, quam legem Q. Catulus armata dissensione Civium, Respublica pene extremis temporibus tulit.* Itaque quum Clodius in Ciceronem insurrexisset, ejusque aedes armatis hominibus combussisset, lege Plautia de vi accusatus est. Hanc autem legem Julium saepe rogasse scriptores tradunt, quum eam ad coercendos civiles motus satis aptam duxisset. Ex quo profecto intelligimus, quantum novo cuiusque regimini prosit poenarum metus, ad vim reprimendam, sive ut in praeterita facinora per seditiones patrata animadvertatur, sive ne vis impofterum inferatur.

Quum igitur Augusti tempore, civilium motuum non adhuc reliquiae extinctae essent, & vereretur ne novae seditiones exorirentur, maxime vero ob recentem, eamque invisam regiminis formam; opus sane fuit, ut is legem de vi conderet, perque ea distincta capita, ne qua vis inferri novo regimini posset. Itaque rem singulatim expendamus.

*De vi publica tenetur, qui arma, tela, domi, agrove in villa praeter usum venationis, vel itineris, vel navigationis coegerit, praeter ea, quae quis promercii causa habuerit, hereditateve ei obvenierint.* Non solum vim illatam lex prohibet, sed etiam instrumenta ea vetat, quorum ope facillimum est ad vim inferendam devenire, uti sunt arma, tela, aliaque hujusmodi, quibus, si quis ea domi, vel agro habeat, proclivius est alii nocere. Sed cur in lege subditur, ne quis

Ddd

do-

(a) *Orat. pro Sextio.*

domi, vel in agro arma teneat? Sane ante legem nostram quamvis privato nefas esset in Urbe arma servare, fas tamen ei erat extra Urbem in agro tenere, quum aristocratico regimini, vel democratico non adeo adversetur, si quo privatus modo arma teneat: quod secus est in forma monarchica, ubi penes unum vitæ, necisque jure manente, nemini suamet auctoritate licet se suaque defendere, si ab inculcata tutela ob imminens periculum discefferis: quo in discrimine, quum præsto esse non possit judicis manus, satius est vim repellere, quam eam per injuriam pati. Omnia igitur arma quocumque loco servata, Augustus prohibet, ut minus consona privatis sub novo regimine. Sed quid est, quod ea excipiantur, quæ quis promercii causa habuerit, aut hereditate obtulerint? Nonne armorum fabrica, ac commercium privatis omnibus interdicta sunt, quum de regalibus Principis censeantur? Fateor quidem id, Monarchia jam adulta: sed nascente, uti sub Augusto, res erat, indulgebantque quidem leges illorum promercium, ne vetustæ libertatis reliquæ tam cito deperire viderentur, atque democraticæ dominationis vestigia omnino delera. Itaque libertas hæc usque ad Marcianum stetit, sub quo vulgata Constitutio, *ne arma quis venderet Barbaris l. 2. quæ res exportari non deb.* ostendit privatos adhuc tunc temporis armorum usum, atque promercium tenuisse. Sed postmodum omnem illorum usum privatis interdictum satis constat.

Tenentur etiam de vi, qui *turbæ, seditionisque faciendæ consilium inierint, servosque, aut liberos homines in armis habuerint.* Quantum hæc omnia ad vim inferendam faciant, experientia satis perdocet. Nulla quippe cædes, aut vis illata, aut seditio erumpit, quorum antea inter male feriatos homines, per cœtus, & collegia communicatum non fuerit consilium. Jure merito igitur hominum armatorum in recenti Monarchia cœtus, & collegia prorsus vetita, præter ea, unde nihil mali timeretur, Præterea scripsit Paulus: *Lex Julia de vi publica, damnatur qui aliqua potestate præditus Civem Romanum, antea ad Populum, nunc ad Imperatorem appellantem, necarit, necarive jusserit, torserit, verberaverit, con-*  
dem-



*demnauerit, in publica vincula ducti iusserit.* Quæ profecto novæ huic Augusti dominationi mirum in modum conveniebant. Nam sub Monarchia non amplius ad Senatum, sed ad Principem de sententiis in Provinciis appellare fas erat; adeo ut de vi teneretur Magistratus ille, qui adversus pristinam libertatem reum impediret, quominus ad Principem appellaret. Quod ut magis intelligatur, adlubeat planius explicare illud Marciani dicentis: *Lege Julia de vi publica caveri, ne quis reum vinciat, impediatque, quo minus Romæ intra certum tempus adsit.* Hi sane in Provinciis sunt, quibus quum Civitas Romana data esset, a Præsidum sententiis ad Principem licebat appellare: sed apud eum intra certum tempus sisti debebant. Hos autem appellantes si quis ex Magistratibus impediisset, ne prosequerentur appellationem, vel in carcerem conjiciendo, vel verberando, hac poena tenebatur, quum non parum offenderet Principis Majestatem non censendo Civem, cui jus Civitatis Princeps dedisset, quemadmodum se gessit Marcellus, qui in Cæsaris contumeliam illos verberari iusserat, quibus Cæsar fuerat jus Civitatis elargitus.

Quæ huc usque edisseruimus, ad vim publicam pertinent, quæ licet olim a publica persona, hoc est, Magistratu inferretur, deinde tamen sic appellata, quæ cum armis fieret, quum quæ sine armis, dicatur privata. Vidimus igitur ut Augustus contra immoderatam Magistratuum potestatem se gesserit: nunc brevi tradendum, qua ratione adversus privatorum audaciam civibus consuluerit. *Qui convocatis hominibus vim fecerit, quo quis verberaretur, pulsaretur, neque homo occisus erit, aut fecerit, quominus quis in jus produceretur; utve ex agro suo sine armis deiceretur, quive ipse deiecerit, spoliaverit; qui questionem de alterius servo habuerit; qui improbe coierit in alienam litem; qui debitori suo debitum per vim extorquere conatus fuerit, atque si quæ sunt ejusdem generis, patravertit, lege Julia de vi privata tenetur, publicatione tertiæ partis bonorum, cum infamia multatur: ut Sigon. de publ. judiciis.* Itaque hac lege damnatus nec Senator, ne Decurio, nec Judex esse, nec honore ullo frui poterat; quum contra de vi publica damnato aqua, & igni interdiceretur; cui deinde poenæ successit deportatio. Non solum au-

tem lege hac tenebantur, qui vim in bona, vitam, vel libertatem, sed etiam in alienam pudicitiam intulissent. Ex quibus profecto intelligimus, quantum lex hæc novo regimini firmando, moribusque civium sanandis congrueret. Neque enim quidquam Monarchiæ adversatur magis, quam vis sive publica, sive privata, in vitam, libertatem, pudicitiam, atque in bona Civium illata. Quum autem hujus legis poena asperior, ut supra dixi, sit, nempe ut illius metu homines ab inferenda vi deterrentur, haud fere minor in vi privata, quam in publica viderur.

Etenim si acerbum nimis erat civilibus commodis orbari, atque ex illa Urbe, ubi Imperii majestas versabatur, ad infelicissimam quamdam Insulam dejici; minus profecto dura videri non poterat in vi privata publicatio tertiz partis bonorum, & infamia, si expenderis, quanti per id tempus esset jus Civitatis, & Romanorum aviditas in honoribus appetendis, sub novo potissimum regimine, ubi Augustus novos in dies creabat Magistratus, in speciem quidem veteribus honestiores, re autem vera, qui novo regimini convenirent. Ex quibus profecto omnibus hac poena damnati, si Magistratus essent, qui vim intulissent, excidebant; si vero privati perpetuo repellebantur. Hæc sunt quæ ad nostræ legis intelligentiam putavi explicanda. Sed e memoria prorsus exciderat quid innuant verba illa Tranquilli in hac lege inserta, & superius relata (*ergastula recognovit . . . Diuturnorum reorum, & ex quorum sordibus nihil aliud quam voluptas inimicis quaereretur, nomina abolevit*) exponere. Sane omni procul dubio laudatus Auctor jus privati carceris, quo creditores in debitores suos utebantur, ab Octavio abrogatum ostendit: nam si in legem peccabat, qui per vim creditum repetebat, suæque auctoritate vindicabat, dixeris sane privatum carcerem vetitum, nec profecto præter rem. Si enim jus hoc cum democratico regimine conveniebat, quum Majestas penes Populum maneret, nequaquam vero affirmari id debet sub Monarchia, ubi jus vitæ, & necis, atque in omnium statum potestas penes unum residere debet.

§. V.

§. V.

*Ad legem Juliam de adulteriis, quidque sit adulterium, & a quibus committatur.*

**J**Am ad legem Juliam de adulteriis coercendis pervenimus. Sed præ omnibus velim advertas, quam rationem tenuerit Augustus in legibus condendis, ut civium felicitati consulere, & novi regiminis firmitatem stabiliret. Primo quidem leges ad Civitatis tutamen, ornatumque tulit, ut curam illius præseferens, omnes ad sui amorem alliceret; deinde per legem Juliam, & Papiam omnem vim adhibuit, ut Urbem civibus, factionum furore exhaustam, repletet, ærarium jamdiu expilatum locupletaret, atque a vaga venere ad matrimonii castitatem civium mores, metu poenarum, & præmiorum spe, impelleret. Hinc munita per has leges ad bonam frugem via, vim publicam, & privatam coercuit, ut quies facta recta foret. Sed incassum hæc omnia, si matrimonii castitas polluat, si fallatur conjugii fides, si familiarum deturpetur splendor, atque aliena soboles per adulterium supponatur. Si enim non stat fides conjugalis, quænam reliquæ erunt integra? Quænam dissidia, bonorumque jactura non oborietur? Itaque jure merito Augustus postquam a venere vaga Cives avertit, & vim repellere conatus est, matrimonii castitatem intemeratam servari per legem nostram jussit; quum & in ceteris rebus tranquillitas esse minime possit, ubi adulteria perpetrantur.

Quum igitur tot tantaquæ mala ex adulteriis proficiantur, quid mirum si apud gentes omnes gravissimis poenis hoc in crimen animadversum sit? Illud autem puniri non tam scripta lex, quam ratio omnibus insita suadet. *Nec si, regnante Tarquinio (a), nulla erat Romæ scripta lex de stupris, ideo non contra illam legem sempiternam Sensus Tarquinius vim Lucretiæ attulit. Erat enim ratio profecta a rerum natura, & ad recte faciendum impellens, & a delicto avocans, quæ non*

(a) Cic. lib. 2. de L. L. cap. 4.

*non sum denique incipit len esse cum scripta est. Orta est autem simul cum mente Divina.* Hinc jure merito ubique terrarum criminum gravissimum adulterium existimatum fuit, vel apud gentem illam, quæ libidini maxime indulgeret, ut Parthi fuere, apud quos nihil prorsus poenis plectebatur, præterquam adulterium (a). Lacedæmonios, si quem diris devoverent, nulla alia imprecatione usos literis proditum est, quam ut adulterio domus ejus foedaretur (b). Apud Græcos omnes receptum fuit, ut adulteri impune possent occidi. Hæc quum ita sint, haud reor ante legem nostram nullam aliam Romæ fuisse contra adulteros. Etenim Marci Catonis Gellius (c) nobis hæc verba servavit: *In adulterio uxorem tuam si deprehendisses, sine judicio impune necares: illa te, si adulterares, digito non auderes contingere, neque jus est.* Sed nos rem paullo altius more nostro repetentes, viro, ex Romuli instituto, jus necis in adulteram fuisse, dummodo rem cum cognatorum consilio peregisset, facile affirmamus. Nam quum Romulus occidi mulierem permisisset, quæ vinum bibisset, qui proximus intemperantiæ gradus a vino ad venerem inconcessam esse soleat; fas erit hinc colligere, & adulteram potuisse a viro occidi. His præmissis, rem ipsam pertractamus.

Quantum Romæ Augusti tempore impudicitia ferveret, fat est in comperto: nam lege hac nostra vulgata, ne ipsius quidem legislatoris domus procul erat ab adulteriis; quum & filiarum, & neptis adulteria adeo pernota essent omnibus, ut Principi legis nostræ poenam vel in suos exercere opus fuerit. Necesse igitur maximopere fuit legem condere, ut cohiberetur impudicitiae licentia. Erymon adulterii quod attinet, mirum quot in origines se traxerint Grammatici. Sed quia nos, vocularum notationibus prætermisissis, de rebus magis solliciti sumus, certum habemus adulterare pro corrumpere acceptum esse, ut quum dicimus adulterinos nummos, pecuniam adulterare. Est igitur adulterium vitiatio, ac corruptio ejus, quæ al-

(a) *Justin. lib. 4. cap. 3.*

(b) *Suida verb. adulter.*

(c) *Lib. X. cap. 23.*

alteri nupta est. Hinc iustæ nuptiæ ubi sunt, ibi & adulterium, si conjugis frangatur fides. Itaque quum penes Romanos inter servum, & ancillam non nuptiæ intercederent, sed contubernium; ea de causa in corruptorem ancillæ non poena adulterii, sed injuriarum, vel legis Aquiliæ animadvertabatur. Sed pro muliere nupta intelligo eam, quæ honeste vivit, pudicitiamque suam minime prostituit, aut artem ludicram exercet: quæ omnia quum longiori disquisitione indigeant, opus est, ut a fontibus suis reperantur.

Ignominiosæ feminæ sunt, quæ stola matronali, idest, pudore, abjecta lenocinium faciebant, artemque ludicram, si-ve operas suas in scenam saltandi, vel cantandi causa locabant. Erant autem istiusmodi femellæ a poena legis nostræ immunes; dummodo tamen apud Ædilem nomen suum professæ essent: putabant enim antiqui, satis posse effrenem mulierum impudicitiam coerceri, si cogerentur eam publice, non sine turpi nota, penes Ædilem profiteri. Si vero nec id quidem impediret, quominus mulier improbam hanc professionem iniret, lex eam tolerabat, habebatque immunem a poena. Verum quum multæ ad evitandam legis Julæ poenam, utque luxuriarentur impune, hanc professionem facerent, vel in scenam operas locarent, vel lenocinium exercerent; provide S. C. sub Tiberio provisum, ne hæc fraus extra legem esset. Ita autem rem hanc enarrat Tranquillus sub Tiberio: *Famosæ feminae, ut ad evitandas legum poenas, jure, ac dignitate matronali exolverentur, lenocinium profiteri cœperant: Quæ ex juventute ordinis utriusque profligatissimus quisque, quominus in opera scenæ arenæque edenda S. C. tenerentur, famosi judicii notam sponte subibant: Eos, easque omnes, ne quod refugium in tali fraude cuicumque esset, enilii poena affecit. Verum quamvis eæ, quæ professionem hanc iniissent, extra poenam legis fuerint; non tamen omnibus sine discrimine impudicitiam profiteri licebat, sed illis tantum, quibus Ædilis indulgebat, vilioribus nempe quibuscumque. En verba Taciti (a): Eodem anno gravibus Senatus decretis libida feminarum*

coer-

(a) II. Ann.

*coercita, cautumque ne quæstum corpore faceret, cui avus aut pater, aut maritus eques Romanus fuisset. Nam Vestilia prætoris familia genita, licentiam stupri apud Ædiles vulgaverat, more inter veteres recepto, qui satis pœnarum adversus impudicas in ipsa professione flagitii credebant. Exacta est a Tirdio Labeone cur in uxore delicti manifesta ultionem legis omisisset? atque illo prætendente, sexaginta dies ad consultandum datos nec dum præterisse satis Visum de vestilia statuere eaque in insulam scriphon abdita est. Ex quibus vide non omnibus per S. C. datum ut impudice viverent, etiam si id professæ fuerint, sed iis tantum quibus lex non obfisteret. Itaque ut vela contrahamus, erant extra legem illæ, quæ pudicitiam suam vulgaverant, artemque ludicram extra fraudem professæ fuerant. Sed quæ supra dicta sunt velim intelligas de vetusto Romanorum jure, nam jure novo, quum nuptiæ iniiri possent cum lena, scenica, & tabernæ famula, istæ quidem adulterium patrabant, si fidem conjugii fallerent; ibi enim adulterium est ubi matrimonium intercedit: quod sane vidit Sex. Cæcilius, in cujus ore frequens illud erat *legem Juliam ad omnia matrimonia pertinere, nec solos Attridas amare uxores suas*. Sed nos ultra progrediamur.*

Quæstio moveri solet, an, si uxor pudicitiam vulgo prostituerit, incidat in adulterii crimen, qui cum ea rem habuerit. Sane heic pugnare videntur Ulpianus, & Diocletianus; nam hic in *lege 22. hoc tit.* ait, *si ea quæ stupro tibi cognita est, & passim venalem formam exhibuit, ac prostitutam meretricio more vulgo se præbuit, adulterii crimen in ea cessat*. Sed contra Ulpianus scripsit in *l. 13. §. 2. hoc tit.*. Sed in *ea uxore potest maritus adulterium vindicare, quæ vulgaris fuerit*. Quam antinomiam antequam componamus, brevi exponendæ sunt futiles Pragmaticorum opiniones. Quidam crediderunt (a) primum mulieris corruptorem adulterii pœna teneri, ceteros vero deinceps minime; quum extra ordinem, & mitius puniendū sint, ipsa muliere excepta, quæ semper ut adultera existimatur, sed rectius tradidit Doctis. Anton. de Mat-

[a] *Clar. d. adulter. Farinac. quæst. 14.*

Matthæi Doctorum facile Princeps opinionem hanc a fori cancellis, quibus aliquando hæsit, prorsus eliminandam, hac innixus ratione. Ibi adulterium est, ubi uxor corrumpitur. Sed matrimonium nec per unius, vel alterius, ne per multorum quidem adulteria solvitur, sed jure civili per sententiam tantum Judicis, postquam scilicet maritus inscripserit in mulierem, probatoque crimine uxori repudium miserit, ut ex novella 117. cap. VIII. §. 2. Igitur mœchi erunt omnes, qui cum alterius uxore rem habuerunt. Atque hoc, ne in procacis feminæ potestate sit flagitiis suis solvere sanctissimum matrimonii vinculum, & multis vectoribus receptis posteriores de poena legis subducere. Verum quæ ratione Ulpianum cum Diocleriano conciliabimus? Hac quidem distinctione inter mulierem, quæ marito deserto, passim, & sine delectu meretricio more se prostituit, & eam, quæ stupratoribus quidem corpus committit, non tamen maritum deserit, nec passim, nulloque habitu delectu. Atque in priori quidem specie crimen adulterii cessat, in posteriori vero minime. Quæ sane præclara conciliatio ipsius laudati Auctoris est, & a me ejusdem verbis exscripta. Quæ autem dixi de matrimonii nempe solutione per adulterium, velim accipias de jure tantum civili, non vero de Canonico, quo per adulterium quoad torum tantum, minime vero quoad vinculum matrimonium dissolvitur.

Ab justis uxoribus ad injustas gradum faciamus, ut, an adulterium & in iis sit, videatur. Porro ea injusta dicebatur uxor, quæ sine legitimis solennitatibus ducta erat, nempe si non accepta aqua, & igni, vel sine coemptione; erat etiam uxor injusta, quam uxorem ducere jura non sinebant, ut si peregrina, vel a peregrino civis ducta sit, si minor duodecim annis, vel ea, cum qua incestum committitur, vel filia familias, sine parentum consensu. His prælibatis cum ipso Ulpiano (a) sic dicamus. *Plane sive justa uxor fuit, sive injusta, accusationem instituere vir poterit. Nam ut Sen. Cæcilius ait, hæc lex ad omnia matrimonia pertinet.* Itaque quamvis legis nostræ verba ad justam uxorem summo jure videan-

E e e.

tur

(a) L. si uxor §. 1. D. ad l. Jul.

tur pertinere, attamen conniventibus oculis, ea etiam ad injusta matrimonia proferuntur, ut tamen vir accuset mulierem jure extranei, non jure mariti, ut & ipse Ulpianus subdit in eadem lege §. IV. Sed quid de sponsa? Idem profecto affirmandum, Ulpianus enim expresse ait §. III. ibidem. *Divi Verus, & Antoninus rescripserunt, etiam in sponsam hoc idem vindicandum: quia neque matrimonium qualecumque, nec spem matrimonii violare permittitur.* Sic autem Deus loquutus est per Oseam IV. 13. (a): *filiae vestrae fornicabuntur, & sponsae vestrae adulterae erunt.* Quem locum exponens Hieronym. in cap. quapropter 27. quaest. 1. apud Gratian. ait. *Notandum est quod in filiabus dicit fornicationem futuram, in conjugibus adulteria, quae sponsali conventionione initiantur, & commixtione corporum perficiuntur.* Sunt igitur sponsae quasi initiae conjuges, ut qui eas violet, conjugium ipsum offendere videatur. Sed velim advertas quam proclive sit in jure errare, si rerum origines ignorentur.

Etenim vir apprime doctus Covarruv. acriter tenet non esse adulterium, si forte violatur sponsa de futuro, bene vero de praesenti. Quo praemisso discrimine credidit Ulpianum de adulterio in sponsa per verba de praesenti intelligendum esse. Sed quam inepta haec distinctio? si is antiquum nuptiarum morem pernosset, haud quidem tam manifesto errasset. Nam sponsae apud veteres a spondendo dictae sunt, eoquod solemne apud eos erat ante initum matrimonium uxores spondere, hoc est futuras stipulari. Quapropter quum penes Ulpianum aliud sponsalia non sint, quam mentio, & promissio futurarum nuptiarum, id excogitavit Covar. quod directe eidem Jurisconsulto adversatur. Dura sane provincia est, jus Romanum pernosse; si ab historia mens aliena sit.

§. V.

(a) IV. ver. 13.



## §. V. &amp; U L T I M U S .

*De adulterii pœna, & quinam de eo accusare possint.*

**J**Am differuimus quid sit adulterium, quive & quæ adulterii teneantur, reliquum est ut nunc sermonem instituamus de pœna adulterii. Sane pœna hæc alia ab aliis ad Justinianum usque inflicta fuit; sed quum nos de Augustali jurisprudentia differere polliciti sumus, in hac tantum, ne a proposito discedamus, immorabimur. Concors est eruditorum opinio legis Juliæ de adulterio pœnam fuisse relegationem. Neque mireris quod dixerit Tribonianus capitis pœnam: siquidem id huic in more fuit, ut in legibus pœnabilibus, si quid forte acerbius a Justiniano sancitum fuerit, id plerumque veteribus tribueret; atque hoc, ne Imperatori suo crearetur invidia. Ceterum excidit e Triboniani memoria illud Papiniani responsum in *l. Claudius 13. de his, quæ ut indignis*, ubi Mævius dicitur damnatus adulterii duxisse Semproniam uxorem non damnatam, eamque heredem instituisse, quod sane fieri non potuisset, si morte naturali adulter puniendus fuisset.

Sed heic investigare animum lubet, cur in Romanorum mores adeo tunc temporis in luxuriam debacchantes, mitior hæc pœna, quæ nec libertatem, neque Civitatem adimeret, fuerit statuta. Et quidem lex pœnalis quum ea esse debeat, ut peccandi voluptatem exsuperet, per quam scilicet homines metu majoris mali quam voluptas peccandi sit, deterriti se se a flagitiis abstineant, dixeris relegationem hanc non tanti fuisse, ut mores Romanorum sanare posset; sed secus judicaveris, si Augusti ingenium introrsum inspicias, sic enim ille in pœnis inferendis adniscus est, ut ex in speciem mitiores viderentur, re autem vera tanta acerbitate essent, quanta opus esset ad corruptos mores ad frugem redigendos. Itaque quamvis relegatio levior in adulteros pœna videatur, spectatis tamen Urbis deliciis, a quibus aberant, & rerum omnium penuria, in quam incidebant, non poterat quin as-

perior existimaretur. Jure igitur merito ejus acerbiter poetam accusat (a).

*Qualis erat nuper tragico pollutus adulter*

*Concubitu: qui tum leges revocabat amaras.*

*Omnibus, atqui ipsi Veneri Martique timendas.*

Sed ut res magis pateat, huc Tranquilli verba appositissima afferre duxi. Is enim relegationem Augusti filiae, & neptis enarrans sic scripsit (b). *Relegatae usum vini, omnemque delictiorem cultum ademisse, neque adiri a quoquam libero, seruoque, nisi se consulto, permisit, & ita ut certior fieret, qua is aetate, qua statura, quo colore esset, etiam quibus corporis notis, vel cicatricibus.* Ex quibus vide quantum acerba Romanis fuerit relegatio. Siquidem poenas non ex nostris moribus, sed pro ea tempestate, in qua latae sunt, expendamus oportet.

Sed præter hæc singularia quædam sunt in lege nostra ad poenam in tanti flagitii reos adaugendam. Nam vindicem illum gladium, quem Augustus & Patri in filium, & domino in servum in nova hac Reipublicæ forma abstulerat, patri in filiam, ejusque adulterum, & in lenones in ipso scelere deprehensos viro concessit, ut ita mortis imminentis metus, mulieres, adulteros, atque lenones ab hoc flagitio absterret. Præter hæc adjecta est infamia, atque amissio dotis, qua mulier plectebatur, de quibus sane omnibus singularim agendum est. Permittitur patri adulteræ, ut occidat adulterum quemlibet domi suæ, vel generi in ipsa turpitudine, actuque obscæno, ipsoque in opere perpatrando deprehensum, modo simul cum adultero eodem impetu interimat & filiam. Quam ingentem sane potestatem ideo lex indulgit patri, quia eum parcius ea usum persuasum erat. Num enim suæmet sobolis amor finit, ut occidat adulterum, si & filia simul interficienda est? Quamvis domus suæ ignominia, atque ira in adulterum excandescens animum ejus vehementer exasperent, vincit tamen procul dubio sanguinis sui caritas, quæ ut parcat adultero, suadet, quum plus sibi ex filia,

(a) *Juvenalis saty. 2. ver. 29.*

(b) *Octav. cap. 65.*

filiae morte lugendum esset, quam ex morte adulteri exultandum. Hæc de patre lex sanxit, quæ quum sit poenalis, minime extenditur ad Avum, neque filiam emancipatam complectitur.

Ceterum potestas hæc uxorem interficiendi adulterumque viro facta non est, quum nulla cognati sanguinis inter hos intercedat caritas, ut credere liceat virum, ut mulierem fervet, non interfectorum adulterum: adeo enim dolor recentis injuriæ amorem conjugalem evertit, ut nihili pendat uxoris vitam, dum ne viventem relinquat suæ ignominiae auctorem. Itaque vir neque adulteram, neque adulterum occidere poterit, secus vero lege Cornelia de sicariis tenebitur, aliqua tamen adhibita lenitate. Nam Imperatores aliquanto iræ parcentes exulcerati conjugis mitigavere poenam, censueruntque eum in opus perpetuum tradendum, si esset humilior, honestiorem vero in insulam relegandum. Sed quamvis vir interficere nequeat adulterum, excipiendæ tamen sunt personæ turpes, nempe lenones; qui artem exercebant ludicram, qui lucri causa in scænam producebantur, quique demum per Prætoris edictum infamia notati erant. Hos profecto impune potest maritus interficere, verum non ubique, sed domi suæ deprehensos, ubi scilicet pudicitia prostituta magis ejus animum exulcerat. Quapropter Quintilianus (a) ait. *Occidisti adulterum, quod lex permittit, sed quia in lupanari cades est;* sed adultero occiso, statim a se dimittere debebat uxorem, ne non tam honestatis, quam ultionis causa videretur hominem interemisse, quod leges vix ferrent. Sed quum quos interficere licet, magis eos fas sit membro aliquo mutilare, sæpe mariti adulteros, aliosque criminis hujus conciliatores membris detruncabant. Ex quo sane more quum Poetæ dictæria, jocosque struxerint, ad hæc liceat nobis ex his pauca quædam excerpere, Horatius ita (b)

*Hic se præcipitem, recto dedit, ille flagellis  
Ad mortem casus, fugiens hic decidit acrem  
Prædonum in turbam: dedit hic pro corpore nummos  
Hunc*

(a) *Lib. V. cap. X.*

(b) *Lib. 1. serm. saty. 2. ver. 41.*

*Hunc perminxerunt calones: quin etiam illud  
Accidit, ut quidam testes, caudamque salacem  
Demeteret ferrum. Jure omnes, Galba negabat. & Mar-  
tial. (a).*

*Quis tibi persuasit nares abscindere mæcho?  
Nil hac peccatum est parte marite tibi.  
Stulte quid egisti? nihil hic tua perdidit uxor.  
Cum sis salva sibi mentula Deipbobii*

Et Plautus omnium lepidissime (b).

*Facio, inquit, quod Mæchi non solent  
Salva vasa, domum reporto, ubi vasa sunt virilia, quæ  
aliquando mœchis amputabantur, unde Terentius in Eunuch. (c)  
minatur id quod mœchis solet.*

Præter hæc mulier adultera dotis jacturam patitur, nam maritus sibi retinet dotem, donationem propter nuptias, & ex paraphernis tantam partem, quanta est tertia dotis, dummodo tamen ipse leno non fuerit, quod ex jure ante legem Juliam proficisci scribunt eruditi, nempe ex veteri judicio, quod de moribus appellabatur, quoque uxor ob detectam ejus turpitudinem sexta dotis parte multabatur, vel octava, si turpitudine esset levior, quæ actio, quia per legis Juliz judicium filebat, ideo poena illius in legem ipsam Juliam conjecta est. Nolim tamen intelligas virum totam dotem ex veteri lege Julia, prout fuit ab Augusto perlata, retinuisse. Nam pars tantum illius penes maritum manebat; reliquam Fisco occupante, quamvis ex insequentibus Principum Constitutionibus totam deinde vir perciperet. Habet etiam hoc crimen in accusatione sua multa singularia, quum ex lege nostra accusandi facultas daretur omnibus, quia judicium publicum erat. Maritus, & pater accusabant, ut injuriam suam ulciscerentur; extranei vero ut publicam honestatem ruerentur. Sed maritus neque uxorem, neque adulterum accusare poterit, nisi ante uxorem dimiserit, deinde vero electio sibi erit, utrum adulteram, an adulterum corripere velit. Potest tamen maritus non secus ac pater, vel jure mariti, sive pa-  
tris

(a) *Lib. 3. epig. 84.*

(b) *Actio. IV. Scan. 2. ver. 40.*

(c) *Act. V. sc. V. ver. 15.*

tris accusare, vel jure extranei; si primum, ambobus sexaginta dies præstituti sunt, quibus elapsis querelam struent jure extranei. Discrimen autem ingens est; nam jure mariti, vel patris accusantes ceteris omnibus præferuntur, nec calumniæ poenam, si crimen non probaverint, timebunt, quum nec inscribere trepidanti stilo teneantur. Cur enim criminaberis eos de calumnia, quos justo tactos dolore ad accusandum impulsos credas? Minor etiam sui matrimonii injuriam persequuturus accusare poterit; nequaquam vero si qua sibi comperta sit alienarum uxorū violatio, ne inconsultæ ætatis calore passim matrimonia turbentur. Item prohibet lex Julia servos adulteræ, vel Patris ejus intra sexaginta dies mitteri, ne de questione subducantur. Hæc sunt quæ de hac lege dicere habui. Constitutiones enim insequentium. Principum, quæstionesque a Pragmaticis interjectas lubenter omitto, quum instituti mei ratio, ut dixi, sit Augustalem Jurisprudentiam ex publico tunc temporis regimine, atque ex Populi moribus exponere. Sed velim advertas Augustum per legem hanc non tantum adulteria, sed & stuprum, incestum, & quæcumque alia impuditiæ monstra prohibuisse, nam quum id in votis haberet, ut deperditam in luxuria Civitatem sanaret, par erat ut ejus species omnes vetaret. Porro legi nostræ prælusisse mihi videtur Plautus quamvis diu ante Augustum vixerit. Sic enim hic in Curcul. A. I. S. I.

*Ita tuum amorem conferto semper si sapias,  
 Ne id, quod ames Populus si sciat, tibi sit probro..*

*Semper curato, ne sis intestabilis,  
 Quod amas, amato testibus præsentibus.*

*Pb. Quid istuc est verbi? Pa. Caute ut incedas via:*

*Pb. Quin leno hic habitat. Pa. nemo hinc prohibet,  
 nec vetat*

*Quin quod palam est venale, si argentum est, emas.*

*Nemo ire quæquam publica prohibet via.*

*Dum ne per fundum septum facias seminam,*

*Dum te te abstineas nupta, vidua, virgine*

*Juventute, & pueris liberis, ama quid lubet.*

Verum ad absolutam rei hujus tractationem duo mihi expendenda supersunt, ex quibus quantum Princeps noster ad-

*Hunc perminxerunt calones: quin etiam illud  
Accidit, ut quidam testes, caudamque salacem  
Demeteret ferrum. Jure omnes, Galba negabat. & Mar-  
tial. (a).*

*Quis tibi persuasis nares abscindere mæcho?  
Nil hac peccatum est parte marite tibi.  
Stulte quid egisti? nihil hic tua perdidit uxor.  
Cum sis salva tibi mentula Deiphobii*

Et Plautus omnium lepidissime (b).

*Facio, inquit, quod Mæchi non solent  
Salva vasa, domum reporto, ubi vasa sunt virilia, quæ  
aliquando mœchis amputabantur, unde Terentius in Eunuch. (c)  
minatur id quod mœchis solet.*

Præter hæc mulier adultera dotis jacturam patitur, nam maritus sibi retinet dotem, donationem propter nuptias, & ex paraphernis tantam partem, quanta est tertia dotis, dummodo tamen ipse leno non fuerit, quod ex jure ante legem Juliam proficisci scribunt eruditi, nempe ex veteri judicio, quod de moribus appellabatur, quoque uxor ob detectam ejus turpitudinem sexta dotis parte multabatur, vel octava, si turpitudine esset levior, quæ actio, quia per legis Juliæ judicium filebat, ideo poena illius in legem ipsam Juliam conjecta est. Nolim tamen intelligas virum totam dotem ex veteri lege Julia, prout fuit ab Augusto perlata, retinuisse. Nam pars tantum illius penes maritum manebat; reliquam Fisco occupante, quamvis ex insequentibus Principum Constitutionibus totam deinde vir perciperet. Habet etiam hoc crimen in accusatione sua multa singularia, quum ex lege nostra accusandi facultas daretur omnibus, quia judicium publicum erat. Maritus, & pater accusabant, ut injuriam suam ulciscerentur; extranei vero ut publicam honestatem tuerentur. Sed maritus neque uxorem, neque adulterum accusare poterit, nisi ante uxorem dimiserit, deinde vero electio sibi erit, utrum adulteram, an adulterum corripere velit. Potest tamen maritus non secus ac pater, vel jure mariti, sive patris

(a) *Lib. 3. epig. 84.*

(b) *Ætio. IV. Scan. 2. ver. 40.*

(c) *Æt. V. sc. V. ver. 15.*

tris accusare, vel jure extranei; si primum, ambobus sexaginta dies præstituti sunt, quibus elapsis querelam struent jure extranei. Discrimen autem ingens est; nam jure mariti, vel patris accusantes ceteris omnibus præferuntur, nec calumniæ pœnam, si crimen non probaverint, timebunt, quum nec inscribere trepidanti stilo teneantur. Cur enim criminaberis eos de calumnia, quos justo tactos dolore ad accusandum impulsos credas? Minor etiam sui matrimonii injuriam persequuturus accusare poterit; nequaquam vero si qua sibi comperta sit alienarum uxorū violatio, ne inconsultæ ætatis calore passim matrimonia turbentur. Item prohibet lex Julia servos adulteræ, vel Patris ejus intra sexaginta dies manumitti, ne de quæstione subducantur. Hæc sunt quæ de hac lege dicere habui. Constitutiones enim insequentium. Principum, quæstionesque a Pragmaticis interjectas lubenter omitto, quum instituti mei ratio, ut dixi, sit Augustalem Jurisprudentiam ex publico tunc temporis regimine, atque ex Populi moribus exponere. Sed velim advertas Augustum per legem hanc non tantum adulteria, sed & stuprum, incestum, & quæcumque alia impuditiæ monstra prohibuisse, nam quum id in votis haberet, ut deperditam in luxuria Civitatem sanaret, par erat ut ejus species omnes vetaret. Porro legi nostræ prælusisse mihi videtur Plautus quamvis diu ante Augustum vixerit. Sic enim hic in Curcul. A. I. S. I.

*Ita tuum amorem conferto semper si sapis,  
Ne id, quod ames Populus si sciat, tibi sit probro.*

*Semper curato, ne sis intestabilis,  
Quod amas, amato testibus præsentibus.*

*Pb. Quid istuc est verbi? Pa. Caute ut incedas via:*

*Pb. Quin leno hic habitat. Pa. nemo hinc prohibet,  
nec vetat*

*Quin quod palam est venale, si argentum est, emas.*

*Nemo ire quæquam publica prohibet via.*

*Dum ne per fundum septum facias semitam,*

*Dum te te abstineas nupta, vidua, virgine*

*Juventute, & pueris liberis, ama quid lubet.*

Verum ad absolutam rei hujus tractationem duo mihi expendenda supersunt, ex quibus quantum Princeps noster ad-

adnifus fit, ut ad castitatem, ac pudicitiam Cives suos revocaret, pateat. Sunt autem hæc tum prohibitio ex ipsa lege Julia de adulteriis ne fundus dotalis Italicus alienaretur a viro, invita uxore, vel ea consentiente pignori obligaretur; tum S. C. Vellejanum, quo cautum ne uxor pro viro intercederet. Sed quid hæc ad pudicitiam? Maxime, nam quum p̄r id tempus divortia essent frequentissima, periculum sane erat, ne vir dote deperdita mulierem domo expelleret. Itaque hoc modo frenum quoddam divortiis, ex quibus ad impudicitiam transitus fit, injectum est. Jure igitur merito caput hoc de *fundo dotali Italico* legi Juliz de adulteriis additum est a Paulo *recep. sent.* 11. 21. quippe quod unum idemque argumentum respicit. Eadem est ratio, cur per legem Papiam statutum, ut divortium nonnisi coram septem testibus fieret, nempe ut favore castitatis conjugalium divortiorum libertas coerceretur. Sed lex prohibuit fundum Italicum alienari invita uxore, quia si fundus esset in solo Provinciali, nulla uxori vel consentienti potuisset nocere alienatio, quum proprietas esset Populi Romani, ac proinde nullus daretur locus usucapioni contra mulierem dotem suam vindicantem. Additur obligari fundum dotalem non posse, ne uxore quidem consentiente, mulieres enim sicut difficilior ad alienandum inducuntur, sic proniores sunt ad obligandum.

Sed de S. C. Vellejano magis sollicitus sum, cur nempe prohibitio ne mulier pro viro intercedat, pudicitiz servandæ profit. Sane sub Augusto primum mulierum fidejussionibus cautum, dubitare nos minime sinit Ulpianus, qui sic ait (a). *Et primo quidem temporibus D. Augusti, mox deinde Claudii edictis eorum erat interdictum ne feminae pro viris suis intercederent. Postea factum est S. C. quo plenissime feminis omnibus subventum est.* Non me latet per hoc mulierum facilitati, qua pro viro, aliisque intercedunt, prospectum esse, sed præter id earum etiam honestati consultum esse docent Jurisconsulti, Ulpianus enim sic ait (b) *Feminae ab omnibus officiis civilibus, vel publicis remotæ sunt; & ideo nec ju-*

(a) L. 2. D. ad S. C. Vellej.

(b) L. 2. D. de regulis juris.



*judices esse possunt: nec magistratum gerere: nec postulare: nec pro alio intervenire, nec procuratrices existere.* Itaque prohibita est mulierum intercessio, non tam propter infirmitatem consilii, quam ut earum pudicitia servaretur, ne virilibus officiis sese miscentes honestatem suam in discrimen conjicerent. Hinc scripsit Callistratus (a) *feminae remotae videntur ab officio argentarii, quum ea opera virilis sit.* Quæ quum ita sint, dixeris sane omnem Augustum adhibuisse curam, ut mulieres servarent pudicitiam, atque ideo virilia officia eas exercere vetuisse, inter quæ merito intercessionem pro viro enumerantur.

## C A P U T XI.

*De regiminis Provinciarum forma ab Augusto instituta, legibusque pro eisdem latis.*

**H**Actenus edisseruimus de legibus Augusti; quæ regimen Civitatis, Civiumque mores respiciunt. At vero quum iis Provinciæ non tenerentur, nisi expressis verbis intra earum statuta comprehensæ essent, par ideo est, ut expositis Imperatoris nostri constitutionibus, quæ ad Urbem pertinent, ad eas deveniamus, quæ Provincias respiciunt, non minus enim illæ, quam istæ novo regimini respondere debebant. Sed ante omnia advertendum est, Urbanas leges eo fucō oblitæ, ut pristinam libertatem servare viderentur, atque id ad invidiam immutatæ Reipublicæ avertendam: Provinciales vero nullo prope arcano involutas. Provincialium enim hominum parum profecto intererat, uni magis, quam pluribus parere, modo in duriori conditione non essent. Itaque Augusti studium, quod ad Provincias, in eo tantum versabatur, ut illarum incolæ ab inopia, ad quam redacti fuerant Magistratum avaritia, sublevarentur; atque ut Consules, & Prætores, quibus earum cura credebatur, non ea militum vi, divitiarumque copia pollerent, quibus novas res molirentur. Itaque in Provincialibus Augusti legibus recensendis, id mihi

F f f

erit

(a) L. II. D. de edendo.

erit curæ, ut palam faciam Principis nostri studium, quo homines illi ad conditionem meliorem redigerentur, coercita nempe legibus suis Præsidum avaritia, atque eorundem potestate, ne quid inde timeret, minuta. Sed quum hæc omnia satis a me exponi nequeant, nisi antea specimen veluti quoddam Provinciarum florente Republica tradatur, inde propterea exordiri ratus sum, ut ostendam non Urbis tantum, sed & Provinciarum formam novatam, ut cuncta exorienti Monarchiæ apte congruerent.

## §. I.

*De antiquo jure Provinciarum.*

**E**A fuit Romanorum in victos mira solertia, ut magis humanitatis officiis, quam armorum vi, atque metu eos regerent. Hinc penes eosdem consuetudo invaluit, ut duriori, aut meliori loco haberentur, qui magis, minusve eorum arma defatigassent. Hinc profecto ortum est varium illud jus coloniarum, municipiorum, Præfecturarum, Provinciarumque prout cujusque gentis meritum postularet, aut rerum novarum metus suaderet. Sed in Orbe Romano durissima erat conditio Provinciarum, quæ suis fortunis, legibus, Magistratibusque expoliatae ab arbitrio victoris pendebant. Nolim tamen ex hoc inferas adeo Provinciales pressos, ut omnia per fas, perque nefas in eos, prout adluberet Præsidi, licerent. Vide quam salutaria præcepta sapientissimus ille Romanorum Tullius Q. Fratri tradiderit. *Non itineribus tuis (ait) perterriti homines; non sumtu exhauriri; non adventu commoveri; esse quocumque veneris & publice, & privatim maximam lætitiā, quum Urbs custodem, non tyrannum; domus hospitē, non expilatorem recepisse videatur, & denuo. Præclarum est summo cum imperio fuisse in Asia triennium, sic ut nullum te signum, nulla pictura, nullum vas, nulla vestis, nullum mancipium, nulla forma cujusquam, nulla conditio pecunie (quibus rebus abundat illa Provincia) ab summa integritate, continentiaque deduxerit.*

Ait Festus, *Provinciae appellantur, quod Populus Romanus*

nus eas provicit ideo ante vicis. Itaque victor profligatis hostibus, debellatisque rem hoc modo componebat. Nuncios de parva victoria cum hastis laureatis, litterisque lauro involutis Romam mittebat, consulebatque Senatum, quas leges victis dari placeret. Senatus vero decem mittebat Senatores, ex quorum consilio Imperator de hostium fortuna statueret. Tum ille legatos hos consulendo victis certas leges præscribebat, & Civitatibus aliis de Populo Romano benemeritis suis legibus, atque Magistratibus uti indulgebat, alias vero omnibus his, bonisque exspoliabat. Quidquid autem Imperatori legatos consulenti visum esset, silentio per præconem indicto publice Civibus omnibus indicabatur, qua re absoluta ille Romam properabat relicto aliquo, qui præflet. Atque hoc est in Provinciæ formam redigere. Sed istiusmodi leges in triplici versabantur differentia; alias enim victor dabat ex legatorum consilio, quas Præsidibus deinde observandas tradebat, ferebant alias Romani, illas scilicet, quibus & Provinciales tenebantur: aliæ demum sunt, quas Præsides sub auspicio Magistratus Edictis suis condebant, quibus edicebant, quo ordine, quaque ratione jus de rebus ad jurisdictionem suam pertinentibus dicturi essent. Præter hæc vectigalia erant, quæ Romanis Provinciales pendebant. Sed ex Magistratuum potissimum Edictis jus Provinciale ortum est, in quibus concinnandis sic se gerebant. Quædam ex Prædecessorum Edictis in sua transferrebant, quæ propterea *Tralatitia* dicebantur, quædam ex edictis Urbanis excercebant: alia demum pro temporum rerumque conditione ipsi nova adjiciebant, ut quæ ad administrationem Provinciæ, sumtus, & rationes Civitatum, pactiones cum publicanis, usuras, syngraphas, hereditates, possessiones aliæque hujusmodi pertinebant. Quæ profecto omnia quum elegantissime Tullius prosequutus sit, ejus verba non sunt prætermittenda (a), Romæ ( inquit ) composui edictum, nihil addidi, nisi quod publicani me rogatus, quum Samum ad me venissent, ut de tuo edicto totidem verbis transferrem in meum. ( En partem tralatitii Edicti ) diligentissime scriptum caput est, quod pertinet ad minuendos sumtus Civitatum,

Fff 2

quo

(a) *Epist. ad Famili. III. 8.*

quo in capite sunt quædam nova salutaria Civitatibus, quibus ego magnopere delector. Atque hæc est pars Edicti novi. Tertiam vero partem ex eodem habes ad Atticum VI. I. breve (inquit) edictum est, quod duobus generibus edicendum putavi: quorum unum est provinciale, in quo est de rationibus Civitatum, de ære alieno; de usura, de syngraphis: in eodem omnia de publicanis, alterum quod sine edicto satis commode transigi non potest de hereditatum possessionibus, de bonis possidendis, magistris faciundis, vendendis, quæ ex edicto postulari, & fieri solent, tertium de reliquo iure dicundo reliqui. Dixi me de eo capere mea decreta ad Edicta Urbana accommodaturum. Ex quibus intelligis totius Edicti partes, & quæ in illis continerentur, secundum quæ Præses jus diceret.

Verum quia Provincia non legibus tantum suis privabatur, sed etiam Magistratibus, iisque parere debebat, quos eo Roma mittebat, post leges Provinciales, reliquum est ut de Magistratibus nonnulla differamus. Eorum, qui in singulas Provincias mitti solebant, alter generali nomine Præses nuncupabatur, alter vero Quæstor. Præsidum officio initio Prætores functi sunt, sed deinde, si quod grave immineret bellum, Consulibus Provincias regendas tradere mos fuit. Hinc nata divisio, ut Provincie alie essent Prætorie, Consulares alie, prout Prætoribus, vel Consulibus committerentur. Sed sub Augusto, qui cuncta in speciem pristinae libertatis, ad novum regimen componere studebat, alia nomenclatio inolevit. Nam quum is Provincias partitus esset cum Senatu; huic pacationes, ut immunis esset ab omni cura, & labore, quemadmodum simulabat, tradidit; sibi autem bellicosiores reliquit, ubi scilicet vis militaris versari debebat: haud enim voluit, ut legiones sub Senatus potestate essent. Quos autem Senatus mittebat, ii Proconsules veteri vocabulo in veteris libertatis honorem appellati sunt. Sed ab Imperatoribus missi varie dicti modo legati Augusti, Proconsules, vel Proprætores, Præfecti Augustales; Legati Caesarum, modo Consulares, Correctores, Juridici. His omnibus prælibatis, ac veluti confuse potius collectis, quam ordine suo enarratis opportunum jam est rem ipsam aggredi, atque ex dictis patefacere, quid novi induxerit Augustus, ut cuncta nascenti Monarchiæ congruerent.

§. II.

## §. II.

*De jurisdictione, & imperio Præsidum, Quæstorumque in Provinciis.*

Q Uum Romani Principatus in Provinciis fere robur esset, tum ob vim militarem, quæ ibi versabatur, tum ob annua vectigalia, quæ a Provincialibus ad ærarium pensitabantur, sane illarum administratio libera Repub. in Populi potestate erat; deinde vero in Senatus, vel Optimatum quorundam manum pervenit, prout cujusque valeret auctoritas. Sed rem ab origine sua repetendo invenio quotannis olim Consulibus, & Prætoribus a Senatu Provincias decretas, imperium autem lege Curiata, ut Doctissimo Sigonio visum, in comitiis a Populo datum, & si quo forte impedimento successor in Provinciam se conferre non posset, idem tunc Populus prorogabat imperium. En præclarum Livii locum lib. III. de bello punico. *Prorogatum Philoni imperium est, ut Proprætor Galliam eandem Provinciam obtineret cum iisdem legionibus, quibus Prætor obtinisset. Quod Lucio Veturio, idem in Cajo Aurunculejo decretum ab Senatu latumque, & de prorogando imperio ad Populum.* Verum anno Urbis sexcentesimo quarto ob quæstiones perpetuas institutas L. Calpurnio Pisone Trib. Plebis, & Censorino, ac Manicio Consul. alia invaluit consuetudo, nempe ut Prætores, qui Provincias sortiti essent, Romæ per annum, ut quæstionibus præessent, morarentur, deinde vero ad suam quisque Provinciam ex S. C. proficiscerentur. Hoc autem jus sæpe Populus adnitus est, ut Senatui eriperet, Provincias extra ordinem mandando, atque earundem imperium prorogando, in speciem quidem ut Magistratibus illis bene de Repub. merentibus gratificaretur, re autem vera ut Senatus a tanto jure excideret; quare Sempronius Gracchus, quamvis popularis libertatis studiosissimus, id tamen æquo animo ferre non potuit, atque ut Senatus suam pristinam auctoritatem reciperet, vehementer adlaboravit, nempe ut *Provincia futuris Prætoribus, ac Consulibus quotannis a Senatu decernerentur.*

Verum pulchrum est videre, quam semitam Sylla in hac Pro-

Provinciarum administratione persequutus sit . Et quidem quum is toto conatu Populi jura infringere studuisset, Senatusque auctoritatem augere adnitus esset, minime putandum est Provinciarum regimen, quod tanti intererat, penes Populum reliquisse . Hinc legem tulit, *ut qui Provincias ex S.C. obtineret, is imperium tandiu haberet, quoad in Urbem rediisset*. Id autem mire Populi labefactabat potentiam . Quum enim Senatus interesset, ne Provinciarum Magistratus mutarentur, tamdiu illi Provincias obtinebant, quousque Senatus successorem non misisset, nec sane eum mittebant, nisi quum e re sua esset . Itaque Senatus quum Aristocratiam maxime foveret, sæpe passus est, ut ii potissimum diu tenerent imperium, qui Populi possent imminuere auctoritatem . Sic Lucullus septem annos Ciliciæ, & Asiæ præfuit . Sed quamvis consilium hoc Senatus auctoritatem maximopere extolleret, fiebat tamen aliquando, ut is ad summam rerum adsurgeret, qui diuturno tempore in imperio fuerat, quemadmodum a Julio factum legimus . Quare suamet hic experientia doctus potentiam nonnisi ex hac imperii continuatione, & diuturna Provinciarum possessione oriri, ne & alii eadem ratione adversus se insurgerent, legem tulit, dum Dictator erat, *ut nemo Prætoriam Provinciam plus anno, Consularem plus biennio obtineret*. Verum eo interfecto, quum Principatum Antonius anhелaret, ejusque cardinem callide pernosset, mirum non est, quod hic viribus omnibus adniteretur, ut per Tribunos lex rogaretur, qua Consulares Provincias sexennium obtinerent, quod profecto ei inter maledicta Tullius objecit inquiring . *Quæ lex sæpius flagitata, quam ne Prætorie Provincie plus quam annum, quam biennium Consulares obtinerentur*. Et quidem jure merito ait *sæpius hanc legem flagitam* quum tanti interesset, ne longe protraheretur Provinciale imperium, quanti erat, ne per id summa rerum penes unum perveniret . Istiusmodi Provinciarum administrationem ab origine sua depromptam ad Octavianum usque perducere duxi, quo planius deinceps exponam, quas is rationes inierit, ne Provinciarum Magistratus adversus nascentem Monarchiam novis rebus studerent . Sed prosequamur modo cetera, quæ Præsidum Provincialium spectant potestatem .

De-

Decreta per Senatum Provincia, ejusque Magistratui a Populo lege curiata imperio mandato, Provinciæ ornamenta eodem S. C. decernebantur. Erant autem hujusmodi ornamenta subsidia omnia ad eam administrandam necessaria, nempe latitudo exercitus, militum stipendia, legatorum viaticum, cohors, comitatus, & cetera ejusmodi. Sed in hoc comitatu erant Legati, hoc est Præsidi Vicarii, quibus solebat jurisdictio tantum, non autem imperium sive potestas mandari, quum merum imperium alteri delegari non posset. Erant etiam Tribuni militum, Centuriones, Præfecti, Decuriones, alique militarium operum, rationumque adjutores: præterea Scribæ, accensî, præcones, lictores, interpretes, tabellarii, aruspices, cubicularii, medici, & quæ quotidianæ vitæ prope socia fuit juvenum cohors, quæ cohors prætorialis, & quasi prætorialis dicta est, in quem numerum referendi quoque sunt contubernales, hoc est adolescentes illi, qui Provincias adibant, ut artem addicerent militarem. Præter hos erat Quæstor, qui publicam pecuniam tractabat; ejusque cogendæ curam gerebat. Sed velim hoc advertas fuisse in comitatu, & qui jurisdictioni in re civili, & qui in criminalibus animadvertendis potestati, & qui rei militari præessent, quum Magistratus Provincialis jus hæc omnia complecteretur. De quibus omnibus dicendi nunc satis commoda mihi præbetur occasio.

Hoc comitatu Prætor ornatus ad Provinciã ire festinabat, sed ab Urbe non discedebat, nisi antea nuncupatis in Capitolio pro Republica votis. Itaque paludamento, lictoribus, reliquisque sumtis imperii insignibus proficiscebatur, salutatis amicis. Sed si quæ adhuc expedienda negotia superessent, tunc extra Urbem aliquandiu morabatur, quum intra Urbem fas non esset cum imperio esse, ubi vero ad Provinciã pervenisset, de adventu suo decessorem faciebat certiore, ut de statu Provinciæ moneret. Sed triginta diebus elapsis per legem Corneliam decessori a Provincia discedendum erat.

Post hæc munere suo fungi novus Magistratus incipiebat, quod ut dictum est, in potestate vertebatur, & imperio. Hujus autem erat habere exercitum, bellum, si quando

do opus esset, gerere, illius vero controversias judiciales dirimere, ac crimina persequi. Quæ duo sic ipse exercebat, ut æstatem fere rei militari, hyemem vero cognitioni causarum addiceret. Nos vero primum de jurisdictione, deinde de militari imperio verba faciemus. Itaque quum munus suum minime Præses exercere in tota Provincia valeret, nisi iter per eandem agendo, ideo opus ei erat totam, qua late patebat, Provinciam peragrarè, & modo hic modo illic ea expedire negotia, quæ sibi offerrentur. Verum ingentis erat, Romanorum moribus luxu corruptis, id itineris sumtus: quare in hac Provinciæ lustratione misere opprimebantur incolæ, ut necesse fuerit Magistratuum Provincialium avaritiam coercere. Hinc variis legibus præscriptum est, quid a Præsede Provinciam percurrente imperandum esset. Prætori igitur advenienti tectum, lectum, ligna, salem, fenum, atque alia hujusmodi præbere tantum debebant provinciales. Exercebant autem potestatem suam Prætores singulis fere quibusque oppidis, utque commodum cuique esset, conventum, sive forum edicto destinabant, diemque quo jus dicturi esset. Sed non ita cuncta expediebant, nam erat & cognitio domestica, quæ intra Prætorium, & in cubiculo querelis Provincialium audiendis tota occupabatur. Hæc autem quæ domi Prætor transigebat, ea fere per diplomata annulo suo obsignata perficiebat. Ex quo illud Tullii ceterum obscurissimum ad Q. Fratrem intelligemus. *Sit annulus tuus (inquit) non ut vas aliquod, sed tamquam ipse tu, non minister alienæ voluntatis, sed testis tuæ.* Quibus verbis sanctitatem justitiæ per annulum, quo Prætor negotia domi transacta obsignabat, prætulit.

Porro veniamus ad negotia, quæ Prætor in foro, sive in Basilica expediebat; hæc autem vel ad jus privatum, vel ad publicas quæstiones, nempe ad punienda crimina comparata erant. De omnibus his carptim saltem nonnulla tradam, quæ instituto meo inserviant. Et quod attinet ad privatas controversias, de iis Prætor jus dicebat, omnibus judiciorum solemnibus servatis, quibus forum Romæ utebatur. Is igitur per hæc solemnia suum cuique jus reddebat, & quidem ex legibus in gratiam Provinciæ latis, quas profecto vel Impe-



perator ex decem legatorum consilio , ut supra relatum est , in ordinanda Provincia condiderat , vel Populus Romanus , aut legatus , vel Consules , aut Prætores , vel Præfecti in gratiam Provinciarum tulerant . Et quidem quas Populus , vel Senatus constituisset , eæ publici juris esse dicebantur , ut de repetundis scripsit Tullius de *divinatione* ita . *Civibus quum sunt ereptæ pecunia , civili fere actione , & privato jure repetuntur . Hæc lex socialis est , totaque sociorum causa constituta .* Verum quum non omnia jure scripto præcaveri possint ; hinc de quibus negotiis lex scripta non erat , Prætor Edicto suo statuebat . Quam autem rationem hæc teneret , jam supra occupavimus . Sed advertas Præsidi minime licuisse condere Edictum Provinciarum legibus adversum , aut iis , quæ ipse vel Romæ , vel in ipsa Provincia in suo adventu edixerat . En de hoc præclarum Tullii locum in epist. ad Atticum . *Cum ego in Edicto translatitio , centesimas me observaturum , haberem , cum anatocismi anniversario ille ex syngrapha postulabat quatuor . Quid ais inquam ? possum ne contra meum edictum ?*

Porro Prætor in basilica , seu in Tribunali consistens , atque in sella Curuli sedens , scribisque , lictoribus , præconibusque stipatus , qui eidem præsto erant , ut mandata facerent , jus dicebat , cujus quidem duæ erant partes , nempe decretum , & judicii datio . Decreta sententiæ Præsidi fuerunt sine Judicum consilio , ut in manumissionibus , emancipationibus , in interdictis , in bonorum possessionibus , in dando tutore , in addicendo , quemadmodum & Romæ Prætor Urbanus se gerebat in iis rebus , quas ipse consilio decemvirorum expediebat . Judicia vero sententiæ fuerunt , quas Judices a Præторе litigatoribus judicium postulantibus dati , re cognita ferebant ; quod docere videtur auctor ad Herennium , quum dixit , *judicatum esse id , de quo aut sententia lata , aut decretum interpositum esset ;* quibus verbis & Prætoris , & Judicum cognitionem exprimere voluit . Atque hoc quidem modo privatarum controversiarum cognitionem Magistratus Provinciales exercebant , quæ proprie dicta est jurisdictio . Nec sane dissimili modo judicia publica , quæ quæstiones nominabantur , habita sunt , quum eadem judiciorum solemnitas , sicuti Ro-

Ggg

mæ

do opus esset, gerere, illius vero controversias judiciales dirimere, ac crimina persequi. Quæ duo sic ipse exercebat, ut ætatem fere rei militari, hyemem vero cognitioni causarum addiceret. Nos vero primum de jurisdictione, deinde de militari imperio verba faciemus. Itaque quum munus suum minime Præses exercere in tota Provincia valeret, nisi iter per eandem agendo, ideo opus ei erat totam, qua late patebat, Provinciam peragrarè, & modo hic modo illic ea expedire negotia, quæ sibi offerrentur. Verum ingentis erat, Romanorum moribus luxu corruptis, id itineris sumtus: quare in hac Provinciæ lustratione misere opprimebantur incolæ, ut necesse fuerit Magistratum Provincialium avaritiam coercere. Hinc variis legibus præscriptum est, quid a Præsede Provinciam percurrente imperandum esset. Prætori igitur adveniienti tectum, lectum, ligna, falem, fœnum, atque alia huiusmodi præbere tantum debebant provinciales. Exercebant autem potestatem suam Prætores singulis fere quibusque oppidis, utque commodum cuique esset, conventum, sive forum edicto destinabant, diemque quo jus dicturi esset. Sed non ita cuncta expediebant, nam erat & cognitio domestica, quæ intra Prætorium, & in cubiculò querelis Provincialium audiendis tota occupabatur. Hæc autem quæ domi Prætor transigebat, ea fere per diplomata annulo suo obsignata perficiebat. Ex quo illud Tullii ceterum obscurissimum ad Q. Fratrem intelligemus. *Sit annulus tuus ( inquit ) non ut vas aliquod, sed tamquam ipse tu, non minister alienæ voluntatis, sed testis tuæ.* Quibus verbis sanctitatem iustitiæ per annulum, quo Prætor negotia domi transacta obsignabat, prætulit.

Porro veniamus ad negotia, quæ Prætor in foro, sive in Basilica expediebat; hæc autem vel ad jus privatum, vel ad publicas quæstiones, nempe ad puniendâ crimina comparata erant. De omnibus his carptim saltem nonnulla tradam, quæ instituto meo inserviant. Et quod attinet ad privatas controversias, de iis Prætor jus dicebat, omnibus iudiciorum solemnibus servatis, quibus forum Romæ utebatur. Is igitur per hæc solemnia suum cuique jus reddebat, & quidem ex legibus in gratiam Provinciæ latis, quas profecto vel Impe-

perator ex decem legatorum consilio , ut supra relatum est , in ordinanda Provincia condiderat , vel Populus Romanus , aut legatus , vel Consules , aut Prætores , vel Præfecti in gratiam Provinciarum tulerant . Et quidem quas Populus , vel Senatus constituisset , eæ publici juris esse dicebantur , ut de repetundis scripsit Tullius de *divinatione* ita . *Civibus quum sunt erepta pecuniæ , civili fere actione , & privato jure repetuntur . Hæc lex socialis est , totaque sociorum caussa constituta .* Verum quum non omnia jure scripto præcaveri possint ; hinc de quibus negotiis lex scripta non erat , Prætor Edicto suo statuebat . Quam autem rationem heic teneret , jam supra occupavimus . Sed advertas Præsidi minime licuisse condere Edictum Provinciarum legibus adversum , aut iis , quæ ipse vel Romæ , vel in ipsa Provincia in suo adventu edixerat . En de hoc præclarum Tullii locum in epist. ad Atticum . *Cum ego in Edicto translatitio , centesimas me observaturum , haberem , cum anatocismi anniversario ille ex syngrapha postulabat quatuor . Quid ais inquam ? possum ne contra meum edictum ?*

Porro Prætor in basilica , seu in Tribunali consistens , atque in sella Curuli sedens , scribisque , lictoribus , præconibusque stipatus , qui eidem præsto erant , ut mandata facerent , jus dicebat , cujus quidem duæ erant partes , nempe decretum , & judicii datio . Decreta sententiæ Præsidi fuerunt sine Judicum consilio , ut in manumissionibus , emancipationibus , in interdictis , in bonorum possessionibus , in dando tutore , in addicendo , quemadmodum & Romæ Prætor Urbanus se gerebat in iis rebus , quas ipse consilio decemvirorum expediebat . Judicia vero sententiæ fuerunt , quas Judices a Præторе litigatoribus judicium postulantibus dati , re cognita ferebant ; quod docere videtur auctor ad Herennium , quum dixit , *judicatum esse id , de quo aut sententia lata , aut decretum interpositum esset* ; quibus verbis & Prætoris , & Judicum cognitionem exprimere voluit . Atque hoc quidem modo privatarum controversiarum cognitionem Magistratus Provinciales exercebant , quæ proprie dicta est jurisdictio . Nec sane dissimili modo judicia publica , quæ quæstiones nominabantur , habita sunt , quum eadem judiciorum solemnitas , sicuti Ro-

Ggg

mæ

mæ factitari solebat , observaretur ; hoc tantum habito discrimine , quod Romæ alii jus dicerent inter cives , & peregrinos , alii judicia publica exercerent , quum ex adverso in Provinciis unusquisque Prætor his omnibus dirimendis præfset . Itaque Præses consilio suo omnia hæc expediebat , sententiamque in reum proferebat ex ea lege , quæ de quoque crimine cognoscendo ac vindicando lata fuerat . Hinc vel absolvebat , vel damnabat reum , si liqueret , vel comperendinabat , si res certo non appareret . Quod si adeo res anceps esset , ut ab ea se se extricare non posse videret , Romam reiiciebat . Ex quo illud Tullii ad Supplicium Græciæ Prætorem intelligere licet ; *per gratum mihi feceris , si eos quando cum Senatore res est , Romam rejeceris , & quod in Verrem dixit , si ex Provincia Sicilia tota statuas idoneum Judicem , aut recuperatorem nullum posse reperiri , postulat a te , ut Romam reiicias .* At enim quum Provinciæ Romanæ latitudo maxima foret , qui fieri potuit , ut omnibus Prætor jus diceret ? Sed præsto erant legati , qui tamquam Prætoris ipsius vicarii ejus curam excipiebant , ejusque vice judiciales controversias dirimebant . Itaque Prætor jurisdictionem suam his mandabat , nequaquam vero potestatem in facinorosos animadvertendi , quum hæc ad merum imperium pertinerent , quod speciali lege sibi creditum cum altero communicari non poterat .

Explicata jam Præsidis potestate tam in re civili , quam criminali , ad ejusdem imperium accedamus . Sane necesse erat , ut non juris dicendi modo potestatem haberet , criminaque plectendi , sed exercitus etiam ducendi . Qui enim sine militari imperio potuissent Præsides in fide Provincias continere , aut a finitimorum hostium incursionibus , aut latronum populationibus tutas eas præstare ? Verum sicuti potestas integritatem , æquitatem , humanitatemque Præsidis desiderabat , sic imperium prudentia , severitate , & fortitudine exercendum erat . Quum enim id nihil aliud esset , quam jus habendi exercitum , belli gerendi , totiusque rei bellicæ administrandæ ; certe quidem prudentia , atque severitate , quum ne disciplina militaris dilaberetur , tum ne temere bellum gereretur , opus erat . Itaque scripsit Tullius : *Demus imperium Cæsari , sine quo exercitus haberi , bellum geri , res militaris*  
ad-

*administrari non potest* ; exercitum hunc ipse Præses vel ex S. C. novum in Urbe conscribebat , vel veterem a decessore suo , aut a legato ejus in Provincia accipiebat , acceptumque lustrabat , ordinabatque habita publica concione , ac proposito edicto emendabat , si quæ opus esset ut corrigerentur . Habebat autem Præses jus in milites , ut non solum privatas eorum controversias dirimeret , sed crimina etiam ad extremum usque supplicium puniret . Num enim sine tanta hac potestate potuisset in officio militarem insoleptiam continere ? Impotens profecto est quæcumque dignitas , si animadvertendi potestatem ab ea sejungas .

Ceterum hanc tantam potestatem sive in gerendo bello , sive in foedere percutiendo , sive in milite plectendo Præses non ex sua tantum sententia , sed & adhibitis in consilium Senatoribus , si qui forte in castris essent , aliisque idoneis hominibus , quod castrense consilium , vel Senatus appellabatur , exercebat . En quæ de hac re scripsit Sallustius : *Mesellus ( inquit ) prope cunctos Senatorii ordinis ex hibernis accersiri jubet ; eorum & aliorum , quos idoneos ducebat consilium habet ; ita more majorum ex consilii decreto per legatos Iugurthæ imperat argenti pondo ducenta millia .* Porro quia tanta Præsidum potestas in re militari gerenda plerumque in causa erat , quapropter rebus novis studerent , variis proinde legibus repressa fuit per Syllam primum , Julium Cæsarem deinde , ac postremo per Octavium , ut infra suo loco dicemus . Sed antequam hinc discedamus , omittendum non est cetera omnia in Provinciis Præfides curasse , potissimum verò rem frumentariam , tributariam , ac vectigalia , quibus omnibus per Edicta providebant . Quumque sæpe tributa , & vectigalia plus æquo Provincialibus imperarent , causam hinc nactus Octavius legibus suis & hanc potestatem coercendi , ut mox differemus . Demum erat etiam in Provinciis quæstor , qui publicæ pecuniæ curam gereret , quæ aut ex ærario deprompta in usus esset ipsius Provinciæ , aut in Provincia exacta ad ærarium referretur . His de antiquo jure Provinciarum ex numquam satis laudato Carolo Sigonio excerptis , ad novam earundem formam , Octaviano imperante , prope-

## §. III.

*De regimine Provinciarum imperante Octaviano Augusto instituto.*

**Q**UUM Octavianus Augustus novam Reipublicæ formam instituisset, quemadmodum in Urbe ita se gessit, ut omnia nascenti Monarchiæ, quamvis ad pristinam libertatem restituendam viderentur composita, congruerent; ita profecto rei provinciali consultum est, ut cuncta novo ejus regimini responderent. Et quidem duo potissimum erant, a quibus optimo Principi cavendum erat, vis Præsidum militaris publica pecunia munita, atque avida eorundem intemperies, qua in Provincialium fortunas, libertatem, famam, honestatemque immaniter insæviebant. Per eam quidem ad nova molienda incendebantur; per hanc vero Principis nomen invisum fiebat. Quum igitur nihil Provincialium referret, uni, vel pluribus parere; id unum præstare Imperator debebat, tum ut eorum securitati adversus magistratuum licentiam prospiceretur, tum ne tanta militum copia, atque auctoritatis potentia iidem pollerent, qua possent recenti regimini adversari. Itaque Principem nostrum sollertissime hæc omnia curasse ostendam: evincam equidem, optime eum cavisse, ut Provinciarum administratio orienti Monarchiæ conveniret. Rem igitur aggrediamur.

Nulla major hominum amorem alligandi ratio est, quam beneficiorum collatio; nam, ut sæpe dictitare solebat Græcorum ille sapientissimus Plutarchus, quamvis mortalium natura ferinum quid habeat, non tamen tantum est, ut eo exui nequeat, maxime vero si benevolentiae indiciis sæpe impetatur. Quapropter Imperator noster sapientissimus, quum pluribus beneficiis, otii dulcedine, frequentibusque congiariis civium omnium amorem sibi devinxisset, ne videretur minori caritate Provincias prosequi, liberalitatem, benignitatemque suam in easdem mire ostendit. Qua de re sic Tranquillus (a). *Urbium quasdam fœderatas sed, ad exitium licentia præcipites, liber-*

(a) In Octav. cap. 47.

bertate privavit. Alias aut ære alieno laborantes levavit, aut terramotu subversas denuo condidit, aut merita erga Populum Romanum allegantes, latinitate, vel Civitate donavit. Et alibi (a). Ad hunc modum urbe urbanisque rebus administratis, Italiam duo de triginta coloniarum numero deductarum abs se frequentavit, operibusque, ac vectigalibus publicis plurifariam instruxit: etiam jure ac dignatione urbi quodammodo pro parte aliqua adequavit, excogitato genere suffragiorum, quæ de magistratibus urbicis decuriones colonici in sua quisque colonia ferrent, & sub diem comitorum obsignata Romam mitterent. Ac nec ubi aut honestorum deficeret copia, aut multitudinis soboles, equestrem militiam petentes, etiam ex commendatione publica cujusque oppidi ordinabat; at iis, qui ex plebe regiones sibi revisenti, filios filiasve approbarent, singula nummorum millia pro singulis dividebat. Quæ omnia consulto ex Tranquillo exscribere volui, ut palam facerem, quantum Principis nostri in Provincias studium fuerit, ut eas ad novum regimen, sub quo tot bonis fruerentur, servandum incolume impelleret. Num enim majora libertatis, gratique animi indicia esse possunt, quam ea, quibus usus est Octavius in Provinciis? Earum inopiam sublevavit, publicisque vectigalibus instruxit, hoc est, certum ex publicis vectigalibus eis redditum assignavit. Ad hæc bene de Republica meritis honores etiam contulit, nempe jus Civitatis, ut militiæ, ac comitorum participes essent. Excogitavit propterea illud suffragiorum genus, quæ in sua quisque Colonia ferret, obsignataque Romam mitteret. Nam licet antea Coloniarum idem jus haberent, multoties tamen ob Urbis distantiam, ne tanto itinere defatigarentur, frustra id erat, quem enim præterit, ut suffragium ferrent, opus fuisse ad comitia accedere? Hæc autem nova suffragiorum ratio ab Augusto inventa, mirum est, quantum Provincias ad res ejus illexerit; prope enim quæque nitebatur omnibus ejusdem votis suffragari. His in universum de Octavii cura in Provincias veluti dicendorum facibus præmissis, ad rem propius festinemus.

Duo igitur in Provinciis potissimum erant, quæ novæ re-

(a) Cap. 46.

regiminis formæ ab Augusto institutæ maxime oberant, summa Præsidum potestas, & immanis Provincialium vexatio. Et quidem illa tam in re civili, quam in militari imperio adeo late, stante Republica, ut supra vidimus, diffundebatur, ut Præsides, Provinciarum Reges potius, quam Reipublicæ Magistratus dixeris. Hi etenim Edictorum nomine leges ferebant quascumque; jus vitæ, & necis in Provinciales exercebant; tributa, quæ vellent, imperabant; milites, quum in sua potestate essent, ad extremum usque supplicium plectebant; exercitum ducebant; foedus demum percutiendi, arma quocumque adlubebat, inferendi, jus iisdem erat. Quique dixerit hanc tantam Magistratuum Provincialium potestatem cum Monarchia consentire. Hac vero tanta auctoritatis vi pollentes adeo per fas, perque nefas in Provincias veluti in prædam hostilem irruebant, ut avaritia, luxuriaque cuncta miscntes, motus undique civiles excirent, ut non earum administratores, sed eversores potius viderentur. Itaque hæc omnia videns Octavius, manibus, pedibusque conatus est, ut & ipse unus Princeps toto in imperio esset, & Provinciarum commoda procul a Præsidum direptionibus tutaretur. Rem igitur persequamur a militari imperio, quod magis est, exordientes.

Quum igitur Principum interfit, vim potissimum militarem penes se manere; Princeps noster *Provincias validiores, & quas annuis Magistratuum imperiis regi nec facile, nec tutum erat, ipse suscepit, ceteras Proconsulibus sortito permisit, & tamen nonnullas commutavit, interdum, atque ex utroque genere plerasque sæpius adiit*: hæc Tranquillus (a), quæ quum lucidius pateant ex Dione, ejus verba exscribere hic non pigeat: tradit is Augustum id fecisse (b) *sub hac specie ut Senatus optimis imperii partibus, tuto perfrueretur, ipse laboribus, & periculis obiectus esset: at revera sub hoc prætextu inermis & imbellis esset, & ipse solus arma, & milites haberet*. Ecce tibi a Dione clarius expositum, quod aliquanto obscurius Tranquillus scripserat. Et quidem satis compertum est

(a) Octav. 47.

(b) Dion lib. 54.



est Romanæ militiæ copias prope omnes in Provinciis confedisse: sive enim ad turbas forte imminentes componendas, sive ad Provinciales in officio continendos, sive demum ad eos ab exterorum incurfionibus tutandos perquam necesse erat, ut in Provinciis maxime vis militaris versaretur. Quumque Prætor jus exercitus ducendi haberet, ac proinde milites in ejus potestate forent, facile erat, ut is vel sua cupiditate impulsus, vel Senatus sententia inductus in orientem Monarchiam insurgeret. Itaque, ut tantum a se periculum Princeps noster averteret, militum copias penes se esse voluit. Partitus igitur Provincias cum Senatu, pacatas, ubi nullo militum præsidio opus erat, ei relinquere, bellicosas vero sibi retinere statuit, ne scilicet, ut is simulabat, Senatus militaribus curis implicaretur, utque quieti, & otio amplissimus ille ordo vacaret, quæque pacis erant, sapientissimis suis consiliis exornaret; quum ex adverso imperium proconsulare curarum plenum, & laboris apud se esset pristinæ libertatis servandæ causa institutum. Sane hæc externa species imperii proconsularis, quod sibi retinuit, non multum antiquo Reipublicæ juri adversabatur. Nam si forte in Provincia Prætoria repentini motus erupissent, Senatus statim eo Consulem, amoto Prætore, amandabat. Itaque Augustus ferociore has, bellicosioresque provincias, uti Proconsul, regens nihil videbatur antiquam Reipublicæ formam immutare, quum simulate objiceret, se se proconsulare imperium veluti jure precario ex Senatus, Populique sententia, & quoad eis adluberet, nempe quousque Provinciæ pacatiores factæ fuissent, tenere. Sed, quod mirandum, nunquam deinceps in spem pacificandarum provinciarum ventum est, quum non deficerent simulatæ causæ, quapropter imminentes saltem turbæ prætexerentur. Quare factum est, ut Augustus proconsulare hoc imperium, ubi Majestatis cardo versabatur, toto vitæ suæ curriculo obtineret, suæque posteritati veluti rem hereditario jure delatam relinqueret.

Sed quamvis Senatus per hanc Provinciarum divisionem inermis factus esset, sæpe tamen fiebat, ut in ejus Provinciis motus aliquis erumperet, ad quem sedandum militaribus copiis opus esset. Verum hic non deerant artes Principi nostro,

ut

ut rebus consuleret suis, nec milites in potestatem Senatus redirent. Nam quum pacatam Provinciam habebat, Senatui tunc tradebat, ac vice illius accipiebat is feditiosam, ut a belli cura amplissimum ordinem eriperet, ut Tranquillus scripsit. Etenim quanti interesset milites Imperatori devotos esse, satis perdocuerat experientia in Mario, Sylla, Pompejo, ac demum in Cæsare, qui omnes nonnisi legionum favore, præsidiorumque provincialium opibus ad supremum dominatum pervenerant. Contra vero ut Cæsar's potentia ad fastigium prope evecta effringeretur, nulla major ratio occurrit, *quam ut ei succederetur ante tempus*, adeo ut scripserit Suetonius (a), *ab Optimaribus datam operam esse, ut Provinciæ futuris Consulibus minimi negotii idest silvæ, callesque decernerentur*. Vide hinc, quanti fuerit inermes Provincias Senatui dedisse, easque si quid novi insurgeret cum pacatioribus commutasse.

Quum sic se gessisset Augustus in Provinciarum administratione, ne earum occasione Senatus res novas moliretur; videamus modo quanta struxerit, ne Præsides auctoritate sua luxuriantes turbas excitarent. Sane exploratum satis est, Magistratuum potestatem, qualis in Aristocratiâ est, cum Monarchia convenire non posse, *ubi necesse est, ut omnes, exuta aequalitate iussa Principis expectent*. Qua de re sapientissimus Mæcenas Principem monuit, ut pristinam Magistratuum auctoritatem usque adeo minueret, quoad formæ novi regiminis aptaretur. Hæc sunt ejus verba. *Magistratuum autem potestatem antiquitus iis concessam nequaquam servabis, ne eodem res recidat: sed honore eorum integro relicto, tantum potentiæ detrabes, ut neque dignitas eorum diminuatur, neque novi aliquid maliendi facultas ulli adsit*. Hoc saluberrimo sane consilio is imbutus, Præsidibus a Senatu in Provinciam missis, jus milites habendi, & extremo supplicio provincialium crimina plectendi ademit, id obtendens inane esse hanc potestatem in iis Provinciis, a quibus utpote pacatis nihil timeretur; sed revera ut rebus consuleret suis. En præclarum Dionis locum. *Neque enim* ) ait ille ) (b) *ulli Proconsuli aut Propratori, præfectove licebat gladio*

(a) In Jul. cap. 19.

(b) In Octav. 53.

*Deo se accingere : quo ipso licentia necandi militis adimebatur : nam & Senatoribus, & equitibus, quibus alterum conceditur, alterum quoque adest, & paucis interjectis ita subdit. Hac ergo ita statuta sunt, de Senatoribus iis, qui potestatem mortis in subditos habent. Mittuntur enim, & quibus ea non est, in eas provincias, quæ Populi Romani esse dicuntur, iique ex quaestoribus, & legatis eorum, qui provincias gubernant sorte diliguntur. Vide quantum pristina Præsidum auctoritas immutata fuerit sub Augusto, ut & a jure habendi exercitus, & Cives morte multandi exciderint. Sed ita fieri oportuit, nam ubi Monarchica forma est, non ne jus vitæ & necis penes unum Principem versari debet? Quum ergo Senatus æque ac Populus uni, eidemque Principi subderetur, par non erat, ut Proconsules in Provinciis jus gladii haberent, quando & ille a jure necis jam exciderat.*

*Contra vero jus ducendi exercitum, militesque capite plectendi Præsidibus a se in provincias suas missis dedit. Nam frustra esset eorum potestas in parum tutis Provinciis, ubi neque militibus imperandi, neque in fontes animadvertendi jus esset. Sic enim Dio loco cit. A se porro designatis præter nomen Propratorum, hoc etiam tribuit, ut plusquam annum essent cum imperio, quatenus videlicet ipse statuisset, ut militarem habitum gestarent, gladiumque, & jus capite plectendi militis haberent. Sed ne & ii potestate hac elati Rempublicam interturbarent, duplici remedio consultum est; primo quidem imperatum ne in Centuriones, Tribunos, aliosque illustres viros jus necis haberent, utque ii ad principalem cognitionem servarentur; nam ut Mecænas Principem nostrum monebat, periculosum quidem erat in primarios viros a Magistratu præter Principem animadverti. Sic enim docuit. Hi autem omnes casus ad Consularem referentur, nisi qui ad Centuriones, ac primarios privatorum hominum pertinent: quorum puniendorum nemini alii potestatem facere tu debes, ne is adeo formidabilis aliis fiat, ut contra te etiam aliquando quidquam conetur. Deinde cautum, ne iis plures præsto essent, ut idem auctor fuit. Quod autem dixi alterum ex Prætoriis debere militibus præfici, ita accipiendum est, si pauci quidem milites in exteris Urbibus sint, aut una legio*

H h h

Urba-

*Urbana; sin duæ Urbanae legiones eodem in loco byberna habeant ( plures enim bis ut uni committas nequaquam tibi auctor fuerim ) oportebit duos pratorios diviso imperio, legionibus, ac rebus Civitatum privatorumque hominum præesse. Sapientissimum quidem consilium; nam quem latet armatorum copias dominationis cupidis maxime ad novas res molendas opitulari?*

Ex quibus omnibus intelligimus, quantum pristina Magistratum potestas in Provinciis, ubi Præsides potius ut Reges, quam ut Reipublicæ Magistratus omnia moderabantur, diminuta fuerit, nempe ut ea novo Reipublicæ imperio quadraret. Sed hec animum subit vestigare, qua ratione factum sit, ut æquo ii animo tantam dignitatis suæ diminutionem passi sint, nec ullos ad jus vetus retinendum motus exciverint. Sane ne credas defuisse voluntatem, bene vero poenarum metu coercitos, *ut potius præsentia, & tuta, quam præterita, & periculosa mallent*. Siquidem boni Principis est comminationibus magis cavere, ne delicta patrentur, quam peracta punire. Præter hæc imperia Augustus non nisi aliqua temporis intercedente intercapidine, mandare solitus erat, ut Romani potestate defuncti, antequam ad eandem advocarentur, ad vitam privatam redigerentur, ibique Cæsari demissius obedire perdiscerent. Quod eundem Mecænatem monuisse Dio refert (a) *Majora imperia nequaquam unum in alio eodem tribuenda censeo: cum quod nihil interest, in eadem ne aliquis Provincia, an vero in diversis continenter, diutius, quam expedit cum imperio sit, tum quod bi aliquo inter Magistratus suos interjecto intervallo, domum reversi, ac privatim viventes, meliores redduntur*. Enimvero Magistratus quum per frequentem ad privatos mores reditum, alteri parere assuescat, in potestate deinde Principis auctoritatem non dedignabitur, nec contra eundem quid audebit. Sed neque diuturniora, neque multo breviora imperia esse debent; illa enim hoc habent, ut ad supremum dominatum Magistratum alliciant; hæc vero, ut non satis apte Cives gubernentur, quum munus suum deponere is debeat, ubi primum mores

Ci-

(a) *Dion lib. 52.*

Civium pernoscere didicit. Qua de re sapientissime Mecænas rei civilis doctissimus ait. *Idemque neque minus triennio ( nisi quis quid deliquerit ) neque plus quinquennio Magistratum obeant. Nam & annui illi Magistratus, ac pauco tempore circumscripti, hoc habent, ut quum quis aliquid in iis addidicerit, prius decedat, quam eius specimen exhibere possit: & diuturniora imperia multos ad fastum, ac tentandas res novas extollunt.*

Verum quum, quæ huc usque edisseruimus, alia ad Præsides, quos Senatus ad Provincias mittebat, alia vero ad delectos a Principe pertineant, videamus modo quæ omnibus indiscriminatim præscripta fuerint, ut eorum potestas ea esset quæ Monarchiæ conveniret. Sed quum hæc omnia non nisi ab eodem Dione edoceantur, ejus verba hac etiam in re describenda sunt, ait is (a): *hæ vero leges ad omnes ex æquo Provinciarum administratores erant factæ. Ne quem delectum militum agerent: ne pecuniam, præter eam, quæ constituta erat, exigent, Senatus, Imperatorisque injussu. Cui successor missus esset, is ut statim ex Provincia abiret, ac ne in redeundo domum tempus tereret, sed intra tertium mensem Romanam reverteretur.* His omnibus consona sunt, quæ scripsit Tullius in Pisonem de Gabinio Syriæ proconsule. *Exercitum eduxit e Syria. qui licuit extra Provinciam? Tribuit se mercenarium Comitum Regi Alexandrino. Quid hoc turpius? In Ægyptum venit: signa contulit cum Alexandrinis. Quando hoc bellum, aut hic ordo, aut populus suscepit? Caput Alexandriam. Quid aliud expectamus u. furore ejus: nisi ut ad Senatum tantis de rebus gestis literas mittat? Hic si mentis esset suæ: nisi penas patriæ, diisque immortalibus eas quæ gravissimæ sunt furore atque insania perderet: ausus esset, misto exire de Provincia: educere exercitum: bellum sua sponte gerere, in Regnum injussu Populi, aut Senatus accedere. Quæ quum plurimæ leges Veteres, tum lex Cornelia Maiestatis, Julia de pecuniis repetundis planissime vetant. Quod autem in hoc Tullii loco animadvertendum, illud potissimum est a Cornelio*

H h h 2

Sylla

(a) Dion in Octav. lib. 53.

Sylla primum, deinde a Julio, quamvis deinceps & ab Octaviano per leges Majestatis Præsidum potentiam coercitam, ut Principis injussu nec exercitum ducere, nec delectum habere, nec demum imperium retinere, ubi successor advenisset, aliaque hujusmodi facere possent. Etenim quum hæc omnia, Monarchia investita, ab unius arbitrio pendere debeant; quumque Principatus specimen omnium primus Sylla dederit, quid mirum, si ab eodem ea vetita fuerint, deinde vero ab insequentibus Principibus Julio nempe, & Octaviano, ut Provinciarum regimen novo regimini accommodarent. Quæ profecto sic etiam complexus est Marcianus in *l. duodecim tabularum 4. D. ad legem Juliam Majestatis. Eadem lege tenetur & qui injussu Principis bellum gesserit, delectumve habuerit, exercitumve comparaverit: quive cum ei in Provincia successum esset, exercitum successori non tradiderit: quive imperium, exercitumve Populi Romani deseruerit.* Num enim instituto Principatu ea pollere potestate Magistratus debebant, quæ sub Aristocratiâ vigeat? An potius ita se se sub Principe debebant gerere, ut omnes ex æqualitate, iussa Principis adspectarent? His ergo finibus imperio militari per Provincias circumscripto, bene profecto consultum, ne Præsidum auctoritas in novam Reipublicæ formam insurgeret.

## §. IV.

*Ad legem Juliam repetundarum.*

Vidimus jam, quot modis militare Magistratum Provincialium imperium debilitatum sit, eoque redactum, ut orientis Monarchiæ quietem interturbare non posset. Sed hæc in cassum adhuc, si Provinciarum in Principem auferas amorem, ex enim præsentis regiminis pertasæ, quas turbas Præsidum impotentia non poterat, non sine maxima rerum perturbatione excitassent. Quapropter Princeps noster sapientissimus effræno Præsidum imperio effracto, id studuit ut per leges saluberrimas Provinciarum amorem sibi alliceret, nempe earum commoda promovendo, ne Præsides in Provincialium bona, libertatem, honestatemque, uti antea florente Re-

Republica, furerent. Quod quidem per legem repetundarum severissime latam, satis probe assequutus est. Ut autem eam planius exponamus, pauca prius repetenda sunt, quo aperte magis intelligatur, quantum Imperator Provinciarum commodis per hanc legem prospexerit.

Proficiscentibus in Provincias Præsidibus a Senatu decernebatur, quanta pecunia ex publico ad milites alendos, quantum viaticum in legatos, cohortem, comitatum, ceteraque hujus generis darentur. Hujus rei rationem expressit Tullius. *Majores nostri neminem, qui cum potestate, aut legatione in Provinciam esset profectus, tam amentem fore putarunt, ut emeret argentum; dabatur enim de publico: ut vestem; præbeatur enim legibus; mancipium putaverunt, quo omnes utimur; & non præbeatur a Populo. Sanxerunt ne quis emeret mancipium, nisi in demortui locum, & ne putes hunc leges ævo suo lãtas respexisse, vide quid scripserit Livius in bello Persico: Magistratus ( inquit ) multis tabernaculisque, & omni alio instrumento militari ornabantur, ne quid tale imperarent sociis. Verum corrupta deinde Romanorum disciplina, mirum quot a Præsidibus excogitatæ artes ad Provinciales opprimendos. Sane quum frequentibus peragrationibus Provinciam percurrerent, tum ut pro Tribunali sedentes suum cuique jus redderent, tum ut cetera omnia curarent; objicientes, non ea impendio suo peragenda, quæ in eorum utilitatem cederent, miserum in modum Provinciales vexabant. Ad hæc quum vestigalia curarent, jusque milites imperandi, si quando delectum habere opus esset, jactarent; his de causis immensum prope erat, quod a miseris Provincialibus extorquebatur. Quæ omnia quum dilucidius appareant ex Cæsaris contra Scipionem Syriæ Proconsulem dictis, ea exscribere ne pigeat. Civitatibus, Tyrannisque magnas imperaverat pecunias; item a publicanis suæ Provinciæ debitam biennii pecuniam exegerat, & ab eisdem insequentis anni mutuam præceperat, equitesque toti Provinciæ imperaverat. Interim acerbissima imperata pecunia tota Provincia exigebantur, in capita singula servorum ac liberorum tributum imponebatur. Columnaria, ostiaria, frumentum, milites, remiges, arma, tormenta, vecturæ imperabantur, cujus modo rei nomen reperiri poterat, .  
bos*

*boc satis esse ad cogendas pecunias videbatur.*

His jam præmissis videamus modo, quam semitam se-  
 ctatus Imperator noster fuerit, ut improborum Præsidum ra-  
 pinas a Provinciis averteret. Certum quidem est, plurimum  
 eum severiori lege sua de reperundis ad Magistratum Pro-  
 vincialium sordes coercendas profecisse. Sed antequam præ-  
 claram hanc legem aggrediamur, vimque ejusdem ostenda-  
 mus, grave ne sit, quas alias, ut Provinciis opitularetur, ra-  
 tiones inierit, advertere. Etenim quum sæpe, ut paullo su-  
 pra innuimus, Provincias, quas gerebant, vexarent Præsides  
 vel immensis annonis, quas veluti muneris sui honorarium  
 exigebant, vel per vectigalia, quæ ipsi curabant; bene Pro-  
 vincialibus consulendum ratus est Imperator istiusmodi direp-  
 tionum causas præcidendo. Et quidem sic se se gessit Augustus  
 ex Mecænatis consilio, qui ita eum monuit: *ceterum omnes  
 illi, quibus aliquod extra Urbem imperio commissitur, singuli  
 ratione sui officii congruentem accipiant mercedem. nam ne-  
 que ex suis facultatibus in alienis locis vivere eos consentaneum  
 est, neque rursus impensis, ac nullo certo modo definitis sum-  
 ptibus eos uti* (a). Quo porro saluberrimo consilio Principem  
 edoctum sic statuisse laudatus sæpe auctor refert (b). Cer-  
 tum etiam stipendium istis Curatoribus ut etiam Proconsuli-  
 bus, edicto constituitur: quia tum etiam Cæsar, ut merces eis  
 sua daretur, censuerat. Antiquitus quidem qui aliquod a Repu-  
 blica munus suscepissent, omnia suis ipsi impendiis agebant. Sub  
 Cæsare primum accipere stipendium ceperunt: non idem omnes,  
 sed quemadmodum muneris eorum rationi congruebat. Atque hoc  
 quidem instituto amota fuit causa omnis, quapropter Præsi-  
 des ingentem Provincialibus pecuniæ vim ad impendia sua sub-  
 levanda imperarent, quum laborum suorum mercedem, sum-  
 ptuumque expensas publice acciperent.

Non autem his Augustus contentus fuit; sed porro pro-  
 gressus est. Etenim ne publica pecunia diriperetur, neu ejus-  
 dem cogendæ gratia Provinciales vexarentur, novam hac in re in-  
 sti-

(a) *Dion lib. 53.*

(b) *Dion lib. 33.*



stituit rationem, ejusdem Mecænatidis documentum. Ceterum Romæ satis est ad unamquamque rationem pecuniæ colligendæ, foris autem in singulis Provinciis, unico Equite, qui, quot opus fuerit ministros, sub se habeat ex Equiribus sumtos, ac ex liberris. Nam hos quoque eis adjungi prodest, ut & famulis suis præmium virtutis extet, & non desint tibi, ex quibus vel invitus cognoscere possis, si quid peccatum fuerit (a). Itaque tanto viro auctore, Ærarii Curatores instituit ad publicam Provinciarum pecuniam colligendam, ut pristinam Quæstorum potestatem minueret; iisque libertos suos tamquam perpetuos vigiles addidit, ut si quid forte peccassent, sibi fidelius denunciarent. Sed Paullus ad legem *Juliam de vi publica* ait: *Qui nova vectigalia exercent lege Julia de vi publica tenentur*. Si caput hoc legis nostræ ab Julio, vel Octaviano latum fuerit nec potius ex aliquo deinceps S. C.; affirmarem sane id ab iis factum, ut Quæstorum auctoritatem in vectigalibus exigendis labefactarent. Jam vero ad legem *de repetundis* accedamus.

Hanc quidem doctissimus Sigonius in suo immortalis opere *de jure Provinciarum tit. de publicis judiciis* sic refert. *Prætor, qui ex hac lege quæret, de eo quærito, qui quum aliquam potestatem haberet, pecuniam ob judicandum, decernendumque acceperit, vel quo magis, aut minus quid ex officio suo faceret. Item de eo, qui comes Judicum pecuniam acceperit. Qui ob denunciandum, vel non denunciandum testimonium, pecuniam acceperit, cui dammato testimonium publice dicere, aut Judex esse, postulareve non liceat. Item de eo, qui ob militem legendum, mittendumve æs acceperit, quive ob sententiam in Senatu, consiliove publico dicendam pecuniam acceperit, vel ob accusandum, vel non accusandum. Item de iis, qui Magistratus Urbani plus domi muneris in anno acceperint, quam quod sit aureorum centum. Item de eo, qui ob Judicem arbitrumve dandum, mutandum, jubendumve, ut judicetur, quive ob non dandum, non mutandum, jubendumve, ut judicet; quive ob hominem in vincula publica conjiciendum, vinciendum, vinciri que jubendum, exque vinculis dimittendum, quive ob bo-*

mi-

(a) *Idem lib. 52.*

minem condemnandum, absolvendumque; quive ob litem aestimandam, judiciumque capitis, pecuniæ faciendum, vel non faciendum aliquid acceperit. Qui in acceptum tulerit opus publicum faciendum, frumentum publice dandum, præbendum, sarta recta tuenda, antequam perfecta probata, præstita lege orunt. Quod contra hanc legem Proconsuli, vel Prætori donatum erit, non liceat usucapi. Venditiones, locationes ejus rei causa pluris minorisve factæ, irritæ sunt, neque usucapio esto priusquam in potestatem ejus, a quo perfecta res sit, heredisve ejus veniat. Item de eis, qui munus publice mandatum accepta pecunia ruperunt. Item de eo, qui ob negotium faciendum, aut non faciendum per calumniam pecuniam accepit. Hæc laudatus auctor, sed ex Tullio hæc & alia habemus. Prætor qui ex hac lege quæret, de eo quærito, qui proconsule, aut Propratore cades, adulteria, & stupra in Provincia fecerit. Qui jus in liberos Populos de pecuniis creditis dixerit. Qui de Provincia cæverit, aut exercitum eduxerit, & sua sponte bellum gesserit. Qui modum in imperato, & aestimato frumento exigendo exceßerit. Qui libertatem sociis non conservaverit. Qui aurum coronarium aut imperaverit, aut acceperit sine S. C. Qui quidquam a sociis præter fenum, & quatuor lectos, & ligna acceperit. Qui rationes in Provincia apud duas Civitates non reliquerit, & easdem totidem verbis ad ærarium non retulerit & ultra eriginta dies Comites in beneficiis detulerit. Ut Prætor quærat ab iis, ad quos pecunia pervenerit.

Hanc legem consulto integram exscribendam censui, ut cuius inde intelligere liceat, quantum fuerit Julii Cæsaris, ac deinde Octaviani, qui eandem confirmavit, studium, ut provincialium vita, libertas, honestas, fortunæque omnes a Præsidum, aliorumque Magistratuum rapinis tuta forent. Et sane si quis attente omnes ejusdem partes expenderit, certe quidem fatebitur, omnem viam illis præclusam, quominus in Provinciarum commoda subdole, more suo, impeterent. Lex generali sermone adversus eos, qui munere, officio, Ministerio publico funguntur, sancita est. Quare & Comites Præsidum, & Officiales, & assessores, cognitores, iudicesque pedaneos complexa est. Sæpe enim quod per se non facit Præses, simulato alterius nomine facit, vel si se incio, familia

lia ejus delinquat, etiam ipse, de quo peccatum est, tenetur. Nam ut sapienter hac de re scripsit Tullius (a) *si innocentes existimari volumus, non solum nos abstinentes, sed etiam nostras Comites prestare debemus. Primum omnium opera danda est, ut eos nobiscum ducamus, qui nostra fama, capitive consulant, deinde si in hominibus eligendis nos spes amicitiae fefellerit, ut vindicemus, missos faciamus.* Ne igitur dubitandi locus sit, quinam Magistratus nomine intelligantur, apposite lex nostra universe loquuta est, omnesque, qui munus, officium, ministeriumve quodlibet publicum exercent, praeponit, quique jus pecunia ducti dixerint, quique eadem subornati jus dicere neglexerint. Et ne quis putaret, legis nostrae poenam eos tantum sequi, qui pro Tribunali sedentes munere suo prave fungerentur, subditur & quodcumque publicum ministerium pecunia, gratiae male gestum, quapropter is etiam qui in acceptum tulerit opus publicum faciendum, frumentum publice dandum praebeandum, sarta recta tuenda, antequam perfecta probata praestita lege erunt, quive aurum coronarium imperaverit, aut acceperit sine S.C., hac lege tenebatur. Verum quia non in hominum tantum fortunas Potentiores assolent debacchari, sed etiam in vitam odio permoti, atque in honestatem propter luxuriam, hinc addit Tullius: *Prætor quæres, qui procons. aut proprætor cades, adulteria, & stupra in Provincia fecerit.* Ex omni igitur parte reddita tuta Provincialium commoda, nempe cœercita omnium Magistratuum potestas, ne in caput, fortunam, honestatemque Provincialium insciverent. Quod si quis in legem peccasset, ne forte lateret, ibidem cautum, ut rationes, quas in Provincia apud duas Civitates reliquissent, eas statim, atque Urbem iniissent, ad ærarium totidem verbis referrent. Merito igitur Tullius de hac lege sic scripsit (a). *Quasi vero dubium sit, quin tota lex de pecuniis repetundis sociorum causa constituta sit, nam Civibus quum summa erepta pecunia, civili fere actione, & privato jure repetuntur.*

Iii

hac

(a) IV. in Ver.

(b) In divin. 2.

*hæc lex socialis est, hoc jus nationum exterarum est, banc habent arcem.*

Verum quia duo insuper sunt, per quæ avaritiam suam obtegere solent magistratus, contractus scilicet, & xenia, quorum nomine sæpe potestate abusi subditorum bona diripiunt; & his malis quoque per legem nostram occursum est interdicto Magistratibus, ne, ubi degunt, munusque exercent suum, dona acciperent, contractusque inirent, quibus commodum sentire possent. Quare eleganter Tullius (a): *Quæ fuit causa cur majores nostri eos, qui cum potestate, aut legatione in Provincia sunt tam diligenter in Provinciis ab emtionibus removerent? Hæc iudices; quod putabant, ereptionem esse non emtionem, quum venditori suo arbitrato vendere non liceret. In Provinciis intelligebant, si is, qui esset cum imperio, ac potestate, quod apud quemque esset emere vellet, idque ei ticeret fore uti, quod quisque vellet, siue esset venale, siue non esset, quanti vellet auferret. Et quod spectat ad dona, ea vetita sunt, etiamsi dentur Magistratibus in bonam causam, quia ut bene dixit Cato, Magistratus non magis orari de iis debet, quæ æqua sunt, quam exorari in ea, quæ iniqua sunt. Nonne enim munus foedat suum, qui non amore justitiæ, sed doni forte munere impulsus officium explet. Sapienter proinde Plato (b) ait: Qui Patriæ in aliqua re ministrant nullo modo munera recipiant, nec ulla occasione, aut ratione nobis persuadeamus in rebus quidem bonis suscipienda esse munera, in aliis minime. Nam nec cognoscere facile est, neque quum cognoveris continere. Idcirco tutius est legibus obtemperare dicentibus, nulla pro Patriæ ministerio munera esse suscipienda. Si quis vero minus obtemperasse damnatus fuerit, moriatur.*

Nec satis fuit Romanis prohibere ne munera præses acciperet, dum erat in Provincia, sed ne deposito quidem Magistratu, quum timor esset, ne is spe futuri muneris peccaret. En quæ scripsit Tullius (c), *donum ne capiunto, neve danto, neve petenda, neve gerenda, neve gesta potestate. Quapro-*

(a) IV. in Verrem.

(b) 22. de legibus.

(c) De legibus III.

propter id refert Plinius (a) de Julio Basso. *Homo simplex, & incautus quadam a Provincialibus amicus acceperat; nam fuerat in eadem Provincia quaestor. Hæc accusatores fursa, ac rapinas, ipse munera vocabat: sed lex munera quoque accipi vetat. Quid ergo? A nemine munera Præles accipiet? ne xenia quidem? Audi quod scripsit Ulpianus in l.VI.D. de officio Proconsul. Non vero in totum Xeniiis abstinere debet Proconsul, sed modum adjicere: ut neque morose in totum abstineat, neque avaritæ modum Xeniorum excedat; quam rem Div. Verus, & Imper. Antoninus elegantissima Epistola sunt moderari, cujus Epistola verba hæc sunt. Quantum ad Xenia pertinet audi quid sentimus. Vetus proverbium est ὅτε πάντα, ὅτε πάντοτε, ὅτε παρὰ πάντων. Nam valde inhumanum est a nemine accipere, sed passim vilissimum, & omnium avarissimum. Et quod mandatis continetur, ne donum, vel munus ipse Proconsul, vel qui in aliquo officio erit, accipiat, ematve quid, nisi victus quotidiani causa, ad Xenia non pertinet, sed ad ea, quæ edulium usum excedunt. Sed nec xenia perducenda sunt ad munusculi qualitatem.*

Satis superque immoratus sum in hac lege de *reperundis*; sed ita fieri oportuit, ut pateret quanto studio Julius primum, deinde Octavius adnisi fuerint, ut Provinciales tuti a Præsidum, aliorumque Magistratuum rapinis essent; quamquam haud negandum, legem hanc Urbanos etiam Magistratus complexam esse, licet maxime Provinciarum beneficio lata esset. Sed hic opportunum est poenas referre in legis contemptores, & antequam ad eas veniamus, quas Julius, & Octavianus sanxerunt, grave ne sit, superiores quasdam de eodem argumento leges evolvere, ut quid novi a Principibus his statutum sit, planius intelligatur. Itaque primus qui legem de *reperundis* tulit, M. Porcio Cato fuit, qui quum Prætoris functione munere Sardiniam obtinuerit, sumptus Provincialium in Prætores coercuit anno quingentesimo sexto, de quo sic Livius: *Sardiniam M. Porcius Cato obtinebat; fugati ex insula fœneratores, & sumptus, quos in cultum Prætorum socii facere soliti*

Iii 2

crant,

(a) Lib. IV. Epist. 9.

*erant, circumcisi, tunc sublatis sunt.* Sed perdocte scripsit Sigonius lege etiam hac perlata, crimen id non pertinuisse ad publica judicia, quum causa hæc privata haberetur & extra ordinem ex S. C. a recuperatoribus cognosceretur.

Sed crescente in diem Magistratum avaritia, libidineque, lex Calpurnia sequuta est, quam L. Calpurnius Piso Tribunus plebis an. sexcentesimo quarto Manilio, & Censorino Coss. rogavit poena graviore inflicta, & creato certo Prætor, cui singulis annis quaestio hæc mandaretur. Itaque opus non erat sociis nova lege, qua istiusmodi criminum cognitio daretur, ut in more antea fuit. Quod sane ut planius intelligas, recolas quaeso, quæ diximus de consuetudine Romanorum in plectendis publicis criminibus ante institutas a Sylla perpetuas quaestiones. Hanc legem Calpurniam Junia sequuta est quam forte tulit, ut conjecit idem magnus vir Sigonius, M. Junius Pennus qui teste Tullio in Bruto Tribun. Plebis fuit Lepido, & Oreste Coss. Per hanc autem præter litis æstimationem a superioribus etiam præscriptam exilium additum est damnato, quia malum in dies crescebat. Quum autem lex hæc, reorum potentiae inservientibus iudiciis, forte exolescere coepisset, restituta est per illam, quæ dicitur lex Servilia. Etenim, ut recte conjecit idem Sigonius, si nihil gravius per Serviliam statuitur, censendum est eandem hanc fuisse, ac legem Juniam. Fuit autem lex Servilia a Cajo Servilio Glaukia Prætor, Cajo Mario Consule anno 663., rogata. Hanc in diversa capita distinctam reperit Sigonius in museo Cardinalis Bembi, eamque in eximio de jure Italiz libro, ubi de publicis judiciis, exscripsit, quam videsis.

Porro lex Acilia a M. Acilio Glabrione post Serviliam lata est; idque novi habuit, *Ut neque ampliari, neque compendinari reus posset*, teste Tullio in Verrem. Verum quum jam per hæc tempora, civiles in Republica motus excitari coepissent, quorum sane est publicam disciplinam inturbare, magistratum scelera, legibus omnibus posthabitis, tam frequentia facta sunt, ut ad acerbiora progredi opus fuerit Syllæ Dictatori. Itaque ad istiusmodi crimina cognoscenda quaestio perpetua instituta est, ad eadem punienda præter litis æsti-

ma-

mationem irrogata est interdictio aquæ, & ignis; lex demum & ad magistratuum libidines, & crudelitates prolata. Etenim sic statutum est. *Qui Prætor ex hac lege quæret, de eo quaerito, qui Dictator, Consul, Prætor, magister equitum pecuniam, dono ceperit abstulerit, coegerit, conciliarit, averterit, nec solum avare, sed etiam libidinose, superbe, crudeliter se in Provincia gesserit . . . Prætor qui ex hac lege quæret facio ut reo damnato lis æstimetur, & aqua, & igni interdicatur. Qui in reatu decesserit, ei ne lis æstimetur (a).*

Sed has omnes excepit tandem lex Julia repetundarum, quæ num quid novi sanxerit, inter eruditos disceptatur: Siquidem & litis æstimatio & dupli, quatruplicque pœna, & aqua ignisque interdictio, jam ante ex lege Cornelia irrogata erant. Quid igitur præter hæc lex Julia repetundarum induxit, quam ceteris severiorem veteres historici, maxime vero Tullius, jactant? traditque Tranquillus in Julio hæc: *jus laboriosissime ac severissime dixit. Repetundarum convictos etiam ordine Senatorio movit.* Sed si vera sunt legis Cornelie capita, qualia nobis Sigonius descripsit, nova pœna dicenda non est ordinis amissio, quando quibus aqua, & igni interdictum erat, quæ fuit legis superioris pœna, Civitatis jure destituebantur. Doctissimus Lipsius (a) sic ait. *An ergo in crimine repetundarum pœna gravior, quam relegatio? Attente legas quia nec relegatio quidem olim sane exilium fuit, & æstimatio) ut Asconius notat in Verrem, & Cicero subindicat non semel . . . Sed sequuta lex Julia immutavit. Ex ea pœnam fuisse adfirmo amissionem ordinis & æstimationem nihil ultra idest, qui damnatus eo crimine esset Senatorio moveretur, & iudices acciperet ad æstimandam litem. Ego sane nihil habeo, quod huc afferam, præter Tullii verba, ex quibus poterit quidem lector conjecturam aliquam hac in re efformare. Ait enim is in oratione pro Postumo: jubet lex Julia persequi ab iis, ad quos ea pecunia, quam is ceperit, qui damnatus sit, pervenerit; Si hoc est novum in lege Julia sicut multa sunt severius scripta, quam in antiquis legibus,*

(a) Sigon. de judiciis lib. 2. cap. 27.

(a) Lips. in Tacit. lib. 14.

*Et sanctius judicata; sane etiam consuetudo hujus generis judiciorum nova; sin hoc totidem verbis translatum caput est, quod fuit non modo in Cornelia, sed etiam ante in Servilia, quem hunc morem novorum judiciorum in Rempublicam inducimus? Et Calius postquam legis unum. Et centesimumum caput legit, in quo ita erat: quod eorum judicum major pars judicaret id jus ratumque esto in tabulas absolutum non retulit, ordinum judicia perscripsit.*

Hæc sunt, quæ de lege Julia repetundarum habui dicere: ceterum velim advertas quantum poenæ illius acerbitas, & Provincialium commodis tutandis, & novo regimini apud Provincias conservando congruerit, nam si magistratuum tunc temporis mores inspexeris, qui sane corruptissimi erant, opus fuit ut in eos inferretur gravior poena, cujus metu a vexationibus, aliisque flagitiis abstererent. Ad hæc cui nam latet, in democratia poenas esse leviores, sæviores vero in monarchia? Demum quum Monarchici Regiminis cardo in eo fere situs esset, ut Provinciæ pacatæ essent, neu de Magistratuum injuriis quererentur; quid mirum si a Cornelio Sylla, qui omnium primus Monarchiam instituit, a Julio Cæsare deinde, atque ab Octavio tandem in hoc crimen acerbiori poena animadvertum sit, nec solum ob pecunias *coactas, conciliatas, averfas*, sed etiam propter libertatem, honestatem, securitatemque fociorum offensam? Ad absolutam Provinciarum regiminis notitiam reliquum esset, ut dicerem de vestigalibus, quæ Populo Romano pendebant, sive per censum capitis, sive soli per *decumas scripturas*, aliaque hujusmodi. Sed quia instituti mei ratio in eo versatur, ut de iis tantum, quæ ad Monarchiam firmandam induxit Octavius, edisseram; quumque is circa Provincialium vestigalia, ac tributa nihil prorsus immutarit, ideo his omisissis percurramus alia, quæ magis ad rem nostram faciunt.

## §.IV.,



## §. IV. , E T U L T I M U S .

*De mandatis Principum Præsidibus Provinciæ datis.*

**D**Iximus supra Præsidum potestatem in Imperio militari, in vectigalibus, aliisque Provinciæ rebus prope omnibus curandis, atque in legibus demum per edicta sua condendis ea amplitudine, libera Republica, fuisse, ut ii Provinciarum potius Principes, quam Magistratus haberentur. Hinc vidimus quantum Princeps noster eos tam in vectigalibus imperandis, quam in militari Imperio exercendo ad recentis Monarchiæ præscriptum moderatus sit. Superest nunc, ut aliqua saltem de potestate eorundem in ferendis edictis dicamus, sive potius quam rationem Princeps noster inierit, vel ut nullas istiusmodi Magistratus per edictorum speciem leges uti antea, conderent, vel ut tales ferrent, quæ monarchiæ tunc exorienti essent pares. Jam vero nihil ingeniosius ab Octavio excogitari ad id potuit, quam mandata Præsidibus sub ipsius administrationis auspiciis dari, ut ad eorundem præscriptum cuncta componerent. Itaque magistratibus Provincialibus negotia omnia secundum hæc mandata, quæ profecto Monarchiæ congrua erant, expedientibus, sensim factum est, ut Provinciæ mores ipso rerum gerendarum usu monarchiæ affluerent, nec Præsides amplius arbitrio suo omnia gubernarent.

Omnia autem hæc comprobatur mirum in modum Justinianus in præfatione Novellæ XVIII., cujus verba exscribenda omnino sunt. *Ex libris (inquit) antiquis, qui jura Romani nominis continebant non ignorat tua sublimitas quanta de mandatis Principum legum latores in suo quisque volumine conscripserunt. Quia igitur nobis reparantibus omnem verustatem jam deperditam ac diminutam, placuit etiam omnibus Judicibus nostris, qui minores, vel medias administrationes gerunt sive inter correctores, sive inter spectabiles ordinentur, non solum Codicillos præstare, sed etiam mandata dare quibus inspectis omnia gubernare laudabiliter possint: ideo librum mandatorum composuimus, qui subter per utramque linguam annexus est: ut de-*  
*sur*

tur administratoribus nostris secundum locorum qualitatem, in quibus Romana, vel græca lingua frequentatur scire eorum sanctionem, ut nihil ex his audeant præterire, sed saluberrimas dispositiones nostras observantes, in perpetuum nostras Provincias nostroque imperio subiectos gubernare festinent: Ex quibus vides Principum data Præsidibus mandata leges fuisse, ut eorum quondam sub democratia legislatoria potestas sileret deinceps, ut par erat in monarchia. Et quia magistratus fere omnes in Romana Republica veras licet edictorum simulato nomine leges ferebant; propterea ut ab hac potestate sub Principe omnes exciderent, cunctis legimus magistratibus, & vel ipsi Præfecto Prætorio quamvis ab Augusto instituto, data fuisse mandata, de quibus late Gutherius in elegantissimis lucubrationibus suis de officiis *Domus Augustæ*, quas vide, si plura de his desideres.

Verum horum mandatorum auctorem Principem nostrum fuisse dubitare nos minime sinit Dio (a), & Ulpianus in lege *unica de officio Præfecti Augustalis*, ubi hæc habet. *Præfectus Ægypti non prius deponit præfecturam, & imperium, quod ad similitudinem proconsulis, lege sub Augusto ei datum est, quam Alexandriam ingressus sit successor ejus, licet in provinciam venerit, & ita mandatis ejus continetur.* Sed pulchrum est inspicere, quidnam mandata hæc præferrent. Sane & quæ ad bene provinciam gerendam, & quæ ad Monarchiam firmandam, fovendamque facerent, continebant; quorum profecto exempla a Jurisperitis excerpta in Digestis prostant. In lege 3. D. de officio Præsidis mandatur ut malis hominibus Provincia purgetur; in l. 19. D. eodem prohibetur ne nimiam familiaritatem cum Provincialibus Præsides ineant, ne quid emanant in Provincia, nisi quotidiani victus causa, neu munera accipiant; insuper habetur in l. 6. §. 3. D. de officio Proconsulis, ne matrimonia in Provinciis contrahant, in l. 6. & 8. C. de nuptiis præscribitur idem. Hæc igitur sunt, atque hujusmodi alia, quæ ad Provinciarum utilitatem instituta in tit. D. de officio Præsidis, & de officio Proconsulis ut plurimum

(a) Lib. 53.

num reperiuntur, ubi videre est capita hæc omnia Jurisconsultos ex libris mandatorum Principum, quæ Magistratibus dabantur, collegisse.

Sed præter hæc multa etiam erant, ut dixi, quæ ad firmandam Monarchiam spectabant, quorum quidem plura fragmenta in corpore juris sparsa leguntur. In *l. 2. D. de militari testamento*, hæc leguntur: *Militibus liberam testamenti factionem primus quidem D. Julius Caesar concessit; sed ea concessio temporalis erat. Postea vero primus Div. Titus dedit. Post hos Domitianus, & postea Div. Nerva plenissimam indulgentiam in milites contulit, eamque & Trajanus sequutus est: & exinde mandatis inferi capis* CAPUT EX MANDATIS. Cum in notitiam meam perlatum sit, subinde testamenta a commilitionibus relicta proferri, quæ possint in controversiam deduci, si ad diligentiam legum, & observantiam revocentur secutus animi mei integritatem erga optimos fidelissimosque commilitiones, simplicitati eorum consulendum existimaui, ut quoquo modo restati fuissent rata esset eorum voluntas. En legem, ubi juri antiquo derogatur in gratiam Monarchiæ, scilicet ad captandam militum benevolentiam, quod sub furo eorum simplicitatis occultatur, nempe ut quæcumque eorum voluntas sollemnitatibus etiam destituta pro testamento valeat, quodque ex libris mandatorum excerptum dicitur; ex quo videsis mandata Præsidibus data pro legibus a Jurisperitis usurpata in gratiam Principum. Insuper in *l. 27. D. de pænis Præsidi* mandatur, ut in re ancipiti, quæ scripto jure dijudicari non possit, Princeps consulatur; idque ex mandatis subditur injunctum. Item in eadem lege ex eisdem mandatis imperatur, ut si quem ex Decurionibus Præses relegatione puniendum existimaverit, releget quidem, sed Principi rescribat. En diminutam Præsidis potestatem tam de re dubia transigenda sine Imperatoris mandato, quam ne in Principes Civitatis relegationem inferret eodem inconsulto. Item *alio quoque capite mandatorum* in hæc verba cavetur. *Si qui ex Principibus alicujus Civitatis latrocinium fecerint, aliudve, quod facinus, ut capitale pœnam meruisse videantur, commiserint, vinctos eos custodies, & mihi scribes & adjicies quid quisque commiserit.*

K k k

Item

Item in tit. *D. de collegiis*, & corporibus illicitis lex hæc habetur in principio. *Mandatis Principalibus præcipitur Præsidibus Provinciarum, ne patiantur esse Collegia sodalitia, neve milites collegia in castris habeant; sed permittitur tenuioribus stipem mensuam conferre. Dum tamen semel in mense coeant; ne sub prætextu huiusmodi illicitum collegium coeat; quod non tantum in Urbe, sed & in Italia, & in Provinciis locum habere, Div. quoque Severus rescripsit.* Quæ sane constitutio Monarchiæ firmandæ tantum prodest, quantum profecto istiusmodi conventus eidem adversantur; ut mirari non liceat, Octavianum, Julium, aliosque Deceffores, qui supremum dominatum affectarunt, collegia isthæc præ cæteris severius prohibuisse. Atque hæc ratio est, cur Plinius Christianorum Collegia quam maxime vetuerit, quum in Principum mandatis id potissimum caveretur. Hæc sunt ejus verba, ex quibus sane evidentius res patebit: *Ipsos hoc est Christianos conventus facere desisse post editum meum, quo secundum mandata, veterias esse volueram.* Sed velim advertas legem hanc de sodalitiis, sive istiusmodi mandata Præsidibus in Provinciis data fuisse constitutione Div. Severi extensa ad Urbem, & in Italiam, quum nihil tanto esset formæ Monarchicæ periculo, quanto hæc Collegia. Itaque ut vela colligamus, mandata hæc Principum ideo instituta, ut & Provinciarum commodis inserviretur, & democratica licentia sensim elanguesceret, & Principatus demum novis semper fulcris sustineretur.

CA-

*De Magistratibus ab Augusto institutis.*

§. I.

*De Magistratibus, qui Monarchiæ congruunt.*

**J**AM Principis nostri novo accommodatas regimini leges exposuimus : sed cuncta hæc in cassum forent , nisi Magistratus ii , qui eodem conspirarent , instituerentur. Quare instituti mei ratio postulat , ut jurisprudentia Augustali ex causis suis deprompta ad Magistratus in novo regimine creatos excurrat oratio . Etenim Tullius post traditas Reipublicæ leges hoc subdit (a). *Hæc est enim , quam Scipio laudat in libris , & quammaxime probat temperationem Reipublicæ ; quæ effici non potuisset , nisi tali descriptione Magistratuum . Nam sic habetote Magistratibus , iisque qui præsent , contineri Rempublicam , & ex eorum compositione , quod cujusque Reipublicæ genus sit intelligi .* Quæ sane omnia satis comperta sunt . Nam si lex , quæ scripto sanciens , quod vult , aut jubendo , aut vetando , inter mutas literas continetur , Civitatis regimini convenire debet ; magis profecto id in Magistratibus , qui lex loquens dicuntur , curandum est . Jam vero Princeps noster eadem prorsus se gessit , atque in novis legibus condendis solertia . Nam sicuti antiquis non aperte , sed per transversos cuniculos , & specioso semper fucō antiquæ libertatis servandæ adhibito , legibus derogavit ; ita & Magistratuum antiquorum auctoritatem sensim delevit , veteribus nomenclationibus religiose manentibus . Procedebant Consules antiquæ dignitatis suæ conspicui insignibus , mittebantur a Senatu Præsides in Provincias , Prætorum , atque Ædilium non secus ac in Republica , nomina audiebantur , *ut nihil usquam prisce , & integri juris videretur immutatum ; sed hæc omnia quidem in externam tantum pristinæ libertatis speciem , quum omnes exu-*

K k k    2

ta

(a) *De legibus.*

*ta aequalitate iussa Principis, ut erat in Monarchia par, ad- spectarent. Quæ quum ita sint antequam singulatim cujusque Magistratus potestatem sub recenti regimine expendam, eam- que Monarchiæ accomodatam ostendam, operæ pretium duxi facturum, si in universum, quinam Magistratus in Monar- chia conveniant, & quæ eorum potestas cum eadem conju- ret, præferer.*

Monent viri politici primam rationem Magistratuum sub Monarchia hanc esse, ut & plures instituantur, & honor potius iis, quam potestas concedatur, atque hoc ut intelli- gant cives se non magis in regimine Popolari, vel Aristocra- tico, quam in Monarchia Civitatis honoribus frui. Hinc de Octavio tradit Tranquillus (a), quoque plures partem admini- strandæ Reipublicæ caperent, nova officia excogitavit: curam ope- rum publicorum, viarum & aquarum alvei Tiberis, frumenti populo dividundi, Præfecturam Urbis, triumviratum legendi Senatus, & alterum recognoscendi turmas Equitum, quotiescum- que opus esset. Censores creari desitos longo intervallo creavit, numerum Prætorum auxit. Exegit etiam, ut quoties Consulatus sibi daretur, binos pro singulis collegas haberet: nec obrinuit, reclamantibus cunctis, satis Majestatem ejus imminui, quod ho- norem cum non solus, sed cum altero gereret. Quibus de ho- noribus civilibus enarratis, hæc de militaribus addidit (b). Nec parciorem in bellica virtute honoranda: super triginta Duci- bus iustos triumphos, & aliquanto pluribus triumphalia ornamen- ta decernenda curavit. Liberis Senatorum, quo celerius Reipu- blica assuescerent, prosinus virilem togam, latum clavum induere, & Curia interesse permisit: militiamque auspicantibus, non tribunatum modo legionum, sed & præfecturas Alarum dedit. Sic igitur Octavius honores tam civiles, quam milita- res ad sibi cives alliciendos multiplicavit, ut magis præsentia & tuta, quam præterita, & periculosa mallent. Et quidem hæc omnia satis cum Mecenas monuerat (c). Præstat per multos

(a) Cap. 37.

(b) Cap. 38.

(c) Dion. lib. 52.

*publica negotia administrari, ut & complures hinc emolumentum sentiant, & experientiam rerum gerendarum consequantur. Ita enim & tibi subiecti majori te benevolentia prosequantur, multipliciter bonis publicis fruantes, & tu semper copiam optimorum virorum habebis, quibus ad res quaslibet necessarias peragendas utaris.*

Itaque si quis hæc attente adverterit, intelliget sane, quanta se dexteritate Octavius gesserit in hisce novis Magistratibus constituendis, atque multifariam distrahendis. Etenim honorum multitudine & sibi cives arctius devinciebat, & veterum Magistratuum memoriam, ad novas amplitudines festinantibus omnibus, comprimebat. Nam hæc est mortalium consuetudo, ut nova quisque semper exoptet, nilque vetera curet, licet meliora arbitretur. Romani igitur recentes honores appetendo, antiquorum sensim obliviscebantur, donec per se ipsi exolescerent, quod non parum Monarchiam juvabat, cui summo opere adversatur Magistratus ille, qui in Republica democratica institutus erat. Sane si intus, & revera recentium Magistratuum, quales sub Augusto erant, vim, & potestatem expenderis, aliam profecto eam non fuisse reperies, quam curam operum publicorum, viarum, & aquarum, alvei Tiberis, frumentum Populo dividendi, legendi in Senatu orationes Principis, ceterasque hujusmodi honorum species, sine tamen potestate, sine imperio, in quibus tota Majestatis ratio vertitur. Sic & Consulum, & Prætorum, & Ædilium, & Præsidum in provinciis, qui sub novorum vocabulorum technis legislatoria ante auctoritate utebantur, adeo potestas sensim imminuta est, ut vix prope eorum nomina sine re audirentur. Ita enim sæpe laudatus Mecænas docuerat (a). *Magistratuum autem potestatem antiquitus iis concessam, nequaquam servabis, ne eodem res recidat: sed honore eorum integro relicto, tantum potentia detrabes, ut neque dignitas eorum diminuat, neque novi aliquid moliendi facultas ulli adsit. Id cum aliis rationibus tum hac præcipue consequeris, si eos omnes in Urbe tantum geri jusseris, ac neque Magistratus tempore, nec*

(a) *Dion. loc. cit.*

*statim ab eo, sed interposito quantum singulis satis videbitur tempore arma eis committes: ita neque Magistratus titulo elati, insuperque exercituum compotes facti ad concutiendam Reipublicam præsentem statum accedent: & miriores eo efficientur, si aliquamdiu privatim post gestum Magistratum vixerint.*

Hæc Dio de potestate Magistratuum in Monarchia, deque illorum munere: atque ita ut eorum auctoritas neque sit diuturna, neque adeo brevis, ut statim ac res per-moverint, ab officio desistere cogantur. Ceterum mutabiles ne Magistratus aptiores formæ Monarchicæ sint, an vero perpetui, ardua quæstio est, & in utramque partem disputat Bodinus (a). Certe si perpetui essent, ad paucos honores reciderent: quare & virtus præmio suo destitueretur, & civilium motuum timor oboriretur. Etenim Civibus honorum, quibus digni sunt, splendore carentibus, res in invidiam concider, unde præsto sunt turbæ. Contra vero ut perpetui sint Magistratus saltem in virili, atque adulta Monarchia, hæc rationum momenta suadent; Res quælibet publica quanta quanta sit, domestico imperio, privatæque cuique familiæ conferri aliquanto potest: non ne autem domus quæcumque pessum it, quæ fervorum mutatione delectatur? Haud profecto secus Rerumpublicarum perniciofa videtur disciplina, quæ Magistratuum novitate, atque varietate pascitur. Hinc enim nova consilia, novæ leges, novi mores, nova edicta, nova judicia, novi ritus, novæ legis actiones, nova denique rerum omnium facies, quæ sane cuncta & veterum legum, morumque priscorum contemptum pariunt, & pericula rebus omnibus minantur. Ad hæc quum perpetui sint Magistratus, frequens illa honorum contentio, ambitioque procul erit: & cives parendo, magis quam imperando assuescent, quo quid in statu Monarchico utilius? Sed quid quid sit in adulta Monarchia, certe tamen in recenti maximopere officiet Magistratuum perpetuitas. Nam quum cives in Republica Democratica, vel Aristocratica, ubi paulo ante vivebant, sibimet ipsis parere consuevis-sent, acerbum nimis, atque adeo periculosum esset, si iis-dem

(a) *De Repub. lib. IV. cap. 4.*



dem perpetuo manentibus Magistratibus, ceteri ingenio, virtuteque valentes omni spe honoribus fruendi destituerentur. Et hæc sunt in causa, cur Mecænas tanto studio monuerit Octavium, ne Magistratus forent perpetui, nempe ut Cives viderent, non minus se in Monarchia, quam sub veteri libertate civilium honorum participes esse. Sed his jam præmissis, ad rem propius accedamus.

Sane in statu Monarchico ii instituendi Magistratus sunt per quos ingens veterum potestas infringatur, quique civium tutamen, ornatumque spectent, sic enim Aristoteles Principem monet, ut Civitatem ædificiis exornet, easque leges perferat, quæ ejus respiciunt ornatum. *Nam ædificanda est (ait) & ornanda Civitas, quasi Curator ejus sit.* Propterea sicuti in exponenda jurisprudentia Augustali a legibus, quæ ad ornatum Civitatis Civiumque commoda pertinent, exorditus sum, deinde vero, ad eas, quæ ad Monarchiam fovendam spectant, accessi; ita & heic ut summam concordiam, quæ leges inter, & Magistratus intercedit, palam faciam, ab illis Magistratibus, quorum jus ad Urbis ornamenta, Civitatisque usum, utilitatemque comparatum est, initium ducam; tum vero eorum potestatem videbimus, qua Monarchiæ consultitur, veterumque Magistratuum auctoritas ad democratiæ olim incolumem servandam instituta imminuitur, atque convertitur.

Quinam autem ad Civium commoda procuranda instituendi sint Magistratus, ex rebus ipsis, quibus Civitas indiget, perspicue intelligitur. Sed quum Aristoteles (a) id lucidius explicarit, ejus verba exscribenda omnino sunt. *Ergo primum (ait) quidem est curatio rerum necessariarum ea, quæ in foro, ubi oportet Magistratum quemdam esse, qui curam gerit rerum contrahendarum, & modestiæ. Nam omnibus fere Civitatibus necessaria est aliarum quidem rerum emtio aliarum vero venditio ad usus inter se necessarios. Et hoc est maxime proximum ad copiam rerum propter quam videntur homines in unam Republicam convenisse: Et deinde. Alius est*

ne-

(a) Politic. lib. IV. cap. IX.

*necessarius quoque & huic similis . Nam de iisdem quidem est rebus , sed in agro est , & in iis , quæ sunt extra Urbem . Hos autem Magistratus vocant bi quidem agronomos , illi vero byloros . Tres igitur hæ sunt harum curationes : Alius est Magistratus , ad quem publica vectigalia referuntur , a quibus ea servantibus ad singulos usus , sive administrationes distribuuntur . Eos autem vocant , Apodectas , & Tamias . Demum subdit . Alius est Magistratus , apud quem & contractus privatos perscribi . oporteat , & sententias iudiciorum , atque apud hos liti-um quoque intentiones , & introductiones fieri oportet . Itaque ut rem colligam , quum Civitati quædam ad vitæ usum necessaria sint , alia vero ad ejusdem ornatum pertineant ; hinc alii rebus emendis , & vendendis præsumt , alii vero Civitatis ædificiis invigilant . Sed quia præter hæc necesse etiam est , ut bene morati Cives sint , & tranquillam vitam , & ab interna , & externa vi tutam ducant , propterea & Magistratus creari debent , qui Civium moribus adsint , & qui lites inter eos oborientes dirimant , ut sunt Judices , & qui demum vim externam propulsent , ut exercituum Duces . Demum quia Religio principem locum inter omnia obtinere debet , Pontifices esse debent , & Sacerdotes , qui sacra curent . En tibi specimen omnium Magistratuum , quibus quæque Civitas indiget , sive ad sacra , & profana curanda , sive ad vim internam , sive externam arcendam , ad vitæ subsidia , commoda Civitatis , Urbis ornatum , Civiumque temperantiam procurandam . Quibus prælibatis , ad Magistratus ab Octavio ad commodum Civium , & tutamen ; atque ad Civitatis totius ornatum institutos veniamus .*

## §. II.

## §. II.

*De Præfecto annonæ, Præfecto vigilum, Comite riparum, & alvei Tiberis, Consulari aquarum, deque Curatore operum publicorum ab Augusto institutis.*

Quum nihil ad vulgi animos captandos præsentius sit, quam congiaria, & utilitas annonæ, mirandum profecto non est, Præfectum annonæ ideo ab Augusto institutum, ut sibi Principatum affectanti omnia feliciter responderent. Quo autem planius rem ita se habere pernoscat; Magistratus hujus primordia, potestatemque altius aliquanto repetenda censui. Sane in historia Romana exempla quamplurima prostant, quibus satis docemur eos, qui rebus novis studebant, non aliunde, quam per annonam vel gratis Populo distributam, vel vilius saltem venditam ad summam potestatem perrexisse. Cui enim bono tanti illi, tamque profusi sumtus, sive in ludis præbendis, sive in missilibus spargendis, nisi ut Populi benevolentia conciliaretur? Et quidem Gracchus, qui omnium primus summam rei anhelabat, per speciem libertatis a Patriciorum tyrannide servandæ legem tulit, ut semisse, & triente frumentum Populo daretur (a). Hinc Cato ad minuendam Julii potentiam nihil aptius ratus est, quam legem condere, ut quotannis mille biscentum quinquaginta talenta ad menstruum plebi frumentum dividendum impenderentur, ita Plutarch. in Cæsare. Quo circa veritus Cato ne egena plebs, quæ universæ multitudinis erat fax, atque spem omnem reponebat in Cæsare, res novas moliretur, fuit auctor Patribus, ut divideret plebi frumentum menstruum. Unde ceteris oneribus per singulos annos sumptus vicies, & ducenties accessit. Ex quibus intelligimus quanti sit ad potentiam augendam Populo annonam elargiri, vel pretio viliori distribuere.

Quid mirum si Clodius ille Tribunorum audacissimus legem pertulerit, ut frumentum Populo, quod ante semisse

(a) Florus hist. Rom.

§

LII

æris,

æris, ac triente in singulos modios vendebatur, gratis daretur? Sed Cæsar ut plebis gratiam sibi captaret, horum omnium liberalitatem superavit; capta enim Africa, iussit viginti myriades medimnorum Atticorum frumenti, idest biscentum millia ad alendum Populum Romanum advehi, duosque Prætores, totidemque Ædiles cereales a Cerere nuncupatos instituit, qui frumentum hoc Romam advehendi, & Populo distribuendi curam haberent, quemadmodum memoriz prodit Pomponius l. 2. *D. de origine juris*. Deinde Caius Julius Cæsar duos Prætores, & duos Ædiles, qui frumento præessent, & a Cerere cereales constituit. Annonarius hic Magistratus etiam ante Julium fuit in Romana Republica, minime tamen perpetuus, quum ingruente tantum fame, frumentique penuria ingravescente crearetur. At Cæsar perpetuo illum creavit, ut quantam curam præ ceteris de commodis Civium gereret, Populo ostenderet.

Quum autem in adstruenda Monarchia, Octavius eandem semitam, ac pater ejus, insectaretur, præfectam annonæ instituit, cujus historiam sic docet Dio *Annus insequens M. Marcellum, L. Anuntium Consules habuit.... pestis eo anno per totam Italiam ita grassata est, ut agris colendis nemo vacaret. Quod idem exteris etiam regionibus evenisse opinor. Itaque Romani luo ista, fameque attriti existimantes id sibi baud alia de causa contingere, quam quod Augustum non eo etiam anno Consulem haberent, Dictatorem cum dicere voluerunt, inclusumque in Curia Senatum ea vi compulerunt, ut hoc decernerent: ni ferissent, incendium minitantes. Ipsi quum XXIV. fascibus ad Augustum accessero, orantes ut se Dictatorem creari, annonæque Procuratorem exemplo Pompeii pateretur. Augustus invitus quidem, tamen annonæ procuratorem, suscepit, iussitque, ut singulis annis duo viri, qui ante quinquennium præturam gessissent, frumento distribuendo constituerentur: Dictaturam autem nequaquam admisit.*

Hæc Dionis. ipsius verbis tradidisse juvat, ut palam omnibus sit occasio, & origo Præfecti annonæ sub Augusto; sed si Magistratus hic adeo Monarchiam fovet, cur Augustus initio eum neglexit, nec nisi frumenti caritate urgente,

&

& se rogato instituit? Id sane ex ingenio ejusdem Principis sagacissimo repetendum est. Etenim ut supra diximus, hic quamvis omnia conquereret, ut penes se summa rerum esset, mira tamen arte, qua pollebat, adyta animi sui occludebat, omniaque, quæ ad Monarchiam faciebant, adeo per occasiones, & tempora disponebat, ut nonnisi in Civium gratiam communemque utilitatem nova parare videretur. Quod quidem intellexit Tranquillus, qui sic scripsit: *liberalitatem omnibus ordinibus per occasiones frequenter exhibuit?* Cur quæso per *occasiones*? quia nempe exercendo ultro liberalitatem visus esset id non ex rerum necessitate, sed ut sibi consuleret, effecisse. Itaque quum Præfectum annonæ, irruente fame, & a Populo rogatus instituerit, sic se gessit, ut Magistratum hunc ad publicæ utilitatis causam, non autem ad sibi conciliandam Populi benevolentiam creasse censeretur. Qua de re noluit profecto ipse ad Pompeii Magni exemplum, uti a Populo rogatus erat, annonæ curam suscipere, ne putaretur velle per eam ad supremum dominatum assurgere, non secus ac Pompejus idem, cui munus hoc propterea fuerat demandatum, ut plenius sibi amorem conciliaret.

Porro munus hujus Magistratus erat non solum curare, ne Civitas frumenti penuria laboraret, neu frumentum carius venderetur; sed etiam ut pecuniam ad illud emendum cogeret, quod gratuito deinde plebi distribueretur. Etenim sic scripsit Tranquillus (a) *frumentum quoque in annonæ difficultatibus sæpe levissimo, interdum nullo pretio virisim admensus est.* Et ne quis in accipiendo fraudem faceret, per tesseras frumentarias, quarum tam frequens mentio est in toto corpore juris, id agebatur. Erat autem tessera signum æneum, in quo nomen accipientis, & quantitas continebatur. Et quum id liberalitatis genus ab Augusto institutum ad comparandam plebis gratiam Principi maxime prodesset, non mirum, si diu per insequentes Principes servatum sit, & licet ab aliquibus omissum, ab aliis deinceps restitutum fuerit: quod

LII 2

sa-

(a) In *Octav. cap. 41.*

sane & effecit Nervà, qui quingentis millibus aureorum agrum emit, unde pauperes alerentur, & eum sequutus Trajanus quinque millia impuberum ex publico nutrit; quem deinde numerum Hadrianus, & Antoninus auxerunt, atque alimenta ad decem usque, & octo annos pueris danda iusserunt ut ex lege *Mela* 14. *D. de alimentis & cibariis legatis*.

Ex qua consuetudine plebem demulcendi & illud ortum est, ut oleum etiam, aliaque ad victum facientia Populo sine pretio distribuere. Sic primum omnium Severus instituit referente Capitolino, ut gratis oleum daretur, cujus ex Africa tantam copiam Romam advehi curavit, ut per quinquennium non solum Urbis ului, sed & totius Italiae, quaecumque ejus pars oleo egeret, satis esset, carnes etiam suillas insequentes Principes dare gratuito coepere, quemadmodum Vopiscus in Aureliano: *statuerat* ( inquit ) *vinum gratuitum Turebanus Populo Romano dare, ut quemadmodum oleum, panis, & porcina gratuita praeberentur, sic etiam vinum daretur, quod a Praefecto Pratorio prohibitum non fecit: dicebat, si vinum Populo Romano damus, superest, ut & pullos, & anseres demus*. Hinc intelliges *tit. C. Theod. de suariis*, quorum corpus Romae institutum erat ad carnes suillas Populo gratis elargiendas. Quum autem permisti his essent pecuarii, hinc intelligimus & ovium carnes solere Populo distribui. Quare Campani, Samnites, Lucani, Brutii, & Tusci certum carnis suillae, & ovinae pondus, veluti canonem quemdam praediis, & patrimoniis impositum praestare tenebantur quibus deinde Principes in largitionibus uterentur. Haec enim erat tunc recepta consuetudo; ut quaeque Provincia fiscalia onera per eas species subiret, quibus regio abundaret. Quumque Campani, Samnites, Lucani, Brutii, & Tusci uberrimos agros haberent ad ovium, atque suum pastum, inductum profecto ut per haec solverent tributa.

Sed minime praetermittendum est morem hunc dividendi gratuito plebi frumentum, qui Romae Augusti aetate invaluerat, fuisse etiam Byzantii, quo per Constantinum fuerat Imperii sedes translata, receptum. Itaque Constantino-  
poli, non secus ac Romae frumentum gratuito plebi dispen-  
saba-

fabatur, & sicuti id Romæ per tesseras frumentarias, ita Constantinopoli in gradibus fiebat. Qua de re prostat titulus in Cod. Theod. lib. 14. *de annonis civicis, & pane gradili*. Sed ambigitur hic inter eruditissimos quosque quinam fuerint ii *gradus*, per quos panis iste distribueretur. Sunt quidam, qui putant panem hunc gradilem nuncupatum propterea quod iis, qui in gradu, sive in honore erant, daretur, sed futillis hæc opinio est; quum omnes quotquot ex Scriptoribus synchroni hunc panem meminerunt, sic eum descripserunt, ut annona esset popularis vili plebeculæ nutriendæ addicta. Ita Prudentius (a).

*Quis venit esuriens Magni ad spectacula Cyrci?*

*Quæ regio gradibus vacuis jejunia dira*

*Sustinet? aut quæ janiculi mora mora quiescit?*

Alii dictionem hanc sic accipiunt, ut panis ordinatim daretur, non vero confuse, sive per turmas. Quare Salmasius opinatus est, panem hunc in foro de plano divisum, sed ordine servato. Verum hanc Salmasii conjecturam refellit *len* 3. eodem, in qua sic legimus. *Universi panem gradilem de gradibus adipiscantur. Neque cuiquam hæc aut deferatur gratia, aut imponatur injuria, ut pistrino accipiat*. . . quod epigraphe ejusdem legis sic dilucidius explicat. *De pane gradili accipiendo, seu distribuendo de gradibus non de pistrino*; ubi oppositio, quæ intercedit inter gradum, & pistrinum clare docet, gradus in proprio sensu, nequaquam vero metaphorice accipiendos. Hinc scripsit doctissimus Gothofr. hic: *bi vero gradus nostri alii fuere; nempe in borum edito, seu tabulato erat annona, seu panis repositus: positique ibi qui eum distribuere singulis e Populo viritim, palam per gradus ascendentibus, atque in summo gradu annonam accipientibus*. Itaque sic habe, in quibusdam Urbis Constantinopolitanæ regionibus quædam pistrina instituta fuisse, ubi panis civilis conficeretur, ibique in gradu editiore panem hunc erogari solitum. Atque hic est panis gradilis, quem non semel memorat Codex Theodos. . Nos interim ad alia pertranseamus.

Sed

(a) lib. II. *adver. Symmach.* vet. 947.

Sed non minus ac Præfectus annonæ, vigilum præfectus Urbi, ac Monarchiæ fuit perutilis, de quo hæc habet (Dio. l. 55.) *Quumque eo tempore multa in Urbe incendiis essent vastata, libertinos septem locis ad ea curanda constituit: equitem eis præfecit, quos & si haud diu id officium gerere pasi statueras; tamen reipsa expertus utilissimum, ac maxime necessarium esse eorum munus perdurare iussit; suntque nostra etiam ætate nocturni hi custodes non ex libertinis tantum, sed ex aliis etiam militibus: murosque in Urbe tenent, & mercedem publicæ accipiunt. Ex quibus pernoscis originem, atque munus præfecti vigilum; is enim ab Augusto creatus fuit ad evertenda incendia: nam licet antea id muneris exercerent Triumviri, Ædiles, ac Tribuni plebis; exorto tamen in Urbe magno incendio, satius duxit Princeps noster novum ad id instituere magistratum, quo omnia tutoria essent. Hinc Ulpianus, & Paullus de eo sic scripserunt (a). Pluribus uno die enormis incendiis.... septem cohortes apparatus locis constituit (Augustus) ut binas regiones Urbis unaqueque cohors aueretur, præpositis eis tribunis, & super omnes spectabili viro, qui præfectus vigilum appellatur. Quum igitur Præfectus hic incendia ab Urbe avertere deberet, tota nocte vigilabat, & more militum calceatus cum amis, & dolabris ambulabat inquilinos admonens, ut ab incendio caverent. Nec tantum id huic Præfecto curæ erat, sed publicæ etiam Urbis tranquillitati studebat, cognoscebat enim de effraCTORIBUS, furibus, raptoribus, receptatoribus, modo tamen in eorum caput ne animadverteret, ut ex l. 3. & ult. D. eodem. Ex quibus omnibus colligimus, quantæ utilitati fuerit Urbi Magistratus hic, quando tanto studio Civium tranquillitatem curabat. Sed quod in nocturnos cœtus & tumultus etiam animadverteret, Urbisque muros teneret, dixeris sane monarchiæ quoque servandæ plurimum profuisse. Quem enim latet nocturnas turbas nocturnosque cœtus cuilibet civili regimini maxime vero monarchico obesse? Jure merito igitur subdit idem Dio Octavianum comperta utilitate magistratus hujus retinuisse eum, perpetuumve constituisse, licet eo animo creasset, ut amoto il-*

(a) L. 2. & 3. D. de offic. Præf. vigil.



illo incendio, extinctoque munere suo abirét.

Post magistratus, quorum cura erat communis utilitas, eos, qui ad Urbis ornatum a Principe nostro instituti sunt, percontabimur. Inter hos formarum comes est, qui reficiendis aquarum ductuum formis, quæ erant ex firmis lateribus constructi canales, curator erat. Et quidem vulgarissimum est apud Romanæ Historiæ Scriptores aquam in Urbem ductam tribus modis vel fistulis plumbeis, vel tubulis fictilibus, vel structilibus canalibus, quæ formæ appellantur. Forma igitur meatus structilis erat ex opere lateritio factus, per quem rivus deducebatur. Hæc olim super altis fornicibus formam sustentibus utrimque muro inclusa, per colles Romanos discurrebat, cujus etiam nunc vetustæ videntur reliquiæ: Palladius quam formam structilem dixerat, deinde formam simpliciter vocat; sed quum deinde per colles discurreret, opus erat lapide strato, in quo contineretur. Ex quo intelligitur cur passim in toto titulo de *servitutibus*, & *aqua*, atque alibi dicatur, cui jus aquam ducendi per alienum fundum sit, jus reficiendi esse, inutile enim sibi jus aquam ducendi foret, si reficere iter non posset. P. Victor Romæ viginti quatuor aquas numerat, quæ postea hostium incursionibus ad undeviginti redactæ fuerunt. Sane magna aquarum copia Romæ opus erat; hæc autem per aquarum ductus derivata, in lacus deinde, thermas, & privatorum aedes distribuebatur; de quo vide legem si *venditor* in fine *D. de actionibus empti*, & si plura desideres videas S. C. sub Augusto conditum apud Frontinum. Quum igitur tanta aquarum vi Urbs indigeret, nil mirum quod Princeps noster magistratum creaverit, qui curam illarum susciperet, tum ut formas inspiceret, atque sartas tectas curaret, ne inde detrimenti aliquid eveniret, tum ut fontes, fornices, muri, rivi que ipsi integri essent ad usum aquæ civibus præstandum.

Consularis aquarum differebat a comite formarum; nam hic tantum formas curabat, cavebatque, ne quid cursui aquarum impediret vel corrumpere; ille vero aquam dividebat, atque ad destinatos usus dispertiebatur. Quanti autem esset munus hoc quantæque apud Populum gratiæ, ex Plinio evincimus, qui lib.

36.15. sic scripsit. *Quod si quis diligentius aestimaveris aquarum abundantiam in publico balneis, piscinis domibus, curiis, hortis suburbanis, villis, spacioque advenientem, extructus arcus, montes perfossos, convalles æquatas, fatebitur nihil magis mirandum fuisse in toto orbe terrarum.* Quum igitur abundantia hæc aquarum magno usui esset, sive ad necessaria vitæ subsidia, sive ad animi voluptatem; hæc causa fuit quapropter tanti hoc munus fieret, ut peculiaris ab Augusto institueretur magistratus. Sed prætereundum hic non est olim, ut scripsit Frontinus, omnem aquam in publicos usus distributam, legeque cautum, ne privati sibi ducerent, præter eam, quæ ex receptaculo publico, seu castello excidisset; atque hanc ipsam, quam caducam vocitabant, ad balneorum, & fallonicorum usum infusam, vestigalemque statuta mercede fuisse. Sed Principes deinde, domum ut quisque suam privatim aquam ex castello, atque ad hortos etiam irrigandos deduceret, concesserunt: de quo vide legem *usum 4. C. de aqua ductu.*

Erat etiam Curator operum publicorum, quem Augustus instituerat, ut opus quodque publicum hoc est amphitheatrum, theatrum, capitolium, thermas, aliaque hujusmodi curaret. Etenim munus ei erat inspicere, ut omnia hæc facta recta essent, neu quis publico operi nomen suum inscriberet, sive id e fundamentis construeret, sive vitiosum reficeret, quum Principem unum opus quodcumque publicum præferre deberet, aut eum, cujus pecunia extrueretur, vel repararetur. Curatorem etiam riparum, & alvei Tiberis Augustus creavit, e Republica enim est ripas fluminum publicorum reficere, atque munire, ne navigatio, aut publicus usus impediatur. Atque hæc de his magistratibus satis sint; quos ideo instituisse Augustum scripsit Tranquillus, ut in plures potius Reipublicæ administratio dispertita videretur, quam ut potestatem haberent. Quamobrem velim advertas quanta sollertia heic sese gesserit Augustus, nam hæc nova officia quum omni imperio carerent, atque inania essent veterum magistratuum simulacra, tantum abest, ut antiquam Populi potestatem servarent, ut potius eam everterent, uniusque potentiam adstruerent. Quum enim homines vetera plerunque fastidiant,

ac

ac nova omnia appetant, hinc vulgo cives nova munera anhelantes, quæ nihil monarchiæ obstitabant, a prioribus magistratibus, qui eidem adversarentur, avertébantur, & popularis forma suapte natura concidebat.

## §. III.

*De Præfecto Urbis, & Præfecto Prætorio.*

**H**Uc usque de iis Magistratibus, qui Monarchiæ conveniunt, edisseruimus, reliquum nunc est, ut dicamus per quos eadem monarchia ab Augusto instituta maxime foveretur, atque incolumis servaretur. Atque hi profecto sunt Præfectus Urbi, & Præfectus Prætorio, de quibus jam sermonem instituimus. Sane quantum Præfectus Urbi Monarchiæ prodest, ex hoc potissimum colligi potest, quod inter præcepta Principi nostro tradita, id maxime adjecerit Mæcenas (a). *Præfectus etiam Urbis ex primariis viris quidem creandus est, qui omnes magistratus, quos geri ante hunc convenit, gesserit: non ut per absentiam magistratuum Rempublicam administret: sed ut quum reliquis in rebus Urbi præsit, tum causas quoque eas, quibus provocatio comperit, capitalesque etiam omnes, iis exceptis (quas post dicam) in Urbe, ac extra eam usque ad LXXXI. millia passuum dijudicet.* Hæc Dio, quorum ut magis pateat sensus, res ab ipsis Urbis exordiis repetenda. Præfectus Urbi sub Regibus etiam audiebat, nam absentibus illis, atque ad bellum proficiscentibus, ne Urbs sine imperio foret, sollemne erat unum aliquem creari, qui locum eorum subiret; atque is Urbi Præfectus nuncupatus est. Ita scripsit Tacitus in *V. An.* *Antea profectis domo Regibus mor magistratus, ne Urbs sine imperio foret, unus in tempus deligebatur, qui illis absentibus jus diceret, ac subditos moderaretur.* Sed Regibus exactis consulibusque imperium tenentibus adhuc Præfectum hunc legi, si quando Consules Urbe ob bella abessent, qui illorum vice jus diceret, mos fuit.

M m m

Ve-

(a) *Dion. lib. 52.*

Verum Prætoris instituto, ut perpetuo loco Consulatum, qui sæpe bellorum causa Roma proficiscebantur, jus diceretur, factum hinc est, ut præfectura Urbis exoleretur, præter feriarum Latinarum tempus, quo ad venerandam antiquitatem servandam, mos mansit, ut semel in annum crearetur. Quum enim tunc temporis Consules ceterique magistratus in Montem Albanum proficiscerentur, ne Civitas imperio omni soluta videretur, Præfectus hic creabatur. Dixi solius antiquitatis memoria Præfectum hunc lectum: nam quum harum feriarum tempore agere Populus non posset, prorsus inanis & vacua ejus erat potestas.

Quum igitur, & sub Regibus, & libera Republica magistratus hic fuisset, hinc intelligimus, cur Mecenas Principem nostrum monuerit, ut talis Præfectus Urbi institueretur, qui jus non tantum, ut antea magistratibus absentibus, diceret, sed illis etiam præsentibus auctoritatem suam exereret. Hæc de origine Præfecti Urbi, sed non dum patefacta ratio est, cur ejusdem auctoritas adeo recenti Monarchiæ congrueret, ut Mecenas de eo instituendo maxime sollicitus visus fuerit. Verum captu difficile id non erit, si ea memoria recolantur, quæ supra de Romana Republica in universum diximus? Etenim si illa Democratica, si Aristocratica fuerit, prout plebis, vel optimatum magis vires invalescerent, semper tamen summa potestas penes magistratus, & Patres erat. Jus quidem dicturus Prætor se incolume jus civile servaturum initio magistratus sui jurabat; sed idem deinde edictis suis supplendo, & corrigendo legislatariam potestatem, quamvis verborum aliorum fucio, formularumque fictionibus involutam exercebat. De Præsidum autem sententiis ad Senatum appellabatur veluti ad summam Orbis Terrarum consilium, ex cujus nutu, atque arbitrio vita, & fortunæ Provinciarum penderent. Nonne ab his omnibus forma Monarchica abhorret? Quid igitur Princeps noster? Magistratum instituit, qui & Senatus, & Prætorum, aliorumque magistratuum everteret potestatem, omniaque ad unum Principem referret. Atque is fuit Præfectus Urbi, cujus tanta potestas erat, si vera sunt, quæ Eusebius Cæsariensis de Melsala Corvino refert,

ut

ut a Principe parum prope distaret . Ecce tibi ejus verba .  
*Intra sen dies Messala se abdicavit ; incivilem eum magistratum  
 contestatus cui omnem imperii potestatem concesserat non tantum  
 in Urbe , sed & extra intra centesimum lapidem , idest centum  
 millia passuum .*

Itaque quum magistratus hic & civiles controversias di-  
 rimeret , & crimina omnia puniret , factum est sane , ut omnis  
 propemodum Prætoris auctoritas elangueret . Præter hæc quum  
 a ceteris magistratibus sive in Urbe , sive extra appellationes  
 reciperet , Senatus , ad quem antea provocabatur , auctoritas  
 quam maxime imminuta est . Etenim si Præfectus hic a Prin-  
 cipe creabatur , de ejusdem sententia appellatio ( nam Augu-  
 stus ex monitu Mecænatis nullum creaverat magistratum sine  
 provocatione ) ad Principem ipsum delegantem , nec amplius  
 ad Senatum deferrebat ; qua de re ab uno vita , fortunæque  
 omnium pendebant : quod sane in monarchico statu par est .  
 Quod ut clarius pateat , Mecænatis verba exscribenda sunt sic  
 Principem nostrum apud Dionem monentis . *Ipse autem seor-  
 sim de causis , in quibus provocatione certatur , iudicium facies ,  
 quæ a majoribus magistratibus , tutoribus , Præfecto Urbi , subcen-  
 sore , Præsidibus Provinciæ , annonæ procuratore , & nocturnæ  
 custodiæ magistro ad te referuntur : nemo enim ita merum impe-  
 rium obsinere debet , ut non ab eo provocari possit .* Ex quibus  
 omnibus vide , quantum Urbis hæc præfectura recenti illi mo-  
 narchiæ congrueret , quum & Prætoris , & Senatus auctoritas  
 adeo per eam effracta sit ; ut deinceps neque Prætori jus fe-  
 rendarum legum sub edictorum nomine exercere amplius fas  
 esset , neque ad Senatum appellationes de Judicium sententiis  
 vel intra , vel extra Urbem deferrentur . Contra vero mirum  
 est , quam altas hinc radices ageret monarchia , quando ne-  
 gotia omnia per provocationem a sententia Præfecti ad unum  
 tantum , nempe Principem deveniebant .

Ut autem luculentius id perspiciatur , juvat hic bre-  
 vi exponere , quantum sub insequentibus Principibus Præfe-  
 cti hujus creverit auctoritas . Et quidem quum Principes per-  
 noscent magistratum hunc quamplurimum fovere monarchiam ,  
 valde profecto ejusdem potestatem , atque imperium adaugere

M m m 2

ad-

adnisi sunt. Ex Dione enim intelligimus hujus magistratus potestatem ad *LXXX. millia passuum* extra Urbem prolatam, sed res, ut dixi, hic non stetit, nam ad immensum ea excrevit, & licet certum tempus, quo tanta amplitudo accesserit, ignorem, compertum tamen habeo, ex Vopisci historia sub Floriano ad imperii culmen Præfecturam hanc fuisse erectam. *Omnis (scribit) provocatio Præfecti Urbis erit: quæ tamen a Proconsulibus, & ab ordinariis iudicibus emerferit. . . . creandi Principis iudicium ad Senatum redit, simul etiam Præfectura Urbana appellatio universa decreta est. . . . & demum nos recepimus ius proconsulare, redierunt ad Præfectum Urbis appellationes omnium potestatum, & omnium dignitatum.* Ex quibus patet, sub Floriano appellationes omnium iudicum, atque potestatum uni Præfecto fuisse delatas. Itaque Senatum omni jure circa appellationes excidisse novimus, postquam monarchia firmissime invaluit. Hic enim rerum omnium ordo est, ut ab exiguis profectæ initiis ad majora sensim affurgant, donec ad maxima quæque attollantur. Cœpit quidem sub Augusto Senatus appellationibus privari earum controversiarum, quæ sive in Urbe, sive extra eam usque ad *LXXX. millia passuum per ordinarias potestates iudiciali sententia* dirimerentur. Sed, postmodum res eo venit, ut ab omnium iudicum sententiis ad Urbem Præfectum provocaretur.

Verum quum Monarchiæ adultæ jam, ac virili minime conveniat magistratus ille, qui tantum polleat, ut a Principe parum differat, cœpta deinde est hæc tanta Præfecti potestas intra limites quosdam coerceri. Quando vero id factum, nos docet Doctissimus Gothof. qui in l. *exemplo Africa IX. tit. Cod. Theod. de extraordinariis, sive sordidis* inquirens quonam tempore Urbicarum, vel suburbicarum Regionum nominis mentio fiat, hæc scripsit. *Investiganti porro mihi, cur non antiquior hujusce Urbicariarum nominis mentio occurrat, hanc causam suppeditat lex 27. infra de appellation. , quæ anno 357. , & quod excurrit ante hanc legem data est. Nempe novam Italia Regionum designationem ea lege Constantius facere instituit; earum scilicet, ex quibus ad Præfectum Prætorio deinceps appellari vellet, & earum ex*  
qui-

quibus ad Præfectum Urbis, quum hactenus ex omnibus Italiae Regionibus Præfectus Urbi eas sibi vindicaret. Quare quum intra suam, & peculiarem Urbis diæcesis eum coarctaret, enata jam inde Urbicariarum Regionum appellatio, quasi quæ Urbis Diæcesin constituentes, sola etiam ad Præfecti Urbis dispositionem pertinerent: ideo quoque lex hæc Romæ proposita dicitur, ad cujus Diæcesin nominatim ea pertinet. Ceterum quot tunc Provincias Italia complecteretur, vide Geographos, eundemque Gotofr. in cit. lege 27. Cod. Theod. de appellationibus. Interim ex his, quæ dicta sunt, advertere licet, ad quem auctoritatis apicem Præfectura Urbis post Augusti tempora evecta fuerit, ut non nisi sub Constantio demum imminui cœperit, porro nos percurramus alia.

Non solum autem proderat Præfectus is monarchiæ, quia Prætoris tribunal, Senatusque auctoritatem infringebat; sed etiam quod antiquæ libertatis vestigia obreptive quamvis deleret. En Taciti verba, ex quibus id intelligitur. Ceterum Augustus bellis civilibus implicatus Clinium Mæcenatem Equestris ordinis virum, Romæ, atque Italia proposuit. Mox rerum positus, ob magnitudinem Populi, ac tarda legum auxilia, sumfit a Consularibus, qui coercerent servitia, quod Civium audacia turbidum nisi vim metuat. Primusque Messala Corvinus eam potestatem, sed paucos intra dies finem accepit, quasi nescius exercendi. Quæ ut intelligantur in memoriam revocandum est, sub Republica Patres, ac dominos jus vitæ, & necis in liberos servosque habuisse, sed quamvis domesticum hoc, atque herile imperium florente libertate civibus conveniret, nequaquam tamen sub monarchia, ubi penes unum omnium vitæ, & fortunæ jus manere debet. Hinc Princeps noster solertissimus, ut illud a Civium manu sensim eriperet, magistratum hunc excogitavit in externam quidem speciem, ut servitia coerceret, nempe ut servorum, filiorumque peccata in dominorum, ac Parentum gratiam puniret, sed revera ut domesticum imperium labefactaretur, nam quum hoc tempore servorum, filiorumque crimina ad Præfecturæ tribunal perferrentur, fiebat, ut per se majestas illa dominorum, parentumque elangueret, donec poenæ tandem statutz fuerint in

pa-

Verum Prætoris instituto, ut perperuo loco Consulum, qui sæpe bellorum causa Roma proficiscebantur, jus diceretur, factum hinc est, ut præfectura Urbis exoleret, præter feriarum Latinarum tempus, quo ad venerandam antiquitatem servandam, mos mansit, ut semel in annum crearetur. Quum enim tunc temporis Consules ceterique magistratus in Montem Albanum proficiscerentur, ne Civitas imperio omni soluta videretur, Præfectus hic creabatur. Dixi solius antiquitatis memoria Præfectum hunc lectum: nam quum harum feriarum tempore agere Populus non posset, prorsus inanis & vacua ejus erat potestas.

Quum igitur, & sub Regibus, & libera Republica magistratus hic fuisset, hinc intelligimus, cur Mecænas Principem nostrum monuerit, ut talis Præfectus Urbi institueretur, qui jus non tantum, ut antea magistratibus absentibus, diceret, sed illis etiam presentibus auctoritatem suam exereret. Hac de origine Præfecti Urbi, sed non dum patefacta ratio est, cur ejusdem auctoritas adeo recenti Monarchiæ congrueret, ut Mecænas de eo instituendo maxime sollicitus visus fuerit. Verum captu difficile id non erit, si ea memoria recolantur, quæ supra de Romana Republica in universum diximus? Etenim si illa Democratica, si Aristocratica fuerit, prout plebis, vel optimatum magis vires invalescerent, semper tamen summa potestas penes magistratus, & Patres erat. Jus quidem dicturus Prætor se incolume jus civile servaturum initio magistratus sui jurabat; sed idem deinde iustis suis supplendo, & corrigendo legislatariam potestatem, quamvis verborum aliorum fuco, formularumque fictionis involutam exercebat. De Præsidum autem sententiis ad prælatum appellabatur veluti ad summum Orbis Terrarum filium, ex cujus nutu, atque arbitrio vita, & fortunæ vinciarum penderent. Nonne ab his omnibus forma Monarchiæ abhorret? Quid igitur Princeps noster? Magistratum instituit, qui & Senatus, & Prætorum, aliorumque magistratuum teret potestatem, omniaque ad unum Principem referre que is fuit Præfectus Urbi, cujus tanta potestas erat, ut sunt, quæ Eusebius Cæsariensis de Melsala Corvino



ut a Principe parum prope distaret . Ecce tibi ejus verba .  
*Intra sen dies Messala se abdicavit ; incivilem eum magistratum  
 contestatus cui omnem imperii potestatem concesserat non tantum  
 in Urbe , sed & extra intra centesimum lapidem , idest centum  
 millia passuum .*

Itaque quum magistratus hic & civiles controversias di-  
 rimeret , & crimina omnia puniret , factum est sane , ut omnis  
 propemodum Prætoris auctoritas elangueret . Præter hæc quum  
 a ceteris magistratibus sive in Urbe , sive extra appellationes  
 reciperet , Senatus , ad quem antea provocabatur , auctoritas  
 quam maxime imminuta est . Etenim si Præfectus hic a Prin-  
 cipe creabatur , de ejusdem sententia appellatio ( nam Augu-  
 stus ex monitu Mecænatidis nullum creaverat magistratum sine  
 provocatione ) ad Principem ipsum delegantem , nec amplius  
 ad Senatum deferrebat ; qua de re ab uno vita , fortunæque  
 omnium pendebant : quod sane in monarchico statu par est .  
 Quod ut clarius pateat , Mecænatidis verba exscribenda sunt sic  
 Principem nostrum apud Dionem monentis . *Ipse autem seor-  
 sim de caussis , in quibus provocatione certatur , iudicium facies ,  
 qua a majoribus magistratibus , tutoribus , Præfecto Urbi , subcen-  
 sore , Præsidibus Provinciæ , annonæ procuratore , & nocturnæ  
 custodiæ magistro ad te referuntur : nemo enim ita merum impe-  
 rium obtinere debet , ut non ab eo provocari possit .* Ex quibus  
 omnibus vide , quantum Urbis hæc præfectura recenti illi mo-  
 narchiæ congrueret , quum & Prætoris , & Senatus auctoritas  
 adeo per eam effracta sit ; ut deinceps neque Prætori jus fe-  
 rendarum legum sub edictorum nomine exercere amplius fas  
 esset , neque ad Senatum appellationes de Judicium sententiis  
 vel intra , vel extra Urbem deferrentur . Contra vero mirum  
 est , quam altas hinc radices ageret monarchia , quando ne-  
 gotia omnia per provocationem a sententia Præfecti ad unum  
 tantum , nempe Principem deveniebant .

Ut autem luculentius id perspiciatur , juvat hic bre-  
 vi exponere , quantum sub insequentibus Principibus Præfe-  
 cti hujus creverit auctoritas . Et quidem quum Principes per-  
 nossent magistratum hunc quamplurimum fovere monarchiam ,  
 valde profecto ejusdem potestatem , atque imperium adaugere

M m m 2

ad-

adnisi sunt. Ex Dione enim intelligimus hujus magistratus potestatem ad *LXXX. millia passuum* extra Urbem prolatam, sed res, ut dixi, hic non stetit, nam ad immensum ea excrevit, & licet certum tempus, quo tanta amplitudo accesserit, ignorem, compertum tamen habeo, ex Vopisci historia sub Floriano ad imperii culmen Præfecturam hanc fuisse erectam. *Omnis (scribit) provocatio Præfecti Urbis erit: quæ tamen a Proconsulibus, & ab ordinariis iudicibus emerferit. . . . creandi Principis iudicium ad Senatum redit, simul etiam Præfecturæ Urbanae appellatio universa decreta est. . . . & demum nos recepimus jus proconsulare, redierunt ad Præfectum Urbis appellationes omnium potestatum, & omnium dignitatum.* Ex quibus patet, sub Floriano appellationes omnium Judicum, atque potestatum uni Præfecto fuisse delatas. Itaque Senatum omni jure circa appellationes excidisse novimus, postquam monarchia firmissime invaluit. Hic enim rerum omnium ordo est, ut ab exiguis profectæ initiis ad majora sensim assurgant, donec ad maxima quæque attollantur. Coepit quidem sub Augusto Senatus appellationibus privari earum controversiarum, quæ sive in Urbe, sive extra eam usque ad *LXXX. millia passuum* per ordinarias potestates iudiciali sententia dirimerentur. Sed, postmodum res eo venit, ut ab omnium Judicum sententiis ad Urbi Præfectum provocaretur.

Verum quum Monarchiæ adultæ jam, ac virili minime conveniat magistratus ille, qui tantum polleat, ut a Principe parum differat, coepta deinde est hæc tanta Præfecti potestas intra limites quosdam coerceri. Quando vero id factum, nos docet Doctissimus Gothof. qui in l. *exemplo Africa IX. tit. Cod. Theod. de extraordinariis, sive fordidis* inquirens quonam tempore Urbicarum, vel suburbicarum Regionum nominis mentio fiat, hæc scripsit. *Investiganti porro mihi, cur non antiquior hujusce Urbicariarum nominis mentio occurrat banc causam suppeditat lex 27. infra de appellation. , quæ anno 357. , & quod excurrit ante hanc legem data est. Nempe novam Italiæ Regionum designationem ea lege Constantius facere instituit; earum scilicet, ex quibus ad Præfectum Prætorio deinceps appellari vellet, & earum ex qui-*

quibus ad Praefectum Urbis, quum haecenus ex omnibus Italiae Regionibus Praefectus Urbi eas sibi vindicaret. Quare quum intra suam, & peculiarem Urbis diocesis eum coarctaret, enata jam inde Urbicariarum Regionum appellatio, quasi quae Urbis Diocesin constituentes, sola etiam ad Praefecti Urbis dispositionem pertinerent: ideo quoque lex haec Romae proposita dicitur, ad cuius Diocesin nominatim ea pertinet. Ceterum quot tunc Provincias Italia complecteretur, vide Geographos, eundemque Gotofr. in cit. lege 27. Cod. Theod. de appellationibus. Interim ex his, quae dicta sunt, advertere licet, ad quem auctoritatis apicem Praefectura Urbis post Augusti tempora evecta fuerit, ut non nisi sub Constantio demum imminui coeperit, porro nos percurramus alia.

Non solum autem proderat Praefectus is monarchiae, quia Praetoris tribunal, Senatusque auctoritatem infringebat; sed etiam quod antiquae libertatis vestigia obreptive quamvis deleret. En Taciti verba, ex quibus id intelligitur. Ceterum Augustus bellis civilibus implicatus Clinium Mecanatem Equestris ordinis virum, Romae, atque Italiae proposuit. Mox rerum positus, ob magnitudinem Populi, ac tarda legum auxilia, sumfit a Consularibus, qui coercerent servitia, quod Civium audacia turbidum nisi vim metuat. Primusque Messala Corvinus eam potestatem, sed paucos intra dies finem accepit, quasi nescius exercendi. Quae ut intelligantur in memoriam revocandum est, sub Republica Patres, ac dominos jus vitae, & necis in liberos servosque habuisse, sed quamvis domesticum hoc, atque herile imperium florente libertate civibus conveniret, nequaquam tamen sub monarchia, ubi penes unum omnium vitae, & fortunae jus manere debet. Hinc Princeps noster solertissimus, ut illud a Civium manu sensim eriperet, magistratum hunc excogitavit in externam quidem speciem, ut servitia coerceret, nempe ut servorum, filiorumque peccata in dominorum, ac Parentum gratiam puniret, sed revera ut domesticum imperium labefacteretur, nam quum hoc tempore servorum, filiorumque crimina ad Praefecturae tribunal perferrentur, fiebat, ut per se majestas illa dominorum, parentumque elangeret, donec poenae tandem statutae fuerint in pa-

parentes , & dominos , si forte filios , vel servos occidissent , aut male habuissent . Ex quibus omnibus quantum Urbis præfectura recentem monarchiam foveret , quum non tantum juribus suis magistratus , Senatusque , sed dominorum etiam , atque parentum domesticum imperium destitueretur , sat perspicitur . Quæ omnia ut majori luce superfundantur , non poterit exscribere Ulpiani verba , qui in *l. i. D. de officio Præfecti Urbis* sic ait Præfectus is institutus ut servos de dominis querentes audiret , sed ubi subdit *en interdictis quod vi , aut clam , aut interdicto unde vi audire potest* , non ne intellexit idem , quod Tacitus scripsit , nempe hunc magistratum institutum esse , ut fartam rectam Reipublicæ tranquillitatem custodiret vim privatam modis omnibus auferendo ? Patet igitur dilucidius quantum magistratus hic monarchiæ congrueret .

Post Præfectum Urbi , Præfectus Prætorio sequitur , hi enim duo fuerant magistratus , quos potissimum ab Augusto creandos voluerat , ut diximus , Mecænas . Sed in hoc argumento ita verfabimur , ut ad insequentia tempora non descendamus : adeo enim deinde Præfecti Prætorio potestas crevit , ut si omnia ejus jura ab Imperatoribus post Augustum adjecta expendere velimus , proluxa satis dissertatione opus esset . Itaque paucis de eo , ut sub Augusto erat , loquemur . Proinde ex Equitibus duos (a) , quosdam præstantissimos satellitio tuo præficiet . Nam uni id committere periculo ; multis vero , turbis non caret . Duo igitur sint , ut si alter etiam insidias , tibi creare conetur , tamen habeas adhuc , qui te custodiat . Hi ex iis , qui aliquoties militiam fecerint , deligendi sunt , quique multis aliis etiam officiis functi sint : imperium autem obtineant in stipatores , omnesque per Italiam totam milites , ita ut capite etiam fontes plectendi potestatem habeas ; demptis tamen centurionibus , ac reliquis in quos Senatoriis magistratibus tantum est potestas , ac ea ipsa quoque libera , ut pœnas aut præmia suo arbitrio imponere possint . Verum hi duo , quos duxi satellitiis tui Præfecti in ceteros per totam Italiam milites jus habeant , ac in Casarianos etiam , qui in tua sunt familia reliquosque omnes ,

(a) Dion. lib. 52.

*omnes, quorum aliqua est habenda ratio. Vicarios autem habeant hi suos necesse est, alioquin pluribus, quam quibus sint expediendis onerati negotiis, neque ea, quæ usus postulat, omnibusque simul istis præesse non poterunt. Hi quemadmodum etiam Præfectus Urbis, & subcensor magistratum omni vitæ suæ tempore retineant.... Nam ex diuturno hoc magistratu, nihil potest mali accidere, quorum alter omnino armis caret, alter paucos milites habeat, ac coram re maiorem partem sui magistratus obeat.*

Hæc ex Dione excerpere duximus, ut rem penitus introspiciamus. Itaque patet ex his verbis, quantum Præfectus Prætorio exorienti Monarchiæ suffragaretur. Et de Præfecto Urbi satis jam diximus, videamus modo de Præfecto Prætorio. Sane is quum undique ab insidiis latus Principis protegeret, maxime quidem civile regimen tuebatur, nec ullum ab eo periculum timebatur, quum duo essent, qui eo munere fungerentur, quorum si forte alter insidias strueret, alter profecto facile obstaret fractamque fidem patefaceret. Quod si Monarchiæ congruat Magistratus ille, qui liberæ Reipublicæ convenire non poterat, tales quidem erant Præfectus Prætorio & Præfectus Urbi, qui quum perpetui essent, honor is non nisi sub Monarchia sperari poterat; etenim ut diximus, sive in Democratia, sive in Aristocratia Magistratus omnes ad tempus instituebantur, ne ii per longum imperium libertatem tandem everterent. Neque Principi periculum ullum per eos creabatur: nam Præfectus Urbi militum præsidio destituebatur, alter vero quasdam tantum cohortes, easque sub Principis oculis regebat, ut, si quid novi moliretur, Principem non effugeret. Sed quamvis sub Augusto non adeo ingens esset Præfecti Prætorio auctoritas, sub Tiberio tamen Sejani calliditate mirum in modum adaucta fuit. En Taciti verba, quæ sane dicendis facem præferre possunt. *Vim Præfectura modicam antea insendit, dispersasque per Urbem cohortes una in castra conducendo, ut simul imperia acciperent, numeroque & robore & visu inter se fiducia ipsis in ceteros metus crearetur.* Et quamvis occiso Sejano, satis Tiberius pernoverit, quo ejus animus in attollenda hac potestata-

state intenderit; non tamen Magistratus hic ab aula recessit, quam perutilis Monarchiæ servandæ videretur, immo ejus dignitas sub insequentibus Principibus eo pervenit, ut Trajanus nudum gladium, quod imperii sui symbolum erat, manibus ejus tradens, sic præfatus sit. *Accipe hunc ensẽ, quo si recte imperavero, pro me uteris, sin minus contra me vertes.* Sed quamquam post Augustum Præfecti hujus potestas nimium evecta fuerit, mansit tamen ex Mecænatis monitu, ut ex ordine Equestri is crearetur, nec præter rem, ne si ex Senatu legeretur ob nimiam is potentiam rebus periculo esset. Hinc lucem accipit illud Capitolini in Marco Antonino, quod *Pertinacem, qui postea imperavit Præfectum facere non potuisset, quia Senator erat.*

Ex his omnibus intelligimus, quænam fuerat hujus Præfecti potestas, de qua nunc dicendum. Solemne quidem veteribus fuit eos, qui præerant exercitui, Prætores appellare; quapropter Prætorium in castris tabernaculum Ducis exercitus erat; atque ante id porta hostibus obversa Prætoria dicebatur. Itaque Præfectus Prætorio, Præfectus Prætorum vocatur; atque is ex Augusti institutione erat, qui Prætorii hoc est palatii Cæsarianorum, & Prætorianorum, sive Palatarum cohortium, aliorumque per Italiam militum curam gereret. Sed tractu temporis adeo crevit ejus potestas, ut totius exercitus, omniumque militum imperium sibi assumeret. Hinc non mirum si ingentibus quidem nominibus ab ipsimet Principibus in corpore juris exornatus legatur, modo enim *excellens auctoritas* dicitur l. 1. C. Theod. de pascuis, modo *excelsa sedes* l. 17. eodem de numerariis, nunc *sublimis magnitudo* l. 52. Cod. Th. de cursu publico, nunc *illustris præstantia* l. X. eodem de diversis Officiis. Quid? *miranda sublimitas, illustris magnificentia, excellens eminentia* l. 15. Cod. Theod. de accusation. *spes magnificentiae Principalis* l. 15. C. Th. de portionib. ultro datis; in summa administratione posita potestas l. 1. eodem ne sine jussu Principis; *magnifica sedes* l. 8. Cod. Theod. de defensoribus Civitat. *Forum magnitudinis* l. 8. eod. de Advocatorum diversorum judicium. *Apex sublimis Præfectura* l. 7. Cod. Theod. de honorariis Præfecturis. Demum

Fa-

*Fastigium summum* l. 8. eod. Atque hæc sunt elogia , quibus Principes in Constitutionibus suis Præfectum Prætorio exornare in more habebant. Ex quibus patet, quantæ profecto auctoritatis Magistratus hic fuerit. Quid si dixerim Principem ipsum ingrediente Præfecto palatium assurgere consuevisse , ut scripsit Cassiodorus l. var. 20.?

Verum quamvis Magistratus hic imperium in totum exercitum nactus esset , non tamen ante Marcum Antoninum Philosophum potestatem judicariam accepit. Quod qua ratione factum , pulchrum est videre . Solemne fuerat Principi illi Sapientissimo in dirimendis controversiis sibi consiliarios asciscere: inter hos autem præcipue Præfectum Prætorio selegit. En verba Capitolini , *habuit secum Præfectos , quorum & auctoritate , & periculo* ( sic legendum pro breviculo) *semper jura dictavit*. Qua ex re enatum , ut Præfectus Prætorio in judiciis sive criminum , sive civilium controversiarum in Principis comitatu potestatem nancisceretur per illud summum imperium , quod in milites habebat . Sed quandonam hujus judiciaria potestas ad id fastigium evecta est , ut ab illius sententia , quippe qui vice sacra judicabat , provocari non liceret? Quum de hoc nullum monumentum supersit , præter Arcadii Charisii responsum in l. unica D. de Officio Præfecti Prætorio , est profecto ut verba ejusdem exscribam. At igitur is. *Ad vicem Magistri Equitum Præfectos Prætorio antiquitus institutos esse a quibusdam Scriptoribus traditum est. Regimentis Reipublicæ ad Imperatores perpetuos translatis ad similitudinem magistrorum Equitum Præfecti Prætorio a Principibus electi sunt, data eis pleniori licentia ad disciplinæ publicæ emendationem . His cunabulis Præfectorum auctoritas initiata, in tantum meruit augeri ut appellari a Præfectis Prætorio non possit: nam quum ante quæsitum fuisset , an liceret a Præfectis Prætorio appellare , & an jure liceret , extarentque exempla eorum qui provocarint ; postea publice sententia principali lecta, appellandi facultas interdicta est: credidit enim Princeps , eos qui ob singularem industriam explorata eorum fide & gravitate, ad hujus officii magnitudinem adhiberentur , non aliter judicaturos esse pro sapientia , ac luce dignitatis suæ quam ipse foret judicaturus*

N n n

turus

*turus*. En prodita ratio, cur a sententiis Præfecti Prætorio vetitum fuerit appellare. Sed quum Arcadius hic temporibus Cari, & Carini vixerit, fueritque sub eisdem magister libellorum, datur intelligi eorum tempore nunquam a Præfectis Prætorio appellatum esse.

Sed juris hujus initia statuere perquam difficile est, quum nullum monumentum occurrat, unde conjecturam capere possimus. Putaviq; quidem doctissimus Gutherus de *Officiis Domus Augustæ* tempore Commodi id accidisse, ut vice sacra Præfectus Prætorio judicaret, quare scripsit, quantum suspicari licet *judicia. & appellationes Commodus in Perennem Prætorio Præfectum transulit, cum metu conscientia facile in publicum non procederet, neque quidquam sibi nunciari pateretur, nisi quod Perennis ante tractasset. Perennis autem Commodi animum persciens invenit quemadmodum ipse potens esset. Nam persuasit Commodi, ut deliciis ipse vacaret: quod Commodus latenter accepit. Sane id ex ipso Dione probari poterit, qui in Commodi sic ait. Quum enim Commodus se studio agitantium curruum, & libidinibus cujusvis generis dedisset. Nec quidquam fere ageret eorum, quæ ad Principatum spectarent; Perenni non solum cura militum, sed etiam reliquorum omnium esse capis, & maxime publica utilitatis. Quum ergo ad Principis consistorium appellationes ab omnibus magistratibus deferrentur; quumque Commodus rerum omnium curam Perenni credidisset, satis probabilis est Gutheri opinio, quod Præfecto Prætorio vice Principis in omnibus fungente, ex hoc tempore ejus sententiæ sine provocatione, quasi Princeps ipse judicasset, fuerint.*

Sed quamvis adversus Præfecti Prætorio sententiam appellari non posset, intra biennium tamen supplici libello Principi porrecto, postquam ille magistratu abisset, retractatio postulabatur. Sed cur intra biennium? Quia per hoc tempus fere consuetudo inducta fuerat, ut biennium esset Præfecti Prætorio munus. Itaque retractatio apud illius successorem peragebatur. Sed velim advertas, fuisse tempus, in quo non Principes Præfectos summovent, sed ipsi Præfecti munere se suo abdicarent. Hinc intelligitur illud obscurissimum alioquin



quin Spartiani in Hadriano. *Quare quum Hadrianus Tazium Præfecto Prætorio successorem dare non posset, id egit, ut peteret.* Verum si quando Princeps per plures annos Præfectos Prætorio confirmasset, ut de Antonino Pio traditum est, qui Præfectum Ganium Maximum per viginti annos retinuit; tunc retractationem apud eundem experiebantur, adhibito tamen Sacri Palatii Quæstore ex Justinianeâ Sanctione in Novella 119., ubi etiam aufert consuetudinem dandi Principi supplicationem, quam didascalicum appellat intra decem dies eidem Præfecto directe porrigendum. Ceterum quum eo auctoritatis magistratus hic assurrexisset, non mirum quod Constantinus deinde ejus jura minuerit, auctoritate in quatuor Præfecturas divisa, atque ab omnibus militari imperio ablato unoque in re civili relicto jure, aliisque in rebus, quæ omnia aliena putans a meo instituto libenter hic omitto.

## §. IV.

*De Præfectis ærario, Subcensore, & Quæstore.*

**P**Ræfectos ærarii, sive quæstores, etiam sub Regibus fuisse, res est in Romana historia satis vulgata. Sed Regibus exactis, & Consulatu instituto, prudentissimus ille vir Valerius Publicola noluit publicam pecuniam a Consulibus curari, veritus, ne improbis ea foret ad omnia audenda promptior occasio, bene vero morati per eandem improbi fierent. Itaque Quæstores creavit, qui publicæ pecuniæ præessent. Hæc autem, quemadmodum apud Græcos ærarium publicum in Insula Delo erat, in Saturni æde servabatur; putabant enim tutius fore, si quo in templo reponeretur, atque in illo potissimum Saturni, quum eo regnante seculum aureum fuisse fabularentur. Igitur in ejus æde & publica pecunia, & leges, & S. C. & publicæ tabulæ asservabantur. Sed quidquid sit de consuetudine publicæ pecuniæ sub libera Republica curandæ, ad Augusti tempora, quod est argumentum nostrum, progrediamur. Etenim, ut superius diximus, quum Augustus militare ærarium instituisset, neces-

se ei fuit Magistratus creare, qui ejus curam gererent, iisque omnibus, quæ ad illud augendum, vel saltem servandum facerent, præessent. Quare Tranquillus inter cetera (a) Principem nostrum egisse ait, ut cura ararii a quæstoribus Urbanis ad Prætorios, Prætoresve transiret. Sed quum ex paucis his verbis lux nulla dicendis affulgeat, videamus potius, quid nobis tradat Politicorum Princeps Tacitus. Hic igitur An. 13. 28. 6. hac de re paullo longius loquutus inquit. *Dein Princeps curam tabularum a quæstoribus ad Præfectos transtulit. Varie habita, ac sæpe immutata ejus rei forma; Nam Augustus permisit Senatui deligere Præfectos: dein ambitu suffragiorum suspecto sorte ducebantur ex numero Prætorum, qui præessent. Neque id diu mansit, quia fors deerabat ad parum idoneos. Tunc Claudius quæstores rursus imposuit: iisque ne metu offensionum segnius consulere, extra ordinem honores promisit. Sed deerat robur ætatis cum primum Magistratum capeffentibus. Igitur Nero Prætura perfunctos, & experientia probatos delegit. Præter hæc adjicienda hic puto & verba Dionis. Augustus, scripsit hic, pro se, & Tiberio pecuniam in ararium, cui militaris nomen indidit, intulit, ejusque administrationem Prætoribus Tribus, sorte lectis ad triennium mandavit qui binis lictoribus, ac Ministris aliis, quos conveniebat uterentur, id per successionem aliorum in multos annos productum: nunc ab Imperatore eliguntur, & lictores non habent.*

Ex his omnibus formam publicæ pecuniæ administrandæ, quam Princeps noster instituit, habemus. Sed cur Senatui permisit, ut Præfectos arario deligeret? Nempe ut exemplo a Valerio Publicola ducto ostenderet, quamvis in speciem, quantum a pecuniæ vi, in qua vertitur militare imperium, abesset, quum ejusdem dispensatio penes Magistratus a Senatu electos foret. Sed quid illa verba, quæ idem Tacitus subdit, *deinde ambitu suffragiorum inspecto, sorte ducebantur ex numero Prætorum, qui præessent.* Si conjecturis locus dari possit, dicerem sane Principis nostri sollertiam hic nobis significari, nam quum Præfectus is maxime esset Principi

(a) In Octav. cap. 36.

clpi acceptus, qui sedula cura res ærarii gereret, quid mirum si Magistratum hunc studiose omnes ambirent, ut Principem sibi demererentur? Hinc Augustus ut effugeret invidiam, præque se ferret, quantum a cogendæ pecuniæ cupiditate abesset, voluit Præfectum hunc forti objicere, ne videretur, inquam, apud Patres egisse, ut crearetur is, qui rebus suis consulere: juvat hanc conjecturam illud Plinii (a). *Quid audes, quo ruis? Quibus te periculis objicis? Quid præsentibus confidis incertus futurorum? laceffis hominem jam præfectum ærarii, & brevi consulem.* Maximi igitur intererat Magistratu hoc fungi, si confestim eum Consulatus sequeretur. Hac sane de causâ Tacitus scripsit bene multos hoc munus affectasse, quum maximopere id valeret ad Principis gratiam aucupandam.

Sed jam opportunum est videre, quæ Præfectus hic ærarii pertractaret, quæque ejus potestas esset. Insignis sane Tranquilli locus occurrit, & quidem explicatu difficillimus, atque ab hoc exordiar. Ait is (b): *Judicia ad duo genera Judicum redegit, equestris ordinis, ac Senatorii; Tribunos ærarios, quod erat tertium sustulit.* Hi quidem sunt Tribuni illi sive ærario Præfecti, quos sustulit Cæsar, Augustus denuo restituit, ut superius diximus. Itaque Tranquillus heic loquitur de Tribunis his tamquam habentibus judiciariam auctoritatem, ut legenti patet. Et quidem Judices fuerunt in rebus illis, ubi Fisci ratio vertebatur, vide legem 12. *D. de his, quæ ut indignis.* Ubi quum quidam peracto testamento nomen heredis induxisset, M. Antoninus ad Præfectos ærarii causam remisit, ut viderent an legata deberentur. Palam igitur est hos præfectos in causis fiscalibus inter ærarium scilicet, & privatos judices sedisse.

Omittendus autem non est insignis Ulpiani locus, qui sane intelligi vix poterit, ignorata Magistratus hujus potestate. Ait is in lege *quum bi §. transactiones D. de transactionibus: transactiones alimentorum etiam apud Procuratorem Cæsaris* sic-

(a) Lib. 9. Epist. ad Quatrat.

(b) In Julio cap. 41.

*fieri possunt, scilicet si a Fisco petantur alimenta, secundum quæ & apud Præfectos ærarii transigi potuit. Verum quænam sunt isthæc alimenta, quæ petebantur a Fisco? Sunt quidem illa, quæ ex sanctione Imperatoris Nervæ pueris, puellisque natis parentibus inopibus sumtu publico per Italiam præstabantur. Itaque quum alimenta hæc a Fisco deberentur, non poterat sane de eisdem transactio iniri, nisi causa cognita apud Præfectos ærarii, quorum præter cognitionem nihil legitimum esse poterat, ubi fiscalis res agebatur. Sed ad quamplurimarum legum intelligentiam advertendum M. Antoninum instituisse, sive potius revocasse consuetudinem illam, qua ad Præfectos ærarii Saturni unusquisque civium natos liberos profiteretur intra trigesimum diem nomine imposito, cujus rei gratia per Provincias *Tabularium* instituit, apud quem professio hæc perageretur. Immo ex hoc tempore causæ etiam liberales, atque filiationis, ceteræque similes apud eosdem Præfectos agitabantur. Ex quo profecto lucem accipit responsum illud Scævolarum in *l. Imperatores §. mulier D. de probationibus*, quod ceteroquin obscurissimum videtur: *Mulier gravida repudiata, filium enixa absente marito, ut spurium in actis professæ est. Quæsitum est an is in potestate patris sit, & matre intestata mortua jussu ejus hereditatem matris adire possit, nec obsit professio a matre irata facta? Respondit veritati locum superfore.* Demum ut rem hanc absolvam, pertinebat ad ærarii præfectos de bonis vacantibus, caducis, ereptitiis, quasi caducis, & de his, quæ auferebantur tamquam ab indignis, cognoscere. Sed tempore procedente, jam inde a Constantiano Magno in horum Præfectorum locum *Comites sacrarum largitionum*, & privatarum substituti sunt, apud quos administratio ærarii, omnisque cura subsedit.*

Sequantur alii duo Magistratus ab Augusto instituti, nempe Cenfor, sive subcenfor, & Quæstor, de quibus carptim quædam dicenda, ne prope in immensum opella hæc excre scat. De creando subcenfore quantum sollicitus fuerit Mecænas, patet ex ejus monitis ad Augustam. *Alius quidem eodem ordine deligi debet, qui genera, facultates, moresque Senatorum, & equitum, adutorum juxta, ac puerilis ætatis,*  
item

*itemque mulierum, & familiae totius examiner, ac procuret, eaque corrigat, quæ quum supplicio non dum digna sunt tamen neglecta, multis ac magnis malis occasionem præbent. de majoribus autem ad te referat. Hoc munus Patricio alicui post Præfectum Urbis præstantissimo potius quam Equiti injugendum est nomenque a tua censura (nam omnino in hac re te primas gerere convenit) band absurde habebit, ut successor ille dicatur.*

Jure autem merito sapientissimus vir Augustum nostrum sedulo monuit, ut subcenforem institueret, quum nullus omnino sit Magistratus, atque is, Monarchiæ æque commodus. Nolim autem heic ea repetere, quæ dixi superius de censura. Sed ut intelligatur, quantum isthæc non utilis tantum, sed necessaria prorsus formæ Monarchicæ sit, pauca quædam perstringemus.

Frustra quidem essent in recenti regimine novæ leges, quæ mortuæ in tabulis jacent, nisi sedulo Princeps curaret, ut civium mores ad novam hanc formam componerentur. Sic jam ante Aristoteles monuit, ut in unoquoque imperio præsto sit censor, qui curet ut civium vitæ formæ civilis regiminis respondeat. Itaque in Monarchia pernecesse est, ut censor, ne consuetudo civilis abscondita sit Monarchico regimini, operam præster. Satis enim vulgatum aliter sub Monarchia quam sub Aristocratiâ, vel democratiâ mores Civium componendos, de quo quum affatim in libri hujus prolegomenis scripserim, sat nunc est rem indicasse. Facit etiam Magistratus hic, ut Princeps præ mentis oculis semper habeat Civium bona, numerum, atque uniuscujusque vitæ genus, nempe cui quisque arti studeat, quoque cujusque ingenium tendat, ad belli ne studia, an paci proclivius. Sed ne adeo summatim rem tantam absolvamus, operæ pretium est pauca quædam de origine census edisserere. Romæ omnium primus Servius Tullius censum instituit, de quo sic Livius invenit ut pro modo pradiorum quisque tributa penderet. Sed cujus rei gratia id effecerit, quum jam occupaverimus in libro primo, ultro missum facimus, ne repetita crambe fastidium pariamus. Theophilus censum definiens, est (inquit) *tabula, seu charta, in qua Romani suas facultates scribebant ut tempore*

*pore belli quisque secundum substantia suæ modum conferret .* Sed præ omnibus advertendum censum frequentius in Provinciis , quam in Italia actum , nam scribit Dio (a) , Metellum Nepotem Prætorem rogata lege Italiam tributis liberasse , ac propterea prædia ejus tributaria , ut in Provinciis , non fuisse , sed immunitas hæc non semper mansit , nam ingruentibus bellis , primum moderate quidem , mox graviter & ipsa onerata est . Quod præcipue factum , inito foedere inter Galerium Maximinum , & Constantinum , factaque Orbis Romani inter eosdem divisione , quapropter Aurelius victor scripsit ; *hujus parti Italia injunctum tributorum ingens malum* . Roma tantum hoc onere immunis mansit , vel liberata fuit , de quo videsis legem 2. C. *Theod. de privilegiis Urbis Constantinopol.* quæ est pars legis 6. l. Justi. *de Sacros. Eccl.* Ex his conjicio , censum Romæ sub Augusto potius actum , ut ingruente bello , aut publica necessitate urgente pro suarum quisque fortunarum modo extra ordinem tributum inferret , quam ut ordinarium quid a Civibus pro bonorum ratione penderetur . Si autem scire cupias rationem censum peragendi in Provinciis adi leg. *formam D. de censibus* , ubi cautum est , ut referretur fundi cujusque nomen , & in qua Civitate , pagoque esset , quosque finitimos haberet ; arvum , quod in decem annos proximos satum erat , quot jugerum esset , vinea quot vitibus constita , oliva quot jugerum , & quot arbores haberet ; pratum , quod item intra decem annos satum erat , quot jugerum , pascua quot & ipsa jugerum esse viderentur , & si quæ essent silvæ caduæ . Ex quibus tibi aperitur ratio , cur apud census Magistrum testamenta aperiri , publicari , donationes insinuari opus esset ; nempe ut palam fieret possessor bonorum , a quo tributa realia persolverentur , quæ curare ad eundem Magistrum census pertinebat .

Sed ut transeamus ad Quæstorem , ejus auctoritas ab exiguis sub Augusto profecta initiis , adeo deinceps crevit , ut cum Præfecto Prætorio propemodum comparari potuerit .

Sed

(a) *Lib. 37.*

Sed rem arcessamus ab origine sua . Dio hæc tradit (a) . Tum quoque primum post Merulam , Flamen Dialis creatus est : quæstoribus etiam quæ unoquoque tempore fierent , Senatus Consulta adservanda tradita , quum Tribuni plebis , ac Ædiles , quibus ante id negotium datum fuerat per apparitores hoc suos egissent , atque inde error & confusio incidisset . Hæc Dio , ex quibus patet primam curam quæstorum fuisse adservandi S.C. quæ ante a Tribunis plebis , atque Ædilibus custodiebantur . Quod profecto rem Principis mire juvabat , ne dominationis arcana vulgarentur , atque apud sibi fidos potius fervarentur . Hinc Tranquillus sic scripsit (b) *Auctor & aliarum rerum fuit , in quæ ne acta Senatus publicarentur . Sed præter id munus quæstorum fuit recitare in Senatu Principum orationes , vocatique proinde Cæsarum candidati a toga scilicet candida , qua erant induti , quod symbolum erat familiaritatis , qua apud Principem pollebant ; quemadmodum scripsit Tertullianus de idololatria sic : qui familiaritate Regum utebantur purpurati Regum vocabantur ( sicuti apud Ægyptios ) sicuti apud nos a toga candidati .* Hæc fuit primigenia quæstorum potestas : sed insequenti ævo datum illis fuit , ut omnia quæ faceret Princeps , juberetque fieri , manu sua notarent . Quapropter mandata , quæ Provinciarum Præsidibus , aliisque Magistratibus dabantur , honorum Codicilli , & Constitutiones Principum rata minime erant , nisi fuissent a quæstore subscripta . Qua de re factum , ut non quæstor simpliciter , sed Palatii quæstor nuncuparetur , quum omnia fere , quæ a Principe fierent , is subnotare debuisset . Quod sub Constantino Magno sane institutum doctissimus Pancirolus in notitia utriusque imperii , & Gutherus de officiis domus Augustæ scripserunt . Demum causæ omnes ad Principem devolutæ , quæstori cum Præfecto Prætorio commissæ sunt , de quo vide l.præcipimus C. de appellation.

Ooo

CA-

(a) *Lib. 54. in fine.*

(b) *Cap. 36.*

*De Magistratibus Provincialibus ab Augusto institutis :*

**Q**Uum in exponenda jurisprudentia Augustali, sic me gesserim, ut primo leges attigerim, quibus Civitas composita est ad Monarchiam, deinde ad eas descenderim, quæ Provinciarum administrationem ad novam Reipublicæ formam adcommodarunt; eundem profecto ordinem in Magistratibus ab Augusto institutis tradendis, ut bene omnia sibi consentiant, persequi ratus sum. Quamobrem postquam Magistratus in Urbe creatos bene satis Monarchiæ congruere vidimus, ratio postulat, ut de Provincialibus differamus, eorumque potestatem Principatui mire consonam spectemus.

Princeps noster victor Antonio, imperio suo exuto Lepido, civilibusque omnibus factionibus extinctis, quum jam potentiam suam firmasset, ad novi regiminis formam animum intendit. Quæ de re novas leges condidit, novosque Magistratus instituit, ut cuncta votis suis responderent. Inter omnia tamen curæ sibi erant Provinciæ, quarum Magistratibus apprime prospexit. Sic enim Mecænas illum monuit (a). *Universam Italiam, quantum ejus ultra nonaginta quatuor millia passuum ab Urbe distat, ceterasque omnes nobis subditas terras insulasque secundum Populos, ac nationes distribue: ita ut singulis Urbibus, quæ unius alicujus hominis mero imperio possunt gubernari, milites imponantur, ac consularis unus, & duo Prætorii viri eis præsent; quorum alter tunc primum extra Urbem amandatus, privatorum negotiis, rebusque necessariis parandis occupetur: alter jam ante hoc munere functus, rem publicam urbium procuret, ac imperium in milites obtineat exceptis iis casibus: in quibus ignominia, aut morte plectendum est.... Oportebit duos Prætorios diviso imperio, legionibus, ac rebus Civitatum, privatorumque hominum præesse, Consularis vero quum ea, quæ dixi munera obibit, tum eas causas, in quibus a Prætoriiis ad ipsum fit provocatio cognoscet. Idem neque minus triennio ( nisi quis quid deliquerit ) neque plus quinquennio Magistratum obeant,*

(a) Dio lib. 52.



beant; nam & annui illi Magistratus, ac paucò tempore circumscripti hoc habent, ut quum quis aliquid in iis addidicerit prius decedat, quam ejus specimen exhibere possit, & diuturniora imperia multos ad fastum, ac tentandas res novas extollunt. Hoc fuit specimen, quod Mecænas Principi nostro ad bene regendas Provincias, accomodate tamen ad Monarchiam præbuit. Ceterum quum superius multa jam dixerimus de origine Provinciarum, de earum legibus, ac forma, imperioque provincialium Magistratuum ab Augusto circumscripto, ac demum de illarum divisione Senatum inter, ac Principem nostrum, reliquum nunc tantum est, ut de Magistratibus ipsis agamus.

## §. I.

*De Præfecto Augustali, deque Juridico Alexandrino:*

**D**Io Cassius regimen Provinciarum ab Octavio institutum memorans ait, *Utriusque sortis Provinciis nempe Consularibus, & Prætoriis Patricios præfecit: Ægypto tantum Equestris dignitatis virum ob eas, quæ supra sunt commemoratæ causas.* Quod ut clarius pateat, res ab origine sua repetenda. Quum Augustus anno 724. Alexandriam occupasset, Ægyptum in Provinciæ formam redegit, quam sibi retentam Equiti Romano Cornelio Gallo, Poetæ insigni, qui Antonium profligaverat, regendam, non Proconsulis, aut Proprætoris, sed Præfecti tantum Augustalis nomine tradidit, cujus rei causam Tacitus prodit (a): *Ægyptum, copiasque, quibus coercetur, jam inde a Divo Augusto Equites Romani obtinent loco Regum.* Ita visum expedire Provinciam aditu difficilem annona fecundam, superstitione, ac lascivia discordem & mobilem, insciam legum, ignaram Magistratuum domi relinquere. Quid vero hisce verbis hic scriptor vult, nisi ideo Augustum Provinciam hanc inter alias maxime sibi retinuisse, eamque Magistratuum Romanorum nemini mandaf-

O o o 2

se,

(a) *Lib. 1. An.*

se, sed Equiti tantum, quasi Rector illius is unus esset, ut ne ob incolarum inconstantiam, atque opum copiam, quibus abundabat, Senatorius Magistratus res novas moliretur? Atque huc facit præceptum illud Augusti, ne quis Senator ad Ægyptum accederet, nisi nominatim ex ejus jussu, quia creari sibi periculum posse putabat, si ad hanc splendidissimam Provinciam Senator mitteretur; item ne Præfectus Augustalis imperium abdicaret, nisi ejus successor Alexandriam ingressus esset. Atque hoc contra morem aliarum Provinciarum quo Præses Magistratum statim deponebat, ac successor fines attigisset. Etenim in Ægypto timor erat, ne qua seditio oriretur, nisi successor confestim, ac sine intermissione, decessoris fangeretur vice. Itaque ob mores leviores ejus gentis, sapienter se gessit Augustus sibi Ægypti administrationem reservando, quasi sibi foret peculiare regnum. En quæ in hanc rem scripsit Strabo capite 17. *erat enim hac Provincia veluti regnum peculiare Imperatoris. Atque hæc est ratio, cur Nero (a) in suis angustiis Senatum oraverit, ut sibi imperio exuto concederetur saltem Ægypti Præfectura, quæ veluti regnum Principis habebatur. His de origine, & causa Præfecti Augustalis præmissis, ultra progrediamur.*

Nimis quidem admissus sum, ut Præfecti Augustalis, & Juridici Alexandrini potestatem, ejusque fines ex vetustatis latebris eruerem. Sed in cassum omnia, quum nihil mihi exploratum sit, quod viris doctis probetur. Itaque nonnisi conjecturis utar, quæ quanti faciendæ sint, lectoris esto judicium. Ad rem igitur. Strabo, qui sub Augusto, Tiberioque scripsit, hæc lib. 17. ait de regimine Ægypti. *Qui mittitur Regis loco est. Ei subest Dicaodotes (idest juri dicundo præfectus) qui judicia exercendi pleraque potestatem habet. Tum alius, qui peculiares rationes curet. Is in ea inquit, quæ sub alterius potestate non sunt, sed seorsim ad Casarem recidunt. Hos comitantur Caesaris liberti, & administratores, quibus majora, & minora negotia committuntur. Ex quibus patet, Ægyptum in Provinciæ formam redactam sub administratione Præsidis,*  
hoc

(a) *Tranquil. in Ner. cap. 47.*

hoc est Præfecti Augustalis, juridici, & Rationalis fuisse. Itaque Præfectus hic Augustalis, qui Ægypto præerat a ceteris Præsidibus distabat, quum hi imperium militare cum jurisdictione civili, ærarii que cura conjunctum haberent, ille vero imperio tantum militari, eoque circumscripto, polleret. Nam ordinariorum sub se judicum examinandi flagitia potestatem habebat, præterea nihil, quum referre super his deinde ad Principem deberet, cujus ex mandato poterat demum punire, ut ex l. 2. *C. de officio Præfecti Augustalis*. Ceterum juris dicendi potestas a juridico exercebatur, atque ærarii administratio penes rationales, Cæsarianosque erat. At enim cur adeo coercita est Augustalis Auctoritas? Non alia profecto de causa, nisi quia veritus Augustus, ne Provinciæ amplitudo, atque opulentia, incolarumque fervens ingenium eum ad res novas moliendas impelleret. Itaque, ut verius loquamur, Præfectus hic Augustalis potius minor quidam Magistratus, quam Præses appellandus erit.

Quod autem spectat juridicum Alexandrinum, nolim putes, talem hunc fuisse, quales Italiæ juridici erant: si enim hi vere Præsides habebantur, ille tantum Magistratus erat qui jus diceret. Cujus gratia sciendum, in unaquaque libera Civitate Duumviros fuisse juri dicundo. Sed si quando Civitas jure libertatis, & Curia excideret, id erat in more, ut omnes ejus Magistratus abrogarentur, atque ab Urbe quotannis Præfecti mitterentur, qui loco Duumvirorum jus redderent, uti factum legimus Capuæ, postquam ad Annibalem defecerat. Quamobrem Alexandrinum juridicum alium non puto a Magistratu ab Urbe misso loco Duumvirorum, qui, Alexandria Magistratibus suis viduata, ibi jus redderet.

Sed Juridicus hic Alexandria tantum, an per totam Ægyptum jus dicebat? Profecto si mihi constaret unam Alexandriam jure Curia excidisse, exploratum esset, haud per totam Ægyptum eum jus dixisse. Id quidem mihi videtur intellexisse Dio, quum scripsit lib. 51. Augustum subacta Ægypto ejus Provinciæ Urbibus veteres reliquisse Magistratus & consuetudines, Alexandrinos autem solos Senatu destitutos. Quapropter conjiciendum est Juridicum hunc Alexandria tantum

tum jus dixisse, quum in reliqua Provincia nihil ab Augusto, & in Magistratibus, & in consuetudinibus, immutatum fuerit. Sed clarius id evincitur ex Spartiano in Severo cap. 17. ubi ait. *Alexandrinis jus bulentiarum dedit, qui sine publico consilio, ita ut sub Regibus, ante vivebant, uno iudice contenti quem Cæsar dedisset.* Itaque Juridicus Alexandrinis datus, quia jus Curia libertate per Augustum ablata amiserant. Hinc idem Dio in Severo subdit. *Senatores autem Alexandria sunt, & esse cœperunt sub Severo Imperatore, quod si Senatores, eo quidem magis iudices, qui jus dicerent.* Ecquid sibi voluit Ulpianus in l. 2. D. de officio iudici. *Juridico, qui Alexandria agit datio tutoris, Constitutione D. Marci concessa est?* Si juridicus hic Magistratus erat, cur tutorem dare non potuit? Sed salva res est, si dicamus, quod sane verum est, juridicum hunc ex Magistratibus majoribus non fuisse, uti erant Præsides, quibus ex lege Julia concessum, ut tutores dare possent. Itaque quum minor Magistratus esset, expressa lege opus fuit, ut tutores daret. Nolim tamen credas sub potestate Præfecti Augustalis fuisse; nam imperii notitia hos tantum Præfecto subjicit, *Principem de schola atheniensium in rebus, Ducenarium, qui adorata Clementia principali cum insignibus exit. Cornicularium Adjutorem. Commentariensem. Ab actis. Numerarios, curam epistolarum. Exceptores, & ceteros officiales.* Præterea si juridicus ad minuendum Præfecti Augustalis imperium institutus est, eratque veluti speculator quidam, ne quid novi Præfectus moliretur, num sub ejus potestate censendus? Hæc de juridico, quantum per conjecturas licuit; quid autem de eo, postquam restituta per Severum Alexandrinis curia, libertasque?

Et quidem sicuti post laudatam Severi constitutionem Alexandrini Senatus crevit auctoritas; ita ex adverso juridici potestas minuta est; adeo ut Ulpiani ævo, qui post Severi tempora scripsit, a quibusdam fuerit dubitatum, an apud Juridicum adoptare quis posset, & Ulpianus quidem affirmat in-  
 (a) *adoptare quis apud Juridicum potest, quia data est ei legis*

(a) L. 1. D. de officio iudici.

*legis actio*. Verum quum ex Constitutione Antonini Caracallæ omnes, qui erant in Orbe Romano Cives facti fuerint, atque idem passus sit, ut Alexandrini adlegerentur in Senatum Romanum, adeo juridici desuevit potestas, ut nulla propemodum ejus occurrat mentio, nisi ad Justiniani tempora deveneris, quibus ad venerandæ antiquitatis memoriam concessum ei tantum est, ut voluntaria quadam jurisdictione polleret. En legem unicam *de officio juridici*. — *Imper. Leo, & Anthem A. A. Alexandrino Duci, & Præfecto Augustali. Jubeamus apud Alexandrinæ dumtaxat clarissimæ Civitatis iudicium licitum, & concessum esse singulis quibuscumque volentibus donationis conscriptæ sollemniter instrumenta referare, eisdemque robur adjiciat gestorum series apud eundem confecta, tamquam si apud virum clarissimum moderatorem Provinciæ, vel Magistratus, vel defensores plebis habita fuisse dicerentur.* Hæc sunt, quæ de Præfecto Augustali, ac de Alexandrino Iuridico dicere habui, quum nihil præterea apud Scriptores invenerim, quod viris doctis probaretur. Percurramus modo & alia.

## §. II.

*De Procuratore Cæsaris, deque ejusdem rationalibus.*

**Q**UOD in Urbe faciebat Quæstor, id in Provinciis Cæsaris procurator peragebat; ambo igitur curabant ærarium. Rationalem autem putant non pauci rem privatam Principis administrasse, ita ut Procurator rebus Fisci, Rationalis veto rebus Cæsaris operam navaret; sed non desunt, qui discrimen hoc insuper habent, creduntque Procuratorem Cæsaris aliquando & Rationalem appellatum, etsi administratio Fisci, & ærarii non uni mandaretur. Sed missis his, Augustus ut ex omni parte Senatus auctoritatem infringeret, ne rebus novis aliquando studeret, non solum ei Provincias ademit, quæ militari præsidio ornarentur, sed curam etiam ærarii, quæ antea Præsidum erat, bene de se merentibus sub nomine Procuratorum Cæsaris, aut Rationalium

se, sed Equitj tantum, quasi Rector illius is unus esset, ut ne ob incolarum inconstantiam, atque opum copiam, quibus abundabat, Senatorius Magistratus res novas moliretur? Atque huc facit præceptum illud Augusti, ne quis Senator ad Ægyptum accederet, nisi nominatim ex ejus jussu, quia creari sibi periculum posse putabat, si ad hanc splendidissimam Provinciam Senator mitteretur; item ne Præfectus Augustalis imperium abdicaret, nisi ejus successor Alexandriam ingressus esset. Atque hoc contra morem aliarum Provinciarum quo Præses Magistratum statim deponerat, ac successor fines attigisset. Etenim in Ægypto timor erat, ne qua seditio oriretur, nisi successor confestim, ac sine intermissione, decessoris fungeretur vice. Itaque ob mores leviores ejus gentis, sapienter se gessit Augustus sibi Ægypti administrationem reservando, quasi sibi foret peculiare regnum. En quæ in hanc rem scripsit Strabo capite 17. *erat enim hæc Provincia veluti regnum peculiare Imperatoris. Atque hæc est ratio, cur Nero (a) in suis angustiis Senatum oraverit, ut sibi imperio exuto concederetur saltem Ægypti Præfectura, quæ veluti regnum Principis habebatur. His de origine, & causa Præfecti Augustalis præmissis, ultra progrediamur.*

Nimis quidem adnissus sum, ut Præfecti Augustalis, & Juridici Alexandrini potestatem, ejusque fines ex vetustatis latebris eruerem. Sed in cassum omnia, quum nihil mihi exploratum sit, quod viris doctis probetur. Itaque nonnisi conjecturis utar, quæ quanti faciendæ sint, lectoris esto judicium. Ad rem igitur. Strabo, qui sub Augusto, Tiberioque scripsit, hæc lib. 17. ait de regimine Ægypti. *Qui mittitur Regis loco est. Ei subest Dicaodotes (idest juri dicundo præfectus) qui judicia exercendi pleraque potestatem habet. Tum alius, qui peculiares rationes curet. Is in ea inquit, quæ sub alterius potestate non sunt, sed seorsim ad Casarem recidunt. Hos comitantur Casaris liberti, & administratores, quibus majora, & minora negotia committuntur. Ex quibus patet, Ægyptum in Provinciæ formam redactam sub administratione Præsidis,*

hoc

(a) *Tranquil. in Ner. cap. 47.*

hoc est Præfecti Augustalis, juridici, & Rationalis fuisse. Itaque Præfectus hic Augustalis, qui Ægypto præerat a ceteris Præsidibus distabat, quum hi imperium militare cum jurisdictione civili, ærariiue cura conjunctum haberent, ille vero imperio tantum militari, eoque circumscripto, polleret. Nam ordinariorum sub se judicum examinandi flagitia potestatem habebat, præterea nihil, quum referre super his deinde ad Principem deberet, cujus ex mandato poterat demum punire, ut ex l. 2. *C. de officio Præfecti Augustalis*. Ceterum juris dicundi potestas a juridico exercebatur, atque ærarii administratio penes rationales, Cæsarianosque erat. At enim cur adeo coercita est Augustalis Auctoritas? Non alia profecto de causa, nisi quia veritus Augustus, ne Provinciæ amplitudo, atque opulentia, incolarumque fervens ingenium eum ad res novas moliendas impelleret. Itaque, ut verius loquamur, Præfectus hic Augustalis potius minor quidam Magistratus, quam Præses appellandus erit.

Quod autem spectat juridicum Alexandrinum, nolim putes, talem hunc fuisse, quales Italiæ juridici erant: si enim hi vere Præsides habebantur, ille tantum Magistratus erat qui jus diceret. Cujus gratia sciendum, in unaquaque libera Civitate Duumviros fuisse juri dicundo. Sed si quando Civitas jure libertatis, & Curia excideret, id erat in more, ut omnes ejus Magistratus abrogarentur, atque ab Urbe quotannis Præfecti mitterentur, qui loco Duumvirorum jus redderent, uti factum legimus Capuæ, postquam ad Annibalem defecerat. Quamobrem Alexandrinum juridicum alium non puto a Magistratu ab Urbe misso loco Duumvirorum, qui, Alexandria Magistratibus suis viduata, ibi jus redderet.

Sed Juridicus hic Alexandria tantum, an per totam Ægyptum jus dicebat? Profecto si mihi constaret unam Alexandriam jure Curia excidisse, exploratum esset, haud per totam Ægyptum eum jus dixisse. Id quidem mihi, videtur intellexisse Dio, quum scripsit lib. 51. Augustum subacta Ægypto ejus Provinciæ Urbibus veteres reliquisse Magistratus & consuetudines, Alexandrinos autem solos Senatu destitutos. Quapropter conjiciendum est Juridicum hunc Alexandria tantum

tum jus dixisse, quum in reliqua Provincia nihil ab Augusto, & in Magistratibus, & in consuetudinibus, immutatum fuerit. Sed clarius id evincitur ex Spartiano in Severo cap. 17. ubi ait. *Alexandrinis jus buleutarum dedit, qui sine publico consilio, ita ut sub Regibus, ante vivebant, uno iudice contenti, quem Cæsar dedisset.* Itaque Juridicus Alexandrinis datus, quia jus Curiae libertate per Augustum ablata amiserant. Hinc idem Dio in Severo subdit. *Senatores autem Alexandria sunt, & esse cœperunt sub Severo Imperatore, quod si Senatores, eo quidem magis iudices, qui jus dicerent.* Ecquid sibi voluit Ulpianus in l. 2. D. de officio iudicis. *Juridico, qui Alexandria agit datio tutoris, Constitutione D. Marci concessa est?* Si iudicus hic Magistratus erat, cur tutorem dare non potuit? Sed salva res est, si dicamus, quod sane verum est, iudicum hunc ex Magistratibus majoribus non fuisse, uti erant Præsides, quibus ex lege Julia concessum, ut tutores dare possent. Itaque quum minor Magistratus esset, expressa lege opus fuit, ut tutores daret. Nolim tamen credas sub potestate Præfecti Augustalis fuisse; nam imperii notitia hos tantum Præfecto subijcit, *Principem de schola agentium in rebus, Ducenarium, qui adorata Clementia principali cum insignibus exit. Cornicularium Adjutorem. Commentariensem. Ab actis. Numerarios, curam epistolarum. Exceptores, & ceteros officiales.* Præterea si iudicus ad minuendum Præfecti Augustalis imperium institutus est, eratque veluti speculator quidam, ne quid novi Præfectus moliretur, num sub ejus potestate censendus? Hæc de iudico, quantum per conjecturas licuit; quid autem de eo, postquam restituta per Severum Alexandrinis curia, libertasque?

Et quidem sicuti post laudatam Severi constitutionem Alexandrini Senatus crevit auctoritas; ita ex adverso iudici potestas minuta est; adeo ut Ulpiani ævo, qui post Severi tempora scripsit, a quibusdam fuerit dubitatum, an apud Juridicum adoptare quis posset, & Ulpianus quidem affirmat in-  
 quiens (a) *adoptare quis apud Juridicum potest, quia data est ei legis*

(a) L. 1. D. de officio iudicis.



*legis actio*. Verum quum ex Constitutione Antonini Caracallæ omnes, qui erant in Orbe Romano Cives facti fuerint, atque idem passus sit, ut Alexandrini adlegerentur in Senatum Romanum, adeo juridici desuevit potestas, ut nulla propemodum ejus occurrat mentio, nisi ad Justiniani tempora deveneris, quibus ad venerandæ antiquitatis memoriam concessum ei tantum est, ut voluntaria quadam jurisdictione polleret. En legem unicam *de officio juridici*.—*Imper. Leo, & Anthem A. A. Alexandrino Duci, & Præfecto Augustali. Jubemus apud Alexandrinæ dumtaxat clarissimæ Civitatis iudicium licitum, & concessum esse singulis quibuscumque volentibus donationis conscriptæ sollemniter instrumenta reserare, eisdemque robur adjiciat gestorum series apud eundem confecta, tamquam si apud virum clarissimum moderatorem Provinciæ, vel Magistratus, vel defensores plebis habita fuisse dicerentur.* Hæc sunt, quæ de Præfecto Augustali, ac de Alexandrino Iuridico dicere habui, quum nihil præterea apud Scriptores invenerim, quod viris doctis probaretur. Percurramus modo & alia.

## §. II.

*De Procuratore Cæsaris, deque ejusdem rationalibus.*

Q UOD in Urbe faciebat Quæstor, id in Provinciis Cæsaris procurator peragebat; ambo igitur curabant ærarium. Rationalem autem putant non pauci rem privatam Principis administrasse, ita ut Procurator rebus Fisci, Rationalis veto rebus Cæsaris operam navaret; sed non desunt, qui discrimen hoc insuper habent, creduntque Procuratorem Cæsaris aliquando & Rationalem appellatum, etsi administratio Fisci, & ærarii non uni mandaretur. Sed missis his, Augustus ut ex omni parte Senatus auctoritatem infringeret, ne rebus novis aliquando studeret, non solum ei Provincias ademit, quæ militari præsidio ornarentur, sed curam etiam ærarii, quæ antea Præsidium erat, bene de se merentibus sub nomine Procuratorum Cæsaris, aut Rationalium

lium adjecit. Itaque non in suas tantum Provincias, sed & ad illas, quæ ad Senatum pertinebant, Procuratores hujusmodi mittebat, ut ita ærarii cura, unde militaris vis paratur, perpetuo a Præsidibus omnibus abesset. En Dionis præclarum locum a Xilandro quidem corruptum, sed a Lipsio tamen restitutum. *Imperator etiam Curatores* ( sic enim ii vocantur, qui publicos redditus colligunt, certasque impensas faciunt ) *in omnes Provincias suas, ac Populi Romani, et Equitibus, alios ex libertis mittit, eo dempto, quod Proconsules, quibus locis præsumt, ipsi tributa exigunt.* Quæ sane postrema verba prioribus consona non sunt, illis enim Proconsules, his Procuratores Cæsaris missi dicuntur. Sed procul dubio credendum est, per eos in iis etiam Provinciis collecta esse tributa, quando eo mittebantur. Quare Laudatus Lipsius in excur. ad Tacit. lib. 11. An. scripsit. *Quasi Proconsules redditus collegerint ipsi in Provinciis suis. Fallacia verba, quæ virum doctum nuper induxerunt non me. Planissime enim in Proconsulum etiam Provinciis procuratores Dion ipse docet.*

Itaque ut ad rem veniamus, Procurator Cæsaris omnia illa peragebat, curabatque, in quibus Cæsaris res vertitur; quamobrem bona vacantia, ereptitia, atque ea quæ auferebantur ab heredibus, vel legatariis tamquam indignis, ille tractabat. Neque Præsidi Provinciæ sine Cæsaris curatore in ulla re versari licebat, in qua Fiscus commodum, vel incommodum adesse videretur. Erat igitur maxima Cæsaris curatoris auctoritas, ita ut Tacitus in vita Agricolæ scripserit. *Quærebantur Britanni in Provinciam redacti, singulos sibi olim Reges fuisse, nunc binos imponi, e quibus legatus in sanguinem; Procurator in bona serviret,*

Quæ profecto verba quum obscura sint, ut res ab origine sua arcessatur, immorari propterea aliquantisper ne pigeat. Quamvis procurator hic maximam haberet in bona Provincialium potestatem, jurisdictione tamen ab Augusto ad Claudium usque Imperatorem caruit. Itaque notione destitutus Cæsaris tantum rem administrabat. A Claudio deinde mirum est, quantum ejus auctoritas aucta sit. Sic enim Tacitus scripsit. *Eodem Anno sæpius audita vox Principis,*

*cēpis, parem vim rerum habendam a Procuratoribus suis iudicatarum, ac si ipse statuisset. Ac ne fortuito prolapsus videretur. Senatus quoque Consulto cautum plenius, quam antea & uberius. Nam D. Augustus apud Equestres, qui Ægypto præficerent, lege agi. decretaque eorum proinde haberi iusserat, ac si Magistratus Romani constituissem, non alias per Provincias, & in Urbe pleraque concessa sunt, quæ olim a Prætoribus noscebantur.*

Ex quibus satis patet Cæsaris, sive Fiscī Procuratorem, nonnisi per Claudium Imperatorem iurisdicendi potestatem in re pecuniaria inter Fiscum, & privatum habuisse. Sed quid illa Auctoris admiratio, quasi rem aliquam inauditam referret? Sane iuris dicendi potestas non nisi Magistratum legitimorum erat, neque umquam Equitibus, eoque minus libertis dabatur. Quare quum Procuratores Fiscī non essent Senatores, sed Equites, vel liberti, neque Magistratum gerere, neque iuris dicendi potestatem exercere poterant. Non abs re erit huc iterum asserere Dionis verba, ut locus hic Taciti luce majori superfundatur. Ait is. *Procuratores (ita enim appellamus eos, qui publicos redditus colligunt eragantque in omnes Provincias, tam suas, quam Populi Cæsar mittit quosdam ex Equitibus quosdam ex libertis. Ex quibus hæc infert, colligitque Doctissimus Lipsius ad Tacitum. Itaque nec iudicia, nec acta eorum rata, vocarique poterant ad disquisitionem Principis aut Senatus. Quoniam lege apud eos agi (ut ad rem, & sollemniter loquar) nefas. Apud Magistratum solum Populi Romani, prove Magistratu actio legis fuit ut Consules, Proconsules, Prætores, Præpresores qui) omnes e Senatu. Apud Equites non fuit, multo minus apud libertos. Inter quos encipio, hoc est inter Equites, unum Præfectum Ægypti, apud quem ut Tacitus notat, lege agi permisit Augustus.*

Ex quibus sane patet, quid dictum voluerit Tranquillus in Claudio cap. 12. Neminem exulum, nisi ex Senatus auctoritate restituit, ut sibi in Curiam Præfectum Prætorii, Tribunosque militum secum inducere liceret, utque rata essent, quæ procuratores sui in iudicando statuerent precario exegit. O-

Ppp

omnia

omnia igitur Claudius ex Senatus auctoritate transigere simulavit, ut Curiae auctoritatem extolleret ad Senatorum benevolentiam suo tunc imperio non satis adhuc firmo perutilem comparandam. Quare quum legibus non nisi Senatus ex pristina libertate derogaret, precario exegit, ut *acta suorum Procuratorum*, qui utpote Equestris Ordinis, vel libertini generis per legem juris dicundi potestate exornari non poterant, *rata essent*. At contra deinde, postquam Imperatoriam Majestatem firmatam satis intuitus est, se gessit idem Claudius: nec amplius precibus, ut antea, usus est, sed jubendo precessit, ut Procuratorum acta rata forent. *Audita von Principis est parem vim rerum habendam a Procuratoribus suis iudicatarum, ac si ipse statuisset*. Profecto Princeps non satis duxit rebus suis consuluisse, nempe ærarii utilitati, si procuratorum acta rata essent, nisi simul ipsius Principis statuta censerentur. Ad id tamen voluit Senatus Consul. fieri, ne Senatui derogaret, cui nondum larva illa ablata erat, ut Princeps nonnisi Senatu auctore leges conderet, quum revera Senatus auctoritas Principum voluntati inserviret.

Hæc omnia satis ad rem hanc claram faciendam essent, sed quia insignis Dionis locus hic occurrit, & quidem a nemine ante intellectus, non est omittendus. Ait is in vita Tiberii: *Capitonem Asia curatorem in Senatum introduxit* (Tiberius) *objiciensque inter alia crimina, quibus se Imperatorem tulisset militibus usum fuisse in civilium misit. Neque enim iis, qui Imperatoris pecuniis tractandis erant consistenti præter defensorum reddituum exactionem, & controversiarum in foro secundum leges privatorum modo disceptationem quidquam concessum erat*. Ita vertit Doctissimus Xilander. Sed postrema hæc verba clarius Brissonius (a) reddit, *deque litibus in foro juxta leges instar privatorum jus persequerentur*. Evincitur igitur hinc, quæ quamque exigua fuerit procuratorum auctoritas sub Tiberio, quum unis ærarii rebus tractandis curandisque navarent, in ceteris vero ut privati haberentur, atque uti tales Fisci jura in foro persequerentur. Et quidem ex his lucem

(a) Cap. XVIII. Antiq. lib. 3.

cem accipit præclarissimus locus Plinii in panegy. ad Trajan. quem profecto tenebricosum censuere viri docti. *Dicitur actori, atque Procuratori tuo in jus veni sequere ad Tribunal.* An igitur tempore Plinii, atque imperante Trajano, Procuratores isti juris dicundi vi exciderant? Minime quidem, nam idem Plinius scribit. *Eos procuratores habes ut plerumque Civēs tui non alios iudices velint.* Igitur in eo loco id Auctor dictum voluit, quod quamvis summa esset Procuratorum auctoritas, atque Iudices essent, bonus tamen Imperator veluti inter privatos accessuerit, publicæque disciplinæ subjecerit, quum sub bono Principe langueat propemodum vis, atque potestas eorum, qui commoda Fiscī, ejusque jura pertractant. Non abnuerim vero, si verba Plinii cum Doctissimo Gutthero (a) de actoribus, & procuratoribus rei privatæ intelligas, qui si deliquissent, judici ordinario subjiciebantur, non vero de Cæsaris Procuratore, in quem delinquentem solus Princeps animadvertere poterat. Quare ut rem colligam, ex hoc Plinii loco putat Gutherus, quamvis Actorum rei privatæ Principis major potestas esset ob Principis gratiam, non autem eam adeo valuisse sub Optimo Principe Trajano, ut ab ordinario jure eximeret. Sed porro pergamus. Et si Procurator Cæsaris post Claudium, ut diximus, judiciariam auctoritatem consequutus esset, hoc tamen de lite in re pecuniaria inter Fiscum, & privatum oborta intelligendum, nam de crimine nequaquam is, sed solus Præses cognoscebat, quum nullo modo merum imperium Cæsaris procurator exerceret. Itaque nullum deportationis jus, aut multæ, nihilque quod ad imperium pertineret, ei erat, sed postquam Præses de crimine cognoverat, si quid in Fiscī gratiam per bonorum publicationem superesset, id apud Cæsaris Procuratorem transigebatur. En Callistrati verba in l. 3. de officio Procuratoris Cæsaris. *Curatores Cæsaris jus deportandi non habent. Si tamen quasi tumultuosum, vel injuriosum adversus colonos Cæsaris prohibuerint in prædia Cæsariana accedere, abstinere debent...* Nullum igitur imperium, neque ea, quæ imperii sunt, habebat Procurator. Quod luculentius evincitur ex Constitutione Severi,

P p p 2

&amp;

(a) *De officiis Domus Aug. lib. 3. cap. 33.*

& Antonini in tit. *Eod. ubi caussa fiscales sic. non defensione mortis questionem apud procuratores nostros non oportere tractari, nec bona a Fisco peti posse priusquam de crimine constiterit apud eum cui convictis poenam irrogare, licet quis ignorat. Plane defunctis homicidii reus, apud procuratores quoque causam agendam esse ratio permittit. Ex quibus mirifice, quæ huc usque dixi, firma manent.*

At enim passim legimus quum apud iurisperitos, tum apud historicos procuratores quosdam merum imperium habuisse, interque eos procuratorem Palæstinæ. Sed heic distinguendum est inter Procuratorem Cæsaris, qui ærarium curabat, atque illum, qui vice Præsidis fungebatur in Provincia, quo facit fragmentum illud apud Gutherum (a) PRAEF. CLASS. BRIT. ET. MOESIC. PROC. ET. PRAESES ALPIUM. Quod ut planius intelligatur, advertendum est sæpe a Cæsare in Provincias quasdam Procuratores missos, ubi nempe Præses defunctus esset, vel si Provincia modicæ amplitudinis esset, ut non deceret Prætorem, aut Proconsulem mitti, aut contra tantæ extensionis, ut si quid subito insurgeret, non posset statim Præses publicæ quieti consulturus occurrere. His de causis Curator a Cæsare instituebatur alius profecto a Procuratore, qui res Fiscī pertractaret, quum Præsidis partes sustineret. Qua de re ex Tacito lib. XII. An. O. et Josepho antiq. lib. XX. cap. V. O. lib. 2. de bello Jud. habemus duos in Judæa Procuratores nempe Cumanum, & Felicem, qui Præsidis Quadrati vices in Regionibus quibusdam Judaicæ gerebant. Audias quæso Tacitum, qui mire rem exponit. *Felix Judæa impositus in tempestivis remediis delicta accendebat, amulo ad deterrimam venditio Cumanus, cui pars Provinciæ dabatur; ita divisus, ut huic Galileorum natio, Felici Sammaritane parerent.* Sed quum ex Josepho loc. cit. habeamus, tunc Judææ Quadratum Præsidem fuisse, evincitur plane Felicem, & Cumanum partibus suis per divisas sibi regiones functos esse. Porro ut ad rem redeamus, merum imperium Curatores hujusmodi exercebant, quum vice Præsidis jus dicerent. Hinc de lege

(a) Capite 34. li. 3. de offic. domus Aug.

lege Fabia Ulpianus sic scripsit (a). *Nec aliter Procuratori Caesaris hac cognitio injungitur, quam Praesidis partibus in Provincia fungatur. Plane post sententiam de Fabia latam Procuratoris partes succedunt.* Quæ sane confirmant Procuratori tunc imperium fuisse, si tamen vices Praesidis ageret, secus vero non cognovisse, nisi de bonis ad Fiscum pertinentibus in poenam scilicet criminis, postquam antea Praeses de crimine ipso sententiam protulerat. Atque hæc mihi visa sunt dicenda in re tam perplexa, quam nescio an quis lucidius peregerit.

Reliquum est ut de rationalibus, & Procuratoribus differamus, ut pars hæc absolvatur. Sunt qui, ut dixi, Rationalem in eo a Fisci procuratore differre credunt, quod hic Reipublicæ patrimonium, ille vero Principis rem familiarem pertractaret. Sed quidquid sit de nominis quæstione, certe quidem vetustis temporibus Procurator Caesaris erat etiam Rationalis appellatus. Itaque licet in nuncupatione olim inter se convenirent, nec nisi posteriori ævo Rationalis alius a Procuratore esset, non tamen in re ipsa idem erant, alter enim rem privatam Caesaris, alter Fisci rem gerebat. Sane Dio de rei familiaris cura sub Augusto scribens, docet ea non Caesaris Procuratorem, sed ejusdem libertos functos esse; quinam autem sunt liberti rei domesticæ Principis præpositi, nisi Procuratores rei privatæ ejusdem, sive Rationales? Hæc sunt Taciti verba (b): *Ministri fuere P. Celer Eques Romanus, & Ælius libertus rei familiari Principis in Asia præpositi.* Ex quibus videlicet, non Caesaris Procuratorem, sed alios rem privatam Principis tunc curasse. Quumque laudatus Auctor Nerone imperante hoc referat non quasi rem novam, evincitur profecto ab antiquo ita rem hanc sese habuisse, nempe alium a Procuratore Fisci vel sub Augusto rem domesticam Principis curasse, de quo quum Ulpianus licet posteriori ævo scripsisset, verba ejus referenda sunt (c).

*Sed*

(a) Collection. LL. Mosaicæ.

(b) Ann. XIII. cap. 1.

(c) L. 39. quum servus §. ultimo de legatis 1.

*Sed & ea prœdia Cæsaris ( inquit ) quæ in formam patrimonii redacta sub procuratore patrimonii sunt , si legentur , nec æstimatio eorum debet præstari .* Ubi , ut vides , Cæsaris patrimonium rem ejusdem privatam præfert , eamque ab alio , quam a Fisci , sive Cæsaris procuratore gestam legimus , sic etiam Plinius (a) ait , *Euristhmus Cæsaris libertus , & Procurator .*

Demum Procurator vicissimæ occurrit . Erat autem is , qui vicissimam hereditatum in Provinciis exigebat . Etenim quum Augustus Provinciis quibusdam jus Civitatis dedisset , si quis earum hereditatem aliquam cerneret , vicissimæ lege tenebatur : quare necesse fuit Procuratorem constitui , qui eam excuteret , atque is sic notabatur *Procurator XX. vel Procurator hereditatum* , ut passim in inscriptionibus . Ceterum quum Antoninus sua Constitutione , ut vicissimæ undique Romam affluerent , omnes quot quot in Romano Imperio essent , Civitate Romana donasset , factum hæc , ut in omnibus Imperii Provinciis Procuratores istiusmodi instituerentur . Verum quum hoc de tributo plurimæ quoad ejus originem , progressum , & finem superius dicta sint , libenter hic omittimus , ac Magistratibus tandem ab Augusto institutis , qui Monarchiæ congruerent , finem imponimus .

### §. III. ET ULT.

*Ad legem Juliam de ambitu , ac peculatu .*

Quum jam de Magistratibus civilibus ab Augusto institutis , ut recenti suæ Monarchiæ consuleret , sat dixerimus , rerum ordo postularet , ut de Magistratibus militaribus verba faceremus . Quoniam vero & de his supra edisertum , ubi nempe de regimine Provinciarum , atque de Præfecto Prætorio loquuti sumus , prætermisissis propterea his ad leges Magistratus spectantes explicandas properandum duxi , quas inter leges sunt Juliæ de ambitu , atque peculatu , quæ sane penitiorem disquisitionem exposcunt . Enim ve-

ro

(a) *Lib. IV. epist. 31.*



ro nullum ex criminibus majori impetu publicam quietem invadit, turbasque ciēt, quam honorum ambitio, nihil magis civilem disciplinam intervertit, quam dignitatum mercatura, nihil demum juris salvum erit, si ad id dicendum ii adhibeantur, qui Magistratum turpi pretio sibi coëmerunt. *Honores, jactabat Severus, juris gladii numquam vendi passus sum. Nam necesse est, ut qui emit vendat. Ego non patiar mercatores potestatum, quos si patiar, damnare non possum. Erubescō enim punire illum hominem qui emit, & vendit. Quum igitur ex honorum numdinatione necessitas suboritur justitiam prostituendi, quot mala ex ea & Principi, & Civibus immineant, res per se loquitur. Ad hæc ambitiosi hominis, qui huc illuc sollicitus circuit, ut malis artibus honore potiatur, animus num eo parato conquiescit? Num fines habet, intra quos contineatur? Nequaquam profecto, semper enim anhelans nova appetet, sitiensque excelsiora imperia inhiabit: En præclarum hac de re Senecæ verbum (a). Videatur & ambitio magni animi. Non est contenta honoribus annuis, si fieri potest, uno nomine occupare fastos vult per omnem Orbem titulos disponere. Omnia ista non refert in quantum procedant extendantque se angusta sunt, misera, depressa. Sola sublimis & excelsa virtus est, nec quidquam magnum est, nisi quod simul, & placidum.*

Quæ omnia satis Romanæ Reipublicæ exempla, & quidem tristia perdocuere. Num enim acerbiores seditiones publicam quietem vexarunt, quam quæ ex Magistratuum inter Patricios, & Plebem contentionibus ortæ sunt? Sed quod mirum, quum tot honores plebs obtinuissent, num quievit? Novæ semper potestatis cupida tamdiu cum Patribus certavit, donec re quassata, ad novam regiminis formam deventum sit, ubi omnes exuta aequalitate jussu Principis expectarent.

Demum quid ambitione indignius, cujus initium vitio, atque poenæ subditur, si nempe haud optato fine potiatur, effectus vero virtuti, atque laudis, quum ambitiosus nempe

VO-

(a) De ira lib. 1. cap. 16. in fine.

voti compos sit, tribuitur. Nam qui ambit punitur quidem, si ad optatum finem haud perveniat, ubi autem jam optata tener, ex ambitu causam dicit, ut jactare assolebat Varro. Et quidem Div. Plato heic recenset, quot arumæ Rempublicam sequantur, ubi pecunia virtuti præferatur. *Quid enim (inquit) fiet, si quis in Navis gubernatione a census aestimatione gubernatores eligat, pauperem vero licet gubernandi peritiorum, haud quamquam admistat. Quid inquam en hoc sequuturum censet. Ut male navem ducant. An non eodem pacto in quovis alio principatu, sic equidem arbitror (a). Quæ omnia verissima sunt, nihil enim fraudis a Magistratibus, si in illorum creatione fraudem omnem amovebimus, timendum est. Sat enim Reipublicæ consultum erit, si in Magistratuum petitione virtus a pecunia, probitas a calliditate, meliores a deterioribus non superentur, sintque meritorum testimonia, non remuneratio largitionum iusta suffragia.*

Sed quum malum hoc, Rerumpublicarum pestis, depravatos Civium animos sequatur; ex quo tempore Romanorum mores labi coeperunt, detestabile ambitus crimen auditum est, eoque sane frequentius, quo Roma corruptior. Itaque antequam legem nostram, quæ tunc temporis lata est, quum vitiorum omnium labes omnia infecerat, aggrediamur; abs re non erit & superiores quasdam huc afferre, quas profecto plurimas, usu exigente, rogatas apud Scriptores legimus. Livius an. 322. lib. IV. *L. Pinnaro, & Lucio Furio* Tribunis militum consulari potestate legem de ambitu primum latam enarrat, inquit enim: *Placuit Senatui tollendæ ambitionis causæ, Tribunos legem promulgare, ne cui album investimentum addere petitionis causæ liceret, vicerunt Tribuni. ut legem perferrent.* Hanc sequuta est lex Pætilia adversus eos, qui nundinas, & conciliabula ad aucupanda suffragia obirent, sed eam paullo post tacito Populi consensu abrogatam Doctissimus Sigonius scribit. Hinc lex Fulvia an. 599. conf. *Cn. Porcelio Dolabella, & M. Fulvio* vulgata est, qua cautum ut ambitus poena capitali, hoc est, ut

ex-

(a) *Plato de Repub. 8.*

explicat Sigonius, exilio puniretur, quod & dictum voluit Polybius, qui scripsit sua ætate ambitum Romæ capitalem fuisse. Sed missis quibusdam aliis incertis, Lex Mária prodit, cujus Marius auctor, idemque violator accusatus fuit. Ex quo vide, quantum crimen hoc incessisset omnes, quum & qui in illud legibus insævirent, in idem deinde offenderent. Quapropter acerbior Lex Calpurnia, M. Acilio Glabrione, & Calpurnio Pisone Cos. promulgata est, *ut qui ambitus damnati essent*, ut scribit Dio, *iis neque Magistratum capere, neque in Senatum legi liceret & pecunia multarentur*. Num autem Consules isti legis hujus conditores ambitus crimine vacabant? Haudquaquam, sic enim idem subdit: *Consules non quod ab ambitu alieni essent, siquidem & ipsi alieno studio, & magna contentione Magistratum quum adepti erant, & Piso ambitus accusatus vix evaserat*. Sed si ipsimet legis auctores in legem peccarent, quid ceteri omnes? Et quidem satis acerba lex hæc Senatori videbatur, pœnaque austerior ea potissimum tempestate, qua publice suffragia coemebantur. Itaque Senatus, addit Dio, *intelligebat immodicarum pœnarum denunciatione hominibus terrorem injici, sed neque qui accusarent, neque qui condemnarent, repertum iri, modicis autem pœnis propositis, neque accusatores, neque Judices defuturos*. Quare ut facilius accusatores invenirentur, statutum est, ut accusatoribus ambitus honores paterent, & quamvis ipsi ambitus tenerentur, si tamen criminis socios accusassent, absolverentur, Magistratumque malis artibus adeptum retinerent. Mirum, quanta difficultate lex hæc rogata fuerit, ut ad cædes etiam ventum sit: fuit tamen promulgata. Denique adjecit idem Dio: *tanta cura caverunt, ne quis largitionibus se corrumpi sineret, ut præter pœnas alias, quas damnatis constituerant, accusatoribus etiam honores proponerent*.

Sed his nihil obstantibus, immanis ambitus Catilina, Antonioque deinde furentibus rediit. Condita proinde est lex Tullia I. Cæsare dictatore, & Cajo Figulo Cos. qua largitionum omnium species distincte prohibita, imo lex ipsa Calpurnia severius inculcata. Qua de re Tullius in Supplicium scripsit. *Legem ambitus flagitasti, quæ tibi non*

Q q q

decras

deerat, erat enim severissime scripta Calpurnia. Sed quum & hæc, ambitiosa Civium cupiditate in dies magis magisque grassante, elangueret, Aufidia rogata est, qua id novi institutum scripsit Tullius ad Atticum, *ut qui nummos in Tribu pronuntiaverit, si non dedit, impune sit, sin dederit, ut, quoad vivat, singulis Tribubus sextertium XXX. debeat.* Quum autem postmodum Pompejus, & Cæsar duo Reipublicæ vultures de summa potestate certarent, vix dici potest, quantis largitionibus utriusque partes honores appeterent. Quare ad pacem publicam ambitiosorum criminibus turbatam reparandam novam legem de ambitu promulgari opus fuit, superioribus profecto severiorem. Itaque coitiones omnes, sodalitates, largitionesque vetitæ, de quibus sic scribit Tullius ad fratrem. *Eo die S. C. factum, ut sodalitates, decuriatique discederent, lenque de iis ferretur, ut qui non discessissent ea pœna, quæ est de vi, tenerentur.* Hinc Dio Cn. Pompejum, M. Licinium, & Crassum legis hujus, quæ Licinia vocata est, auctores innuens, ait: *pœnam graviolem ab illis constitutam adversus eos, qui largitionem fecissent; quasi vero ipsi minus deliquissent, quod non pecunia, sed vi Magistratum adepti essent.*

His jam præmissis, quæ potius ad antiquæ historiæ intelligentiam faciunt, quam ad rem, ad legem nostram veniamus. Hæc primum a Julio, deinde ab Octavio lata est. Licet autem in ea eadem fere pœnæ, quæ in superioribus, inflictæ essent, quædam tamen adjicere statuerunt, ut majori ea vi polleret, sic enim se gessisse Julium, ut perniciosissimam ambitus pestem averteret, scribit Tranquillus. *Cæsar comitia cum Populo partitus est, ut exceptis consulatus competitoribus de cetero numero candidatorum pro parte dimidia, quos Populus vellet, pronunciaretur, pro altera parte, quos ipse dedisset, & edebat per libellos circum tribus scriptura brevi. Cæsar dictator illi Tribui. Commendo vobis illum, & illum, ut vestro suffragio suam dignitatem teneant; & Dio de Augusto hæc tradit: Fabianis, & Scaptientibus Tribulibus suis die comitorum ne quid a quoquam candidato desiderarent, singula millia nummum a se divisit.*

Sed

Sed videamus propius ambitus poenas ab Octavio inflatas : Idem Dio Principis nostri rerum Scriptor sollertissimus hæc libro 54. narrat. *Inter alia ab Augusto tum statuta hoc quoque fuit, quod eos qui largitionibus factis Magistratum aliquem ambiissent, quinquennium ab iis arcuit . . . . . & eodem libro hæc alia: Augustus deinde quum Consules, & reliqui Magistratus culparentur, quod largitionibus eas sibi dignitates parassent, neque inquisitionem instituit; & totam rem dissimulavit: quia neque punire quenquam, neque criminis manifesto ulli veniam dare statuerat: sed pecuniam pignoris loco ab iis, qui petituri essent, Magistratum aliquem accepit: quam qui largitiones fecisset, amitteret: idque ejus factum ab omnibus laudatum fuit.* At leviuscula quidem poena, tunc præsertim temporis, quum crimen hoc omnium fere animos invaserat, dissentionesque inde exsurgentes, si omnes Reipublicæ formas, recentem tamen Monarchiam maxime obturbabant. Sed pensitatis Octavii rationibus acerbum id nimis fuisse putandum est. Et quidem hæc nobis tradit Varro de vita Populi Romani. *Tanta invasit ea tempestate bonorum cupiditas plerisque, ut vel Cælum ruere, dummodo Magistratum adipiscerentur, exoptarent.* Quod si in captandis honoribus adeo insanirent, tantoque eos appeterent furore, non profecto mitem existimaveris poenam, qua, qui in legem peccassent, Magistratibus ad quintum usque annum destituerentur. Si autem addas multam pecuniariam, qua & emungebantur Romani, qui frequentibus proscriptionibus ad inopiam vergebant, & ærarium penitus exhaustum in dies ditescerebat, non levem poenam hanc fuisse fateberis, licet talis visa fuerit ob miram Augusti simulandi artem, atque optime Imperatorem rebus suis consuluisse. Porro hæc omnia viguerunt, dum Magistratum creatio ad Principem non pertinebat, ubi vero ad ejus curam demandata est, ambitus poena omnino cessavit, ut animadvertit Modestinus. *Hæc lex in Urbe hodie cessat: quia ad curam Principis Magistratuum creatio pertinet, non ad Populi favorem. Quod si in municipio contra hanc legem Magistratum aut Sacerdotium quis petierit, per S.C. in centum aureos cum infamia punitur. Qua lege damnatus, si alium con-*

*vicerit, in integrum restituitur; non tamen pecuniam recipit.*

Lege etiam Julia tenetur, quisquis aut ipse rapit, *vel intercipit, avertit, aufert, inque rem suam vertit pecuniam*, publicam, sacram, religiosam, & in auro, argento, ære publico deterioris aliquid materiæ confundit, aut alii, qui hoc meditetur, præstat operam. Quumque criminis hujus promptior occasio iis sit, qui sunt in potestate, non mirum, si Juliam de peculatu inter leges, quæ respiciunt Magistratus, attulerim. Enim vero in veteri Romanorum Republica, Magistratus maxime omnium in id criminis offendisse, causam dante ipso Magistratus munere quem præterit? Quapropter refert Gellius (a) Catonem dictitare solitum. *Fures privatorum furtorum in nervo, atque in compedibus atatem agunt, fures publici in auro, atque in purpura.* Itaque criminis hujus poena fuit *interdictio aquæ, & ignis*, deinde vero, in quam illa migravit, deportatio. Sed & quadrupli condemnatione reus urgebatur, aliisque poenis ex arbitrio judicis, & pro delicti gravitate; dictus est peculatus a pecunia, sicut hæc a pecude, quam in ære Tullium Romanorum Regem primum signasse ferant, eo quod prisca opes omnes in pecudibus, & bobus constituerent. Hæ sunt leges, quæ respiciunt Magistratus. Ad finem jam properante hac mea tractatione, id unum superest, ut de Principis nostri consilio, novaque fori Romani consuetudine differamus.

## C A P U T XII.

*De consilio, sive consistorio Augusti, deque novo Fori Romani usu sub eodem.*

**Q**Uantum hæc duo, consilium nempe Augusti, ac nova Fori Romani consuetudo, recenti tunc Monarchiæ convenerint, res ipsa loquitur, quum in Augusti consilio non secus ac in Senatu omnia expedirentur, ipsaque judicia in eodem exercerentur de vita, hominumque fortunis. Quid per illud? vel novæ leges, simulato Constitutionum, Rescriptorumque

(a) *Lib. II. cap. 18.*

que nomine, ferebantur, vel veteribus Monarchiæ parum confionis derogabatur. Neque in his tantum consilii hujus utilitas versabatur, sed longius processit, quum per Sacras has cognitiones, quibus Civium controversiæ dirimebantur, leges veteres per se conciderent. Etenim Consilium hoc ita se gerebat, ut vetustas leges ad novum Reipublicæ regimen confectis quamvis rationibus accomodaret. Qua de re & jus vetus in dies magis magisque exolefcebat, & novum inolescens majori semper vi crescebat. Itaque ipso usu rerum, quæ semper congruenter ad Monarchiam transigebantur, civium ratio sensim ac sine sensu cum Monarchia ipsa coalescebat. Per quam igitur utilia omnia sunt, quæ hic differenda aggredior. Nam quid profunt novo regimini novæ leges, si lex viva, hoc est Magistratus, forique consuetudo ab eo aberrant? Itaque quum nulli bono essent, quæ ad imperium suum firmandum per novas leges constituisset, nisi & veteres Reipublicæ Magistratus, & fori Romani consuetudines immutatae essent, præclare me acturum puto, si post Magistratus, quos ab Augusto novo regimini aptos institutos ostendi, ad novam consuetudinem Fori Romani, quæ sub eodem inuenta est, accederem, atque ex ejusdem ingenio depromptam patefaciam.

Ne igitur amplius lectoris animum in suspensio teneam, quædam universe, de quibus disserturus sum, præfari brevi censeo, antequam singulatim sermo instituat. Non alio sane studio Princeps noster sollertissimus consilium hoc excoxit, quam ut Senatus auctoritatem clanculum labefaceret, sic enim simulabat, quod ipse cum suo Senatu faceret, non ex Regia aliqua potestate, sed ex Romani Senatus auctoritate facere. Itaque quæ in hoc consilio expediebantur, ejusdem erant firmitatis, ac si in ipso Senatu essent peracta. Hinc judicia publica, provincialiumque appellationes, quæ antea Senatus erant, ad Principis consistorium delata sunt. Præter hæc civiles, criminalesque controversias idem consilium transigebat, legibusque ipsis pro tempore solvebat. Quapropter hujus sententiæ decreta Principis, sacræque cognitiones nuncupatae. His veluti dicendorum facibus præmissis ad historiam consilii hujus accedamus.

## §. I.

## §. I.

*De origine consistorii Principis.*

**N**ihil sane est, quo magis Princeps Civium sibi amorem alliciat, quam si eorum curam maxime omnium se gerere præferat, cura autem illorum præcipua est, si Princeps ipse publico Civitatis consilio, ubi de rebus Civium agitur, assideat, neque a foro, ubi vita, atque fortunæ hominum periclitantur, procul esse videatur. Quæ omnia quum verissima sint, quid mirum si Julius Cæsar primum, Octavianus deinde frequentes ad Senatum accesserint, jusque assidue dixerint. Hæc Tranquillus de Julio: *jus laboriosissime ac severissime dixit*, & de Octavio. *Ipse jus dicit assidue & in noctem nonnumquam: si parum corpore valeret, lectica pro Tribunali collocata, vel etiam domi cubans. Dixit autem jus non diligentia modo summa, sed & lenitate (a)*. Hanc semitam sectatus Augustus & sibi Populi amorem alliciebat, & ad ea statuenda præsentia sua Senatum inducebat, quæ recenti imperio magis magisque adstruendo inservirent. Sed quia, si res ad pauciores perveniant, facilius in potestatem unius dilabuntur, quum expeditius sit paucos superare, quam plurimos, ideo Princeps sollertissimus hoc excogitavit, ut sibi ex Senatus auctoritate liceret consilium aliquod sibi instituere, ubi Consules, & ex Magistratibus singulis, primoribusque Patrum quindecim sorte dati ad sex menses adessent, horumque sententiæ tanti valerent, quanti illæ, quæ ab ipso Senatu ferebantur. Itaque quum nihil legitimum, nihilque ratum esset præter Senatus auctoritatem, ne is videretur eandem impetere, quod sane invidiam creasset, ab eodem consilium hoc impetrasse simulavit, cujus sententiæ ideo ratæ forent, quia Civitatis Senatus hæc auctoritatem communicaverat. Atque id, quod paullo obscurius prætermisissæ hujus rei historia videtur, intelligit Pomponius in l. 2. §. 2. *de origine juris. Constituto Principe datum est ei jus, ut quod constituisset, ratum esset*. Ne tamen

pu-

(a) In Octav. cap. 33.



putes, hoc constituto consilio Principem jura Senatus ademisse: nam in externam saltem speciem omnia immutata videbantur. Etenim vetera, & consueta judicia Senatus Urbis adhuc exercebat, legationes Populorum excipiebat, Regibusque responsa dabat, licet hæc omnia perraro, nempe *ut vestigia morientis libertatis*. Et quidem quum universa hæc, atque alia hujusmodi sæpe Princeps præoccuparet, post ejus sententiam frustra erat Urbis consulere Senatum, quum ratum jam esset quidquid Principi adhibuisset. Sed pulchrum est videre, quas artes adhibuerit, ut Senatus Urbis per se caderet auctoritas.

Caussatus is est suam senectutem, eamque jactavit sibi impedimento fore, quominus crebro ad Senatum conferretur, quare petiit, ut consilium institueretur, ubi agerentur ea, de quibus deinde in Senatum referretur. Sic enim Tranquillus (a): *sibi que instituit consilia sortiri semestria cum quibus de negotiis ad frequentem Senatum referendis ante tractaret*, cui consonat & Dio sic scribens (b). *Et en aliis Magistratibus singulis, unum itemque reliqua Senatorum e multitudine quindecim viros sorte delectos ad sex menses sibi consiliarios sumebat*. Etenim prudentissimus Mecænas sic eum monuerat. *De his igitur caussis & Equitum, Centurionumque, privatorumque primariorum cognosces, ubi de capite, aut ignominia erit controversia; nam hæc ad te solum debent referri ac nemo ob eas quas dixi caussas, alius judicare de iis debet: Adhibere autem unoquoque tempore ad ea judicia potes præstantissimos quosque patricii equestrisque ordinis viros, aliosque ex Consulatibus, & prætoriis, alios, alio tempore, ut & tu prius moribus eorum hac ratione certius perspectis, recte uti eis possis: & illi consuetudine habita tuorum morum, ac consiliorum ita demum in Provincias exeant: Ex quibus intelligis, quantæ Augusto consilium hoc suum utilitati fuerit ad firmandum imperium. Ejus enim imbuti moribus consiliarii, quum miram illam simulandi artem addidicissent, ita in Urbe, Provin-*

(a) In Octav. cap. 34.

(b) Lib. 53.

vinciisque cuncta componebant, ut modis omnibus rem Monarchicam foverent. Sed tradita jam Consilii Octaviani origine, eaque ex politicæ artis adyto deprompta, rem ipsam aggrediamur. Ordinis autem gratia sic argumentum hoc partiar, ut primo Senatus hujus Consiliarios recenseam, deque eorumdem auctoritate agam, deinde quæ apud hos negotia expedirentur, differam, demum vero rationem vestigem, quam res in hoc consilio disceptatæ, Principisque sententia definitæ ad stabiliendam Monarchiam haberent.

## §. II.

### *De auctoritate Prudentum, deque Principis Consiliariis :*

**D**ominationis cujusque fulcrum, atque arcanum juris interpretatio est. Quod si tanta interpetres polleant vi, ut sub fuco legis explicandæ novum jus condant, iique sint, quorum in judiciis vita Civium, fortunæque versentur; quis neget in potestate eorum publicarum rerum statum, firmitatem, mutationem sitam esse? Quæ quum ita sint, mirandum non est, si Patricii Romani, qui dominationem, atque imperium anhelabant, adeo fuerint de legibus interpretandis, judiciisque rerum penes se retinendis solliciti, ut plebs nonnisi sequiori ævo, & quidem per secessiones, & turbas, judiciariæ potestatis particeps facta fuerit. His in antecessum delibatis ad rem propius accedamus. Legibus duodecim tabularum in Urbem receptis, Patricii, quorum voluntas judiciorum antea norma fuerat, ut auctoritatem suam servarent, id anxie curarunt, ut illæ brevissimis verbis, atque obscurissimis perscriptæ evulgarentur. Sic enim quum in judiciis ad obscuritatem depellendam interpretatione opus esset, eamque sibi religiose servassent, fiebat, ut sub legum explicandarum fuco, jus illud inveherent, quod magis suæ dominationi esset consonum. Hac sane arte utebantur Decemviri, ut per suas interpretationes, judiciaque summum imperium intra ordinem tutarentur. Et quidem hæc & Pomponius docuit de origine juris, quum scripsit. *His legibus*  
la-

*latis, cepit, ut naturaliter evenire solet, ut interpretatio desideraret Prudentum auctoritatem necessariamque disputationem fori.* Advertens autem deinde plebs, eos non legum interpretis, sed legislatoris munus usurpasse, de abrogando decemvirorum imperio maximopere sollicita fuit, sed non tamen disputationi fori, extincta decemvirorum potestate, evanuit: nam quum legum obscuritate adhuc persistente necesse esset, ut ad quæstiones dirimendas, interpretes accederent latentem legum sensum ex ratione, atque æquitate excutientes; quumque jurisconsulti, nempe Patricii, qui tantum jus profitebantur, ad legum interpretationem convenirent, hinc quod ii per disputationes suas statuissent, sancte id iudices servare debebant. Itaque aliud jus enatum fuit, quod jus civile, consuetudinarium, jus *per manus traditum, aut receptum* nuncupatum est. Ceterum quum Patricii hoc non alia mente prosequerentur, quam ut consulerent rebus suis, mirandum non est, si interpretationes eorum eo referrentur, ut suo imperio servando congruerent. Quare Livius hæc scripsit (a). *Nondum hæc, quæ nunc tenet seculum, negligentia Deorum venerat: nec interpretando, sibi quisque jus iurandum & leges aptas faciebat, sed suos potius mores ad eas accomodabat.* Sed quamvis hæc fori disputationi tunc vim legis nancisceretur, quum jurisperitorum sententiæ receptæ forent, nemo tamen inficias ire poterit maximæ auctoritatis fuisse. Quapropter Tullius scripsit (b) *privata iudicia, maximarum quidem rerum in iure consultorum mihi videntur esse prudentia. Nam & adsunt multi (in medio scilicet foro) & adhibentur in consilium (domi) & patronis diligentibus ad eorum prudentiam confugientibus bastas ministrant.*

Sed quum labentibus annis plebs potestatis legislatoriæ particeps facta esset, ut amissum imperium patricii alia ratione repararent, legis actiones, actusque legitimos excogitarunt, quorum formulis si quis religiosissime non uteretur, causa cadebat. Quæ omnia quum veluti quoddam arcanum pe-

R r r

nes

(a) *Lib. 3. cap. 20.*(b) *Topicor. XVII.*

nes solos patricios manerent, factum est, ut frustra plebs jura atque judiciariam potestatem jactaret, quum formulas has, quibus leges ad negotia accommodabantur, ignoraret, sic Pomponius loco cit. *deinde ex his legibus, eodem tempore fere actiones compositae sunt, quibus inter se homines disceptarent; quas actiones no Populus prout vellet institueret, certas sollemnesque esse voluerunt, & appellatur hac pars juris legis actiones idest legitima actiones.* Quum igitur hæc ad id inventa essent, ut plebs sub jugo Patriciorum esset, quid mirum, si tricus & superstitionibus cuncta contexerint, ut paucis omnino innotescerent? Sic enim Tullius (a). *Quæ dum erant occulta necessario ab eis, qui ea tenebant petabantur; postea vero pervulgata, atque in manibus jactata, & excussa, inanissima prudentia reperta sunt, fraudis autem & stultitiæ plenissima.* Et paullo superius: *posset lege agi, nec ne, pauci quondam sciebant. Factos enim vulgo non habebant. Erant in magna potentia, qui consulebantur; a quibus etiam dies, tamquam a Caldæis petebatur.* Et ante hæc dixerat: *quæ dignitas in tam tenui scientia potest esse: res enim sunt parvæ, prope in singulis literis, atque interpunctionibus occupata.* Deinde etiam, *si quid apud majores nostros fuit in isto studio admirationis, id enunciatis vestris mysteriis, totum est contemptum, & abiectum. Posset agi lege, nec ne pauci quondam sciebant.*

Porro jurisperitorum hoc imperium per istiusmodi technas, & simulationes quæsitum quum adhuc Julii ævo perstaret, pulchrum est videre, an Principe nostro imperantē, incolume etiam esset, quamvis Monarchiæ parum consonum. Sane triumviratus tempore abrogatum id non fuisse ex insigni Valerii fragmento lib. VI. intelligimus, qui sic ait. *Age Cæsius vir juris scientia clarus, quam periculose contumax? Nul- lius enim aut gratia, aut auctoritate compelli potuit, ut de aliqua earum rerum, quas triumviri dederant formulam compo- neret: hoc animi judicio victoriæ eorum beneficia extra omnem ordinem legum ponens.* Quæ profecto huc redeunt, quævisse triumviros, ut de his quæ ipsi imperabant, Casellius Juris-  
con-

(a) *Pro Murena cap. XII.*

consultus formulas conficeret, quibus eorum iussa executioni mandarentur, eum vero renuisse ex defectu potestatis eorundem, quum quæ juberent, usurpatæ potentia effectus essent. Si igitur tanta jurisperitorum potestas erat, ut ne triumviri quidem efferatissimi Reipublicæ vultures quid imperarent sine compactis per Jureconsultos formulis; fatendum plurimum tunc etiam temporis jurisperitos ad dominationis arcanum valuisse. Quid igitur? Abrogavit ne id Octavius, veluti rebus suis adversum? Minime gentium. Nam quum vetusta satis, & maximopere veneranda jurisconsultorum esset in urbe auctoritas, veluti Palladium evertere visus fuisset, si tantam dignitatem cum Divinarum humanarumque rerum scientia conjunctam interturbare ausus esset. Tantum igitur abest, ut solertissimus ille Princeps Jurisconsultorum auctoritatem everterit, ut eorum potius opera ad recentem tunc Monarchiam adstruendam usus sit. Sed quas ad id rationes inierit, abs re non erit animadvertere.

Ante Augustum omnibus Patriciis jus civile profiteri, ac de eo respondere fas erat, postmodum vero certis is hominibus, illisque maxime, qui bene de se merebantur, tantam facultatem beneficii loco indulxit, neu Judices ab eorum responsis discederent, imperavit: utque ea latius pateret, id voluit; ut responsa hæc, quæ ad certa quædam negotia olim dabantur, ad alia, atque alia simillima perducerentur? Hinc Jurisconsulti, quo Principis gratiam aucuparentur, controversias responsis suis ad præsens regimen accomodatis dirimebant, & Judices, qui in jure dicundo ne latum quidem unguem poterant ab istiusmodi responsis recedere, id sententiis suis faciebant, ut illa fori consuetudo legibus ipsis, quæ mortuis literis interjacent, validior ad firmandam Monarchiam invehetur. Etenim quamvis responsis suis vetera nomina retinerent, quum satis vetusta consuetudo esset, ut jurisperiti ex scripto jure legum mentem, ac rationem disputando excuterent, tamen sub juris antiqui interpretationis specie nova in dies sancire videbantur. Hinc redditur ratio, cur passim in corpore juris Jureconsulti juris conditores dicantur. Sed quia hæc scitu quidem pulchra sunt, ne pigeat paullo longiori examine ea pertractare.

R r r 2

Dup

Duo erant Octaviani ævo Jusperitorum facile Principes Antistius Labeo, & Atejus Capito, duo, ut scripsit Tacitus, *pacis decora*: ambos quidem Princeps solertissimus maximo opere studuit sibi per honores devincire, sed quia Labeo libertatis vindex acerrimus erat, cum eo res non satis apte gerebatur, quum enim, ut ait Tacitus, *incorrupta libertate gauderet ab ambitione honorum vacuus nihil ratum, pensumque habebat, nisi quod iustum, sanctumque esse in Romanis antiquitatibus legisset*. Itaque honores omnes, imo & consulatum ipsum respuit. Ex adverso Capito maxime apud Principem gratosus erat, quia, ut laudatus Auctor subdit, eo erat ingenio, *ut ejus obsequium non posset non dominantibus magis probari*. Sed perbelle accidit, ut per diversum horum jurisperitorum ingenium res Principis nostri mirifice proficeret. Duæ enim exortæ sectæ sunt, utriusque nempe studiis, ac genio respondentes, Sabinianorum, & Proculejanorum, qui tot sibi adversas opiniones in jus invexerunt, ut ad dissidia componenda quinquaginta decisionibus Justiniano fuerit opus, quamvis Triboniani inscitia multa adhuc hujusmodi dissidiorum vestigia in jure appareant. Ex suo igitur quoque genio, & peculiari philosophia jus interpretantibus, factum est, ut jus vagum, atque incertum inveheretur. Quumque in ancipiti jure Principis opus sit constitutionibus, hinc ex re nata data Augusto caussa, quapropter novas quotidie constitutiones evulgaret, in speciem quidem, ut per jus certum necessitatibus civium consuleret, sed revera ut Monarchia per leges eidem consonas invalesceret. Ex quo sane patet ratio, cur Augusti ævo sectæ istiusmodi magis magisque efferbuerint, nempe ut jus incertius semper obscuriusque, cui Principis providentia prospiceret, fieret. Hinc illud Tullii intelligitur (a). *Sapiens existimari nemo potest in ea prudentia, quæ neque extra Romam usquam, neque Romæ rebus prolatis, quidquam valet*, Etenim quum Tullii ævo jam Reipublicæ libertas per Cæsaris dominatum everti cœpta esset, ea sensim suborta est jurisprudentia, quæ sane dominantis consilio congrueret. Hæc autem quum unius potentiae firmandæ inserviret, neque rebus intra

Ci-

(a) *Orat. pro Mura.*

Civitatem, neque extra, vel negotiis prolatis respondere poterat, quum tantum ad alienam dominationem firmandam per simulationes, & technas referretur. Itaque quum istiusmodi Jurisconsultorum interpretationes, atque responsa procul ab antiquo jure forent, neque tuto patefieri posset novum jus, quod præsentì regimini aptabatur, recte illud jactabatur, *non de omnibus, quæ majoribus placuerunt rationem reddi posse.*

Quum igitur Jurisconsultorum opera adeo omnibus esset Principibus, maxime vero Octavio utilis, quid mirum, quod tanto studio Jurisperitos Principes coluerint? Quare operæ pretium duco facturum, si his insuper pauca quædam non poenitenda adjiciam. Et primo Princeps noster iudicibus præcepit, ne a jurisperitorum in judicando discederent responsis, quod, ut superius vidimus, ad novum jus per fori consuetudinem obtrudendum, & simul ad judiciariam Prætoris potestatem evertendam, qui in dies edicti nomine, rebusque nova nomina dando, leges condebat, mirifice profuit. Deinde quum ob sectarum studia, quæ in dies ferventius crescebant, jus anceps, atque incertum oriretur, hinc fiebat, ut ex Principis jussu sæpe convenientes, ea per decisiones suas statuerent, quæ præsentì regimini congruerent. Præclarum exemplum habemus *in tit. de Codicillis*, ubi legimus Augustum convocasse prudentes, inter quos Trebatium quoque, *cujus tunc auctoritas maxima erat, & quæsisse an posset hoc recipi, nec absonans a juris ratione Codicillorum usus esset, & Trebatium suasisse Augusto, quod diceret, utilissimum, & necessarium hoc Civibus esse.* Qui sane Codicillorum usus ærario ditando quantum ob vicefimam conveniret, jam supra *in tit. de vicefima* occupavimus. Querela etiam inofficiosi testamenti hinc repetenda est, nempe ex Prudentum sub Augusto disputationibus, quod item Monarchicæ Majestati maxime conveniebat. Nam quum Augustus Patriam, ac dominicam potestatem multum intercidisset, ne quid consiliis ejus obversaretur, par erat, ut parentes vel nominatim exheredarent, vel instituerent filios. Etenim si eos impune præteribant, quum jus vitæ, & necis sibi erat, ut vulgo scribunt antiqui Jurisconsulti, fas id non erat, ubi jam Augustus vindicem  
gla-

gladium a manu Dominorum , & Patrum , veteris libertatis vestigium jam eripuerat . Item Aquilianam stipulationem , discrimen filiorum , filiarumque exheredationis , aliaque hujusmodi ex fori disputationibus sub Augusto enata concors est eruditorum opinio , quos adeas , nam ego brevitatis gratia ad alia pertranseo .

Neque prudentes Judicibus tantum , sed & Principibus assidebant , quos propterea Principes ipsi amicos suos honoris causa nominabant . Quod cœptum ab Augusto frequens fuit sub insequentibus Imperatoribus , exemplo esse potest quod legimus in *l. Divi D. de jure patronatus* , ubi quum quæreretur , an delictum avi , vel patris nepoti , vel filio in jure libertorum noceret , sic Divi fratres constituerunt . Sed cum & ipso Maciano , & aliis amicis nostris jurisperitis adhibitis plenius tractarem , magis visum est , ut nepotem neque verbis , neque sententia legis , aut edicti Prætoris , ex persona , vel nota patris sui excludi a bonis aviti liberti . Sed , quod magis est , nullam constitutionem sine jurisperitorum consilio evulgabant , ut de Alexandro scriptum reliquit Spartianus . Nec ullam ( ait ) constitutionem sancivit sine viginti jurisperitis , & doctissimis , ac sapientissimis viris ; Immo in suis rescriptis ipsa prudentum responsa sæpe eisdem verbis præferebant , ut in *l. & si contra mandata C. de nuptiis* , & ideo postea liberos susceptos , natosque ex justo matrimonio legitimos esse , responsum viri prudentissimi Pauli declarat . Et in *l. 2. C. de prædiis minorum* scriptum est . Utere viri prudentissimi Papiniani responso , ceterorumque quorum precibus fecisti mentionem , sententiis . Quibus omnibus & Jureconsultorum sibi amorem alliciebant , ut responsis suis rebus Imperii studerent , & legistoriam potestatem occultabant ; nam quum Prudentum responsis in rescriptis uterentur , ex ipsa æquitate , atque rationis vi jus novum manare , non vero ex rescripti natura videbatur . Quumque responsum ad peculiarem casum referretur , rescripto deinde probatum ad alia ejusdem generis perducebatur , jusque constituebat , sed larvæ istiusmodi , simulationesque locum amplius non habuere , ubi jam Monarchia adulta , atque virilis effecta est . Quapropter Constantinus,



nus, & Constantius formulas omnes judiciorum abrogarunt, imo Constantinus idem omnem interpretationis vim a Prudentum consiliis auferens, eam sibi dumtaxat servavit, quum interpretatio illa vim legis habens ei peculiaris sit, cui leges condere fas est. Itaque in l. 1. C. de legibus sic ait: *Inter aequitatem jusque interpositam interpretationis nobis solis & oportet, & licet inspicere*, & lucidius Justinianus eodem tit. l. 12. *explosis itaque his ridiculosis ambiguitatibus tam conditor quam interpret legum solus Imperator jure existimabitur nihil hac lege derogante veteris juris conditoribus, quia & hoc eis Majestas imperialis permisit.*

Vidimus hucusque quanta sub Augusto Prudentum fuerit auctoritas, ut res Imperii promoveretur. Reliquum modo est, ut aliqua de consiliariis Principis nostri enarremus. Augustum ad firmandam Monarchiam, eamque occultandam Senatu probante sibi consilium quoddam instituisse jam præfati sumus. *Sane quum omnis ratio, & institutio vitæ adjumenta hominum desideret (a), maxime vero opus id est Principi etiam sapientissimo, quum non possit is sua scientia cuncta complecti, nec unius mens tanta molis capam esse possit (b).* Num unus is omnia absolvet, sapientissimeque reget, nisi in partem curarum alios adsumat? *Nonne magna negotia magnis adjutoribus egent (c)? Is profecto sapiens erit, qui sapientum commercio utitur (d).* Sed brevi nunc videndum, qui nam boni Consilarii sint. Etenim parum prodest Principi Consiliarios adfidere, si & ii doctrina, morumque præstantia alios non antecedant. Boni igitur Consilarii sunt, qui imprimis benemerati sunt, & Principi amici, sed ii amici sunt, qui & optimi. Sic enim Plinius ad Trajan. *Optimum quemque fidelissimum puto*, atque ii sunt Imperii præsidia, quemadmodum Sallustius scripsit. *Nam non exercitus neque thesauri præsidia Regum, verum Amici. Non aureum istud sceptrum est, quod regnum custodit, sed copia amicorum ea Regibus sceptrum veris-*

(a) Tullius I. Offic.

(b) Tacit. III. Ann.

(c) Vellej. lib. II.

(d) Euripid.

*rissimum tutissimumque* (a). Sed inter bonos ii sunt seligendi, quibus corpus annis infirmum, ingenium sapientia validum sit (b) consilia enim senum bastas juvenum esse Plutarch. dictabat. Immo inter senes ii præstant, qui plurimum fortuna jactati sint. Nam in ore Mithridatis frequens illud erat. *Mibi fortuna multis rebus ereptis usum dedit bene suadendi* (c).

His præmissis videamus quæso, quo pacto Princeps noster in Consiliariis sibi ad res graviores pertractandas assumendis se gesserit, quod sane ex Mecænatis consilio penes Dionem alato depromendum est, *Addibere autem* (hic monuit) *unoquoque tempore ad ea judicia potes præstantissimos quosque patricii, Equestrisque ordinis viros, aliosque ex Consularibus, & Prætoriiis, alios alio tempore, ut tu prius moribus eorum hac ratione certius perspectis recte uti eis possis: & illi consuetudine habita tuorum morum, ac consiliorum, ita demum in Provincias exeant. Hos in causis gravioribus sententias non aperte rogabis, ne necessariis suis faventes non libere quid sentiant pronuntient: sed in tabella eas scriptas ad te solum, ne cui alii innotescant perferri, ac deleri statim lectas jube. Sic enim uniuscujusque sententiam certissime cognoscas, si eam illi a nemine alio cognitum iri persuasum habeant. Præterea ad judicia, ad litteras, ad urbium decreta, ad privatorum hominum postulata, ad aliaque omnia, quæ administrationi imperiî competunt adjutores, ministrosque ex Equitibus quosdam habebis: sic & facilius singula peragentur, & neque tu per errorem falleris, neque solus omnia conficiens fatigaberis. Ex quibus omnibus velim colligas, quanta utilitate hæc Mecænatis monita affluant. Singula igitur expendamus. Monet ante omnia ut Consiliarios sibi adsumat ex Patriciorum, Equitumque ordine: non igitur ex solis Patriciis, vel Equitibus, sed ex utrisque, ut scilicet ejus amor in utrumque ordinem ostenderetur, utque omnium pariter salus Imperiî interesset, cujus regiminis partes omnes suscepissent. Addit ex his Consiliariis, qui diu in Principis concistorio versati essent, Præ-*

des

(a) *Senoph. lib. 8.*

(b) *Tullius Catill.*

(c) *Sallus. in fragm.*

des in Provincias mittendos. Quod sane utilissimum Principi erat, quum de eorum moribus ob longam consuetudinem satis ei esset compertum, illique contra Principis morem, artemque in firmanda Monarchia belle callentes, omnia ad ejus vota feliciter expedirent. Sed quia Octavius non adeo Monarchiæ suæ firmandæ studebat, ut cetera missa faceret, subdit Mecænas Consiliariis suis liberam consulendi potestatem faciendam, ut utilia simul, non tantum Principi gratiosa proponerent, *liberam (ait) tibi ex animi sui sententia consilii omnibus potestatem facies proposita securitate, nam & si cujus tibi sermo probabitur multum inde utilitatis ad te, & si non placebit, nihil incommodi redibit: quorum consilium sequendum existimabis eos collauda, ac honora (nam illorum inventis gloriam tibi paries) quorum vero rejicies, nequam eos aut ignominia afficies, aut culpabis, quum ad eorundem tibi voluntatem, non successum ejus, sit respiciendum.*

§. II.

*De Sacris Cognitionibus:*

**J**Am vidimus, quidnam Principis consilium, ejusque Consiliarii fuerint, quo animo instituti essent, quo ex ordine assumpti, & qua vitæ consuetudine præditi essent, satis edisseruimus, reliquum est, ut ea persequamur, quæ hoc in consilio peracta sint. Dixi hoc consilium folleter constitutum, ut per transversos licet cuniculos Octavius Romani Senatus auctoritatem, quantum posset, minueret, Prætorisque potestatem, quam in legibus condendis edictorum nomine exercebat, funditus everteret. Quapropter par est adfirmare in Principis consilio ea peracta, quæ in Senatu agimos erat, & lites controversiasque diremptas, quæ apud Prætores agitari solerent, nempe, ut ex hoc Principis consilio deinceps jurisprudentia prodiret, quæ Monarchiæ conveniret. Sed quia de Principis cognitionibus in dirimendis controversiis magis sollicitus sum, quibus fiebat, ut sub decretorum nomine potestas leges ferendi exerceretur; hanc propterea, quæ

Sff

quæ per rescriptorum, decretorum, constitutionum, dispensationumque involucra se exerebat, quantum potero, ex nova ipsa Reipublicæ forma patefaciam. Sane sæpius laudatus Mæcenas Octavium monuit, ut ipse de omnibus controversiis, Magistratuumque judiciis, sive per Judicum relationes, sive ex partium appellationibus cognosceret: *Ipse autem seorsim de causis, in quibus provocatione certatur iudicium facies, quæ a maioribus Magistratibus, tutoribus, Præfecto Urbis, Subcensore, Præsidibus Provinciarum, annonæ Procuratore, & nocturnæ custodiæ Magistro ad se referuntur. Nemo enim ita metum imperium obtinere debet, ut non ab eo provocari possit.*

Ne vero videretur Octavius una spongia & Senatus auctoritatem, & Prætoris, aliorumque Magistratuum potestatem delere, rem satis apte exorditus est, ut ex Tranquillo discimus (a). *Appellationes quotannis Urbanorum quidem litigatorum Prætori delegavit Urbano: at Provincialium Consularibus viris, quos singulos cujusque Provinciæ negotiis præposuisset. Sed quia inter judicia graviora, quædam sunt, quæ præstat a Principe potius, quam ab aliis expediri, hinc Mæcenas idem apud Dionem subdit. De his igitur causis, & Equitum, centurionumque primariorum privatorumque cognosces, ubi de capite, aut ignominia erit controversia: nam hæc ad te solum debent referri, ac nemo ob eas quas dixi causas, alius judicare de iis debet.*

Sed heic illa nobis objicitur inter politicos viros satis agitata controversia, quam more suo doctissime pertractat Bodinus *de Repub. lib. 4. cap. IV.*, an Principis Majestati Judicem agere, & cum subditis colloquia ferere conveniat. Si quidem veteres audiamus, intelligemus profecto nihil principali Majestati congruere magis, quam de civium controversiis ferre iudicium; bonus Princeps, Themistius ait, *Imperatoris nomen respuit, & Judicis amplectitur, quia illud potentia, hoc vero sapientia vocabulum est.* Hinc Homerus non aliter fere Græcorum Reges, quam Judices appellat, & apud Hebræos Imperatores gerendi belli causa instituti Judices appellati sunt. Neque abest ratio ex ipsa Prin-

(a) *In Octav. cap. 33.*

Principatus natura. Quum enim Principis & subditi obligatio mutua sit, non magis Principi parere subditi debent, quam Princeps subditis jus dicere. Quod si dixeris, per Magistratus id, jubente Principe, præstari, non ne sæpe vel avaritia abrepti, vel gratia allecti cuncta ii prævertunt? Quod sane minime in Principe censendum. Sed quum in ore omnium illud protritum sit, Principem præmia per se conferre, poenas vero per alios infligere debere, ratio finit, ut indulgendum id sit Principibus, si judicia per Magistratus a se creatos ferant. Quid igitur? cum ipso Bodino quadam adhibita distinctione dicemus. *Neque mirum videri debet cuiquam cur iudicandi munus antiquorum Regum proprium, nunc vero Magistratum sit: quia quum nullis adhuc legibus Populi uterentur, sed Regia manus, ac voluntas pro lege haberetur, necesse erat causas Civium a Principibus judicari; promulgatis vero iudiciorum publicorum ac privatorum legibus, & quæ quibus peccatis supplicia, quæ merentibus præmia dari oporteret, necessitas illa sublata est, & a Principibus ad Iudices delata.*

His jam rei, qua de agimus, præmissis rem ipsam modo aggrediamur. Princeps igitur assidentibus juris peritis controversias dirimebat, tum eas, quæ immediate ejus cognitioni subiciebantur, tum quæ per relationes Judicum, aut litigatorum appellationes ad ejus Tribunal deferbantur. Sed de omnibus, quæ cognoscebat, non eadem ratione jus reddebat. Nam quædam in Auditorio per decretum, alia in Tribunali per cognitionem, & sententiam expediebat. Quædam ad juris præscripti rationem, alia vero ad regulam boni & æqui transiebat. Quæ omnia quum ad quamplurimum legum intelligentiam faciant, par æquumque arbitror aliquantisper in iis immorari. Principis concistorium & Tribunal & Auditorium complectebatur. Sed in Tribunali ea exercebantur negotia, quæ utraque parte præsentem ex ordinario jure absolvebantur: Contra vero in Auditorio, ubi de plano, & sine partium contentione, secundum regulam boni & æqui res decidebantur. Hic igitur omnia per decreta, illic vero per cognitionem, & sententiam expediebantur. Quo sane discrimine posito lucem accipit illud Pauli in *l. i. C. de offic.*

Adfessorum . Omne officium adfessorum in his fere causis constat : in cognitionibus , postulationibus , Libellis , Edictis , Decretis , Epistolis , ubi ut vides decreta a cognitionibus diversa referuntur . Ita cognitio illa erat , quæ pro Tribunali sollempniter fiebat , juris ordine servato , atque judiciorum formulis adhibitis , de qua Tranquillus in Claudio . In ultima ( inquit ) cognitione pro Tribunali accessisse se ad finem mortalitatis semel atque iterum pronuntiavit , quasi ore proprio , & se ipso iudice morti addixerit . Contra Ulpianus in l. mulier 22. ad Trebellian. speciem quamdam fideicommissi affert , deque ea in Auditorio D. Marcum judicasse Scævola refert . Nonne fideicommissa ideo in Auditorio adfirmare poteris peracta , quia in iis non jus ordinarium , sed æquitas , & judicantis arbitrium primas obtinent ? Hinc relationes Judicum , suggestiones , & consultationes , quæ oblato negotio expendebantur , absentibus litigatoribus , & nemine causam perorante in Auditorio peractæ dicuntur l. 11. C. de legibus . Contra vero causæ capitis , & status , quippe quæ graviores , in Tribunali per cognitionem , & sententiam peractæ dicuntur . Hinc Plinius Trajano rescripsit ; Cognitionibus de Christianis interfui numquam ideo nescio quid & quatenus , aut puniri soleant , aut quæri . Et quia de supplicio Christianorum sermo incidit , nolim hic mittere , hoc judiciorum discrimen ex Martyrum actis planius probari . Principes Pagani isthæc judicia graviora esse rati sunt , quapropter per se servatis sollempnibus ea in Tribunali per sententias , & cognitiones exercebant . In illis videre est interrogationes factas ab Imperatore , quæ profecto aliud nihil , quam defensiones reis oblata , ut ipsimet suas causas agerent , quum Patronorum auxilio destituerentur .

Ex his velim intelligas , sicuti ratio controversias expediendi diversa fuit , ita etiam diversas fuisse formulas judiciorum , nam si præter sollempnia juris , & pro bono & æquo judicatum esset , hac utebantur dictione . Placuit Imperatori , secus vero Pronunciandi vocabulum in more erat . Ita in l. maritus D. de questionibus , ubi dirempta quæstio est secundum ordinarium jus , ut uni testi fides non præberetur , dicitur sic Pronuntiavit Imperator quæstione illicite habita unius testimonio

*non esse credendum*, ideoque recte provocatum, sed in omnibus ultimarum voluntatum controversiis dictionem placuit cernere est, nam in istiusmodi judiciis semper ex bono, & æquo sententia ferebatur. *Ex æquo & bono testamentorum controversias iudicatas* (a). Porro ut fides atque memoria servaretur de his omnibus, quæ in Principis concistorio agebantur, commentaria fieri mos erat. Et hæc sunt *Acta*, quorum in Codice Justiniano aliquando mentio fit, ut in *l. 2. de excusation. & Maximiliani A. A. C. C. inductis Firmino, & Apollinario, & ceteris Principalibus Antiochenis adstantibus Sabinus dixit &c. Diocletianus dixit. Certis dignitatibus data a nobis est indulgentia numerum civilium & personalium, idest his, qui aut ex Protectoribus sunt, aut ex Præpositis. Hi ergo ad munera personalia, aut civilia non vocabuntur.*

Quæ huc usque edisseruimus, consuetudines & formulas fori Romani respiciunt sub Principibus. Videamus nunc, quantum ad orientem Monarchiam firmandam profuerit Augusto iudicia in civilibus controversiis exercere, quem morem & insequentibus Principes tenuerunt. Pene dixerim unicum Monarchiæ fulcrum hoc fuisse, ut Principes de negotiis civium sententias ferrent, etenim sub decretorum, Constitutionum, re-scriptorum, beneficiorumque nomine antiquum omne jus subvertebant, illudque in medium adferebant, quod præsentis Reipublicæ formæ aptaretur. Et quidem haud libertati videbatur Octavius adversari, si Jurisperitis, Prudentibusque sibi adfidentibus de negotiis civium sententiam ferret. Nonne enim Prætor, Ædilis, alique Reipublicæ Magistratus, vel per se, vel per alios data iudicii formula iudicabant? Si vero hic stetisset Octavius, nihil quidem novi effecisset. Sed in hoc antiquam libertatem evertibat, quia sub interpretationis fucus novum condebat, & in speciem transactæ litis per sua decreta leges universales in similibus causis ferebat. Arcanum hoc mire Justinianus in *l. ultima de legibus* prodit. *Si Imperialis Majestas ( inquit ) causam cognitionaliter examinaverit, & partibus cominus constitutis sententiam dixerit omnes omnino*  
Ju.

(a) *Tullius in Bruto.*

*Judices, qui sub nostro Imperio sunt, sciant banc esse legem non solum illi causæ pro qua producta est, sed & omnibus similibus. Quid enim est majus. Quid sanctius Imperiali est Majestate? Vel quis tanto superbiæ fastidio tumidus est ut regalem sensum contendat? Quum & veteris juris, conditores Constitutiones, quæ ex Imperiali decreto processerunt legis vim obtinere aperte, dilucideque definiant. Ex quo enucleate intelligis datum Principis decretis, ut per isthæc judicia & in similibus causis jus constituerent. Ex quo sane factum, ut in dies proheveretur, quod Principi magis arrideret.*

Ceterum quum per hanc consuetudinem ad immensum excrevissent decreta Principum jus constituentia, nec in solis rebus judicatis, sed & in ceteris similibus, adeo jus effusum sparsumque est, ut Theodosius, quum certam juris formam constituere vellet, statuerit tandem, ne deinceps decreta Principum in aliis rebus præterquam judicatis jus facerent, metuens nimirum, ne ingenti eorum numero denuo jus vagum, incertumque evaderet. Jam vero penitus intelligimus, cur is in *l. 2. C. de legibus* præscripserit. *Quæ ex relationibus, vel suggestionibus judicantium, vel consultatione in commune florentissimorum Sacri nostri Palatii Procerum Auditorium introducto negotio statuimus, vel quibuslibet corporibus, aut legatis, aut Provinciæ vel Civitati, vel Curie donavimus; nec generalia jura sint, sed leges faciant iis dumtaxat negotiis, atque personis pro quibus fuerint promulgata;* Neque solum Principis decretum legis jus nanciscebatur, sed si jurisperiti inter se forte dissidebant, id profecto auctoritatis vim habebat, quod Princeps statueret; hac scilicet conficta ratione magis bonum, æquumve esse, quod Principi arrideret. Insigne exemplum prostat in *l. Æmilius Largianus D. de minoribus*, ubi Paullus contra suam sententiam refert Antoninum Imper. pro pupilla pronunciasse in quæstione, restituenda ne esset in integrum, nec ne, illiusque sententiam ceteris secum sentientibus prælatam. Hinc intelligas, quantum studii adhibuerint Prudentes, ut per technas suas, & simulationes, ne videretur antiqua libertas everti, Principum decreta vim legis adferrent.

§. III.



## §. III.

*De Constitutionibus, Rescriptis, deque beneficiis, atque dispensationibus Principum.*

**N**on solum autem in consilio suo presentibus per decreta Octavianus suum unicuique jus reddebat, sed & absentibus, nempe per Constitutiones, & rescripta iudicibus se consulentibus respondebat, vel litigantibus interjecta appellatione de Magistratum sententiis, jus dicebat. Hinc posteaquam de Principum decretis super negotiis presentium latis edisserui, de eorundem Constitutionibus, Rescriptis, beneficiis, aliisque dispensationibus agendum est. Et si in decretis faciendis id maxime studuit Octavius, ut jus novum conderet, eandem operam per Constitutiones suas, & Rescripta navasse ostendam, ut non minus Urbs, quam Provincia novo Regimini accommodarentur. Itaque licet constitutio in universum omnia cujusque placita denotet, in jure tamen nostro Principum Constitutiones pro legibus eorundem universalibus usurpantur; potuissent sane planius leges appellari, sed ad avertendam invidiam, consultius in recenti Monarchia legum ferendarum potestatem nominibus non invisis occultari existimatum est, quum & sub libera Republica receptiores Jurisconsultorum sententiarum Constitutiones appellarentur. Principum igitur Constitutiones leges sunt, unde titulus in *Cod. de Principum Constitutionibus*, quæ honoris causa sæpissime vocantur *leges Sacræ, Sacratissimæ, Divales Sanctiones, leges venerabiles, oracula salubria, leges perpetuæ, æternæ, publica jura, apices sacri*. Verum has Principum leges non subdolis tantum nominibus ad offensionem vitandam, sed & aliis fictionibus obtegi mos fuit; tum enim Principis oratio de eo jure, quod per novam Constitutionem condere vellet, in Senatu præcedebat, tum deinde una cum ipso Senatusconsulto id in publicum prodibat, ut hac conficta ratione, nova illa lex Senatus potius auctoritate, quam Principis potestate ferri videretur. Sed præter hæc aliis, atque aliis eodem consilio exquisitis usi sunt *vocabulis*. Leges aliquando edicta-  
les

les vocitarunt, quemadmodum in libera Republica præter invidiam edicta erant Magistratuum : sæpe Epistolas Generales, ut in *l. 4. D. de fugitivis*, cujus epigraphe est *generalis Epistola Div. Fratrū*. Non raro *Principum orationes*, *Pragmaticæ Sanctiones* dicebantur, quibus aliisque nominibus modestiam quamdam, honoremque Senatus præferre callide studebant. Ut autem ad omnium notitiam pervenirent, omnesque iis tenerentur, ad Præfectum Prætorio, Præfectum Urbi & Magistros militum istiusmodi Constitutiones dirigebantur, quas deinde in frequentioribus Civium conventibus evulgare per Edictum debebant.

Quum igitur Constitutiones novum revera jus conderent, nihil mirum, si in *tit. institution. de jure naturali gentium*, & civili legatur, quodcumque Imperator per Epistolam constituit, vel cognoscens decrevit, vel edicto præcepit legem, esse constat, quumque, ut diximus, juri veteri derogarent, hinc receptum ut potiores ipso jure essent Constitutiones, utque juris nomine jus vetus intelligeretur. Quod si per Constitutiones quid antiquum confirmaretur, rem non tantum jure, sed & Constitutionibus ita sese habere dictare mos erat. Vide legem *falsa demonstratio 33. D. de conditionibus*, ubi habetur. *Hoc ita juris Civibus ratione & Constitutionibus Div. Veri*, & *Antonini cautum est*. Quum autem novum jus Constitutiones essent, novumque jus veteres leges abroget, hinc verba illa intelligimus *Constitutiones*, quæ *jus vetus emendant*, *strictè esse accipiendas*, *Constitutiones novas strictius esse servandas*. Nam per eas illam veteris juris partem existimandum est voluisse Principes abrogare, quam expressis verbis significassent. Hæc de Constitutionibus; veniamus ad Rescripta, quæ maximam juris novissimi partem efficiunt.

Erant rescripta responsiones, quas Principes vel ad libellos supplicantium, vel ad relationem Magistratuum dabant. Sæpe autem libellos hujusmodi mittebant Principes ad Judices, ut ipsi sane inquirerent, *an preces veritate niterentur*; sed consuetudo hæc, ut Princeps per libellum responderet, ab Octaviano refertur accepta, is enim ut Tranquillus scri-

scripsit (a) *ne plus minusque loqueretur ex tempore instituit, ut per libellum Princeps supplicantium precibus responderet*, quod deinceps insequentibus Principes retinuerunt, unde tit. prostat in *Cod. de precibus Imperatori afferendis*, & *de quibus rebus supplicare liceat*. Porro autem in ambiguis, ac difficilioribus causis solemne etiam fuit Magistratibus per relationes Principem consulere, quæ sæpius in jure *consultationes* appellantur, sic Plinius ad Trajan. (b). *Salva Majestate, Domine descendas oportet ad meas curas, quum ius mihi dederis referendi ad te*. Hinc tit. *Cod. de relationibus, & appellationibus, & consultationibus*. Verum Principes libellis supplicantium, vel Magistratuum relationibus respondentes jurisperitorum consilio uti solebant, ita enim dabant intelligere, se se non jus novum, sed, quod melius, æquiusque Prudentibus videretur, statuere. Hinc Divi Fratres rescribentes in l. 17. *de jure patronatus*, hæc præstantur . . . *Sed quum & ipso Mariano, & aliis amicis nostris jurisperitis adhibitis plenius tractaremus, magis visum est*.

Sed absouum hic non est videre, quam viam initio Augustus, alique post eum inierint, ut rescripta vim legis nanciscerentur. Sunt rescripta vel generalia, vel specialia, illa jus generale constituebant, eademque profecto ratione, qua Constitutiones, ac decreta Principis legis vim obtinuerunt; specialia vero, quæ ad certum locum, aut Provinciam, vel ad certum aliquem Magistratum, aut Judicem in singularibus negotiis ex privatorum precibus prodibant, per quam specialia negotia absolvunt. Hinc nullam ob causam fieri videbatur, ut specialia rescripta vim legis haberent, quippe quæ legum ipsarum rationi opponerentur, per quam ea lex haberi debet, quæ ad omnes fertur. Sed ex aduerso intererat Principis, ut per rescripta non minus in Urbe, quam in Provinciis potestatem legis ferendæ exerceret, illudque jus conderet fucato rescriptorum nomine, quod rebus suis conveniret. Quamobrem sic res componebatur, ut quod

T t t

uni

(a) *Cap. 48. in Octav.*(b) *Lib. X. cap. 40.*

oni rescribatur, simili se præbente specie, idem semper responderetur. Hinc in *tit. institution. de fideicommissariis hereditat.* legimus *Div. August. semel iterumque gratia personarum motus.* Quamobrem Judices secundum rescripta sæpe repetita, ac nunquam variantia judicantes, jus illud consuetudinarium in forum invehebant, quod legibus ipsis scriptis firmitus putabatur. Studebant autem, ut rescripta saltem per confictas interpretationes, & in externam speciem cum legibus convenirent; ut obsequium iis non secus, ac legibus ipsis haberetur. In iisdem laudabant sæpe Principes prudentum responsa, ut cum ii maximæ auctoritatis penes Romanos essent, horum benevolentiam hac arte captarent. In rescribendo hanc passim usurpabant formulam, *ex æquo, & bono ita sibi videri*, ut per æquitatis simulationem rescripta hæc magni apud omnes fierent; qua potissimum æquitatis causa a jure consuetudinario discedere piaculum censebatur. Itaque si vetusta quædam lex objiceretur, Prudentes respondebant. *Sed hoc jure utimur*, nempe consuetudinario illo, quod æquitatis ratione receptum per rescripta Principes invexerant.

Verum hisce rationibus ad vetusto juri derogandum comparatis addenda sunt beneficia Principum, sive dispensationes, quæ non minori ad venerandam antiquitatem evertendam vi pollebant. Sunt autem beneficia Principum, sive liberalitates in duplici differentia, alia enim generalia, alia specialia, hæc pro certis quidem personis, illa vero universis conferebantur, quæ potius beneficia legis dicuntur ex novo jure, hoc est ex Principum inuenta Constitutionibus, ut beneficium restitutionis in integrum, *inventarii, representationis, divisionis ex Epistola D. Hadriani inter fidejussores, aliaque hujusmodi*; Specialia igitur, ut dixi, certis personis, & Collegiis, sive corporibus dabantur; ut ita de jure communi recederent, de quibus exempla prostrant in *l. 4. Cod. ad S. Tertull.* His præmissis operæ pretium duco facturum, si paullo altius rationes depromam, quibus per has dispensationes jus vetus pessum iret, quod sane difficile vestigatu haud est. Constituto Principatu, id par erat, ut is solutus legibus esset, hoc est jura existente ratione posset legibus derogare. Sed in orienti Mo-

Monarchia periculosa id alicui plenum erat, maxime vero in Romana Republica, ubi juris veteris observantia maximo in obsequio putabatur, & invisa nimium quantum legum ferendarum potestas. Hinc Principes legum veterum molem diruere clanculum more suo cupientes, appositissimam dispensationis rationem excogitarunt; siquidem per hanc, jus vetus minime quamquam tolleretur, legis tamen vinculo modo hic, modo ille solvebatur. Sic quum muto puberi substituere non liceret, a Principe id impetratum, ut tradit Paullus in *l. ex facto de vulgari*. En concessione Imperiali liberam testamenti factionem, cui per leges non licebat, aliquando datam legimus in *l. 35. C. de inoffic. testam.* Princeps saepe minori veniam ætatis dabat, ut cura solutus res suas agere posset. Item quæ coram universo Populo in comitiis fieri solebant, si coram Principe fierent, legitima quidem putabantur, ut in adoptionibus, atque arrogationibus compertum omnibus est, ut quidem quum a Patriciis sexcentæ inventæ essent sollemnitates, ut actus legitimi essent, innumeræque formulæ, quod fulcrum eorum dominationis erat, quibus suum quisque experiretur; Princeps ad omnia hæc uno ictu evertenda induxit, ut quæ coram se fierent, valerent non secus, ac si adhibitis sollemnitatibus omnibus coram Magistratu facta essent. Hinc consuetudo illa, qua si quid coram Principe minus sollemniter fieret, haud aliter, ac si sollemniter in jure coram Prætoris peractum foret, haberetur. Ex quibus omnibus comperta est ratio, qua Principes in recenti Monarchia effecerint, ut jus vetus abrogarent, novumque per subdolas simulationes, arcanorumque involucra inducerent.

#### §. IV. ET ULTIMUS.

##### *De Legibus Juliis Judiciorum.*

**V**idimus hucusque novam consuetudinem fori Romani per Julium, atque Octavianum inventam, patefecimus item technas, quibus ad jus vetus evertendum novumque inducendum, ut legum ferendarum potestatem hac arte obtegerent,

usi sunt. Quoniam vero nullum est forum, quod judiciorum formulas non habeat; hinc prætermittendæ haud sunt leges Julix, quæ certam in foro agendi rationem, atque formam respiciunt. Sane accepimus ex Gellio (a) Julium quasdam judiciorum leges tulisse, quas & Augustum retinuisse suspicari licet, quum eadem amborum imperandi ratio fuerit. Ait igitur is. *Atque in dierum quidem diffisionibus, comperendinationibus, & aliis quibusdam legitimis in rebus ex ipsa lege Julia, & ex Sabini Massurii, & ex quorundam aliorum jurisperitorum commentariis commoniti, & adminiculati sumus.* Primum autem caput legis hujus est, ne minor viginti annorum ad judicandum adlegeretur. Sane quum judicandi facultas prudentiam maximam desideret, qua carere censetur, qui vi maturioris consilii haud pollet, uti sunt minores, merito sancitum ne viginti annis minor Judex legeretur. Neque Princeps hic hujus saluberrimi instituti primus auctor putandus, nam ut docet Sigonius *lib. 2. de judiciis cap. 6.* triginta quinque annos natus esse debebat, qui Judicis munere fungeretur. At enim Tranquillus in *Octav. cap. 32.* tradidit: *Judices a trigesimo ætatis anno allegit, idest quinquennio maturius, quam solebant.* Ex quibus in mendo cubare lex nostra videtur, quæ annos viginti præscribit, sed Binkershoek *observation. juris lib. VI. cap. 17.* docet, quod sedulo advertendum, non legem nostram, bene vero Tranquilli locum mendosum esse.

Fundus ejus opinionis est Callistratus, qui in *l. 41. de receptis, qui arbitrium* scripsit, *quum lege Julia cautum sit, ne minor viginti annis judicare cogatur. Nemini licere minorem viginti annis compromissarium Judicem eligere.* Ex quibus verbis duo velim notes, & legis Julix caput fuisse, ne minor viginti annis judicare cogeretur, & jurisperitos Principis sanctionem statim ad similia protulisse, nempe ad arbitria, ut undequaque novum jus radices ageret. Neque hic omittendus est insignis Ulpiani locus in *l. 57. D. de re judicata*, ubi hæc ait: *Certe si Magistratum minor gerit, dicendum est jurisdictionem ejus non improbari. Et si forte ex consensu judex minor*

da-

(a) *Lib. XIV. cap. 2.*

*datus sit, scientibus his, qui in eam consentiebant rectissime dicitur valere sententiam. Proinde si minor Prætor, si Consul jus dixerit, sententiarum protulerit, valebit. Princeps enim, qui ei Magistratum dedit omnia gerere decrevit. Quod ut intelligatur, advertendum est leges judiciarias, quum in Populi manu, penes quem judicia versabantur, essent, Populum iisdem sollemnibus solvere potuisse, quemadmodum Scipio apud Livium ait (a): Si me omnes Quirites Ædilem facere volunt satis annorum habeo. Sed quum potestas legum, & judiciorum Principi deinde facta esset, ad eum profecto legibus annalibus, quæ munera spectant, & judicia, solvere pertinebat.*

Alterum caput legis nostræ est, quo prohibetur Judex rei, de qua Judex est, arbitrium recipere, in se compromitti jubere, ut in *tit. de receptis, qui arbitr. j.* Sed hoc publicam utilitatem videtur offendere. Nonne boni judicis munus est, aut esse debet, ut lites, controversiasque quanto potest celerius expediat? Quum igitur lites citius per compromissum, & arbitrium, quam per judicium finiantur, quæ causa est, quapropter Judici hic prohibetur, quominus arbiter rei in jus jam deductæ fiat? Contra vero utilitate maxima lex nostra non caret; nam quum nullus judex a munere ferendæ sententiæ se se possit eximere, ratio finit ne arbiter ipse fiat, quum enim per arbitrium sententiam animi sui patefecerit, num credas eundem, si forte res ex arbitrio in jus producat, secus pronunciaturum? Hæc est prohibitionis hujus ratio, & quidem ad rem appositissima.

Tertium demum caput est de prorogata jurisdictione, illius nempe, qui jurisdictionem habet, licet respectu litigatorum sit incompetens, seu non proprius judex. Porro integra verba legis hujus non habemus, hæc tantum supersunt, *quominus inter privatos conveniat*, quæ sic explicat Ulpianus in *l. r. D. de judiciis. Si se subjiciant alicui jurisdictioni, & consentiant inter consentientes, cujusvis judicis, qui Tribunali præest, vel aliam jurisdictionem habet est jurisdictio*. Hæc jurisdictionis species per consensum litigantium *prorogata appellatur*. Sed, ut pulchre

MO-

(a) *Lib. 25. cap. 1.*

monet doctissimus Nood *de jurisdictione*, & *imperio*, minus recte dicitur prorogata, quum prorogatio de tempore ad tempus affirmetur, non vero de persona ad personam, nam potius proferri, propagari, quam prorogari jurisdictionem dicendum esset. Sed quid quid sit, rem potius ipsam expendamus. Privatos homines jurisdictionem dare nemo umquam adfirmavit; quum autem jurisdictionem prorogare idem sit, atque eandem in aliquem conferre, qui quod ad se saltem iudex incompetens sit, cur tantum datum privatis, ut jurisdictionem possent prorogare, quum imperium, & jurisdictio a suprema tantum potestate pendeant, eaque intra præscriptos fines exerceri debeant? Dicam tamen, quod & egregio Nood visum, nempe publicæ utilitatis causa, hoc est odio litium id factum, ut celerius transigerentur, & finitæ minime denuo suscitarentur. Sed quum Octavius id maxime curaret, ut vestigia omnia priscae libertatis, quantum posset, deleteret, qui tandem inductus est, ut privatorum arbitrio jurisdictionem prorogandam daret? Id tantum adfirmaverim, quum Octavius tot, ac tanta circa Magistratus, & judicia immutasset, ut rebus consuleret suis; facillimum factum futurum, ut in tam magna rerum varietate iudex sæpe incompetens inveniretur: ne igitur lites ex litibus exsuscitarentur, sanxisse, ut sive per expressam, sive per tacitam conventionem privatorum voluntate jurisdictio prorogaretur.

Quæ hætenus edisseruimus, ad rerum privatarum judicia spectant, quum deprompta sint a Ulpiano ex edicto, in quo sancita fuerant, quæ ad jus privatum, non autem ad publicam vindictam pertinebant. Videamus modo quam brevissime, quid statutum fuerit in publicis judiciis. Sanxit primo ne quis uno, eodemque tempore de duobus reis quæreret, nisi suam injuriam persequeretur, deinde ut locum, ubi crimen admissum, personam, quæ patrasset, Consules, & mensem designaret, cujus profecto formula extat in *l. quavis de judiciis*. Apud illum Prætores, vel Proconsulem, Lucius professus est se Mæviam lege Julia de adulteriis ream deferre, quod dicat eam, cum Cajo Sejo in Civitate illa, domo illius, mense illo Consulibus illis adulterium comisisse. Et jam tandem volumen hoc absolvimus, quod, humanissime lector, sedu-



dulo perlegendo, pernosces quidem, an fidem obligatam liberaverim. Siquidem leges ex forma ipsa civilis regiminis deprompsimus, quemadmodum instituti mei ratio poscebat; & spero quidem rem assequutum. Rivulos confectatus minime sum, sed omnia a fontibus potius haurire adnissus; nempe ab Auctoribus, quorum ex monumentis Imperii arcana certo certius patere possent. Hanc potissimum Augustalem Jurisprudentiam ex Tullio, Tranquillo, Tacito, maxime vero ex Politicorum facile Principe Dione, nempe Cassio, aliisque comparare studui. Quod si opinio me aliquando fefellerit, & absconum quid, ineptum, aut absurdum in hoc argumentum novum omnino (absit invidia), atque hactenus intactum irrepsit, bona quæso verba. Si vero me voti compotem factum censueris, mecum conjures precor, frustra facultates omnes, potissimum vero jus civile appeti, ni omnia a fontibus suis repetantur. Vale, & laboribus meis forte non poenitendis frui. Iisque tamquam facibus prælucentibus ad meliora utere. Nam ipse fori ambagibus implicatus, negotiisque in dies magis, magisque crescentibus distentus, maxime vero valetudine in ætate quamvis juvenili labente opellam hanc, qualis qualis existimabitur, ad umbilicum perduxisse, haud parum habebō.

F I N I S.











